

iDioswan...
Sapa p'unchay!



Autor: Carl Olof Rosenius

Editor: René Villegas Camacho

Publicado por:

1ra. Edición 2023 Asociación “EL SEMBRADOR”

2da. Edición 2024 Asociación “EL SEMBRADOR”

Dirección: Calle Loa Nro. 621-B SUCRE – BOLIVIA

Web: www.elsembradorweb.com

Contactos:

Gonzalo Ascarrunz Paredes Cel. 73417525

lgap_41@hotmail.com

René Villegas Camacho Cel. 67607735

renewc1958@gmail.com

Juan Pablo Rosado Lambertín Cel. 75793650

juanpablo7rosadolambertin@gmail.com

Primo Serrudo Córdova Cel. 67631073

Impreso en:

Imprenta Prográfica S.R.L.

Sucre - Bolivia

2024

Todos los derechos reservados. **Queda prohibida la venta** y reproducción total o parcial de esta obra, su traducción, adaptación, distribución o transmisión por cualquier medio, ya sea electrónico, mecánico, fotocopia u otros.

Presentación

Querido lector:

Después de un arduo trabajo y no sin dificultades, te presentamos este devocionario en idioma quechua, del reconocido escritor cristiano Carl Olof Rosenius. Nacido en Suecia, Rosenius escribió varios artículos y devocionarios en los boletines que el mismo distribuía; posteriormente a su fallecimiento, estos artículos fueron hechos libros, y algunos de ellos fueron traducidos al español, de los cuales la “Asociación El Sembrador” está actualmente distribuyendo en Bolivia y en Perú. Por ejemplo, “Una guía clara y fiel a la paz con Dios”, y el devocionario “Cada día con Dios”.


Pero ahora, un equipo de creyentes de habla quechua a la cabeza del Pastor René Villegas ha traducido del español a nuestro idioma originario estos escritos de Rosenius, con la idea de llegar con la luz maravillosa del evangelio a nuestros hermanos y a los que todavía no lo son que habitan en las áreas rurales de nuestro país.

Este devocionario posee 365 devocionales, un devocional para cada día del año; y aunque no posee un texto muy extenso para cada día sin embargo lo escrito es profundo y claro, lo suficiente para llenarnos de fuerza y recibir diariamente el dulce evangelio de nuestro Señor Jesucristo.

No nos cansamos de agradecer a la Misión Luterana Laica de Noruega (Lekmannmisjonen), y especialmente a los misioneros Ingar y Marit Gangas por su apoyo espiritual, ánimo para encarar este trabajo y su apoyo financiero para la impresión.

¡Jesús es el Señor!

Sucre, Julio 2024



Luis Gonzalo Ascarrunz P.

Presidente “Asociación El Sembrador”



Enero

*"Noqa qankunaj chawpiykichejpi purisajpuni;
Diosniykichej kasaj, qankunataj noqaj aylluy
kankichej." (Levítico 26:12).*

Enero 1

“Jesucristoqa kikillampuni qayna, kunan, wiñaypajpis.” (Hebreos 13:8)

Hebreosman qhelqasqa cartaj tukukuynin t’aqapi, apóstolqa nin: Cristoqa kawsashan, chayraykutaj “Jesucristoqa kikillampuni qayna, kunan, wiñaypajpis,” nispá. Chayqa maytapuni pillatapis sonqochan, imaymana mana allin imas rikhurimojtimpis. Chayraykutaj, tukuy imapis Jesucristopeqa allimpuni kanqa.

Cristopi creejkunapaj chay nisqakunamanta astawan sonqochajqa imapunitaj kanmanrí, Cristo tukuy imapi kashajtin? Imapunitaj kanman aswan jatumpaj qhawana uj mosoj watapi, Jesucristo kikillampuni qayna kunan wiñaypajpis kashajtin?

Qanqa Cristota rejsinkiña, chayraykutaj yachankiña Diospa munakuynin, khuyakuynin, qhasilla k’acha yanapaynin ima kasqantaqa; may jatun kasqanraykutaj Jesucristoqa tukuy ima nisqasnintaqa junt’ampuni; Payqa, may jina jatun atiyniyoj kasqanraykutaj chaykunataqa ruwan. Chayrayku ama qonqaychejchu Payqa qayna, kunampis kikillampuni. Qayna imaynachus karqa, kunampis kikillampuni kashan, kay mosoj watapipis Paywan khuska kawsakusunchej.

Tukuy imas imaymanamanta ujjinaman tukujtimpis, Diosqa kikillampuni kashan. Mana waj jinaman tukunmanchu ni jayk’aj. Payqa tukuy imasmanta patapi kikillampuni kashan.

Tukuy imas waj jinaña kashan chaypis, chayqa kay pachallapi, noqallanchejpi, kawsaynillanchejpi waj jina kashan. Ajina kashajtimpis Cristoqa kikillampuni.

Qayna wata pasajpi juchasninchejmanta Diosqa perdonawarqanchej, mana perdonanapaj jina kashajtinchejpis; kay watapipis kikillantataj sapa p’unchay perdonawasunchej. Chay tukuy imata yachashaspaqa ayqhena kachun juchamantaqa.

Ñawpajpi sonqochawarqanchej mana sonqochanapaj jina kashajtinchejpis, jinallataj kunampis sonqochashallawanchejpuni, chayrayku ama Señorninchejta wasanchanachu ni jayk’aj.

Señor, qanqa munanki chimpamusunaykuta, chayrayku noqaqa Qanman jamuni. Perdonaway juchasniymanta. Ama saqewaychu juchaman urmajta; jinallataj, ama saqeychu Qanman mañakoj chimpamushajtiy sonqoy jark’anawanta. Jesucristoj supimpi. Amén.

“Sapa p’unchay yupaychasqayki, wiñaypa wiñaynimpaj sutiykita yupaychasaj.” (Salmo 145:2)

Espiritual kawsayninchejpi rijch’arina kachun, tukuy sonqo Señorta yupaychaspá. Kaykunapi sumajmanta t’ukurina kachun, astawampis yuyayninchejman churana, Payqa may munakuyniyoj yanapakuyniyoj kasqampi.

Yuyarikuna tiyan, Dios Tatanchejqá munakuyninta rikuchiwanchej tukuy ruwasqannejta. Jinallataj yuyarikuna Dios Chureqa, cuentanchejmanta Diospa kamachisqanta junt’asqanta, juchasninchejraykutaj wañuyman jaywakusqanta ima. Yuyarikullasuntaj Espíritu Santoqa, Qhasilla K’acha Yanapayninwan, sonqochayninwan ima junt’ashasqanta kawsayninchejpeqa.

Qanmanqa rijch’asunkichu chay khuyakuynenqa mana chaykamachu kasqan? Ajina kashan chayqa, mañakuy Diosmanta khuyakuyninta qampaj. Imaraykuchus pisipaj qhawajkuna kasunman chayqa urmasunman llakiykunaman.

Chay tukuyman Diosman gracias ninapuni, agradecekuyta mana yachasqanchejqá ingratos kasqanchej chinkayman apayta atiwasunman. Chayrayku gracias nispapuni Diosmanta mañakuy, sonqo tiyaykuyta qosunampaj, ajinamanta munakuynintawan junt’achisunampaj. Ajinata ruwaspaqa sinch’i kallpayoj kanki, sonqo junt’asqa agradecikuyta yachajtaj.

Yupay mana atina bendecionesninmanta Señortaqá yupaychay. Ripoj watasta qhawarinki chayqa, rikunki Señorqa qanta wajkunatapis maytapuni khuyasqanta. iMashkha kuti rikuchisunki munakuyninta, qanwampuni kashasqanta, waqaychasusqantataj. Wakin ch’isisqa ichapis ni puñuytapis aterqankichu, imapi pantasqaykitapis mana allinchayta atispa. Diosman qhaparikuspa mañakusqaykitataj usqhayllata uyarispa yanapasunki.

Yuyariy mashkha kutitachus Diosqa yanapasusqanta. Ajina munakuyniyoj kasqanmanta graciasta qoypuni, agradecisqa kayta yachaqakuy.

Dios Tatayku, qanqa may jina Santo kanki, noqataj juchasapa. Mana yanapayniykiwanqa mana atiymanchu kawsayta, gracias Señor yanapawasqaykimanta. Jesucristoj sutimpi. Amén.

Enero 3

“Noqa, tukuy imata mosojyachini.” (Apocalipsis 21:5)

Runataqa, Dios mosojyachin Evangelionnejta. Chayqa kashan chay watejmanta nacey, mosoj ruwasqataj kaypi; chaytaj ruwakun Espíritu Santoj atiyininwan. Chaykunaqa umanchejpi kanan tiyan, noqanchejmanta mana chinkanampaj.

Diosqa mana ñawisnillanchejtachu, nitaj ninrisnillanchejtachu kicharin, manachayqa qowanchej mosoj yuyayta, mosoj kawsayta ima. Ñawpajpeqa Diospa Simi Nisqantapis, imapis kachun nispa ñawirej kanchej, ajinallataj uyarejpis kanchej; watejmanta nacespañarí Diospa Simi Nisqanwanqa k’askanasqa rikhurinchej. Ajina kashajtimpis Bibliapi Diospa nisqasninga mancharichiwanchej, wakin kutitaj sonqochawanchej.

Dioswan kawsayninchejqqa uj jinaman tukun. Ñawpa kawsayninchejqpeqa waj jina yuyayniyojpis kasunman jina karqanchej, kunanrí Diospa Simi Nisqanman jinaña yuyayninchejqqa, jinallataj kawsayninchejpis.

Ñawpa kawsayninchejqpeqa, noqallanchejmanta may kasqanchejta yuyakoj kanchej, noqallanchej kallpakoj kasqanchejta yuyakuj kanchej, noqanchej kallpallanchejwan sonqochayta atiyta ima mask’aspa purej kanchej, manataj Evangelioman jinachu imatapis ruwaj kanchej. Kunanqa reparanchej evangeliollapi chaykunaqa kasqanta.

Kunanqa, mana yuyaynillanchejchu waj jinaman tukun, manachayqa sonqonchejpis waj jinaña; astawapis kusikunchej, misk’ichikunchejtaj ñawpajpi mana munana jina karqa chaykunawan, Diospi kawsayninchej mosoj kasqanrayku. Astawampis, chay ñawpa mana allin imas kusichiwarcanchej, kunantaj sonoqonchejta nanachin.

Pasaj watas, pasaj killasqa imatachus yuyaj kanchej, imatachus ruwaj kanchej kay mundo kawsayta may sumajta jina qhawaj kanchej, may yuyana karqa; kunanqa Cristopiña kaspaqa mayta munanchej Dioswan parlarikuyta, imatapis Paymanta mañakuytaqa. Ari, mosoj runaña kanchej.

Dios Tatayku, kunanqa yachani munasqa k’ata Churiyki Jesús noqarayku wañusqanta. Kunanqa tukuy sonqo graciasta qoyki, Jesucristoj sutimpi. Amén.

“Leyqa Cristopi junt’akun, Paypi tukuy creejkuna Diospa ñawisnimpi cheqan runapaj qhawasqa kanankupaj.” (Romanos 10:4)

Ujta nisqayki: ¿Diosman kutimpuyta munaspa aswan sumajta kawsakuyta yuyaspa, kallpakuytachu mananki? Diospa kamachisqanta junt’ayta munaspa, kallpallaykiwanchu Paypa Qhasilla K’acha Yanapayninta ganakuyta munashanki? Chayta yuyaspaqa pantashanki. Chayta ruwaspaqa ni jayk’aj cheqan runaqa kayta atinkichu, kallpallaykiwan Diospa qhawaynimpeqa chinkasqallapuni kanki. Qanqa yachanayki tiyan, ni mashkhata kallpakuspapis Diospa kamachisqasnintaqa junt’ayta atisqaykita. Jinallataj yachanayki tiyan, chaykunata ruwaspa Diosmanqa mana chayayta atisqaykita.

Umaykipi sut’i kachun: “Leyqa Cristopi junt’akun, Paypi tukuy creejkuna Diospa ñawisnimpi cheqan runapaj qhawasqa kanku.” Wiñaypaj Diospa Churin Jesús kashan Salvajninchey. Salvanawanchejpaj cuentanchejmanta tukuy ima Diospa kamachisqasninta junt’arqa. Jesucristoqa, cruzpi wañushaspa tukuy imamanta astawan Dios Tatata munakorqa, jinallataj noqanchejtapis kunankama munakuwanchej. Chaymanta parlashan: “Cristo preciowan kacharichiwarqanchej leypa maldicionninmanta” nispaqa.

Jesucristoqa, chay imakunata ruwarqa ñak’arirqataj noqanchejrayku “tukuy Paypi creejkuna, cheqan runapaj qhawasqa kanankupaj.” Ama qonqaychu chayta.

Qallarirqanki Jesuspi creeyta, chaywampis juchasapallapuni kasqaykita reparakunki, imaraykuchus Diospa Simi Nisqampi qhelqasqa kashan, chaytaj yuyachisunki Diospa kamachisqasnintaqa junt’anapuni kasqanta. Chayta noqallanchejmanta junt’ayta munanchej chayqa, mana atisunchu ni jayk’aj. “Leyqa Cristopi junt’akun, Paypi tukuy creejkuna, Diospa ñawisnimpi cheqan runapaj qhawasqa kanankupaj.” Sonqoykipi chay kanqa chayqa, sonqoyki tiyaykonqa.

Munakoj Dios, pisi kallpa kani, q’elliskiritaj. Umaymanta chakisniy puntakama juchaj atipasqan kani. Qanlla salvadorniy kanki, Qanta jatunchayki, yupaychaykitaj wiñaypaj. Jesucristoj sutimpi. Amén.

Enero 5

“Cristojta kajkunaqa aychankoj munayninta chakatanku, chay millayta ruwayta yachasqa kaynintawan khuskata.” (Gálatas 5:24).

Pikunachus salvasqa kanankupaj Diospa kamachisqanta kallpallankuwan junt'aytapuni munajkunapajqa mancharinapaj jina kashan; ajinata ruwaspa paykunaqa mana sonqo junt'asqachu kanku.

Ama qonqanachu “mawk'a runanchejta” wañuchiya, “mosoj runanchej” astawan rikhurimunampaj. Ari, ñawpajta Leypajraj wañuna tiyan. Aswan sut'ita nisun: Umanchejmanta chinkachina, Diospa kamachisqanta noqallanchejmanta junt'aspa cheqan runaman tukuyta atisqanchejta. Criatollapi salvasqa kasqanchejpi kusikuna. Imaraykuchus Jesucristollapi cheqan runapaj qhawasqa canchej Diospa qhawaynimpeqa. Chantapis, Paynejllata juchamanta t'aqasqa canchej. Ari, ajina kajtenqa, apóstol Pablowan khuska nisun: “Leynejta leypaj wañusqa kani, Diosllapajña kawsanaypaj,” nispa. (Gálatas 2:19)

Reparashankichu, ñawpajtaqa maytapuni kallpakusqani Leypa nisqanta junt'ayta munaspa, cheqan runa kayta munaspa. Kunanqa Cristollapi tarini cheqan runa kaytaqa, imaraykuchus Cristopi kashan cheqan runa kayneyqa, chantapis Paypaj t'aqasqa kani. Yanqhallata kallpakusqani Leypa nisqanta junt'ayta munaspa, salvasqa kanaypajqa.

Cristo salvawajniy kasqampi creesqayraykulla salvasqa kani, manaña imatapis ruwanaychu kashan salvasqa kanaypajqa, imaraykuchu Jesucristo junt'anña tukuy Leypa nisqanta, noqaj cuentaymanta.

Kunanqa, Cristowan khuska wañusqa kani; kunan kawsashani chaypis, mana noqañachu kawsashani, manachayqa Cristo kawsashan noqapi. Imaraykuchus Pay wañorqa noqarayku, noqa sapa p'unchay kawsanaypaj.

Señor Jesús, jina juchasapata Qanqa munakuwanki, khuyakuwankitaj. Noqataj sajraman qosqa kasqayrayku manaña noqapichu atienikusaj; tukuy sonqo qhaparikamuyki yanapayniykita mañakususpa. Amén

“Chumpisniykichej mat’isqa kachunku, k’anchanasniykichejpis jap’ichisqa.” (Lucas 12:35)

“Qankunaqa rijch’akuychej casaraku raymiman patronninku chayamunanta suyajkunaman, chayamuspa paykunata wajyajtinkama punkuta kicharejkunaman,” nispa nerqa Señorninchej Jesucristoqa. Ari, Jesusqa munan sumaj wakichisqa Paypa kutimunanta suyananchejta. Apostol Pablopis, nin: “Ama kay pacha runaspa yuyasqankuman jina kawsayman yachakuychejchu; astawampis sonqoykichejpi, yuyayniykichejpi ima mosojyachisqa kaychej.” nispa. (Romanos 12:2).

“Tumpamantawan manaña rikuwankichejchu, uj tumpamantawantaj watijmanta rikullawankichejtaj,” nispa nerqa Señorninchej Jesucristoqa. (Juan 16:16).

Wakichisqa kanapajqa, iskay imas noqanchejpi kanan tiyan: Ñawpajpiqa casaraku raymiman yaykuna p’achawan p’achallikuspa. Chayqa niyta munan creesqanchejrayku Cristo qowanchej chay yuraj p’achataqa. Qhepampitaj: Juchallisqanchejmanta sonqonchejta nanachikuspa Diosman sapa p’unchay kutirikuspa, payllapi perdonasqa kananchijpaj. Chay kashan tukuy imamanta aswan jatun Payta suyanapajqa. Imaraykuchus: “Kunanqa mana ima juchachaypis kanchu Cristo Jesuspi kajkunapajqa,” nispa nin. (Romanos 8:1).

Chayrayku, allimpuni kashan juchamanta karunchakunaqa, mana kay pacha kawsayllata astawan munapayaspa, chaykunaqa kashan: chejninakuy, phiñakuy, runa masinchejta pisipajqhaway ima. Kaykunaqa Diosmanta karunchawanchej. Kawsakuna kachun Diospa wawan jina, kusiyan Payta sirvispa.

Munakoj Dios, juchasniykuta perdonawayku Jesucristo Señorniykunejta. Chay qhapaj yawar jich’asqanwan juchasniykuta pampachapawayku. Jesucristoj sutimpi. Amén

Enero 7

“Tukuy profetaspis Jesusmanta willarqanku, Paypi tukuy creejkunaj juchasninku sutinnejtapa pampachasqa kanankupaj.” (Hechos 10:43)

Dios perdonawasqanchejta imaynapitaj yachasanman? Diospa Simi Nisqampi yachanchej, chay nisqaspitaj creenanchej tiyan: “Juchasninykeqa may jina pukapis kachunku, rit’i jina yuraj kanqanku, may jina kullipis kachunku, yuraj millma jina kanqanku,” nispa nin. (Isaías 1:18).

Noqanchejpaj perdonta Cristo tarisqanqa, mana jark’asqa kayta atinchu ni pisiyayllatapis atinmanchu. Juchasninchejqqa mana imachu kashan Salvawajninchejpajqa, cheqan kaynenqa may jatun; chayrayku, Payqa atiyiniyoj noqanchejmanta parlarinampaj, abogadonchej jinapuni kashan.

Kay pachapi, wakin kuteqa jucha atipashawasunmampis jina tarikunchej, ajinamanta noqanchejqqa manarajpis Diospa wawan jina kasqanchejta yuyakunchej. Ajinapi Cristoman chimpakujtinchejqqa, cheqan kaynin noqanchejpi rikukun, ni pi nitaj ni imapis chaytaqa atipanmanchu. Mashkha karuchus kay pachamanta janaj pachaman kashan, ajina jatumpuni Diospa khuyakuyninqa kashan, pikunachus Diosta manchachikunku, chaykunapajqa tiyan salvación.

Chaypi yuyaspa tapukuy: Imataj astawan jatun: Juchanchejchu, Cristoj cheqan kayninchu? Nispa. Apóstol Pablo nin: “Uj runaj (Adampa) juchanraykulla wañuy atiyiniyoj karqa. Jesucristoj ruwasqanrí aswan atiyiniyoj. Tukuy pischus Diospa qhasilla k’acha yanapayninta, cheqan kaynintawan jap’ejkunaqa mosoj kawsaypi atiywan kawsanqanku uj runarayku, chaytaj Jesucristo,” nispa. (Romanos 5:17).

Sichus noqaj ruwasqallayta aswan jatumpaj qhawayman salvasqa kanaypaj chayqa, Diospa Qhasilla K’acha Yanapaynenqa pisipaj qhawasqa kanman. Ajina kajtenqa, Jesucristo noqarayku wañusqanqa manachá imapajpis valenmanchu. Chaywampis Apostol Pablo niwanchej: “Kunanqa mana ima juchachaypis kanchu Cristo Jesuspi kajkunapaj,” nispa. (Romanos 8:1).

Dios Tatáyku, qan kachamorqanki uj k’ata Churiykita noqaykuta salvanawaykupaj. Chayrayku ima mañakusqaytapis Qanqa uyarinkipuni. Jesucristoj sutimpi. Amén.

“Diosqa Espiritunta qosorqachej, qankuna ukhupitaj t’ukuna imasta ruwallantaj. Chay imastaqa Dios ruwan leyta kasusqaykichejraykuchu, chayrí uyarispa creesqaykichejraykuchu?” (Gálatas 3:5).

Ashkhas parlanku juchamanta t’aqakuna kasqanta, jinallataj Espíritu Santomantapis ashkhata parlanku, nitaj yachankuchu imaynachus kasqantaqa. Apóstol Pablo nin: “Espírituman jina kawsaj runapirí kay imas poqoy jina rikukun: Munakuyniyoj kay, kusikuyniyoj kay, sonqo tiyaykusqa kay, pacienciayoj kay, khuyakuyniyoj kay, k’acha kay, nisqanta junt’aj kay, llamp’u sonqo kay, sajra munayninwan mana atipachikoj kay ima. Chaykunaj contrampeqa mana ima leypis kanchu. Cristojta kajkunaqa aychankoj munayninta chakatanku, chay millayta ruwayta yachasqa kaynintawan khuskata,” nispa. (Gálatas 5:22-23).

Chay munakuytaqa Dioslla atin churayta sonqonchejmanqa, chaytataj ruwan juchasninchejta pampachaspa. Chayta yachacherqa Señorninchej Jesucristo: Uj qolqe manoj runaman iskay runas manu kasqanku. Ujnin kajqa phisqa pachaj denario manu kasqa, ujnintaj phishqa chunka. Mana imaynamanta kutichipuyta atejtinku, iskayninkuta khuyaspa, manaña mañakapusqachu. Chantá Jesusqa Simonta tapusqa: ¿Chay iskayninkumanta mayqentaj munakorqa astawan chay khuyaj runatari? Nispa. (Lucas 7:41-43) Kayta nerqa Jesuqa, imaraykuchus: “... ujjuchasapa warmi Jesusman chimpaykuspa chakisninta waqayninwan mayllarqa, chujchasninwantaj ch’akicherqa.” (Lucas 7:38, 44-48)

Simonqa fariseo allin rejsisqa wiraqocha karqa, payqa allin imasta ruwasqa tukuy runaspa ñawpaqempeqa. Chay warmipirí ni ima allin karqachu runaspa ñawpaqempeqa, jinapis Jesucristoman chimpakusqanrayku Diospa Espiritun paypi kasharqa.

Pitachus ashkha juchasninta perdonan chayqa, ashkhallatataj munakun. Arí, ajina kashan Diospa munakuynenqa, runaj sonqonman churan jatun munakuyninta.

Dios Tatayku, noqayku runa jinaqa, mana yachaykuchu ajinata perdonayta. Perdonawayku, yapawaykutaj munakuyniykiwan, noqaykupis munakuyniyoj kanaykupaj. Jesucristoj sutimpi. Amén.

Enero 9

“Kamachis, kay pachapi patronesniykichejta kasuychej, manchachikuywan, jatumpaj qhawaspa ch’uwa sonqowan Cristota jina.”
(Efesios 6:5)

Cristiano kanki chayqa, k’acha imakunatapuni astawan ruwayta munanki, chaywampis ichus mana atinkichu chay imasta munasqaykiman jina junt’aytaqa. Chaywampis noqa nisqayki, imatachus trabajoykipi ruwashanki chaypi, patronniykej nisqanta junt’ay: pacienciawan, llap’u sonqowan, kasukuywan ima; ajinatachus ruwashanki chayqa, Señortapis servishawaj jina kashan.

Uj pastorpa ruwaynin, uj misioneroj ruwaynin, uj kuraj kamachej ruwaynin imaqa, aswan jatun ruwanapis kanman jina qhawanchej, uj jornaleroj ruwasqanmanta nisqaqa. Chaywampis, Diospajqa aswan jatumpaj qhawasqa pichus tukuy sonqo ruwananta junt’an chayqa.

Wakinqa yuyanku, aswan k’acha ruway kasqanta kay pacha imasmanta karunchakuspa, nispa; wakintaj yuyanku ashkha p’unchaykunata ayunusta ruway aswan sumaj kasqanta. Wasillapi ima ruwanarí, wayk’una, p’achasta t’ajsana imaqa, mana chhika valorniyojchu kasqanta yuyanku. Ima ruwaymampis runataqa Dios churan, chay ruwananwan sumajta ruwasqanwan Diosta sirvinampaj.

Uj kuti, Martin Lutero runakunaman willasqa, kay pacha imasmanta karunchakuspa karupi uj runa sapallan tiyako runamanta. Unayninman chay runaqa yachayta munasqa maykama santomanchus tukusqanta. Diostaj mosqoypi chay runaman rikuchisqa, wasipi empleada warme j ruwayninmanta. Chay warmita taripamuspataj tapusqa, imata ruwaspachus chay jina uyarisqa kasqanta. Chay warmirí nisqa patronan imatachus kamachisqanta tukuy sonqo junt’aspa. Llasa llant’ata apaspapis, yuyaynimpí kasharqa, imaynatachus Jesucristo Calvario orqokaman llasa Cruzta q’episqampi yuyaspa.

Dios Tatayku, mañakuyki Espíritu Santoyki qampi creesqaypi sinch’ita sayachinawanta. Llank’anaypi sapa p’unchay junt’anaypaj tukuy sonqo, Qampa munayniykiman jina. Jesucristoj sutimpi. Amén

“...Tukuy munakojqa Diospa wawanmin, Diostataj rejsin.” (1 Juan 4:7)

Chhullunkata mana pipis atinmanchu q'oñichiya. Ajinallataj mana pipis atinmanchu Diosta, chanta runamasinta munakuyta, manaraj Diosman kutirikuspa watejmanta nacekushaspaqa. Jesuspi mana creej runa payllamanta yuyasqanqa Diospa contrampi, imaraykuchus mana Diospa kamachisqanman jinachu imatapis ruwan, nipunitaj atinpunichu.

Manaraj watejmanta nacej runaj yuyaynenqa mana Diosmantachu, mana jap'inrajchu chay mosoj songota. Chay runaqa mana atinchu cheqamanta munakuyta, imaraykuchus mich'a kasqanraykuqa imatapis payllapi yuyaspapuni ruwan. Ari, ajinapuni runaj songonqa, tukuy pata mana wakillampatachu.

Imaynatataj pipis atinman mosoj songoyoj kayta, cheqamanta Diosta, runa masintapis munakuyta? Qanqa yachanayki tiyan, ni imarayku atinkichu cheqamanta Diosta munakuytaqa, nillataj runa masiykita munakuytapis, manaraj Diosmanta chay munakuyta jap'ishaspaqa. Imaraykuchus songonchej chhullunka jina chiri kashan, Diospa munakuynin manaraj songoykiman k'ajaykusqanrayku.

Diosmanta chay munakuyta jap'isparaj, recien qallarinki munakuytaqa. Apóstol Juan nin: “Chay munakoyqa kay jinapi rikukun: Mana noqanchej Diosta munakusqanchejpichu, manachayqa Dios munakuwasqanchejpi, Churinta kachamusqampitaj juchasninchejmanta Diospa phiñakuyninta wañuyninwan thasnunampaj,” nispa. (1 Juan 4:10). Jesuspis nillaraqataj: “Mana qankunachu ajllawarqankichej, astawanqa noqa ajllarqaykichej,” nispa. (Juan 15:16).

Ajinata ari parlashayki Diospa munakuyninmanta. Chay munakuynin llimphuta ruwawanchej, cheqan runapaj, Paypajtaj t'aqawanchej kay pacha kawsayninchejpi, wawasninta jinataj jap'ikapuwanchej wiñaypaj.

Dios Tatayku, kay pachapi kashayku supaypa qhatiykachasqan, juchaman urmanapaj jina. Churiyki Jesús jamorqa supaypa ruwasqashinta phirispá k'anchaymantaj orqhowarqayku. Kallpachawayku qampi creesqayku sinch'i kanampaj. Jesucristoj sutimpi. Amén.

Enero 11

“Kay pachata ruwasqampi sink’urispa kusikorqani, runasraykutaj sonqoy t’ikarerqa” (Proverbios 8:31)

Diostaqa uj manchachikuna Juezta jina qhawanchej, mana khuyayniyojpis kanman jina qhawanchej, ajinata yuyaspaqa pantasqa kanchej. Ajina yuyayqa kay pachapi rikhurin, imaraykuchus Edén huertapi supayqa katariman tukuspa Adanpa yuyayninta, Evaj yuyaynintawan laqhayaykuchispa juchaman urmacherqa. Chaymantapacha ajina yuyay runapeqa rikhurin. Chayrayku noqanchejqqa paykunamanta mirajkuna kasqanchejrayku Diostaqa manaña k’acha Dios munakujta jinachu qhawanchej.

Chaywampis Diosqa mana qonqarpariwanchejchu, yanapawanchej Payqa noqanchejwan mayta kusikoj Dios; chayraku tukuy runakuna Payman rijtinkoqa kusikun, wawasnin kasqanrayku. Chayraykutaj nin: “Diosqa ayllumpi kusikuyta tarin; llamp’u sonqoyojkunata salvaciónninwan k’achanchan,” nispa nin. (Salmos 149:4).

Jesucristoqa kay pachapi kashaspa uj kutipi yarqhachikorqa, chayraykutaj yachachisqasninta kacharqa t’antata rantimojta. Paytaj uj puju qayllapi qhepakorqa. Jinallaman uj juchasapa warmi chayman chayamorqa. Jesús paywan parlaspa sonqonta rijch’aricherqa: “yakuta jaywariway”, nispa. Chay warmirí repararqa pichus pay kasqanta. Chantá Jesus chay warmiman cheqata parlaykusqanrayku yacharqa Dios Salvador kasqanta, ajinamanta kuisisqa llajtaman rerqa, waj runastawan pusarimoj. Yachachisqasnin t’antata rantimusqankutapis mana mikhorqañachu, Payqa nerqa: “Mikhunayqa Kachamuwajniypa munayninta junt’anay, ruwanantataj tukuychanay,” nispa. (Juan 4:34). Arí, Jesuspaj mikhunanqa noqanchejta yanapay, kusiynimpis runaj wawasnimpa chawpimpi tiyakuy kashan.

Chayqa t’ukuna, Diosqa runata ruwawasqanchej payman rijch’akojta, Paypaj kananchejta munaspa. Ichapis qanqa nishanki: Chayqa unay ajina karqa, kunanqa manaña piwampis rikunanta uyapuranchu, nitaj piwampis parlanñachu Adanman jinaqa, nispa. Ajinata yuyashajtiykipis Diosqa munan noqanchejtapis yanapayta. Qanqa ichapis chayta mana creej jinachu kanki, chaywampis chayqa cheqapuni, ajinapuni kashan.

Munasqa Jesucristo, qanqa supayta atiparqanki, noqapis munani kallpaykiwan atipayta; amapuni saqewaychu sapallay kallpaywan maqanakujtaqa. Jesucristoj sutimpi. Amén.

“Chay jinamanta yachanchej cheqa kajmanta kasqanchejta.” (1 Juan 3:19)

Jesuppi creesqanta pipis iskayrayashanman juchasnin perdonasqachus manachus nispa, chay runaqa mana watejmanta nacenrajchu, chaytajchus chay creesqanmanta urmasqa kashanman. Ajinallapipuni kawsakuyta munaspataj puraj uya jinalla kawsashanman. Imaynatataj uj qosayoj warmi kuisqa kanman qosampa munakuyninmanta iskarayaspa? Ajinallataj noqanchejwampis.

Noqanchejqa mana ni jay’aj iskayrayasunchu salvasqa kasqanchejmantaqa, Diospa qhawaynimpi cheqan runapajña qhawasqa kanchej Jesucristopi kasqanchejraykulla, mana noqallanchejmanta imata ruwasqanchejraykuchu, manachayqa Jesucristoj ruwasqanraykulla.

Waranka sojta pachajniyoj watapi, Martín Lutero maytapuni kallpakorqa chayta sut’iman orqhoyta munaspa, imaraykuchus kawsaynimpi mana sonqo tiyaykuy kasqanrayku, kay jinata nerqa: “Religioso runakunaqa kanku pikunachus kallpakunku, imatapis paykunallamanta ruwayta munaspa, ajinata ruwaspataj tariyta yuyanku juchasninku perdonasqa kananta. Paykunataj uyarinku Cristopi cheqa creejkuna Diosta tukuy sonqo jatunchajta, kusikuywantaj Diosta servejta; Qhasilla K’acha yanapayninwantaj perdonasqa kasqankuta. Ajinata rikushaspapis chay religiosokunaqa qhesachanku jatunchakuyman urmasqankurayku.”

Chay jina runakunaqa mana rikunkuchu Diospa Simi Nisqan kay jinata nisqanta: “yachanchej wañuyamanta kawsayman chimpapusqanchejta.” (1 Juan 3:14) “Yachanchej cheqa kajta rejsisqanchejta.” (Juan 8:32). “Yachanchej Diosmanta kasqanchejta.” (1 Juan 5:19). “Yachallanchejtaj Diospa Churin jamuspa wiñay kawsayta qowasqanchejta, ima.” nispa. (1 Juan 5:20).

Jatun atiyniyoj Dios Tatayku, yachani qan salvawasqaykuta Churiyki Jesusnejta. Ajina kajtinga kallpata qowayku astawan Paypi atienikuyta, . Jesucristoj sutimpi. Amén.

Enero 13

“... Cheqatapuni niykichej: Tukuy imata sutiypi mañakojtiykichejqa Dios Tata qosonqachej.” (Juan 16:23)

Diosmanta mañakushajtiyki, supayqa ashkha kutis umaykiman mana allin yuyayta churan Diosmanta mana mañakunaykipaj jinachu kasqaykita. Ñawpajtaqa aswan cheqan runamanraj tukuy, nispa. Diospa cheqa wawankunarí, mana chaypaj jina kashaspapis astawan Diosmanta mañakunku.

Ajina juchasapa kasqaykita reparakuspaqa, astawan chimpakuy munakoj Señorninchejman, Payqa chinkasgasta mask'aj jamorqa. Ichus Diosmanta ithirikushawaj chayqa, mana reparayllata sajra supayqa munayninta ruwasunkiman. Mashkhapis, may jina jatumpis juchayki kachun, Cristoqa perdonaspa salvacionta qosunqa. May jina jatumpis juchayki kachun Jesucristoj yawarnenqa llimphituta mayllasonqa. May jina chinkasqa kashawaj chaypis, Jesusqa tarisuytawan Janaj pachaman pusasonqa.

Chayraku, usqhayllata Jesucristoman qayllaykuy. Mana chayta ruwanaykipaj jina kasqayki yuyayniykiman jamusunki chaypis, Cristopi atienikuypuni. Payqa munashan perdonasuyta, amataj yuyaychu imataraj ruwanayki kasqanta perdonanasumpajqa.

Martín Lutero nerqa, kay jinata: “Manaraj k'acha runaman tukushaspa mana munashankichu Diosmanta imatapis mañakuyta chayqa, ni jayk'aj Diosmanqa qayllaykuyta atinkichu. Diosmanqa chimpaykullay, perdonasonqapachataj.” Nispa.

Juchaman urmasparí, imatataj ruwanayki kanman? Diosman usqayllata chimpakuy, mañakuytaj tukuy sonqo perdonasunanta: “Diosnítay Tatáy juchasniyta perdonaway ari,” nispa. Payqa perdonasonqopacha.

Dios Tatayku, kunanqa yuyani munasqa wawayki kasqayta, mana imata ruwaspa qosusqayraykuchu. Qanman jamuyki Churiykiwej ruwasqanraykulla, Jesucristoj sutimpi. Amén.

“... Umaykichejpi chujchasniykichejpis tukuyninku yupasqa kashanku.”
(Mateo 10:30)

Qampaj llakiykuna anchañachu kashan? Ichus ajina kajtenqa, mana creenaykipaj jinachu kashanki? Qhawariy muyuyniypiki ima k'acha imaschus kashanku chaykunata. Ciegochu kawaj chay imasqa qhasillamanta rikhurisqa kasqanta? Chay jina rumi sonqochu kawaj, mana reparaspa, sapa sach'a qanrayku ruwasqa kasqanta? Diosqa allintapuni runakunapaj ruwapun. Arí, Diospajqa runapuni aswan yuyasqa munasqataj kashan.

Ichus ñak'ayllata creeshanki chay tukuy imas ajina kasqanta chaypis, chayri itajchus chay tukuy ima llulla kasqanta yuyashanki chaypis, unanchay Jesuspa nisqampi. Payqa nin: “¿Umaykichejpi chujchasniykichejpis tukuynin yupasqa kanku. Chayrayku ama manchachikuychejchu. Qankunaqa p'esqitusmanta nisqaqa aswan valorniyoj kankichej,” nispa, (Mateo 10:30-31). Ichari? Chayqa t'ukuna. Kikillantaj nerqa. “Runatajri chay tukuy imasmanta aswan yuyasqaraj Diospajqa,” nispa. (Mateo 6:26).

Diospa Simi Nisqampi allinta unanchanki chayqa, reparanki Diospa munakuyninga manchay jatun noqanchejpajqa. Reparallankitaj, imatachus Dios runaman qosqayki nisqasnintaqa junt'asqantaqa.

Qanqa ichapis chinkacherqanki kay pachapi tukuy kapususqanta; ichus aylluykipis mayta ñak'arerqanku; chaytajchus aylluykimanta mayqen munakusqayki wañuporqa. Qanqa chay imaspi yuyaspa, kawsaytapis manaña munarqankichu uyariyta. Chayri, may chhika unaytaña imata munasqaykitapis kunankama mana tariyta aterqankichu. Ajinapi rikukunki chayqa, yachay, Dios mana qonqasunkichu, Pay suyashasunki Payman k'umuykunaykita yanapasunampaj.

Diosqa ichus qanwan uyarichikuyta munashan, almayki salvasqa kanampaj.

¡Ay Señor! Imata ruwasqaypis mana yanapawanmanchu allin ñawiwan qhawanawaykipajqa. Tukuy sonqo creeni khuyakuyniykiraykulla salvasqa kani, Churiyki Jesucristo noqaj cuentaypi wañusqanraykulla perdonasqa kani. Jesucristoj sutimpi. Amén.

Enero 15

“... Uj yuyaylla kaychej...” (2 Corintios 13:11)

Apóstol Pablo llamp'u sonqos kajkunata uj yuyaylla kaychej nispa nerqa. Jatun imasta yachaqashaspapis, llamp'u sonqo kananchej tiyan; may jina yachaysapa kasqanchejta yuyakunchej chayqa, mana llamp'u sonqo kayqa noqanchejpi kanqachu. Chayrayku Jesucristoqa yachachin Diospa kamachenqa llamp'u sonqo kananta. Pay nerqa: “Kusikuyniyojmin kanku llamp'u sonqoyojkunaqa, imaraykuchus paykunakaypachata herenciankupajjapap'enqanku,” nispa. (Mateo 5:5). Lucaspa qhelqasqan Evangelio, 14:8-9 nin: “Casarakuman wajyarisqa kaspaga, ama ñawpajpi tiyaykuychu; pajtataj wajpis qanmanta aswan sumaj runa wajyarisqallataj kanman. Chantá pichus iskayniykichejta wajyarejta nisunkiman: Chay tiyanata payman qoy,” nispa.

Cristopi creejkunataqa, kay ñawirisqanchejpi yachachin tukuy kawsayninkupi, juch'uy imaspi jatun imaspipis llamp'u sonqo kanankuta. Ajinamanta wawasnin jinaqa, imatapis cheqanta ruwananchejpaj.

Cristopi creejqa, mana may kasqanta yuyakunchu. Astawampis payqa imachus “... Tukuy cheqa kajpi, tukuy allin kajpi, tukuy cheqan kajpi, tukuy ima llimphu kajpi, tukuy k'acha kajpi, tukuy allimpaj qhawasqa kajpi ima...” kawsakun. (Filipenses 4:8). Mana payllapaj imatapis munajchu. Nitaj paypa nisqampuni allin kasqanta yuyakunanchu tiyan. Manachayqa, ujkunaj yuyasqankutaqa allimpaj jap'in, chayqa Diospa munayninman jina kashan.

Ap'ostol Pabloqa parlashan, aychanchejpa jatunchakuyninmanta, chaytaj mana saqewanchejchu uj yuyaylla kaytaqa; wakin kuteqa noqanchejpa yuyasqanchejpuni nisqanchejpuni allin kasqanta yuyajkunchej, runaqa wawamantapacha ajina kanchej. Arí, ajina kashan. Sapa ujnincej aswan yuyayniyoj, astawan yachaj kasqanchejta yuyakojkuna kanchej.

Ajinallapuni kasun chayqa, ch'ajwasqa kallanqapuni noqanchej ukhupeqa. Chayrayku apóstolqa niwanchej: “... Uj yuyaylla kaychej...”, nispaga.

Munakoj Dios Tatayku, noqaqa mana iskayrayanichu munakuwasqaykimantaqa, imaraykuchus creen Churiyki Jesús Salvawajniy kasqampi. Kunanqa qoway imachus noqapi pisi kashan chayta. Chayta ari, kunan mañakuyki. Jesucristoj sutimpi. Amén.

“... Jesusqa Pedrota nerqa: Qhepayta jamuy, nispa.” (Juan 21:19)

Pedrota Señor Jesús ajllarqa Apostolnin kanampaj, pastor kanampaj ima. Chayrayku nerqa qhatinanta, kamachin kanampajtaj.

Paypi tukuy creejkunata Jesucristoqa wajyawanchej Payta qhatinanchejpaj, sapa ujnincej waj ruwanayoj kashajtinchejpis. Tukuy atinchej Paymanta yachaqakuyta, Pay jina kayta, runa masinchejta munakuyta, imaynatachus Paypis noqanchejta munakuwanchej, ajinata. Tukuy Payta munakojkunata Jesusqa, “qhepayta jamuy”, nispa niwamchej.

Apóstol Pablo nin: “Chayrayku Diospa munasqa wawasnin kspa, payta qhawaripa kikinta ruwaychej. Jinallataj munakuypi puriychej, imaynatachus Cristopis munakuwarqanchej, ajinata,” nispa. (Efesios 5:1-2)

Salwawajnincheqa, nin: “... Noqarí jamuni kawsayniyoj kanaykichejpaj, aswan junt’asqa kawsayniyoj kanaykichejpaj,” nispa. (Juan 10:10). Chayta nispaqa nishawanchej, Paypeqa kusiyninchej mana pisiyanqachu, imaraykuchus tukuy ima allin Paymanta jamun: Llimphu kawsay (Diospaj t’aqasqa), cheqan kawsay. Chay imas kapuwanchej chayqa, mana ni ima juchapis chinkayman apawasunchu. Jesucristo noqanchejwan tiyakun chayqa, ni ima sajrapis atipawasunchu, astawampis wiñay kawsayniyoj kasun. Imaynachus Noqapis Cheqan kawsayniyoj kani, ajinallatataj qankunapis kusiypi kawsakunkichej, nispa nishawanchej.

Cristoqa munan runamasinchejta munakuywan parlaykunata, jinallataj perdonaspa. Jesucristoqa niwanchej: Imaynatachus noqapis perdonaykichej salvasqa kanaykichejpaj ajinata, nispa.

Ajinata ruwanchej chayqa kallpachan runa masinchejta, Cristopis chaytapuni ruwarqa. Chayta ruwayqa Cristopi creejpa ruwaynin kashan. Cristorí, chay imakunata munakuywan ruwasqanchejta jatumpaj qhawan.

Dios Tatayku, noqaqa mana janaj pachaman yaykunaypaj jinachu kashajtiypis, munakuwasqaykirayku uj k’ata Churiykinejta perdonawarqanki; kallpachaway sinch’ita sayanaypaj. Jesucristoj sutimpí. Amén.

Enero 17

“Señorpa palabranrí wiñaynintimpaj kanqa...” (1 Pedro 1:25)

Apostol Pedroqa, yachachiwanchej Diospa palabranqa ancha sumaj wiñaypajtaj kasqanta, Diospa nisqanqa chegapuni mana llullachu chay parlaykunaqa. Diospa Simi nisqanqa noqanchejpaj churasqa kashan, chayraykutaj sonqonchejpaj kashan.

Sut’i kachun yuyayniyki: “Plabraqa qayllaykipi kashan, simiykipi, sonqoykipitaj,” nispa nin. (Romanos 10:8). Ajina kajtenqa, sonqonchejpaj mana pisiyanqachu, Diospa bendicionnimpis ni jayk’aj pisiyanqachu. Dios ajinata nishan, Pay nin chayqa junt’akunqapuni.

Noqanchej runakuna ukhupipis imatapis ajina kanqa ninchej chayqa, chay ninakusqanchejtaqa junt’anakuytapuni munanchej, icharí? Ajina kashajtimpis wakin kuteqa, Dios imatapis niwasqanchejtaqa, mana chaykama creeyta atinchejchu.

Makinchejpaj qolqeta mana jap’ishanchejchu chaypis, ichus qolqeqa bancopi churarasqaña kashan; bancomanta “cheques” nisqas makinchejpajña kashajtimpis iskayrayasunmanchu? Chay qolqe manarajpis makinchejpaj kachun, chay qolqeqa kashampuni chay “cheques” niwasqanchejman jinaqa.

Diosqa, kaytapis jaqaytapis qosqayki nispa niwasqanchejqa, “chequetapis” qoshawasunman jina kashan, chay “chequewan” orqhomunallapis kashanman jina kashan. Ari, imatapis niwanchej chayqa, uj chhikanta suyarikunalla kashan, nisqanta junt’ajpuni kasqampi yuyaspa, Payqa junt’anqapuni.

Diospa niwasqanchejqa, ima “chequemantapis” aswan valorniyojraj kashan; ajina kajtinqa creey sonqoykiman churay tukuy nisuusqanta.

Cristo salvasunampaj imatachus ruwasqampi creey, sonqoykimantaj churay, chaypitaj atienikuy. Ajinata ruwaspaqa, Janaj Pachapi herenciayoj kanki wiñaypaj wiñaynintinkama.

Munasqa Dios Tatayku, graciasta qoyki juchamanta t’aqawasqaykimanta, wañuymanta Supaymantapis Jesucristonejta kachariwasqaykumanta. Salvawajniy Jesucristojta kasqaymanta tukuy imata qowasqaykimantapis, graciasta qoyki. Jesucristoj sutimpi. Amén.

“... Uj tumpitamantawan jamojqa jamonqaña, manataj unayñachu kashan jamunampaj.” (Hebreos 10:37)

iSeñorpa kutimunampi unanchanaqa may sumajpuni! Diospa Simi Nisqampi ajinata nishan. Cristopi creekunapajqa, Janaj Pacha kasqampi yuyanaqa may sumajpuni kashan.

Kay pacha kawsaypeqa, mana ujpis kanchu mana imapi pantajqa: Tukuy k’aminapaj jina kanchej. Dios Tataj palabran, nin: “Kusikuyniyojmin, Diospaj t’aqasqataj kanku pikunachus ñawpaj kaj kawsarimuypi kawsarimojkunaqa,” nispa. (Apocalipsis 20:6). Ajina kashaspapis kay pacha kawsapeqa pantayta atinraj. Chayrayku tukuy rinanchej Cristoman Evangeliota uyarispa sonqochakunapaj, ajinamanta perdonta tarinapaj ima.

Diospa qhesachasqan jina kasqaykita yuyakushanki chayqa, yuyarikuy Cristoqa munakuynimpi suyashasunki, Paypi creesqaykirayku Diosqa wawampajña rejsikapusunki. Chayrayku apóstol Pablo, nin: “... tukuy sonqo creeychej, imaraykuchus chay creesqaykichejqa uj jark’akuna escudo jina... Salvacionta monterata jina umaykichejman churakuychej. Espíritoj espadantapis jap’iychej, chayqa Diospa palabran,” nispa. (Efesios 6:16-17). Chay nisqan yuyachiwanchej uj maqanakupi kashasqanchejta. Cristopi creesqanchejrayku kallpaqa Paymanta noqanchejman jamun. Apostol Juampis niwanchej: “Pichus Jesucristopi atienikuspa suyakojqqa pay kikin llimphuchakun, imaynachus Jesucristopis llimphupuni, ajina,” nispa. (1 Juan 3:3).

Pisillaña tiempo kasqampi yuyay. Diosmanta kusikuy chayamusojtinga, kusikuy; imaraykuchus mana unaypajchu chaypis kanqa; ima llakiykuna p’unchay chayamusonqa chaypis, manallataj unaypajchu. Ari, imapis chayamun chayqa tukukapullampuni.

DiosnÍy Tatayku, ancha llakisqataj kashani, yanapariway ari. Qan niwayku yanapanawaykuta llakiypi rikhurejtiykuqa. Yanapaway Churiyki Jesúsucristoj sutimpi. Amén.

Enero 19

“Kusikuyniyojmin runaqa, juchanmanta Señor mana cuentata mañajtin...” (Romanos 4:8)

iSunajta uyariy!: “Kusikuyniyojmin runaqa, juchanmanta Señor mana cuentata mañajtin,” nin. Chayta creesunmanchu? Kanchu ajina runa? Rejsinkichu ajina runata? Diosqa nin mana juchachananta. Munasunman chay runata rejsiyta. Ichapis maynejpi purishanman; imaynapitaj rejsisunmanri? Noqapis pay jina kayta munayman. Atiymanchu? iAri, qampis atiwaj! Apostol Pablo nin: Chay runaqa, juchallin chaypis mana pakaykunchu Diosmantaqa. Nillataj ninchu waj juchallichisqantaqa; manachayqa perdonta mañakun. Ajinamanta: “Kusikuyniyojmin runaqa, juchamanta Tata Dios mana juchachajtin, pipichus mana llullakuy kanchu, chayqa,” nispá. (Salmos 32:2). Rey Davidpis mayjina millay juchasninta Diosman ajinata willakorqa.

Pitachus Dios chegan kasqanta nin chayqa, chay runapeqa Churin Jesucristo kashan. Chayrayku payqa mana umata oqharej runachu, manachayqa llamp'u sonqoyoj runa, Diospa k'acha yanapaynimpí atienikoj runa. Diosman mana chimpanchu ofrendasnín aparisqa uj lluk'ita jina qospa juchallisqanmantaqa. Astawanqa Diosman willakun juchasninta. 1 Juan 1:9, nin: “Juchasnínchejtachus Diosman willakunchej chayrí, juchasnínchejta pampachanqa, nisqanta junt'aj cheqantaj kasqanrayku,” nispá.

David parlan pay kikinwan imachus pasasqanmanta. Payqa khuchichakorqa wajpa warminwan, chantapis chay warme j qosanta wañuchicherqa. Chay jucha ruwasqanta ni pi yachananta munarqachu, pakayta yuyarqa. Chay ruwasqanqa imaymana llakiykunata apamorqa. Allin ñanman watejmanta churakunampajqa, ñawpajtaqa Diosman rimarinan karqa tukuy juchasninta. Chay ruwajnimpitaj, Diospa Qhasilla K'acha yanapaynimpí ima sonqonta churanan karqa. Ajinata ruwajkunata Jesucristo nerqa: “Creesqayki salvasunki,” nispá. (Lucas 17:19). Sonqoykimanta ama chinkachunchu Jesuspi creesqayki

Diosniy Tatayku, mañakuyku sutyiki jatunchasqa kananta noqayku ukhupi. Supaypa reinontataj thuñiy. Jesucristoj sutimpi. Amén.

“Diospa jatun kaynenqa wiñaypaj kachun, ruwasqampitaj Tata Diosqa kusikuchun.” (Salmos 104:31)

Imatapis allinta ruwasqanchejqa kusichiwanchejpuni. ¿Ichari? Diospis kusikullantaj ruwasqasninta qhawarispaga, imaraykuchus Paypa ruwasqanqa ancha sumajtaj, t’ukunataj kashan.

Ichapis qanqa nishawaj: Diospa chay kusikusqanqa imapitaj noqata yanapawan? Nispa. Jina chayqa, ujta nisqayki: Imatapis k’achituta ruwaspaqa kusikunki. Ichari? Ajinallataj Tata Diosqa ruwasqasninmanta kusikorqa.

Supayta, infiernotawan ruwasqanmantapis Diosqa kusikunmanchu karqa? ¡Ni imarayku!, imaraykuchus infiernoqa supaypaj chanta millayta ruwajkunapaj wakichisqa kashan. Chaypi kashanku, mana pipis chaymampuni kachasqa kasqankunraykuchu, manachayqa millay juchapi kawsakuyta munasqankurayku, mana Diosman kutirikusqankurayku. Paykunaqa yuyaychakorqanku paykunaj yuyasqankuman jinalla Diosman chimpayta munasqankurayku. Chantá Diosrí mayqen ruwasqapitaj kuisqa kashanri?

Diosqa kuisqa kashan, maypachachus impuestota cobraj runa pechonta takakorqa juchanrayku, Diosllaman k’umuykorqa khuyakuyninta mañakuspa; maypachachus ñan patapi uj ciego qhaparikorqa: “Davidpa Churin khuyariwan ari,” nispa; Maypachachus uj cananea warmi t’anta t’unasllatapis alqeto jina mikhukuyta munasharqa, chay jina runasta salvasqanmanta kuisqa kasharqa. Maypachachus Tarso llajtayoj, runa wañuchi kashaspa Diosman qhaparikorqa; maypachachus Simón Pedro kharkatitispas nerqa: “Señor, qanqa yachanki noqa munakususqayta,” nispa nejkunamanta, Diosqa kusikun.

Ari, ajinata Diosman qhaparikojkunaga ashkhas rikukun Diospa Simi nisqampega, paykunamanta Diosqa kusikun. Rumi sonqo runakuna payman k’umuykojtin salvasqa kanampaj chaykunamanta Diosqa kusikun.

Khuyakoj Dios Tatayku, kawsayniypi wakin kuteqa pisi kallpa rikhurini. Qanqa ninki: “mañakuychej, jap’inkichejtaj,” nispa. Kallpachaway munasqa Churiykinejta. Amén.

Enero 21

“... Creesqanchejrayku purinchej, mana rikusqanchejraykuchu” (2 Corintios 5:7)

Kaymá kashan chay pakasqa Cristoj Reinonqa: Chay Reinota mana pipis rikunchejrajchu, ajinapis chay Reinopi creenchej. Yuyayninchejri manaraj chayta entiendenampaj jina wakisqachu kashan. Chay Reinoqa mana rikukoj kashan, manataj rejsisqachu, chaypi yuyayninchejta churana tiyan. Chay ajina kasqampi mana yuyayninta churajqa mana atinmanchu sayayta Runaj Churimpa ñawpaqempeqa. Cristoj Reinompeqa Pay kikinman rijch’akoj kasqanchej. Apostol Juan nin: “Imaraykuchus noqanchejpis kay pachapi Pay jina kanchej,” nispa. (1 Juan 4:17).

Kay pachapi kashaspa imaynataj karqa Señorninchej Jesucristo? Paypeqa rikukorqa llamp’u sonqo kaypuni, Payqa aswan pataman oqharisqa karqa, t’ukuna ashkha jucha patapi Cristoqa juchamanta llimphu: “Runasqa Payta qhesacharqanku, pisipaj qhawarqanku. Payqa imaymana nanaywan junt’a karqa; ñak’ariypi, llakiypi ima yachasqa karqa,” nispa nin. (Isaías 53:3). jinallataj jatun kaynimpa k’anchaynimpis Paypi rikukorqa. Payqa kamachejkunaj kamachin jina kawsakorqa. Jinallataj, reykunaj Reynin, señorespa Señorninkutaj karqa; tukuymanta aswan wajcha, jinallataj tukuymanta aswan qhapajtaj karqa.

Imaynachus Pay karqa kikitantaj kay pachapi noqanchejpis kanchej. Cristopi imaschus rikukorqa, noqanchejpipis kay pachapeqa chay imas rikukullantaj, runaj qhesachasqan kanchej Señorninchej jina. May jina juchaj k’umuykachachisqan kanchej, uj p’unchaytaj Diospa wawan kasqanchejrayku pataman oqharisqa kasunchej. Wajchas kay pachapi kanchej, Janaj pachapitaj qhapaj kanchej. Arí, noqanchejpipis chay iskay imas kashallantaj; Adanpi chay ujnin, Cristopitaj ujnin, ujqa noqallanchej kashan, ujnintaj Cristopi herencianchej kashan.

Imatachus Dios nin chayqa, junt’ampuni. Diospa Reinonman yaykunapajqa, Jesucristopi atiekusqanchejraykulla kashan.

Munasqa Señor Jesucristo, mana niy atina noqaj ñak’ariyneyqa. Kay pachapi tukuyqa qonqasqan kani, jinapis yuyani Qanqa mana saqerpariwankichu, kallpata qowaway. Jesucristoj sutimpi. Amén.

“... Tukuy yachaywan, entiendeywan ima munaynimpa pakasqa imasninta rejsichiwarqanchej munasqanman jina, mayqentachus Cristopi junt’ayta munarqa, chayta.” (Efesios 1:9)

Diosman mana kutiriko j runaqa, Diosmanta imatapis yuyan llulla kasqanta. Kay pachapi ajina runasmanta parlayqa mana tukukuyniyoj. Uj kay pachallamanta yachaysapa runaqa Diosmanta parlan paypa yuyasqanman jinalla. Diosmanta yachakoj runataj ujinataj parlan. Llajtapi wakin tiyakoj runakunari yachachinku Diosman chimpanapajqa, kayta, jaqayta ruwanaraj nispa. Kaymanta yachanapajqa Wiñaypaj Diospa Simi Nisqampi qhawarisunchej. Chaypi imatataj nin?

Uyariy: “Diosqa chay jinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis paypi creejqa mana chinkayman rinqachu, astawanqa wiñay kawsayniyoj kanqa.” (Juan 3:16). “Jinaqa Diospa qhasilla k’acha yanapayninrayku runasqa cheqan runaspaj qhawasqa kanku, Cristo Jesusnejta juchamanta kacharichisqa kasqankurayku.” (Romanos 3:24). “Judío runapis, mana judío kaj runapis uj rejlla kanku”. (Romanos 10:12). “Tukuy runas juchallikusqankurayku, paykunaqa Diospa jatun kaynimpa k’anchayninta mana taripayta atinkuchu. Jinaqa, Diospa qhasilla k’acha yanapayninrayku, runasqa cheqan runapaj qhawasqa kanku, Cristo Jesusnejta juchamanta kacharichisqa kasqankurayku.” (Romanos 3:23-24). “Manallataj chivospa nitaj torillospa yawarnin aparisqachu yaykorqa, manachayqa Pay kikiampa yawarninwan Aswan Santo Cheqaman uj kutillata yaykorqa, chay yawarninwantaj wiñaypaj chay juchaj atiyinmanta kacharichiwarqanchej.” (Hebreos 9:12). Nispa nin Diospa Simi Nisqanqa.

Imatapis, imaynatapis, pipis yachachishachun; Diosqa runata cheqan runapaj qhawan Jesuspi creesqanraykulla, mana imata runa ruwasqanraykuchu.

Chaytamari munaynimpa pakasqa imasninta rejsichiwarqanchej noqanchijmanqa. Kaymanta jawaqa mana kanchu ajina jatun valorniyojqa.

Dios Tatayku, yachani noqaqa mana salvanawaykipaj jinachu kasqayta. Ajinapis Qanqa perdonawarqanki k’ata Churiyki Jesucristonejta. Gracias Señor chay jatun munakuyniykimanta. Jesucristoj sutimpi. Amén.

Enero 23

“Diospa Espiritu Santunta ama llakichiychejchu...” (Efesios 4:30)

Imataj llakichin, qharqontaj noqanchejmanta Espíritu Santota? Llakichin Diospa wajyasqanta mana kasukoj kasqanchej, ajinamanta Diospa contrampi ruwayta ajllakusqanchejrayku.

Imatachus Espíritu Santo nisuusqanta mana kasusqayki llakichin qharqontaj qanmantaqa. Tukuy imamanta astawan Espíritu Santoqa juchata ruwasqaykita reparachisunki, Jesucristomantaj pusasunki; jinaspataj Dioswan allinyakunaykita munan. Chayta mana uyarejtiykitaj, chay juchaykeqa Diosmanta karunchasunki. Mana jina kanaykipajqa, uyarikej kay, manachusqa Espíritu Santo kawsayniykimanta riponqa.

Ima juchaman urmajtiykipis, Espiritu Santoqa chay juchaykita qharqoj churakushajtin ch'urkikunki chayjuchaykiwan kakuyta munaspa chayqa, chaypi llakikun. Ajinallapipuni kayta munajtiykitaj Espíritu Santoqa qanmanta ripun.

Tukuy imamamanta astawan Espíritu Santoqa juchasapa kasqaykita reparachisuyta munan, Diosmanta karupi kashajtiykipis reparachisunki. Chayta reparakojtiykitaj Cristoman pusasuyta munan perdonasunampaj, ajinamanta Cristopi creenaykipaj, paymanta songochayta jap'inaykipaj ima; jinallataj qosonqa kallpata juchata Jesucristo qampi atipanampaj, manachusqa chay jucha atipasonqa. Mana Espíritu Santowanqa sapallaykiña kallpakuyta munawaj. Chaykuna llakichin Espíritu Santotaqa.

Chaytajchus Espíritu Santo reparachishasunki juchallisqaykita, qantaj kasunki Diosman willakuspa chay juchasniykita chayqa, mana karunchakunkichu. Sichus manapuni uyariyta munanki chayqa astawan karunchakunki, ajinamanta pipis k'amiykusojtenqa manaña uyariytapis munawajchu. Dios qowanchej Palabranta (Bibliata), chaypi nisqanman jina Espíritu Santonejta parlaykuwanchej, Diospa wawan jina kawsakunapaj. Arí, Diosqa Biblianejta yachachisonqa, kallpachasonqataj Jesucristopi astawan creenaykipaj.

Dios Tatayku, Qanqa yanapawasqaykupuni, icharí? Chayrayku noqaqa tukuy kawsayniypi mañakullasqaykipuni yanapayniykita. Jesucristoj sutimpi. Amén.

“Noqa niykichej... manachus qankuna Diosman kutirikunkichej chayqa, chinkayman rinkichej.” (Lucas 13:3)

Jesupa chay nisqanqa, mana kay pachapi paykunallamanta uj jinaman tukunamantachu parlashan, Imaraykuchus chaytaqa Espíritu Santolla atin ruwayta.

Mana pipis paykunallamanta atinkumanchu mosojman tukuytaqa, manachus Espíritu Santo runaj kawsayninta Jesucristoman manaraj pusanmanchu chayqa. Kaypiqa Jesucristonejta Diosman kutimunamanta yachachishan. Juchachakusqanmanta phutikuspa, sonqota nanachikuspataj Payman kutirimuspa.

Diosqa nin tukuy Payman kutirikunata. Sitajchus tukuy reparakunchej juchapi chinkasqas kasqanchejta, manataj imapis noqanchejta sonqochayta atiwasqanchejta chayqa, chaymataraj atisun tukuy sonqo chimpakuyta Jesucristomanqa.

Entiendena kashan imamantachus, imapajtajchus Diosman kutirikuna kashan chayta. Diosqa mana suyashanqachu qampa kallpallaykiwan Payman chimpanaykitaqa. Manachayqa Diospa kamachisqan mancharichiwanchej mana jut'ayta atisqanchejmanta, ajinamanta Jesucristoman pusawanchej. Apóstol Pablopis chaymanta parlashaspa nerqa: “Chay Leyqa uywaqeyku karqa, Cristoman pusanawaykupaj, Diospajtaj creeynejta cheqan runapaj qhawasqa kanaykupaj,” nispa. (Gálatas 3:24)

Kay pachapeqa ashkha runakuna mana reparankuchu, perdonasqa kanapajqa qhasilla ni imata ruwaspa jap'isqanchejtaqa; astawanqa yuyanku tukuy imata allinta ruwasparaj Diosman chimpakuna kasqanta. Chayrayku, ajinata yuyasqankurayku, ni maypi, ni pipi tarinkuchu sonqochasqa kaytaqa; Chayrayku Diosmanta mañakusqankupis yanqhalla kasqanta yuyanku. Sichus pipis tukuy sonqo Diosman kutirikun, chayrí chay kutirikuynenqa Jesucristoman pusan, Payllapitaj atienikun chayqa, ajinamanta kusiya tarin.

Cristopiña kaspaga, salvasqa kanchej kusikuyniyojtaj. Paywanqa sumaj waqaychasqa kanchej: “Diosqa wiñay kawsayta qowasqachej, chay wiñay kawsaytaj Churimpi kashan,” nispa nin. (1 Juan 5:11).

Janaj pachapi kashaj Dios Tatayku, khuyawayku ari wawasniykita. Yanapawayku ari chay Qhasilla K'acha Yanapayniykiwan. Kallpachawayku ama juchaman urmanaykupaj. Jesucristoj sutimpi. Amén.

Enero 25

“Sichus hermanosta munakunchej chayqa, yachanchej wañuymanta kawsayman chimpapusqanchejta...” (1 Juan 3:14)

Cristoman kutirikusqanchejpeqa uj k'acha poqoy jina kashan Paypi creesqanchejrayku. Chay creesqancheraykutaj noqanchejpi rikhurin mosoj munakuy Diospa wawasninta munakunapajqa. Chayta qampi reparankichu? Jesucristopi qan jina creejkunapaj munakuyniyki kashanchu? Qanta mana allinta parlapayasojkunapajpis?

Chay imas qampi rikhurin chayqa, sut'i kashan watejmanta nacesqaykiqua, Espíritu Santo qampi chay imasta ruwan, mana qanllamantachu kashan.

Ichus qanqa yuyashankiraj manarajpuni Diospa wawanchu kasqaykita, imaraykuchus chaypaj jinaqa manaraj imatapis ruwanirajchu, nispa. Chay imas yuyayniyki kashan chayqa, unanchariy qampa yuyasqallaykichu, chayri Bibliapi Diospa nisqanchu kashan chayta.

Qanqa ajinata pantasqaykiraykuchus mana munashawajchu waj hermanoswan qotucharikuytapis. Chaytajchus nishanki: Noqa sapallay Diowan kakusaj, Paypa Simi Nisqantapis sapallay ñawirikusaj, nispa. Chayta yuyaspaqa pantashanki. Ichus ajinata yuyaspaqa, ichus ñawpa kawsayniyki sajra imastapis saqenkiña, Bibliatapis ñawirikushanki, Diosmantapis mañakushanki, juchasniykitapis Diosman willakushanki, tukuy imatapis sumajta ruwashanki salvakuyta munaspa. Chaykunaqa qanllamanta yuyasqaykiman jinaqa, mana cheqamanta Diospa nisqanman jinachu kashan.

Cheqamanta Diosman kutirikoyqa, tukuy sonqo chimpakuy imaqa, Diospa Espíritu Santon qampi ruwasqan, Jesucristoman pusasunqa. Paypa ruwasqanraykulla perdonasqa kanaykipaj. Ajinamanta qampi yachakunqa Jesuspi “creej masisniykita munakusqaykiki.”

Chay ujkuna hermanoswan ujcharikuspa atinki uj sonqolla kayta. Apóstolkunaj tiempompi hermanos imaynatachus ujlla qarqanku ajinata.

Janaj Pachapi kashaj Tatayku, Qampa qhasilla K'acha Yanapayniyki Qampa wawasniykita jina kawsakuyta yachachiwayku, jinallataj wawasniyki jinapuni cheqa munakuyniyojta ruwawayku. Jesucristoj sutimpi. Amén.

“... Sonqosninchejqqa juchachana yuyaymanta llimphuchasqa kachun...”
(Hebreos 10:22)

Imaniytataj munan “sonqosninchejqqa llimphuchasqa kachun” nispa? Imaynapitaj sonqonchejqqa llimphuchasqa kayta atin?

Exodo 12 t’aqapi chaymanta parlashan chayman jina reparanapaj, imaynachus chay llimphuchay ruwakun chayta. Israelitakuna Egiptopi kashaspa isopo nisqa qhorata jap’ispa corderoj yawarninwan wasi punku k’aspisman jawinanku karqa, chay wasipi tiyakojkuna mana wañunankupaj. Chaywan atinchejqqa rijch’anachiyta: chay isopo qhoraqa Evangelioyan ninakun. Evangelioqa Diospa corderon, Cristoj yawarninwan sonqonchejqqa ch’ajchuykuspa llimphuchasqa kaspaj, wañuyamanta salvasqa kanchejqqa. Evangelioqa qallariymanta tukukuyninkama salvakuyninchejqqa parlan, Jesuspa cruzpi yawarta jich’asqanmanta. Chayraykumari Cristoqa Salvawajninchejqqa Yawarninwan rantiwanchejqqa. “Diospa Churin Jesuspa yawarnintaj tukuy juchamanta pichawanchejqqa,” nispa nin. (1 Juan 1:7).

Evangeliojqqa nisqanman jina, sajra sonqonchejqqa llimphuchasqa kashan Cristopi tukuy sonqo creesqanchejqqa ratomantapacha, jinallatajqqa Dioswan allinyachisqa kanchejqqa. Chayraykutaj Dioswanqa atinchejqqa parlarikuyta, jinallatajqqa Paymanta mañakuytapis. “Dioswan allinyachisqa kanchejqqa” manañatajqqa ima juchachaypis noqanchejqqa kanchu, chayqa Jesucristoj ruwasqanraykulla. Leyqa mana atinñachu noqanchejqqa juchachaytaqa.

iChayqa may kusiy! Noqa juchaman urmani chaypis, Diosman perdonta mañakuspa chimpakuni chayqa, chay jatun munakuynimpi sonqochawan, niwantaj: Kallpachakuy wawáy juchasniyki pampachasqaña, nispa. Diostaqa maytapuni jatunchani; Payta sirviyta anchatatajqqa munani tukuy kawsayniypi.

Khuyakoj Dios, noqaykumanta karunchay tukuy wist’u llulla yachachiyta. Ama saqewaykuchu sutiyejqqa honranta t’akajta. Jesucristoj sutimpi. Amén

Enero 27

“Paynejta yaykunchej Dioswan allimpi kawsayman creesqanchejrayku, chaypitaj sinch’ita sayaspa, kusikuychej...” (Romanos 5:2)

Cartasta qhelqasqampi apóstol Pabloqa, nin: “Uj Espiritunejllata Dios Tataj ñawpaqenman yaykuyta atinchej,” nispa. (Efesios 2:18) Jesucristonejllata aswan Santo nisqa cheqaman yaykuyta atinchej. Pay cruzpi wañorqa chaypis, kunan kawsashan; Paytaj kashan chay MOSOJ ÑAN. Chayta yachasqanchejqqa may kusiya qowanchej, rikuchiwanchejtaj Payman chimpakunanchejpaj, mana manchachikuspataj mañakunanchejpaj. ¡Chay MOSOJ ÑANQA! noqanchejpaj kicharisqa kashan.

Kunankama cheqapipuni mana creerqankichu, chaytajchus falso creyente jina qarqanki chaypis, Payman rejtiykiqa atinki perdonta tariyta. Chay yatiri Simónpis chay jina sajra kawsayniyoj kashaspapis tarirqa perdontaqa. (Hechos 8). Apóstolqa payta k’amerqa: “Chay juchaykimanta Diosman kutirikuy, Señormanta mañakuspa; ichapis sonqoykipi sajra yuyayniykimanta perdonasonqa,” nispa. (Hechos 8:22). Apocalipsis parlan uj iglesiamanta. Chay iglesiata Dios nisqa: “Yachallanitaj mana chirichu, nitaj ruphachu kasqaykita. Allin kanman chiri, chayri rupha kanayki. Q’oñisqalla kanki, mana chirichu, nitaj ruphachu. Chayrayku simiyanta ajtumusqayki,” nispa. (Apocalipsis 3:15-16). Chay jina kashajtimpis Tata Diosqa, nerqa: “Qanta yuyaychayki noqamanta rantikunaykita ninapi ch’uwanchasqa qorita, cheqamanta qhapaj kanaykipaj,” nispa. (Apocalipsis 3:18).

Jesucristoj ujnin kaj apostolnin niwanchej: “Chayrayku mana manchachikuspa, Qhasilla K’acha Yanapayninta qoj Diospa ñawpaqenman qayllaykunachej khuyakuyninta, qhasilla k’acha yanapaynintawan tarinanchejpaj pisichikusqanchej tiempopi,” nispa. (Hebreos 4:16).

Chimpana atikun Jesucristonejllata Diosmanqa. Imaraykuchus Jesucristo kashan Kuraj Sacerdotenchej, Paylla noqanchejta salvayta atin.

Dios Tatayku, pikunachus qhawashaj ciegos kajkuna, Jesuspi cheqa kaj creeyta jap’ikuchunku, reynoykitaj astawan wiñachun, Cristopi creejkuna ashkhayachunku. Jesucristoj sutimpi. Amén.

“Palabraykeqa purinaypi k’anchana jina, ñanniypitaj k’anchay jina.”
(Salmo 119:105).

May chhika runakuna mana sonqoyoj kanku paykuna kikinkuwan, imaraykuchus mana saqenkuchu almanku Diospa Simi Nisqanwan k’achaykojta. Diosqa qowanchej Simi Nisqanta qhelqasqata, chaynejta Payman rina ñanta rikuchinawanchejpaj. Wiñay kusikuyninchejta sumajmanta tukuy sonqotaj ñawirinanchejpaj kashan.

Llakeyqa kashan, Diospa Simi Nisqanta sarojkunamanta, mana pikunachus mana creejkuna kajkunamantachu, manachayqa pikunachus uj kuti creerqanku misk’ichikorqankutaj Diospa Palabranwan, paykunapis sarullankutaj mana creejkuna jina kawsaspa. Paykunaqa ajinata pantanku ashkha p’unchaykunata, chaychus semanasta Diospa Simi Nisqantaqa mana ñawirispa, ni uj chhikanta unachaspa. Unaymanta Bibliataqa oqharinku uj chhikanta ñawiriyta munaspa, yuyayninkurí ruwanankupi kayman jaqayman rinankupi, ni chhikanta entiendenkuchu; chay wajcha almankutaj ch’usaj.

Chaytamari Jesusqa nin: “sumaj mujuta tarpusqan ukhupeqa rikhurin imaymana qoras, khishkas ima,” nispa. Paymanqa tukuy imapis allillan rijch’an. Mana tiempon kanchu Diospa palabranpajqa.

Imatapis ruwanaqa allimpuni, chaywampis Diospa Simi Nisqanta ñawpajman churayqa aswan sumaj. Icharí? Jesusqa nillaraqataj Lázaroj panan Marthaman: “Ujllamin aswan walejqa. Mariaqa ajllakun chay aswan walej kajta. Chaytaqa mana pipis qhechunqachu,” nispa. (Lucas 10:42).

T’ukuriy: Diosman cuentata qona chayamojtin, imaninkitaj? Chay waj imasllapi yuyasqayki yanapasonqachu Diospa ñawpaqempi? Chayrayku Diospa nisqasninmpi yuyay, Diospi tukuy sonqo creesqaykitaj kusiya qosonqa wiñaypaj.

Janaj Pachapi kashaj Dios Tatayku, Espirituykinejta kallpachawayku, munayniykita tukuy imamanta astawan ruwanaykupaj, tukuy kawsayniykupi. Jesucristoj sutimpi. Amén.

Enero 29

“Amallataj cuerpoykichejta juchaman jaywaychejchu, chaynejta sajra imasta ruwanapajqa. Astawanqa qankunaqa wañusqamanta kawsarimusqa jina cuerpoykichejta Diosman jaywaychej...” (Romanos 6:13)

Chayta qhelqaj apostolqa yacharqa sajra imas yuyayninchejpi rikhurinallantapuni. Chaywampis k’amiwanchej chay sajra cuerponchejpa munayninta, Jesucristoj kallpanwan atipaj sayaykunanchejta, Diospa Simi Nisqanman jina kawsakunanchejpaj.

Reparay kayta: Kay aycha ñawisninchejqqa tukuy imata rikuspa munapayan chay imas kapunanta. Mana tariyta atispataj moq’eshallampuni ichapis wakin runakunaqa suwayta munanku; qhari kaspapis wakinqa wajpa warmintapis moq’ejta qallarinku, khuchichakuyman urmanankama, warmi kaspapis wakinqa kikillantataj ruwanku. Ninripisichus mana allin kajtapuni uyarin, ajinallatapuni ruwaspaqa misk’iykapun, chay sajra imasman cuerponta jaywaspa. Qhepamantaj, imamantapis phiñarikuspaqa millay parlaykunawan churakun, ajinamanta cuerpontaqa sajra imasman jaywan.

Apóstol Pabloqa niwanchej: “Astawanqa qankunaqa wañusqamanta kawsarimusqa jina cuerpoykichejta Diosman jaywaychej,” nispa. (Romanos 6:13). Payqa nishan cuerpoykichejta, almaykichejta imaqa Diospa t’aqapunchej Payta sirvinaykichejpaj, nispa. Arí, ñawpajtaqa Diosta manchachikuna, munakunataj, imaynatachus noqanchejta jatun munakuywan munakuwanchej ajinata. Noqanchejpis Paytaqa jatunchana tukuy kayninchejwan.

Diosqa mayta kusikun kawsayninchejta Payman jaywapojtinchejqqa, chaytapunitaj munan. Chayrayku noqanchej juchasapastaqa niwanchej: “Tukuy sonqo uyariway, waway, sonqoykita qopuway,” nispa. (Proverbios 23:26).

Wiñay, wiñaypa Tatayku, sapa p’unchay t’antaykuta qowayku, waj imasta munapayayta ama saqewaykuchu. Qanllapi atienikuyta sonqoykuman churay, tukuy imasta qanmanta jap’inaykupaj. Jesucristoj sutimpi. Amén.

“Diospi suyakuspa kusikuychej...” (Romanos 12:12).

Cristiano kajkunaj suyakuyninkoqa Jesuspa kutimuynin, jinallataj creesqanchejqa Diospa Qhasilla K’acha Yanapaynintapis noqanchejpi kashan. Suyakuyninchejpi suyashanchej jamoj p’unchaykunapi imaynachus kananchejta kusikuywan qhawashanchej. Chayta nishawanchej.

Apóstol Pablo niwanchej, Diosman graciasta qonanchejta chay p’unchaypi imaynachus kanqa chayta wakichipushawanchej chaymanta. Mana ninchu juch’uysitu imasmanta kusikunanchejtaqa, manachayqa chay wiñay kusiymanta. Chayta creespachus kunampi kawsakushanchej chayqa, aswan jatunmanta kusikusunchej, imaymana llakiykuna chayamushawasunman chaypis kusikusumpuni.

Chay wiñay kawsaypi yuyaspa suyakushanchej. Imatachus Dios qonawanchejta niwasqanchejta, ichapis mana sumaj sut’itaqa entiendesunrajchu. Imaraykuchus Payqa wakichishan k’achito imasta mana ñawej rikusqanta, ni sonqollanchejpipis sut’isituqa kanrajchu. Chaywampis reparaspa jinanchejña t’ukuna sumaj imas noqanchejpaj kashasqantaqa. Pitaj ninman imaynachus Jesucritowan khuska Diospa herederon kananchejta? Diospa Simi Nisqampi ujchhikanta rikuchiwanchejña.

Pikunataj kananku kashan, chay Diospa jatun k’anchaynimpipi? Pikunachus Diospa nisqanta creejkuna, Chanta pikunatachus Diosqa wawampaj rejsikapun chaykuna. “Cristowan khuska herenciata jap’isunchej... Jesucristowan khuska Diospa herederon canchej.” (Romanos 8:15-17). Chaytataj suyakushanchej, pikunachus juchasapa kasqankuta reparakuspa tukuy sonqo creespa perdonasqa kanku, chaykuna. Pikunachus creellankutaj Jesucristo chay kawsay t’anta kasqanta almasninkupaj, chaykuna kashanku Diospa herederonqa. Chayta sut’incharqa Jesús: “Pillapis aychayta mikhoj, yawarniytataj ujjayqa wiñay kawsayniyojña, noqataj payta wañusqas chawpimanta kawsarichisaj qhepa qhepa kaj p’unchaypi,” nispa. (Juan 6:54).

Jesús ninllantaj: Kusikuyta mask’ajqa, wiñay kusikuyniyoj kanqanku, nispa.

Dios Tatayku, juchasniykuta pampachay; Llimphu sonqoyoj ñawpaqeykipi kanaykupaj, ni imamanta manchachikuspa. Jesucristoj sutimpi. Amén

Enero 31

“Imatapis Dios qon chayqa, mana mañakapullantajchu; wajyan chaypis, mana iskaychakunchu.” (Romanos 11:29)

iChay nisqanqa jatun sonqochay noqanchejpajqa! Diosqa mana arrepietikuyta yachasqanta, nitaj piwan tratota ruwakuspapis manachakunchu. Noqanchejwan Dios tratota ruwasqanqa mana chinkachisqa kayta atinchu. Diosqa, noqanchejwan jatun promesata ruwan. Diosqa noqanchejta Cristopi ajllakuwanchej manaraj kay pacha ruwasqa kashajtinña. Chayrayku Diosqa mana oqharikaponqachu chay niwasqanchejtaqa.

Manaraj p’unchay ni llaqha kargachu, ni inti, ni killa, ni ch’askaspis, Cristopi ajllawarqanchejña wawasnin kananchejpaj. Manaraj uj runapis Diosman rijch’asqa kashajtin, wakichisqaña karqa noqanchej salvasqa kananchejqa.

iArí! Manaraj kuraj supay kataripi runaman rikhuriykushajtin, manaraj juchaman runa urmashajtin, Diosqa ajllawarqanchejña. Dios munayninmanjinajk’atamunasqachurin Jesusta qowarqanchejña, Dios Tataj ñawpaqempi noqanchejmanta parlarej kanampaj. Jesusqa Janaj Pachamanta urayk’amorqa noqanchej runa jina, cuentanchejmanta Leyninta junt’anampaj: “Diosqa chayjinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis Paypi creejqa mana chinkayman renqachu, astawanqa wiñay kawsayniyoj kanqa.” (Juan 3:16). Chay tukuyta Dios wakicherqa noqanchej salvasqa kananchejpaj, wiñay kawsayniyoj kananchejpajtaj. Apóstol Pablopis nillantaj: “Munakuynimpi wiñaymantaña ajllakuwarqanchej, Cristonejta Paypa wawasnimpaj rejsikapusqa kananchejpaj,” nispa. (Efesios 1:5).

Munasqa salvawajniyku, ama saqeychu juchaman urmaykuta. Espirituykita qowayku. Kay sajra aychaykoj sajra munapayayta atipayta yanapawayku, supaypa trampasninmanta karunchawayku. Jesuscristoj sutimpi. Amén.



Febrero

"Chay tukuytaqa ruwaychejsapa p'unchay, Diosmanta mañakuspa Espiritupi tukuy laya mañakuywan, mana saquespa nitaj sayk'uspa. Mañapullaychejtaj Diospata kajkunapajpis." (Efesios 6:18).

Febrero 1

“... Chay jina jatun salvacionta mana kasuta ruwasunman chayqa, imaynatataj llusp'isunman castigomantari?...” (Hebreos 2:3)

Diospa munakuyninmantaqa, ni mayqen runa, ni mayqen angelpis atinkumanchu niyta, imaynapunichus chay jina jatun Diospa munakuynin kasqantaqa. Pichus chay jina jatun munakuypi atienikojpajqa aswan jatumpuni kusiyninqa kashan. Yuyashankichari Diospa munakuyniywan khuska kashan: Diospa cheqa kaynin, juchamanta t'aqasqa Santo kaynin imaqa. Ajina Dios kasqanraykutaj, phiñakuynenqa pikunachus mana jatumpaj qhawankuchu chaykunaj patampi kashan; qosqaykichej nisqantapis mana jap'ikunkuchu. Jesusqa nin: “Sichus jamuspa, mana paykunaman parlayman karqa chayqa, mana juchayoj kankuman karqa; kunanrj juchankuta mana pakayta atinkuchu,” nispa. (Juan 15:22).

Hebreos libropi qallariypipacha parlan Diospa Qhasilla K'acha Yanapaynin noqanchejman qoyta munawasqanchejmanta, kay jinata nispa: “Kay qhepa p'unchaykunapitajrj Churinnejta parlawanchej,” nispa. (Hebreos 1:2). Chantapis nillantaj: “Mana kasuta ruwasunman chayqa, imaynatataj llusp'isunman castigomantari?” nispa. (Hebreos 2:3).

Cristo cruzpi yawar jich'asqan, runapajqa iskay imaspaj kashan: Salvaspawina kawsayta qonawanchejpaj, Diospa yachaytnina qonawanchejpaj, manachayrj wakin qhesachajkunapajrj Juchachasqa kanankupaj.

“Diospa Churinta qhesachaj” (Hebreos 10:29), imataj kashan? Chayqa niyta munan: Cruzpi yawar jich'asqanta qhasipaj qhawaspamane chaykama yuyasqa kasqampi, jinallataj manapayta kasuspa paypaj munasqayman jina kawsaypi, ima.

Jerusalempi tukuy tiyakojkunaqa rikurqanku Jesús cruzpi ñak'arisqanta, paykunamane imatapis nerqankuchu. Chaymanta manaraj unayninman jatun llakiy waqay paykunaman chayamorqa. Chaywampis manapuni munarqankuchu Jesucristopi creetaqa.

Tatayku Dios, reparakuyku juchayoj kasqaykuta. Ama chaymanta juchachawaykuchu ari. Khuyayniykiipi perdonawayku juchaykumanta. Jesucristoj sutimpi. Amén.

“Payqa tukuy waqayta ñawisinkumanta pichanqa, manañataj wañuy kanqachu, nitaj waqaypis, nitaj qhapariypis, nitaj nanaypis, imaraykuchus ñawpaj kaj imasqa manaña kanqachu.” (Apocalipsis 21:4).

“Ñawpaj imasqa” kay pachapi ñawpaj kawsayninchej, k’umuykachachisqa kananchej, waqananchej, nanayninchej, onqosqa kananchej, wañuypis tukukaponqa. Ari, chay imas mana kanqañachu. Supaypis mana tanqawasunñachu juchaman urmachiyta munaspaqa. Mana kanqañachu sajra sonqo runakuna, noqanchejta pisipaj qhawajkuna, noqanchejta wañuchiyta munajkuna, yanqhallamanta tumpajkunapis.

Diospa chay niwasqanchejman jinaqa, kaykunata yuyayninchejman churana: Janaj pachapeqa manaña juchawan pejtukusuncho, manaña yuyarikullasumpischo kay pachapi juchaman qosqa kasqanchejmantaqa; Diostapisanchatatajtukuysongomunakusunchej.

iChaypachamari cheqamanta kusikoyqa kanqa! Jucha k’askanawanchejmanta manaña manchachikusuncho. Kay sajra songonchejpis manaña Diosmanta karunchachiwasunñachu. Manaña kunanta jina rumi songoschu kasunchej, Diospa Espirituntapis manaña llakichisuncho. Ni sajra imasllatapis parlasunñachu. Chay imasmanta samarikusunchej, wiñaypa wiñaynimpaj.

Chay tukuymanta jawataj, Diospa munakuyninmanta manaña iskayrayasuncho. Kunanta jina salvasqa kasqanchejmantapis mana iskayrayasunñachu.

Tukuy imas kunan kawsaynillanchejpi kaspalla lakichiwanchej, chaytaj pasapunqaña. Dioswan khuska tiyakujtinchejñaqa tukuy imapis mosoj kanqa. Astawampis kusiyllaña kanqa mana tukukuyniyoj.

Munasqa Dios Tatayku, kunanmantapacha ama saqewaykuñachu millay sajra imasta parlajta, nitaj yuyajllatapis. Manachayqa, imachus Qanta jatunchasunki yupaychasunki, chaykunapi yanapawayku. Jesucristoj sutimpi. Amén.

Febrero 3

“Aychallamanta nacekoj runaqa Diospa Espiritunmanta kaj imastaqa qhesachan, imaraykuchus chayqa paypaj wampoj thawtisqan jinalla. Chaytaqa mana entiendeyta atinchu, imaraykuchus chay imasqa Espiritunejta sut’iman orqhosqa kashan.” (1 Corintios 2:14)

Qallariypi, runaqa ruwasqa karqa “Diosman rijch’asqa”. Payman qosqa karqa uj alma, unanchayta atinampaj, jinallataj sumajllatapuni imatapis ruwanampaj, ima.

Adanwan Evawan qallariypeqa imatapis yuyaj ruwaj kanku, Diospa munayniman jina. Paykunaj yuyayninkoqa may jina sut’i karqa; llamp’u sonqo yachayniyojtaj Diosta sumajta rejsej karqanku. Uj p’unchaytaj juchaman urmarqanku, Diosman rijch’asqa kayninkutaj chinkaporqa. Mana yuyayniyoj juchasapa runaman tukorqanku, yuyayninkupis laqhayaykorqa. Kunankama tukuy chay runamanta mirajkunapis ajinallataj juchasapas kanku.

Kay pachaj qallariynimpeqa, uj qhariwan uj warmillawan karqanku, paykunaqa tiyakorqanku Edén Huertapi. Paykuna juchallisqankuraykutaj mana Diosman rijch’akoj kaynillankutachu chinkacherqanku, astawanqa supay llullakuspa yuyayninkuman sat’erqa llullakuyta “mana wañunankuta,” nispa. Diosqa paykunaman nisqa: “Kay kaj sach’aj poqoyninta ama mikhunkichejchu,” nispa. Paykuna chayta mana kasuspa mikhuykorqanku. satanasqa paykunaj yuyayninkuman churarqa imachus cheqa kajpa cuentanmanta llullakuyta, “Dios jina kankichej”, nispa. Chayta nispaqa llullakorqa, icharí.

Chay jina millay sajra yuyaykuna kunankamapis kashallampuni runapeqa. Runaqa yuyan yachallasqanta imaynatachus kawsakuyta. Chayrayku, Bibliaj nisqanman jina kawsanankutaqa, paykunaj yuyasqankuman jinalla kawsashanku. Chayrayku runaqa Diosmanta karunchakusqankurayku contrampi sayaykun. Chayrayku, runa ajinapi tarikusanrayku Diosman kutirikunan tiyan, Espíritu Santo k’anchaykunanta Bibliaj nisqanwan sut’ita entiendenampaj.

Dios Tatayku, tukuy imapi Qanman jamusaj, Qanta jatunchasunaypaj, yupaychasunaypaj ima. Yachachiwayku imaynata Qanta honrasuyta, Dios Tataykuta jina. Jesucristoj sutimpi. Amén.

Febrero 4

“Chayrayku Dios Tataj ñawpaqempi qonqorikuni. Tukuy ayllu paymantamin jap’in sutita janaj pachapi, jinallataj kay pachapipis... Chaywan qankuna tukuy ajllasqaswan khuska sumajta entiendeyta atinkichej may jinachus Cristoj munakuynin kasqanta: Anchonman, sayt’unman, ukhunman, sayayninman ima. Chantapis mañapullaykichejtaj Cristoj munakuynitapis sumajta rejsinaykichejpaj, mayqenchus tukuy runaspa yuyayninta atipan chayta, ajinamanta Diospa tukuy kayninwan junt’a kanaykichejpaj.”
(Efesios 3:14-15, 18-19)

Apóstol Pabloqa nerqa, Diosmanta mañakunaqa allimpuni kasqanta, payqa yacharqa Diospa pakasqa imasninta sut’ita entiendenanchejta, imayna jatunchus Evangelio kasqanta cheqapi yachananchejpaj.

Apóstol Pabloqa, munarqa Diosmanta mañakuyta, tukuypa yuyayninman Dios k’anchaykunanta, kay jinata nispa: “Mañapullaykichejtaj yuyayniykichejpa ñawisninman k’anchayta qonanta yachanaykichejpaj ima suyakuymanchus wajyasqa kasqaykichejta,” nispa. (Efesios 1:18).

Señorninchej Jesús nerqa: “Mana pipis Churinta rejsirqachu; Dios Tatalla rejserqa. Dios Tatatapis nillataj pipis rejserqachu; Churillan Paytaqa rejserqa, pikunamantajchus Chureqa rejsichiyta munan, chaykunapis,” nispa. (Mateo 11:27); “Jatunchayki Tatáy, Janaj pachajta, kay pachajtawan Señornin, imaraykuchus kay imasta pakaykorpanki yachayniyojkunamanta, yuyayniyojkunamantawan, wawasmantaj sut’incharqanki,” nispa nerqa. (Mateo 11:25).

Chay tukuy imata umallanchejpi jap’inaqa mana bastachu, sonqonchejmanraj yaykunan tiyan, Diospa Churin sonqonchejpi tiyakunampaj. Ari, mana Bibliamanta yachaspalla, jinallataj mana Diospa Qhasilla K’acha Yanapayninmanta yachaspallachu, nitaj Jesucristomanta yachaspallachu salvasqa kayta atisunman, manachayqa sapa p’unchay Paywan kawsakuspa, astawan rejsisunchej. Chayrayku wakimpajqa kay yachachiyqa pakasqa jinallaraj kashan. Lutero uj kutipi nerqa: “Umallampi pipis chay imas kajkunata jap’inman chayqa, uj p’unchay allin sut’iman rikhurinqa; kuisqa chay tukuymanta parlayta qallarinpaj, chaypiraj yachakun cheqamanta watejmanta nacesqanqa,” nispa.

¡Ay Dios Tatayku! Kawsayniykumanta juchata chinkachiy, ama ñak’arichinawaykupaj. Jesucristoj sutimpi. Amén.

Febrero 5

“... Imatachus qallariymantapacha uyarerqankichej, chayqa, qankunapi kakuchun. Sichus qallariymantapacha chay uyarisqaykichej qankunapi kakonqa chayqa, qankunapis Churiwan, Dios Tatawan ujchasqa kankichej.” (1 Juan 2:24)

Kay pachapeqa imaymana yachachiykuna uyarikun, chaykunataj runaj umanta muyuchin. Chaykunamanta wakinkuna, Biblia Diospa Simi Nisqan kasqanta creenku chaypis, iskay sonqolla Diospa Simi Nisqan kasqanta creenku. Wakimpajrí may kusiy kashan. Jesucristo nin: “Noqa kani Tukuy Imañ Jallariynin, Tukukuynintaj, nispa nin Tukuy Atiyniyoj Señor Dios, pichus kunan kashan, karqataj, jamonqataj, chay,” nispa nin. (Apocalipsis 1:8). Imaraykuchus chaypi sut’i kashan salvasqa kasqanchejqa.

Kay pachapeqa tukuy imapis qhasipuru tukukuyniyoj, iskayrayanapaj jinapuni kashan. Chaywampis Dioswan allimpi kayninchejqa wiñay kawsay, mana iskayrayana kanchu. “Hermanos, kayta niyta munaykichej: Pisi tiempollapajña kashan. Chayrayku kunanmanta ñawpajmanqa casadosqa manapis kasarasqachu kankuman kankuman jina kawsakuchunku. Waqajkunapis manapis waqankumanchu jina kachunku...imaraykuchus kay pachaga askamalla tukukaponqa,” nispa nin. (1 Corintios 7:29-31).

Pisimantawan, Jesucristopi kajkunaqa, Janaj pachapi may jina kusikuypi kawsakusun. Chaykamataj atinchej sonqochakuyta; kay pachapi ima mana allin imas chayamuwajtinchejpis, Dios noqanchejwan kashan, yachantaj imaynachus kashanchej chaytaqa. Chayrayku imapi llakiypi rikhurinchej chaypis allinninchejpaj, Diosman kutirikunanchejpaj kashan.

Pikunachus ajina kasqanta suyakushanchej, creenchejtaj chayqa, sonqo tiyaykusqa kawsakusun. Chayrayku ama qonqanachu Biblia kay jinata niwasqanchejtaqa: “Qankunaqa sumajta kallpachakuspa, sinch’ita sayaychej. Ama manchachikuychejchu,” nispa. (Deuteronomio 31:6). Diosqa noqanchejwan kay pacha tukukunankama kanqa.

Dios Tatayku, kay pachapi munayniyki ruwasqa kachun. Juchaykuta reparachispa jasut’iwayku chaypis, Qanman chimpamuyta yanapawayku. Jesucristoj sutimpi. Amén.

“Juchamanta kacharichisqa kaspaga, Diospa kamachisninmanña tukupunkichej, jinaqa wiñay kawsayniyoj jina Diospaj t’aqasqa kawsakuychej.” (Romanos 6:22)

Kaypeqa rikunchej juchamanta t’aqasqa kaspaga, allin kawsayman Dios churawanchej. Reparana kachun imaniytachus munan chay niwasqanchej. “Juchamanta kacharichisqa kankichej” nispa nishan. Cristopi creesqanchejraykulla juchamanta kacharichisqa kanchej. Kaypeqa iskay imasmanta parlashan:

Ujqa kahan, juchamanta Cristo kacharichibasqanchej, infiernomanta salvawasqanchej, chanta leypa maldecionninmanta ima kacharichiwanchej. Yuyarinapuni Romanos 3:10-20, imanishanchus chayta: Ni uj runallapis kanchu mana juchayojqa.

Tukuy runas juchallikusqankurayku Diospa jatun kaynimpa k’anchayninta paykunallamanta mana taripayta atinkuchu, “Tata Diostajrí tukuyninchejpa juchasninchejta Payman q’epericherqa,” nispa nin. (Isaías 53:6). Tukuy chaykunamanta parlan apóstol Pabloqa, Romanos 3; 4; 5; 6, t’aqakunapeqa.

Ujtataj parlashan: Jucha watasqata jap’ishawajtinchej, Cristo kacharichibasqachejta. Chayrayku mana juchaj wata runañachu kanchej.

Arí, chay tukuyta Diospa Espiritun noqanchejpi rikhurichin (noqanchejman churan) “Ajinallatataj qankunapis yachaychej juchapaj wañusqa kasqaykichejta, Diospajtaj kawsasqaykichejta Cristo Jesús Señorninchejpi... Chayrayku juchataqa amaña saqeychejchu qankunapi munayninta ruwajta,” nispa nin. (Romanos 6:11,14).

Munasqa Dios Tatayku, ama saqewaykuchu munayniykuta imatapis ruwajta, manachayqa Qampa munaynillayki noqaykoj allinniypupajqa kachun. Jesucristoj sutimpi. Amén.

Febrero 7

(ñawpajpi parlasqanchejman yapashanchej)

Juchamanta kacharichisqa kaspaga, Diospa kamachisninmanña tukupunkichej. Jinaqa, wiñay kawsayniyoj jina Diospaj t'aqasqa kawsakuychej. (Romanos 6:22)

Qampajqa ichus mana ajinachu kaspajinan. Chaywampis Diospaj t'aqasqa jina kawsakuytaqa, mana qanllamanta kallpakuspachu tarinki, manachayqa Jesucristoman chimpakuspalla. Juchamantaraj kacharichisqa kananchej tiyan: "Jatunchasqa kachun Tata Diosqa, imaraykuchus munakuyninwan jatunchaj imasta ruwapuwarqa, noqa llakisqa, phutisqataj kashajtiy," nispajin. (Salmos 31:21). Chayrayku kunanqa llimphu kani, santo kani Jesucristoj yawarninraykulla.

Pichus salvasqa kayta munajqa, ñawpajtaqa mask'anan tiyan juchamanta kacharisqa kayta; perdonasqa, salvasqataj kaytawan Jesucristopi creesqanraykulla. Chantaraj pipis llimphu kawsayniyoj santo kayta atin.

Sichus qan kikiyki kallpakuspalla Diospaj t'aqasqa santo kayta yuyanki chayqa, laqhallaipiraj kashanki. Apóstol Pabloqa sut'ita nin: Ñawpajtaqa juchamantaraj kacharichisqa kana tiyan, chaymantaraj Diospaj t'aqasqa kayta atisun, nispajin. Chayqa yuyarichiwanchej Jesucristoj nisqanta: "Imaynatachus ramanqa sapallanmanta mana poqoyta atinchu mana uva sach'api kaspaga, ajinallataj qankunapis mana atinkichejchu, manachus noqapi kawajchej chayqa," nispajin. (Juan 15:4).

Yachananchej tiyan, juchamanta kacharisqa kasqanchejmanta amapuni iskayrayanachu, imaraykuchus Dios nin ajina kasqanta. Diospa t'aqasqa santo kanaqa sapa p'unchay Jesucristowan kawsasqanchejpi, Espíritu Santo yuyaychawasqanchejpi.

Dioswan imaynachus kashanchej, jinallataj runa masinchejwampis chayqa, sapa p'unchay rikukun Jesucristowan kawsakusqanchejqa.

Dios Tatayku, noqallaykumanta mana atiykumanchu salvakuytaqa. Chayrayku kallpachawayku Jesucristo Churiykenejta munayniykita ruwanaykupaj. Jesucristoj sutimpi. Amén.

(ñawpajpi parlasqanchejman yapallasumpuni)

“Juchamanta kacharichisqa kaspaga, Diospa kamachisninmanña tukupunkichej. Jinaqa, wiñay kawsayniyoj jina Diospaj t’aqasqa kawsakuychej.” (Romanos 6:22)

Jesucristoman ashkhata gracias nisun, juchamanta kacharichiwaspachejmanta. Chaytaqa Biblia nin: “Diospa Qhasilla K’acha Yanapayninnehta creeyrayku salvasqa kankichej,” nispá. (Efesios 2:8). Chaypajqa mana imatapis ruwanachu kashan. Astawanqa Jesucristopi creespa sinch’ita sayana, wiñaypaj Cristowan kawsakunapaj. Pichus rantisorqa jatun preciowan, Payman rijch’akuy sapa p’unchay kawsayniyki. Pay imatachus chejnikun, chayta qampis chenikullaytaj, imatachus Pay munakun ajinata qampis munakuy.

Dioswan allinyasqaña kanki Cristonejta. Diospa wawan kanki, Cristoj hermanontaj. Chayrayku Diospa wawan jina, Jesuspa hermanon jina kawsakuy.

Jesusqa Janaj pachapi kashaj Tatanwan ujchasqa kashan. Payqa Dios Tatata maytapuni munakun, jinallataj kay pachapi runakunatapis. Imatapis ruway munakuywan imaynatachus Salvasojniyki Jesús munakusunki ajinata.

Diospa wawan jinaqa, Espíritu Santoj tiyakunan wasi kanki. Paylla k’uchuy k’uchu qampi tiyakun. Ama ima sajra kaj imastapis kawsayniykiman apaykuychu. Ama sajra aychaykej munasqanman jina kawsaychu.

Astawanqa Salvasojniyki Jesucristo jina Evangeliomanta parlay wajkunaman Jesusllapi Salvación kasqanta. Chayta sumajta sut’inchay mana pita manchachikuspa nitaj p’enqakuspa imatachus Pay ruwasqanta noqanchejrayku, chayta willay tukuyman.

Munasqa Dios Tatayku, kallpachawayku wawayki jina kawsanaykupaj, imaynatachus Qan munanki kawsanaykuta ajinata. Jesucristoj sutimpi. Amén.

Febrero 9

“Khishkarara jallp’a, maymanchus muju t’akakusqa, chay jallp’aqa Palabrata uyarejwan ninakun. Jinapis kay pacha imaspi yuyaykuna, qhapajyayta munapayay ima Diospa Palabranta p’ampaykuspa, mana poqojta saqenkuchu.” (Mateo 13:22)

Chay khishkasqa kashan wajcha kaymanta usqayllata qhapajyay; chay khiskastaj muju tarpusqata mana saqenchu llojsimojta p’ampaykapun. Wajcha kaymanta ujllata qhapajyayqa, runataqa umata oqharichin, Diosmantataj karunchan.

Kay pacha kawsaypi kanku ashkha Cristopi creejkuna, pisi imayoj kashaspapis kusijsa kawsakunku. Ichus wakinqa, ajina kashaspa mana yuyasqamanta usqayllata qhapajyarparinku, Dios bedisqanrayku; mana apaykachayta atispa chay kapuynillankupiña yuyaspa kawsanku, astawan ashkhayachiyta yuyaspa. Ajinamanta Salvajninkumantaqa pisimanta pisi qonqapunku, manaña yuyarillankupischu. Mana qonqapunku chaypis, Jesucristotaqa kawsayninkupi tukuy imamanta qhepaman churarparinku.

Karqa uj iglesiapi Bibliamanta yachachej hermano, k’acha hermano, imachus ruwananta sumajta junt’aj hermano, runa masin salvasqa kananmanta kusikoj. Uj kutipi chay hermano uj sumaj trabajota tarikusqa; chaypeqa mana tiempon kasqañachu Bibliamanta iglesiapi yachachinampajpis. Ñawpajta chay hermanoqa, juchasapa kasqampi yuyaspa Diosman k’umuykoj sonqo karqa. Chantaqa ashkha qolqeyoj kaspañarí sonqon junt’asqa kaspá jinarqa, umata ima oqharisqa. Mana dakusqañachu iglesiapi kajkuna hermanosmantaqa, nitaj yachachinamantapis dakusqañachu.

Jesusqa nin: “Ruwasqaykita rikuni, yachanitaj mana chirichu, nitaj ruphachu kasqaykita. Allin kanman chiri, chayrí rupha kanayki. Q’oñisqalla kanki, mana chirichu nitaj ruphachu. Chayrayku simiyamanta ajtumusqayki. Qanqa nishanki: Qhapaj kani tukuy imayoj... Jinapis mana reparakunkichu khuyana, mana imayoj, wajcha, ciego, q’alallataj kasqaykita”, nispa nin Apocalipsis 3:15-17. Qanrí imaynataj kashanki?

Dios Tatayku, Sumaj wakichisqa pastorta kachamuwayku, ama yuyaynillankumanta orqhokuspa wayrallata mikhuchinawaykupaj. Manachayqa, maychus kajta Bibliamanta yachachinawaykupaj. Jesucristoj sutimpi. Amén.

“... Cristo Jesuspi tukuy bautizasqa kajkunaqa wañuynimpi bautizasqa kasqanchejta?” (Romanos 6:3).

Golgota nisqapi Jesucristoj wañuynenqa, bautizasqa kajkunaj wañuynin kashan. Tukuy bautizasqas chay wañuymanta kawsarimuspa jap'incej ashkha sumaj imasta. Jesús noqanchejrayku wañusqanrayku Paypa Reinonman apawanchej, ashkha sumaj imastataj jap'incej.

Cristoj wañusqanwan bautizakuynincejqa ujlla. Chayraykutaj kunanqa wajyasqa kanchej mawk'a kawsayninchejta imaynachus karqanchej chayta wañuchinapaj. Ajinamanta manaña maytapis muspaykachanapaj, manachayqa Diospaj kawsaspa sajra kawsaypajtaj sapa p'unchay wañusun.

Imaynatachus Jesucristo noqanchejrayku Diospa makinman churakorqa wañuchisqa kanampaj; noqanchejpis kikillantataj Diospa makinman jaywasqa kanchej bautismonchejpeqa. Apóstol Pablo nin: “Astawanqa qankunaqa wañusqasmanta kawsarimusqa jina cuerpoykichejta Diosman jaywaychej, chaynejta cheqan kajta ruwanapaj,” nispa. (Romanos 6:13).

Chaywampis, ichus mana dakushankichu sajra aychaykej munayninta wañuchinayki kasqanta. Chaytajchus juchapi kawsaspa aswan allin kasqaykita yuyakunki. Ajinataj, chaymanta reparakuspa Diosman chimpakuyta munashanki. Ajina kajtenqa, mana imatapis ruwanaykichu kashan juchasniykimanta t'aqakunaykipajqa, manachayqa saqey Cristo qampi kawsayta qosunanta. Cristoman usqayllata chimpay mana qhepaman llakiy jamusunampaj.

Lucas 14:28-32 t'aqapi, Jesús parlarqa ujrunamanta, chayrunaqa wasita ruwayta qallarisqa, manaraj allinta unanchaspa, mana yacharqachu maskha qolqetachus chaypaj gastananta. Kikillantaj kashan Jesucristota qhatinapajpis, mana sumajta unancharispalla, nitaj Paymanta allinta yachaspaqa mana allinchu kanman. Yachana tiyan imaynachus Paywan kawsakuna kasqanta, chaywampis aswan sumajpuni Jesucristowan kay pachapi kawsakuyqa.

¡Ay Dios Tatayku! Khuyawayku ari. Sapa p'unchay t'antaykuta qowayku. Mana atishaykuchu junt'ayta imatachus niwayku Palabraykipi chaykunamantapis perdonawayku. Jesucristoj sutimpi. Amén.

Febrero 11

“... Mana noqanchej Diospa munakusqanchejpichu, manachayqa Dios munakuwasqanchejpi...” (1 Juan 4:10)

Mana mayqen munakuypis kawsayninchejta allinman tukuchiya atinmanchu, Diospa munakuynin jinaqa. Chay munakoyqa tukuy kayninchejta allinyachin, Diospajtaj uj k'ata Churinneja t'aqawanchej mana juchayojta. Tukuy juchanchejmanta perdonawanchej, ajinamanta Diosqa wawasnimpaj rejsikapuwanchej.

Chaymanta Jesús parlarqa, fariseo runa Simonpa wasimpi kashaspa. Chaypacha uj juchasapa warmi Jesusman chimpaykuspa maytapuni waqaykusqa, Jesuspa chakisninta waqayninwan ch'aranchanankama, chujchanwantaj ch'akichisqa. Chaypi kashajkuna fariostaj phiñasqa qhawarqanku.

Chayta rikuspataj Jesusqa, nerqa: “Uj qolqe manoj runaman, iskay runas manu kasqanku. Ujnin kajqa phishqa pachaj denario qolqe manu kasqa, ujnintaj phisqa chunka. Mana imaynamanta kutichipuyta atejtinku, iskayninkuta khuyaspa, manaña mañakapusqachu. Kunan niway ari: Chay iskayninkumanta mayqentaj munakonqa astawan chay khuyaj runatarí? Nispa nerqa Jesusqa. Simóntaj kuticherqa: Pichus aswan manu karqa, chay kasqata yuyani, nispa. Jesustaj nerqa: Arí, cheqanta ninki, nispa. Chantà warmiman kutirispas, Simonta nerqa: Rikushankichu kay warmita? Wasiykiman yaykumorqani, manataj yakullatapis jaywawarqankichu chakisniyta mayllakunaypaj; payrí, waqayninwan chakisniyta joq'ochan, chujchanwantaj ch'akichin. Qan mana much'aykuwarqankichu; yaykumusqaymantapacha payqa chakisniyta much'aspa mana sayk'unchu,” nispa. (Lucas 7:41-45).

Kaypi rikunchej, may chhikapis juchanchej kachun, aswan jatun, aswan ashkhataj Diospa qhasilla k'acha khuyakuynenqa. Chayrayku, may chhikapis juchanchej kachun, Payqa perdonawanchej; chaypi yachanchej aswan ashkhapuni Diospa khuyaynin kasqantaqa. Chayraku Diosmanqa mana sayk'uspa graciasta qonanchej tiyam. Icharí?

Mosoj Testamentopi Diosqa kamachin, pikunachus mana allin ñawiwana qhawawanchej chaykunata munakuna kasqanta. Amataj sajrmananta sajrallatataj kutichinata. “Imaraykuchus Diospa munakuynenqa sonqonchejpi junt'a kashan Espíritu Santonejta.” (Romanos 5:5).

Señor, noqaykoqa mana perdonanapaj jina kayku. Jesucristorayku perdonawayku. Yanapawayku, noqaykupis runamasiykuta perdonanaykupaj. Jesucristoj sutimpi. Amén.

“... Imaynatachus chay mana kasuta ruwana ujnin kaj wawqeypaj ruwarqankichej, chaytaqa noqa kikiypaj ruwarqankichej.” (Mateo 25:40)

Noqaqa kaymanta ashkhata tapukorqani. Ichus qampis Jesuspa chay nisqanta creenkichus manachus, chaytaqa sapa ujninchey yachanchej. Jinapis Diospa Simi Nisqantaqa jatumpajpuni qhawana, wiñaypaj cheqa kajta jina. Jinapis, wakin Jesuspi creeshaspapis mana creespa jinankuchu kay: “Imaynatachus chay mana kasuta ruwana ujnin kaj wawqeypaj ruwarqankichej, chaytaqa noqa kikiypaj ruwarqankichej,” nispa nisqantaqa.

Chaytachus cheqamanta creesunman chayqa, jinallataj chay nisqanman jina ruwasunman chayqa, Señorninchejta aswan sumajmanta servisunman.

“Chaytaqa noqa kikiypaj ruwarqankichej” nispa nerqa Señorninchej Jesucristoqa. Chayta creenapaj, chay FE noqanchejpi kanan tiyan. Imataj chay FE? Imaniytataj munan FE? Imatapis mana rikuspalla creenchej, ajina kanantataj suyakunchej, chay kashan chay Feqa. Chay nisqampi creenchej chayqa, Jesucristoj kallpanwan runa masinchej imamanta pisichikujtimpis, kusiyan jaywarispa yanapasun. Wakin hermanos mayta llakikunku ni imaynapi Diosta serviya atispa. Payta sirvinaqa kashan, runa masinchejta yanapaypi. Chayta ruwajtinchejqa Dios allin ñawiwana qhawaspa, ashkhamanta bendiciwanchej.

Jesusqa nillarqataj: “Yarqhasqa kashajtiy, qankunaqa mikhuchiwarqankichej; ch’akiyniyoj kashajtiy, ujjachiwarqankichej; forastero kashajtiy, wajyarikuwarqankichej. P’achamanta usushajtiy, p’achallichiuwarqankichej; onqosqa kashajtiy, waturikuwarqankichej; carcelpi kashajtiypis, watukoj jamorqankichej, nispa... Imatachus chay mana kasuta ruwana ujnin kaj wawqeypaj ruwarqankichej, chaytaqa noqa kikiypaj ruwarqankichej, nispa. (Mateo 25:35-40).

Allimpuni kanman tukuy cristianos tapukunanchej: Wajchasta ajinata yanapanchej chayqa, Diospajpunichu ruwapushanchej? Nispa. Arí ajinapuni kashan. Sichus manaraj ajinatachu ruwashanchej chayqa, mañakuna Dios munakuyninta qonawanchejta, ajinamanta noqanchejpi munakuywan runamasinchejta khuyakusun.

iAy Dios Tatyku! Juchaman urmanapaj tanqasqa kayqa may jina tiyan, kay sajra aychaykutaj chaymampuni astawanqa aysawayku. Ama saqewaykuchu urmajta. Yanapawaykupuni sapa p’unchay. Jesucristoj sutimpi. Amén.

Febrero 13

“Chay qhepata Dios nerqa: Runata ruwanachej noqanchejman rijch’akojta. Tukuynin animalesmanta aswan atiyniyoj kachun; atiynin urapi kachunku: challwas, p’esqos, tawa chakiyojkuna, jallp’a patapi qhatatakojkuna ima, nispa. Diosqa runata ruwashaspa, payman rijch’akojta ruwarqa; qharita warmitawan ruwarqa.” (Génesis 1:26-27)

Ñawpajtaqa, reparanachej Diospa nisqanta: “Runata ruwanachej”, nispa nisqanta. Kaypeqa reparanachej Dios Tata, Dios Churi, Dios Espíritu Santopiwan uj parlanakuy kasqanta. Diosqa mana nerqachu: “Runata ruwayta munani”, nispaqa. Nillataj nerqachu: “Runaqa jallp’amanta rikhurichun,” nispaqa. Diosqa nerqa: “Runata ruwanachej” nispa.

Tukuy kay pachapi kawsajkunataqa Dios ruwarqa, simillanwan nerqa: “rikhurichun” nispa. Runata ruwanampajrí parlapayanakuspa ruwarqa. Piwantaj parlanakorqa? Kinsa ukhu parlanakorqanku: Dios Tata, Dios Churi, Dios Espíritu Santuwan ima; chay kinsantin uj k’ata Dios kashan. Runaqa mana cuerpoyojllachu kanan karqa, manachayqa uj almayoj ima; chay almaqa Diospa Espiritunpa qosqan karqa. Ajinata ruwasqa karqa Dioswan uj sonqolla wiñaypaj kawsakunampaj. Chayrayku Diosqa nerqa: “Runata ruwanachej noqanchejman rijch’akojta,” nispa. (Génesis 1:26).

Diosqa tukuy yachayniyoj kaspa chay ruwasqan runaqa, ajina ruwasqa kaspaqa, yacharqa juchaman urmananta, imaymana millay imasta ruwayman qokunanta ima. Chayta yachashaspapis, parlanakuytawan ruwarqapuni runataqa.

Chaypacha, Dios Churimanta paraspa nerqa, Pay Salvajnincej kananta. Apostol Pablo nin kay jinata: “Paymin juchasnincejrayku wañuchisqa kanampaj jaywaykukorqa,” nispa. (Gálatas 1:4). Chayrayku apóstol Pabloqa nillaraqataj: “Manaraj kay pacha ruwasqa kashajtin, Diosqa ajllakuwarqanchej Cristopi,” nispa. (Efesios 1:4).

Dios Tatayku, yachani mañakususqayta uyarinawaykita, Qan nerqanki mañakusuncykuta, uyarinawaykuta munayniykiman jina, chayrayku chimpakamuyki. Jesucristoj sutimpi. Amén.

“Señorqa tukuytaj wañorqa, kunan kawsajkuna amaña paykunapajchu kawsanankupaj, astawanqa kawsanankupaj, jaqay pichus wañorqa kawsarimporqataj, paykunarayku, chaytaj.” (2 Corintios 5:15)

Jesucristopi creejqa, mana payllapi yuyaspachu kawsan. Ashkha preciowan rantisqa kaspaga, tukuy cuerpon, alman, kallpan, chanta tukuy kawsaynin, Diospata.

Diosman kutirikusqanchejmantapacha yachakuna tiyan, kay jinata niyta: Jesucristo Salvawajniy, Pay rantikuwan ashkha preciowan, noqa chinkasqa kashajtiy tukuy juchaymanta kacharichiwan, wañuymanta, supaypa atiyinmanta, noqa Paypata kanaytaj Reinompi kawsanaytaj, chanta Payta servispataj ima, nispa.

Sichus Cristota sirviyta munanki, sonqoykipitaj tapukunki: Imatataj munan ruwanayta? Nispa. Payqa nisunki: Imatachus Noqa ruwaj kani, chayta ruway runamasiykita yanapaspa, wajchasqa qankuna ukhupi kallanqapuni: “Imatachus chay mana kasuta ruwana ujnin kaj wawqeytaj ruwarqankichej, chaytaqa noqa kikiytaj ruwarqankichej,” nispa nerqa Señorqa. (Mateo 25:40).

Cristoqa munan noqanchejqa makisnimpi uj herramienta jina kananchejta, kay pachapi ima ruwanachus kashan, chayta Paytaj jina ruwanapaj. Payqa, tukuy runakunarayku wañorqa wiñaytaj Jesucristowan khuska kawsanankupaj. Cristo kawsan noqanchejtaj, noqanchejtaj Cristopaj kawsanchej. Cristoqa noqanchejpi kawsashan. Jesucristoqa Janaj pachapi noqanchejrayku parlarin, noqanchejtaj kay pachapi Paymanta parlanchej. Chay ruwanayoj noqanchejqa kay pachapi kanchej.

Ni ima juchachaypis qampaj kanñachu, chaymantaqa Cristo perdonawanchejña, waqaychashawanchej ima. Cristo munan paytaj kawsananchejta, tukuyman Evangelionta willaraspa, runa masinchej salvasqa kanankupaj. Chayrayku Cristo munan payta uyarinaykita, creenaykita mana iskayrayaspa, imaraykuchus juchawan cuentaykimanta Pay maqanakunqa. Tuta p’unchay Diosmanta mañakuspa kawsakuy.

Dios Tatayku, mana chaytaj jina kashajtiypis Qanqa uyariwankipuni mañakusqaytaqa, yanapaway mana misk’anaytaj. Jesucristoj sutimpi. Amén.

Febrero 15

“... Noqaqa allin kajtapuni ruwayta munani; jinapis mana atinichu.”
(Romanos 7:18)

Apóstol Pabloqa sonqompi allin kaj imasta ruwaytapuni munarqa, manataj aterqachu ajinata ruwaytaqa, imaraykuchus sajra aychampa munaynin wajladoman aysayta munarqa. Chayqa mana niytachu munashan payqa sajralatapuni imatapis ruwashasqantaqa, manachayqa chay allin imasta ruwayqa ukhu sonqompi kasharqa, sapa p'unchay maqanakorqa aychampa munasqanwan.

Diospa munayninta ruwaytaqa, pipis atispa jinallan. Diospa munayninta junt'ayri mana Jesucristoj yanapayninwanqa mana atina jinallachu kashan. Apóstolqa “mana atinichu” nispaga, niyta munashan: Payqa munampuni Diospa munayninta ruwaytaqa; Diospa munayninta junt'aytari, mana atina jinallachu sichus Jesucristoj kallpan atiyin mana noqanchejpi kashan chayqa.

Jesucristopi creejkunamanta ashkhas yuyanku chay imasta ruwayqa, facilito paykunaj kallpallankuwan kasqanta. Mana yuyankuchu chaykunataqa Jesucristolla Espíritu Santonejta atiyinwan runapeqa ruwanantaqa. Paykunallamanta mana atipayta atispataj, ashkhas iskayrayanku imajtinchus reparakunku ancha pisi kallpas kasqankuta. Chayrayku Apostol Pabloqa, kay jinata nin: “Ajinallatataj Espiritupis yanapawanchej pisi kallpa kayninchejpi,” nispaga. (Romanos 8:26).

Wakin kuteqa, qonqapunchej runamasinchejpaj allin imasta ruwaytaqa. Sichus runa masinchejpa allinnimpaj imatapis ruwanchej chayqa, mayta kusikunchej, icharí?

Astawampis, maypachachus allin imasta ruway astawan astawan yuyayninchejpi rikhurin chaypis, mashkha kuti mana kallpa kaspaj jinachu chayta junt'anapajqa. Chayrayku Señorninchej Jesucristoj kallpanta necesitanchej. Paylla noqanchejpi kallpanchejqa,

Tukuy atiyniyoj Diosniyku, khuyakuyniykipi qan niwayku mañakusunaykuta kallpata, atiyta ima, runa masiykoj allinnimpaj imatapis ruwanaykupaj. Chay jina khuyakuyniyoj kasqaykirayku, sonqoykuman munakuyniykita churay. Jesucristoj sutimpi. Amén.

“... Mana jayk’aj llank’asqa jallp’asta llank’aychej, amataj khishkas ukhuman tarpuychejchu.” (Jeremías 4:3)

Kay qhepa p’unchaykunapi ashkhas kanku mana allimpi kawsajkunaqa: chiri sonqos, khuchichakupi kawsajkuna, mana creej sonqos ima, cheqa cristiano kajkunapis pisimanta pisi chinkanayashan; chayraykutaj chay Diospa nisqantaqa tukuyman reparachina tiyan.

Diospa Simi Nisqanta uyarejkunaqa, qallarinku allin ñanta tukuy sonqo puririyta. Sut’i rikukun paykunaj yachakusqankupi, jinallataj kay pachapi sajrayaymantapis karunchakunku. Juchawanpis maqanakunku Jesucristoj kallpanwan, chaywampis ichus tumpamantawanqa sayk’urparinku, manaña munaspa jinankuñachu Cristowan khusa puriytaqa, Iglesiamantapis karunchakusaj ninku. Imaraykutaj chay ajina?

Ashkha runakuna Diospa Palabranta uyariytawankama kusiyan jap’ikunku, yuyayninkupeqa ichus kasharqa, kaymanta jaqaymanqa tukuy imapis allimpuni kananta. Paykunallamanta yuyarqanku sumaj cristianos kayta jaqayta ruwasaj nispa. Chaywampis mana entienderqankuchu Diospa makisninman churakuna kasqantaqa, Paypa kallpanwantaj ruwana kasqantaqa.

Ajina kayqa, rijch’akun chay phisqa sipaskuna imaynachus chay casamiento wasiman mana yaykuspa jawapi rikhurijkunaman. Chayrayku manachus Diospa Palabran cheqamanta kawsayninchejta, sonqonchejta Espíritu Santo uj jinaman tukuchin chayqa, ajinaman tukusunman.

Chaykunamanta parlaspa Jesusqa ashkha rijch’anachinaswan yachachiwanchej; yuruta mayllaspa jawallanta mayllajkunaman, ukhumpitaj ch’ichillapuni kashasqanwan rijch’akusqanta. Chaywanqa Señorninchej rikuchisharqa ajina yuyayniyoj kasqanchejta, imaymana allin imasta ruwaspa janaj pachaman yaykuyta munasqanchejta. Chaypajqa Jesucristoj ruwasqallan noqanchejpeqa mana juchayojta qhawachiwanchej Diospa ñawpaqempeqa. DiosTataj palabran, nin: “Sichus pipis watejmanta mana nacen chayqa, Diospa reinonta mana rikuyta atinchu,” nispa. (Juan 3:3).

Dios Tatayku, llamp’u sonqo kayta qowayku, “Tatáy” nisuyta atinaykupaj. Jesucristoj sutimpi. Amén.

Febrero 17

“Qankunaqa watejmanta nacesqa kankichej, manataj ismoj mujumantachu, manachayqa mana ismojmanta, chaytaj Diospa wiñaypaj kawsaj Palabrannejta.” (1 Pedro 1:23)

Pipis tapukunman: Imaynatataj watejmanta naceyman? nispa chayqa, qanqa kutichiy: Ni imata ruwanaykichu tiyan watejmanta necenaykipajqa. Tumpa allin imas ruwaykunas kawsayniyki rikhurin chaypis, mana niyta munanchu watejmanta nacesqaña kasqaykitaqa, mana qampaj kallpaykiwan imatapis ruwasqaykiraykuchu, nispa.

Watejmanta naceyqa mana runa imatapis ruwasqanraykuchu, manachayqa Diospa Espiritunpa ruwasqanrayku. Dioslla atin runaj sonqonta allinman tukuchiyaqa. Jesucristo runaj sonqonman yaykujtin, kawsaynimpeqa jatun milagro ruwakun.

Qanqa, mana kallpakunaykichu kashan, sonqoykita allinman tukuchiya munaspaqa. Qanllamantaqa mana kanchu atiy chay milagrota ruwaspa mosoj kawsayniyoj kanaykipajqa.

Mosoj nacimiento qallarín chayqa, Dioslla ruwan sonqoykipi, yuyayniyki, sinch'i kallpayoj rikhurinaykipaj, may jina pisi kallpa karganki chaypis, qampi mosoj kallpa rikhurenqa.

Runa juchampi wañusqa jina kashaspaqa, mana pay kikin mosoj kawsayta qokuyta atinmanchu. Chayrayku, runa wañusqa jina kashajtin Dios payman jamuspa rijch'arichin Palabrannejta. Sut'inchantaj Diospa juiciompi rikhurisqanta, jinaspataj willasunki imaynapichus chay juciomanta salvasqa kayta atiwaj chayta. Ari, ajina kashan, manachus Diospa Qhasilla K'acha Yanapayninta jap'ikunki chayqa, Diosmanta wiñaypaj karupi rikhuriwaj. Dios wajyasuspa cuentata mañasojtin, chay p'unchayqa mana kanqañachu chay salvakuyqa.

Ama qonqaychu: Dioslla chay mosoj nacimientotaqa ruwayta atin; chaytataj Pay ruwan qampi Palabrannejta, Espíritu Santotaj juchamanta reparachisunki, chanta Jesucristo Salvadorninchejman pusasunki..

Dios Tatayku, waqaychawayku, wawasniyki jinapuni kawsakuyta, amataj enemigoyki jinaqa rikhurisqaykuchu. Qanllapuni Tataykuqa kanki. Jesucristoj sutimpi. Amén.

“Chay kamachina tiyanapi tiyasqa kajpa paña makimpi rikorqani uj k’uyuna librota, ukhumpi jawampitaj qhelqasqata, qanchis selloswantaj sellasqata.” (Apocalipsis 5:1)

Kay mana entiendey atina Palabrasqa jatunta sonqochawanchej, sichus Señorninchejpi creespallapuni kawsakusun chayqa, sitajchus Diosllapipuni sonqonchejta churasun chayqa, Paypa munayninman jinallapuni tukuy yuyayninchej kanqa chaypis, kay pachapiqa ni imamanta manchachikusunchu.

Apóstol Juan mosqoypi jina rikorqa, Apocalipsispi qhelqasqas kashan imaschus chayta. Rikorqa Janaj Pacha Reinota; chaypitaj rikusqa Pitajchari uj tiyanapi tiyashajta, paña makimpitaj uj librota jap’isahjta. Chay libropeqa qhelqasqa kasqa “imaschus kanan kasharqa” chay imasmanta; chaynejmanta qhepan t’aqaspitaj willasharqa chay libropi sellos kicharikunanmanta.

Mosqoypi jina Juanpa rikusqan imasqa, imaniytataj munan? Chay libropi “imaschus kanan kasharqa tukuy kay pachapi, chantapis iglesiapi, jinallataj Israelita runakuna ukhupipis, chaykunamanta willasharqa. Chay tiyasqa kasharqa chaypa paña makimpi lebrito chayqa, niyta munan: Diosqa yachan tukuy ima pasananta, imaraykuchus chay libropi kashan tukuy ima qhelqasqa.

Chay libro paña makimpi kashasqanqa, Paypa makimpuni ima ruwanampajpis kashan, yachayta qowanchej tukuy atiniyoj Dios, chay makiwan kamachishasqanta ima. Pay jark’awasun ima mana allinchus pasan kashan chaykunamantapis. Chay tukuy ima Diospa makimpi kashan, chantapis qhelqasqa kashan. Kay, imosqoypi jina Juanpa rikusqanqa sonqochasqa kananchejpaj kashan!

Dios Tatayku, qanqa munanki nisunaykuta: “Diosniyku Tatayku”, nispa. Jinaqa tukuyniyku mañakusqayku chay sonqochayta. Qowayku kay pachapi uj sonqolla kawsakuyta. Jinallataj uj kuna ujkunapaj Qanmanta mañapuspa. Jesucristoj sutimpi. Amén.

Febrero 19

“... Imaynachus kawsayniy kananta libroykipi qhelqasqaña karqa, manaraj ni uj p’unchaniypis kashajtin.” (Salmo 139:16)

Janaj Pachapi Tatanchej tiyapuwanchej, Paytaj tukuy imata sumajta waqaychan, noqanchej kawsayninchejmantapis uj libropi qhelqasqa makimpi kashan.

iChaymá t’ukunapaj k’achan! Sichus cheqamanta tukuy sonqo creesunman, Diosninchej tukuy imapi qhawarinawanchejta chayqa, kusiqa, ni imamanta llakiyniyoj kawsakusunman sapa p’unchay. Qanrí manachu yuyanki ajina kananta? Tukuy ima qhelqasqa uj libropi Diospa makimpi kashasqanqa anchaña. Mana creena jinapis kachun, tukuy Atiyniyoj Tata Diosqa ajinata ruwan.

Runa jina yuyayninchejpeqa ninchej: “Chayqa mana jinachu kanman,” nispá. Chaywampis, muyuyninchejta qhawarinchej chayri, imatataj rikunchej? Tukuy imata Diospa ruwasqanta, t’ukuna, icharí? Pitaj noqanchej runakunamanta ajinata ruwayta atinman? Mana pipis ajinata ruwanmanchu. Kay imasta Dios ruwarqa mana tukukoj atiyninwan, chayrayku kunampis Payqa rikushawanchej, waqaychashawanchej; tukuy kay pachapi ruwasqantapis Pay waqaychashan.

ilmaynapichus atisunman mana creeya atisqanchejta noqanchejmanta wijch’uytaqa! Ashkhas yachachiwanchej Diosqa atiyniyoj kasqanta. Chaywampis noqanchejqá manarajpuni reparashanchejchu ajinapuni kasqantaqa.

Diosmanta mañakunachej ñawisninchej kich’arinanta, allin yuyayta ima qonawanchejpaj, ajinamanta kaypi kunan nisqanchejta umanchej sumajta jap’inampaj. Ama ari, Señorninchej Jeucristota llullapaj jap’inachu, Pay nishajtenqa: “Manchu phishqa p’isqetusta vendenku iskay phisurayku? Chaywampis ni uj qonqasqachu Diospa ñawpaqempeqa... qankunaqa aswan valorniyoj kankichej ashkha p’isqosmanta nisqaqa,” nispá nin Diosninchejqá. (Lucas 12:6-7).

Dios Tatayku, allin yuyayta sonqoykuman churay, amataj mayqenniypis noqallaykupaj imatapis munajkuna kanaykupaj. Runa masiykuman jaywarej sonqota qowayku. Jesucristoj sutimpi. Amén.

“Yachanchej, Diosta munakojkunataqa tukuy ima allinninkupaj yanapasqanta...” (Romanos 8:28)

Apóstol Pabloqa, manaraj Cristopi creeshaspaqa, Iglesiamanta kajkunata chinkarichiyta munaspa qhatiykachaj runa karqa. Chay jina kashajtimpis Pabloj sonqonta Dios Payman kutiricherqa, aswan jatun apóstolman tukuchispa, ajinamanta parlasqanta uyarispa ashkha runakuna Diosman kutirikunankupaj.

Aríajina, Diosman kutirikunchej chayqa, Cristopi creeyta qallarejtinchej, Diosqa sajra sonqoyoj kayninchejta cheqanman churaspa mosojman tukuchin. Martín Luteropis chaymanta parlaspa nerqa: “Pantarasqasninchejta Diosqa allinman tukuchin”, nispa.

Waj kutipitaj kay jatun feniyoj Luteroka, nillaraqataj: “Noqa rikuni kawsayniypi mashkha imaspi sonserasta ruwasqayta, reparakuspataj jatunta mancharini. Chay ruwasqasniyrayku reparakuni uma nanayta apamusqanmanta, mana kacharichikuyta aterqanichu. Jesucristo sonqoyman yaykuspa kacharichiwarqa, Dioswantaj allinyachiwarqa. Chay jinamanta Diospa salvasqasnin ukhupi reinasaj wiñaypaj,” nispa. Diosqa Tukuy atiyniyoj, tukuy imatapis mana imallamanta ruwarqa. Chayrayku Diosqa, mana allin imasmantapis, atin allin imasta ruwayta.

Diospa munayninta ruwayta munashaspa pantaykuyta manchachikunki chayqa, Diosmanta mañakuy sajra aychaykej munayninta Pay wañuchinanta. Sichus mañakushanki rikuchisunanta maynintachus imaynatachus purinaykita chayqa, mana ruway atina jina kashan chaypis, ima llakiyniykipipis Payqa yanapaspa sonqochasonqapuni.

Dios Tatayku, qanqa mana mayqen tata jinallachu kanki, chayrayku mañakuyki yachachiwayku allinta kawsakuyta. Jesucristoj sutimpi. Amén.

Febrero 21

“Iskayrayajkunata khuyaychej. Wakinkunatarí salvaychej ninamanta usqayta orqhospa...” (Judas 22-23)

Ashkha runakuna pantasqa yachachiypi kawsakunku, jinallapi ujllata rijch'arispá jina reparakunku qaqamampis urmaykushankuman jina, paykunata yanapay. Wakintaj mana reparakuspa ajinallapipuni kawsakunku. Chaychus paykunamanta wakin rejsisqasniyki ajinata kawsajkuna, chaytajchus aylluykimanta kashanku. Ajina kajtenqa, munaypuni yanapayta Jesucristoman pusamuspa.

Ashkhas Jesucristoj Evangelion paykunaman k'anchaykusqanrayku munanku chay allin willaykunata tukuyman willaramuyta, imaraykuchus Diospa Espiritun sonqonkupi juchasapa kasqankuta reparachisqanrayku. Jesucristopi perdonasqa kaspataj, qallarinku tukuy runakunata munakuyta rikuchiya, salvasqa kanankupaj. Paykunaqa mana munankuchu paykunalla salvasqa kaytaqa.

Kay rich'arichisqa, salvasqa kajkunaqa ichus mana rinkuchu sumaj yachay wasismanqa, ajinapis paykunaqa Diospa yachachisqanwan t'ukunata parlarinku, tukuy rikunku uyarinkutaj. Kunanqa paykuna kikin yachanku imachus allin, chanta imatajchus mana allin kasqantapis. Kunanqa sumajta rejsinku Diospa Simi Nisqan Bibliatapis. Chaypi yachakun, sumaj sut'ita may jina jatun preciowan Jesucristo salvasqantaqa.

Chaymanta parlaspa, Martín Lutero nerqa: “Evangelioqa watejmanta pitapis nacechispaqa, uña wawitasta jina mana kallpayojtachu, manachayqa kallpayoy waynasta sipaskunata imaqa, Evangeliomanta tukuyman willaranankupaj,” nispa.

Chayqa ajina, imaraykuchus Dios yachachin tukuyman atinankupaj Evangeliota willaranankupaj.

Dios Tatayku, yachachiwaykupuni wawasniyki jina kawsakuyta. Ama kay pacha imas, sajra aychaykoj munaynin ima, sonqoykuta aysanampaj kay pacha sajra imasman. Jesucristoj sutimpi. Amén.

“Chayrayku rispa tukuy laya runasta yachachisqasniyman tukuchimuychej bautisaspa Dios Tataj, Dios Churej, Dios Espíritu Santoj sutimpi...” (Mateo 28:19-20)

Bautismoqa mana mayqen runaj yachachiynillanchu kashan, manachayqa Diospi qallarikun, pichus kay pachapi Janaj Pachapi Atiyniyojpa kamachisqan. Chay kamachisqantaj tukuy kay pachapi kaj chhika runakunapaj kamachisqa kashan. Chantapis, Mosoj Trato sumaj ruwasqa kashan, kinsa ukhupi: Dios Tataj, Dios Churej, Dios Espíritu Santoj sutimpi. Chayraykumari Bautismoqa jatumpaj qhawasqa kashan.

Diospa Simi Nisqan bautismopeqa chay yakuwan khuska cheqa creeyta (feta) rikhurichin mosoj runaman tukuchispa. “Tukuy laya runasta yachachisqasniyman tukuchimuychej, bautizaspa” nispa nerqa Jesusqa. (Mateo 28:19). Khuyakoj Señorninchejqqa yachan imaynachus kasqanchejta. Noqanchejqqa ñak’ayta creejkuna kanchej, Diostaj Cristopi Pay kikitawan allinyachikuwanchej. Ajinamanta juchasninchejqqa pampachasqaña, Diospa k’ajaj phiñakuynimpis thasnusqaña Jesucristoj ruwasqanrayku. “Ajinamanta pillapis Paypi (Cristopi) creejqqa mana chinkayman renqachu, astawanqa wiñay kawsayniyoj kanqa,” nispa nin, Juan 3:16, t’aqapi. Dios munakuwasqanchejqqa, may k’achapuni.

Diosqa khuyakuynimpi mana iskayrayanapaj Bautismota noqanchejpaj churan. Ñawisninchejpa rikusqan Bautismo, mana rikukoj Diospa Palabrantawan khuskata qowanchej, chaynejtataj tukuypaj rikunanta Diosqajap’iwanchej Paypa Reinompi. Chay tukuytaj iskayrayayninchejta chinkachin yuyayninchejmanta, sonqonchejmantapis. Ajinamanta Diospa qhapaj khuyakuyninta sonqonchejman churan. Diosqa khuskachan Palabranta, chanta kay pachapi rikukoj yakutawan.

Tukuy Atiyniyoj Dios Tatayku, khuyayniykiipi jark’awayku tukuy sajra imasmanta; sutikita jatunchayta yunapawayku. Jesucristoj sutimpi. Amén.

Febrero 23

“Pichus creejqa, bautizachikojtaj, salvasqa kanqa...” (Marcos 16:16)

Salvasqa kayqa niyta munan, juchaj makinmanta, wañuymanta, supaypa atiyninmantawan kacharichisqa kay, ajinamanta Diospa reinonman churasqa kanapaj; wiñay kawsaytataj herenciapaj jap'isqanchej ima kashan. Imaynachus runa karqa manaraj jucha kay pachaman yaykumushajtin, chaykunamanta yachachiwanchej, jinallataj kunanqa Dios wawampaj rejsikapuwasqanchejta niwanchej: “Tukuy imata ruwan munayninta junt'anampaj... Paypa jatun kayninta jatunchanaykupaj,” nispa nin. (Efesios 1:11-12).

Diospa wawasnin jina munayta kawasakushaspa, ichus juchaman urmarqanchej. CristotajrÍ, wañuyninnejta kawsarimpuyinnejta ima, maymantachus urmamurqanchej chayman salvaspa kutichimullawanchejtaj. Salvawajninchejqqa munan, ajinata ruwaspaqa ñawej rikusqan Iglesianejta ajina ruwakunanta; chayraykutaj chaypaj bautizmotaqa churarqa. Chaytaj uj señal kashan Diospa wawasnin kasqanchej.

Wakimpaj mana chaykama jatunmpaj qhawasqachu kashan bautismoqa; chaywampis bautismoqa may jina t'ukuna jatun valorniyoj. Chayqa imaynatachus may jina kapuyniyoj runa uj juch'uy qori anillomanta nerqa: “Pichus kay anillota jap'ikuwajqa, tukuy kapuyniyamanta dueño kanqa,” nispa. Chay anilloqa ancha valorniyoj rikhurin pichus chay jap'ikojpaj, tukuynin kapuyninmnata dueño kanqa nisqanrayku.

Bautismopeqa. “Yakulla kanman mana Palabrawanqa, manataj bautismuchu kanman; Palabrawan khuskari bautizmo, chaytaj kawsaj yaku Diospa K'acha Yanapayninwan junt'a; chay runataqa mosojman tukuchin,” ajinata Lutero uj kutipi nerqa. Chayqa kashan uj kamachisqa mayqempichus Diospa Qhasilla K'acha Yanapaynin salvacionwan khuskakasqanrayku. Apóstol Pablo nin: “Chayta Cristo ruwarqa Iglesiaqa juchamanta t'aqasqa santo kanampaj, palabranwan mayllaspataj llimphucharqa yakuwan jina,” nispa. (Efesios 5:26).

Munasqa Dios Tatayku, noqaykumanta ni mayqen pantachunchu, mana cheqa yachachiyta uyarispa, nitaj saqewaykuchu religiosolla kajta. Jesucristoj sutimpi. Amén.

“... Cristoqa Iglesiata munakorqa, ajinata Iglesiaraykutaj kawsayninta churarqa. Chayta Cristo ruwarqa, Iglesiaqa juchamanta t’aqasqa santo kanampaj. Palabrawan mayllaspataj llimphucharqa yakuwan jina...”
(Efesios 5:25-26)

Salmos 118 imanishanchus chayta yachachishaspa Martín Lutero nerqa: “Adán runamanta mirajkuna jinaqa Diospa qhawaynimpi juchachasqa rikhurinchej, imaraykuchus noqanchejpeqa mana kanchu cheqampaj qhawasqa kay, nitaj llimphu Diospa t’aqasqa kaypis. Cristopi bautizasqa kajtinchajtaj Diospaj t’aqasqa rikhurinchej, cheqan runapaj qhawasqataj. Imaraykuchus Cristo juchasninchejta chinkachin noqanchejmanta, k’achanchaykuwanchejtaj Paypa Santo kayninwan.” Nispa.

Pichus p’enqakun Cristopi kasqanta Diospaj t’aqasqa kasqanta ima, astawampis munan wajcha juchasapallapuni kawsakuyta chayqa, chay runaqa nishanmampis jina: “Noqaqa mana creenichu noqarayku Cristo wañusqanta ni juchaymanta llimphuchawasqantapis, nillataj creenichu bautizakusqaypis imapajpis valenanta”, nisqampi.

Ajinata kawsakusun mana allinta unancharispalla chayqa, yuyayninchejpeqa tukuy imapis uj sonsera jinalla kanman. Diospa qhawaynimpipis juchasapa Cristomanta karupi rikhurusunman, llakisqallapunitaj kawsakunman kay pachapeqa. Ajina runapajqa, bautisachikuspa creesqampis, mana kasunapaj ilocospa... yuyaynillan kasqanta! yuyankuman.

Yachakusqanchejman jina, Evangelioqa rikuchiwanchej juchaman urmasqa runata Dios salvayta munasqanta, chayraykutaj uj k’ata Churinta kay pachaman kachamorqa noqanchej ukhupi kawsanampaj, cuentachejpi Diospa Kamachisqanta junt’anampaj, noqanchejrayku wañunampaj ima. Chayrayku Diosqa noqanchejman qowanchej bautismota, Evangelioqi Dios niwasqanchejman jina: “Cristopi tukuy bautizasqa kajkunaqa Cristomanta p’achallisqa kankichej,” nispa. (Gálatas 3:27).

Dios Tatayku, ama saqeychu noqayku ukhupi phiñanaku kananta, qowayku munakuyniykita. Jesucristoj sutimpi. Amén.

Febrero 25

“... Pichus mayllasqa kashan, chaypata tukuy cuerpon llimphuña; chakisnillanta mayllana tiyan. Qankunaqa llimphuña kankichej...” (Juan 13:10)

Jesusqa parlashan almanchej llimphu kasqanta, imaraykuchus chaypi nillaraqataj: “... manapis tukuyniykichejchu,” nispa. (Juan 13:10). Imajtinchus yacharqa pichus Payta wasanchananta. Apostolesnin ukhupeqa Judas mana llimphuchu karqa.

Jesusqa ujtawampis nillaraqataj: “Qankunaqa llimphuchasqaña kankichej, noqaj parlasqayrayku,” nispa. (Juan 15:3). Arí, ajinata nerqa, imaraykuchus Fe, Diospa Simi Nisqampi khuskachasqa kanan tiyan; imaraykuchus, mana Cristopi atienikuspaqa mana pipis llimphu kanmanchu. Judasqa mana chay feniojchu karqa.

Jesusqa, runaj yuyaynimpi imachus kashan chaytaqa sumajta yachan, chayrayku yachachisqasninman nerqa: “Pichus mayllasqa kshan, chaypata tukuy cuerpon llimphuña,” nispa. (Juan 13:10). Apostolesnintapis sapa ujta sumajta rejserqa. Yacharqa sapa ujninku imaynachus karqanku chaytaqa. Nisqanman jina, chay ch’isipacha wasanchasqa karqa.

Diospa qhawaynimpi Jesuspa apostolesnenqa Jesuspipuni cheqan kayninkoqa karqa, chayraykutaj Paypata kajkunapis llimphusllataj karqanku. “Diosqa rikuchin imaynatachus runata cheqan runapaj qhawasqanta mana leyllawan,” nispa nin. (Romanos 3:21).

Cristoj Cheqa kaynin mana rikukoj kashan chaypis, ajinapuni kashan, manataj uj mosqoyllachu, cheqapuni kashan.

Cristoqa Dios kasqanrayku, apoltolkunapeqa rikun tukuy kawsayninkuta. Chayrayku pichus bautizasqa kajkunaqa salvasqas kasqankuta nin, Imaraykuchus, Jesuspi, Salvajninkupi creesqankurayku; paykunaqa mayllasqa kanku Diospa qhawaynimpi juchamanata llimphu.

“Chakisr” purisqanrayku ch’ichichakumpuni. Ajinata runaqa, kay pacha kawsaynimpi juchawan ch’ichichakunraj, Ajina kajtenqa Diosman kutirikunan tiyan Jesucristoj yawarnimpi llimphuchasqa kanampaj, sapa p’unchay perdonta mañakuspa.

Tukuy Atinyioj Diosniyku, yanapawayku Qanman jamuyta. Noqaykupi wiñachiy Qampi atienikuyta. Wañunayku patapipis ama saqerpariwaykuchu. Jesucristoj sutimpi. Amén.

“... Payqa (katareqa) warmita tapurerqa: Huertapi kaj tukuynin sach’aspa poqoyninta ama mikhunkichejchu, nispachu Diosqa nisunkichej? Nispa.”
(Génesis 3:1)

Allinta reparay imaynatachus Supay warmiman nerqa chayta. Mana reparayllata runataqa Diosmanta karunchachin, Diospa Simi Nisqanta ujinaman q’ewispa.

Imanerqa? “Huertapi kaj tukuynin sach’aspa poqoyninta ama mikhunkichejchu, nispachu Diosqa nisunkichej?,” nispa nerqa. (Génesis 3:1). Misk’i simiwan parlaykurin Evamanqa, chantapis mana maychus kajtachu ujinaman q’ewispa. Sajra yuyayta churan Evaj yuyayninmanqa.

Kunampis kikiillantataj supayqa ch’awkiyashan runataqa. Chayraykutaj mana t’ukunapajchu, runakunaqa supaypa ch’awkiyasqan mana Diosman chimpakuyta munankuchu, runa masinkutapis ch’awkiyaspa kawsashanku: “Diosqa nishanchu kamachisqanta mana junt’ajkunaqa juchachasqa kanankuta?” Ajinata ninman karqa chayqa, qhasipajchá Jesucristoqa wañunman karqa. Ajinata nispa supayqa, cheqa kajmanta iskayrayachishan, yuyayninkuman llulla yachachiyta sat’ispa.

Salvasqaña kajkunatapis supayqa ch’awkiyashanraj juchaman tanqaykuspa urmachiyta munaspa. nirishan: Diosqa ajinatachu nishan? nispa. Diosqa ajinatapunichu ninman karqa, Cristoman kutirikuna kasqanta? Juchallinkuman chaypis Paypa wawallampuni kankichej, imaraykuchus Diosqa perdonallasunqa, nirishan. Cheqapipunichu Diosqa ninman karqa noqanchejwan mayllapipis sapa p’unchay kananta? nispa.

Chay ñawpa katareqa (supayqa), sapa p’unchay tanqashawanchej Diospa Simi Nisqanmanta karunchachiyta munaspa, iskarayachiyta munashawanchej imaymanapi, jinallataj yuyachiyta munashawanchej noqallanchej salvakuyta atisqanchejta.

Dios Tatayku, ama saqewaykuchu noqaykoj yuyasqaykuman jinalla imatapis ruwanaykuta; manachayqa Qanllata jatunchayta yupaychayta ima yanapawayku. Jesucristoj sutimpi. Amén.

Febrero 27

“... Kay sutiwanmin chaypacha sutichasqa kanqa: Tata Diosmin Cheqan kayninchejqqa...” (Jeremías 23:6)

Diospa kay nisqanta entiendeqqa supaypa atiyninmanta karunchakun, Jesucristoj kallpanwantaj kacharisqa rikhurin, ajinamanta creeninga sumaj churasqa cimientojina rikhurin. Pitajchus mana kasuta ruwanchu, chayrí mana munanchu entiendeyta Diospa nisqantaqa chayqa, mana yachanchu imachus Evangelio kasqantapis, nillataj Dioswan allinyachisqa kaytapis atinchu. Chayrayku ujkunamampis mana atinchu Evangeliomanta yachachiytaqa.

Noqanchejpi sonqo tiyaykusqa kanapajqa, cheqamanta Jesucristoman kawsayninchej jaywasqa kaltillan tarikun. Bibliaqa parlan mosoj p’achawan p’achallikuna kasqanta. Ajina kajtenqa, manaña noqanchejpa yuyasqanchejman jinachu sonqo junt’asqa kasun, manachayqa p’achallikusun Jesucristoj qowasqanchej p’achawan. Ajinamanta Diospa qhawaynimpeqa, cheqan runapaj qhawasqa kasunchej; chayraykutaj tukuy juchasninchej pampachasqa rikhurin; chaytataj Jesucristo pampacharqaña.

Diospa wawan kajqa, Bibliaj nisqanman jina kawsan, nisqanman jinataj mana allin imastapis qhesachan, juchatapis millaypaj qhawan. Paypajqa tukuy ima kawsaynimpeqa kashan Cristo: “cheqanta ruwanampajqa, Cristo ahska precowan rantisqampi kashan.” Arí, Jesusqa sonqon chawpipi kawsashan, tukuy ima yuyasqan munakuy chawpipi.

Chaytukuyimas ruwakun bautismopi, pichus “bautizachikun Jesucristoj kawsaynimpi, wañuynimpi, kawsarimuynimpi ima” Imaraykuchus Biblia nin: “pichus creejqqa, bautizachikuntaj salvasqa kanqa,” nispa. (Marcos 16:16). Bautismoqa apóstol Pabloj yachachisqanman jinaqa kashan mosojmanta nacey, mosoj runataj kay Espíritu Santonejta. Chay mawk’a runa, noqanchejpi ahogasqa kanan tiyan sapa p’unchay, Diosmanta perdonta mañakuspa chay juchachakusqamanta. Arí, “sapa p’unchay mosoj runa kana tiyan, Diospa rikuynimpi llimphu kawsayniyoj,” nispa nerqa Martín Luteropis.

Dios Tatayku, pillapis kawsayniykuta rikuspa Qanta yupaychasuchunku, amataj noqaykutaqa. Jesucristoj sutimpi. Amén.

“... Manañataj noqañachu kawsani, manachayqa Cristo kawsashan noqapi. Kunantaj aycha cuerpoypi kawsashaspapis Diospa Churimpi creesqayraykulla kawsashani...” (Gálatas 2:20)

Cristochus noqata cheqan runaman tukuchiwan, salvasqa kasqaytaj Cristollamanta kashan chayqa, arí, chaypiraj Diospaj t’aqasqa santo kasqayqa yachakonqa.

Tukuy jap’erqanchej chay millay herenciaata Evamanta Adanmantawan, chayrayku kunankamapis juchaman aysasqas kawsanchej. Chay millay herenciaqa, jucha tukuy kayninchejpi junt’a kashan. Chaytaj rikukun: Yuyasqanchejpi, parlayninchejpi, ruwayninchejpi ima. Chayqa kashan: Noqallanchejpaj imatapis munay, may kasqanchejta yuyakuy, k’ajajta phiñakuyninchej, sajra munapayayninchejpi, imaymana jucha ruwaypi, ima. Ajina kashan chay “mawk’a runanchejqa.”

“Mosoj runanchejri” noqanchejpi ujinamanta rikhurin, Jesucristopi atienikusqanchejrayku, chaytataj Espíritu Santo sonqonchejpi ninata jina jap’irichisqanrayku. Uj niypeqa, creesqanchej Dioswan khuskachakusqanrayku rikhurin noqanchejpi mosoj imasqa. Chayqa kashan Diosta munakuy, Paypa munayninta ruwayta munay, juchata ruwanamanta manchachikuy, sajra imasta ruwasqanchejmanta sonqota nanachikuy, jinallataj anchatapuni munay Diospa khuyayninta mask’ayta ima.

Noqanchejpi chay mosoj runa kayninchej, mana kallpayoj jina kashan chaypis, Diosmanta mañakusun chayqa kallpachawasun, Paypaj t’aqasqaña kasqanchejrayku Diosqa kusichiwasun. Imaynatachus Jesuspis uña wawita uywa qaranapi jayt’italla kashaj jina kasharqa chaypis, Espíritu Santoj atiyinwan Diospa munasqa Churin karqa, angelkunaj ñawpaqempi tukuypa t’ukunan.

Jesucristoqa wawita kashaspa, “wiñasharqa yachaypi cuerpompipis. Payqa Diospaj allin qhawasqa karqa, chanta tukuy runaspajpis,” nispá nin. (Lucas 2:52). Mana sayk’uspa, kawsaynimpeqa rillarqa imamanchus jamorqa, chayman chayanankama. Ajinallataj noqanchejpi chay mosoj runaqa wiñanan tiyan, Cristotaj noqanchejpi astawan rikukunampaj.

Janaj Pachapi kashaj Dios Tatayku, ama saqeychu noqaykoj sajra kawsayniykurayku mayqempis iskayrayajta. Astawanqa tukuyniykoj kawsayniyku jatunchasuchun. Jesucristoj sutimpi. Amén.



Marzo

*"Munakuychej Señorniykichej Tata Diosta tukuy
sonqoykichejwan, tukuy almaykichejwan, tukuy
kallpaykichejwantaj." (Deuteronomio 6:5).*

Marzo 1

“... Imaynatachus Señor Jesucristota sonqoykichejpi jap’erqankichej, ajinallataj Paywan khuskallapuni kawsaychej.” (Colosenses 2:6)

“Imaynatachus mosoj kawsayta jap’erqanki”, ajinallataj kachun Jesucristopi wiñayniykichejpipis. Mosoj kawsayniyki qallarijtinkama, qampi chay mawk’a runaj wañuyninta qallarirqanki; chaymanta kaymantaj, sapa p’unchay sajra aychaykej munaynin wañuchisqa kachun, espirituyki Jesucristopi kawsanampaj.

Jesucristopi creenchejña chayqa, manaña ch’awkiyakusunchu Diospaj t’aqasqa kayninchejpeqa. Jesuspi chay creesqanchejraykulla Salvasqa kasqanchejpis sinch’i kanqa. Kikin Jesucristowan khuska Diospaj t’aqasqa kawsakusunchej. Ajina kajtinga creesqanchejpi sinch’ita sayana, wiñanataj kachun. Apostol Pablo, nin: “Imaynachus Cristopis iglesiaj uman,... Ajinallataj Iglesiaqa paypa cuerpon,” nispá. (Efesios 5:22-23).

Kunanqa chay tukuyta kutiparisun: Bautizasqa kasqanchejraku, watejmanta nacerqanchej, chayraykutaj Cristowan ujchasqa kaspá Diospaj t’aqasqa kanchej, jinallataj cheqan runapaj qhawasqa kanchej. Juan 15:4 nin: “Noqapipuni kaychej, imaynatachus noqapis qankunapi kani, ajinata. Imaynatachus ramaqa sapallanmanta mana poqoyta atinchu mana uva sach’api kaspáqa, ajinallataj qankunapis mana atinkichejchu manachus noqapi kawajchej chayqa,” nispá. Arí, Cristopi kaspalla atinchej wiñayta.

Diosman kutirikuspañaqa qhesachananchej tiyan noqallanchejmanta salvasqa kaytaqa. Mana yuyanañachu k’acha kawsayninchejrayku salvasqa kaytaqa. Salvasqa kananchejpajqa, Diospaj t’aqasqa santo kayninchejpis mana noqallanchejmantachu. Manachayqa, Salvawajninchej Jesucristoraykulla.

Tukuy atiyniyoj Dios, yanapawayku Qampa wawasniyki jina kawsakuyta ni pí Qanta pisipaj qhawasanampaj. Jesucristoj sutimpi. Amén.

“Señorqa tukuytaj wañorqa, kunan kawsajkuna, amaña paykunapajchu kawsanankupaj, astawanqa kawsanankupaj, jaqay pichus wañorqa, kawsarimporqataj paykunarayku, chaypaj.” (2 Corintios 5:15)

Uj kutipi bautizasqa karqanchej, chaywampis, sapa p’unchay ujtawampis bautizasqa kasunman jina, sapa p’unchay mosojyanchej.

Diospa Qhasilla K’acha Yanapayninta jap’erqanchej mana chaypaj jina kashaspapis. Dioswan allinyachisqa kanchej Cristopi atienikusqanchejraykulla. Chayrayku kunanqa Salvawajninchej Jesucristopaj tukuy sonqo kawsanchej. Pichus Jesucristopi creeni nishaspa, manataj ajinata kawsayta munanchu chayqa, pay kikinta ch’awkiyakun. Sajra aychampa munayninta mana wañuchinchu, astawampis Diosta mana kasuspa mawk’a kawsayninman jinalla kawsakapun, ajinamanta payqa falso creyente kanqa. Imaraykuchus “Cristojta kajkunaqa aychankoj munayninta chakatanku,” nispa nin. (Gálatas 5:24).

Sapa paqarin rijch’arispas Diosman graciasta qoy kawsayniykimanta, kawsanaykipaj tukuy imata Dios qosusqanmanta, jinallataj almaykipaj sonqo tiyaykuyta qosusqanmantapis. Graciasta qoy Jesucristo salvasusqanmanta, chay feta qosusqanmanta salvasqa kanaykipaj. Jinallataj jatunmanta yupaychay Diostaqa.

Sapa p’unchay Diosqa yuyayniyki sonqoykipi ima kachumpuni. Ama juchallispas Diostaqa wasanchaychu. Sonqoykej chiriyashasqanta reparakunki chayqa, yuyarikuy Diospa nisqanta, imaynatachus k’amisusqanta. Imachus kapususqantapis allinta apaykachay, qolqeykitapis ama imapis kachun nispaqagastaychu. Manachayqa, chay tukuy kapususqanwan Diosta jatunchay, runa masiykitapis yanaparispas. Sajra aychaykej munaynintapis wañuchiypuni mana juchaman urmachisunampaj. Pipis k’amisojtinga ama phiñakuy pachachu. Diospa kamachisnintapis kasuy creenyiki wiñanaykipaj.

Dios Tatayku, kay pachapeqa, sajra imaswan junt’a kashan. Munasqa Churiyki Jesucristomantari tukuy k’acha imas jamun, kallpachawayku allin imaspi kawsakuyta. Jesucristoj sutimpi. Amén.

Marzo 3

“Qanqa kay nacionmanta runasta miraykuchinki... Ñawpaqeykipi tukuy kusikonqanku, cosechapi runas kusikunku, ajinata; maytapuni kusikonqanku, imaynatachus wañuchinaku maqanakupi qhechusqanku qhapaj imasta rak’inakuspa runas kusikunku, ajinata. Qanqa paykunata phaskaranki yugonkumanta, lijrasninkupi k’aspismanta, sinch’i llakiypi jarap’asqa kasqankumanta ima. Chayta qanqa urmachinki, imaynatachus Madiana urmacherqanki, ajinata... Uj wawa nacepuwanchejña; Dios uj wawata qowanchej. Paywan kanqa jatun atiy kamachinampaj. Sutisnintaj kaykuna kanqa: Mayta t’ukuna yuyaychaj, Atiyniyoj Dios, Wiñaypaj Tata, Allin kawsayta apamoj Rey, ima.” (Isaías 9:3,4,6).

Diosmanta Qhelqasqapi, Espíritu Santo Israelitakunata yuyarichishan imaynatachus Egiptopi wata runa kashaspa ñak’arisqankuta. Chayrayku nishan: “phaskaranki yugonkumanta, lijrasninkupi k’aspismanta, sinch’i llakiypi jarap’asqa kasqankumanta ima. Chayta Qanqa urmachinki,” nispá. Chayta nispaqa parlasharqa Jesucristomanta, imaynatachus Pay pagarqa tukuy runakunaj cuentanmanta tukuy imata junt’aspa, chayta.

Mosoj Testamentopi rikunchej: Cristo preciowan kacharichiwarqanchej Leypa maldicionninmanta, imaraykuchus Payqa maldecisqa karqa noqanchejrayku. Diosmanta Qhelqasqapi nin: “Kurkupi tukuy warkhusqa kajqa, maldecisqa kachun, nispá.” (Gálatas 3:13). Wañushaspa yawarninta jich’asqanwan rantiwarqanchej.

Señorqa nerqa, wañuyqa atipasqa kasqanta, Tata Diospa munakuynin may jatun kasqan chaypi rikukun.

Kay pachapi tukuy runaspa juchanku, Adampa p’unchayninmanta kunankama, Diospa Corderonman q’epirichisqa karqa. Chaychhikajatun jucha Señorninchej Jesucristotaqa ñak’arichispa yawarta jump’icherqa. Tukuy juchanchej Paypa patanman urmarqa, chayraykutaj noqanchejqqa jampisqa kanchej chay juchanchejmantaqa.

Dios Tatayku, tukuy iskayrayaymanta Jesucristoj qhasilla K’acha Yanapaynirayku perdonawayku. Kunanqa, Qanta munakuywan sonqoykuman junt’achiwayku. Jesucristoj sutimpi. Amén.

“... Diosqa k’anchaymin, manataj Paypeqa ni ima laqhapis kanchu. Dioswan uj sonqolla kasqanchejta nishaspa, sichus laqhapi kawsanchej chayqa, noqanchejqa llullakushanchej, manataj cheqa kajman jinachu kawsashanchej.” (1 Juan 1:5-6)

Kaypi rikunchej, Dioswan uj sonqolla kasqanchejta, chayraykutaj ninchej: “Diospi creeni, Jesucristopi atienekuni salvasqa kanaypaj,” nispaga. Chay nisqanchejqa allimpuni kashan. Chaywampis mana nisqallachu kanan tiyan, manachayqa cheqapipuni kawsayninchejpipis ajina kanan tiyan. Manachus ajina chayqa, llulla kawaj Diospa rikuynimpeqa.

“Laqhapi kawsayqa,” juchapi kawsay kashan. Dioswan uj sonqolla kashani nishaspa, hermanoykitataj chejnikunki chayqa, laqhalla piraj kashanki. Pitapis chejnikoyqa, Diospa contrampi kashan.

Martín Lutero Nerqa: “Diospa wawan kani nishaspa, khuchi kawsaypitaj kashanki chayqa, supaypa atipasqan kashanki. Sichus mich’a kasqaykiwan, runa masiykita dañota ruwanki chayqa, sajra aychaykej atipasqan kashanki”, nispa nerqa Luteroqa.

“Laqhapi kawsaymanta” parlaspa, chaykunamanta wakin kashan kay jinata kawsajkuna: Munayninkuman jinalla kawsanku, ajinapis Diospi creeni nishankutaj, Evageliomantapis may sumaj kasqanta parlarishanku, Diospa Qhasilla K’acha Yanapayninmantapis kikillantataj parlarinku, Dioswampis allimpi kashasqankuta nishanku, kawsayninkupirí paykunapi atienikuspalla jatunchakuspa kawsanku. Ajinata kawsajkunaqa Espiritu Santoj ñawpaqempi llullas kanku.

Mosoj Testamentopipis, Apostolkunaj kawsayninkumanta parlay libropi (Libro de Hechos), chay phishqa kaj t’aqapi, Diosqa sut’inchashan ajinata kawsaj runasmanta. Paykunaqa creejkuna ukhumanta orqhosqa karqanku, juchankumanta wañurqanku ima. Chaykuna karqanku Ananías warmin Safirapiwan, Diosman llullakusqankurayku wañusqa pampaman choqakorqanku. Noqanchejwan mana ajinatachu kunan ruwashan chaypis, Diosqa rikushan yachashan imaynachus kashasqanchejtaqa.

Ama llullakunachu, juchanchejtaqa mana Diosmanta pakayta atisunmanchu.

Dios Tatayku, ajinapi kashasqaykuta, jinallataj mana creesqaykumantapis perdonawayku, ujkunawan qhawanakusqaykumantapis perdonawayku. Jesucristoj sutimpi. Amén.

Marzo 5

“... Qhawakuychej fariseospa levadurankumanta...” (Lucas 12:1).

Ajina puraj uyapuni kuraj supayqa. Pichus ajina kajkunapis chay kuraj supayman rijch'akunku. Runaj yuyayninta sonqonta ima muyuchushanku, ajinata supayqa pantachishan runakunata jucha yaykunampaj.

Pichus k'anchaypi kawsan, Dioswampis jinallataj runa masinwampis allimpi kawsakun chayqa, ima jucha jamojpis mana unaytachu paypi qhepakun, usqhayllata chay juchanta Diosman rimarin. Arí, ajinamanta payqa mana puraj uyachu, nitaj chay juchaj watasqan jinaqa qhepakapunchu, manachayqa ch'urkirakuspa Jesucristoj kallpanwan kacharichikun.

Chayrayku Señorninchej Jesucristoqa nin: “Qhawakuychej fariseospa levadurankumanta. Chayqa puraj uya kayninku,” nispá. (Lucas 12:1).

Ajinapi rikhurispapis, paykunaqa munankupuni Diospa wawan jina kawsakuytaqa; chaywampis wakinqa juchawan misk'ichikapunku, chayraykutaj mana munakuchu chay juchanta saqeyta. Mana chaykama jatun juchachu, nispalla sonqochakunku. Paykunaqa ajinata ruwaspaqa juchallishankupuni.

Wakintajrí, tukuypa rikunallanta Diosman juchankuta perdonta mañakuspa rimarinku, chaywampis simillankuwan manataj tukuy sonqochu. Ajina puraj uya creyentesqa perdonasqa kashaspapis watejmanta juchaman urmallankuñataj, chantapis asiyanta wañurispá mana p'enqarikuspataj puriykacharinku.

Puraj uya kajkunaqa, ima juchankutapis wakillanta rimarinku, chayllamanta perdonta mañarikunku. Yuyasqankuman jina, imachus paykunapaj allin misk'i juchapitaj yuyashallankupuni, manataj yuyankuchu imachus Diospa munaynin kasqantaqa. Chayta ruwaspaqa, pisipaj qhawanku Diospa Palabrantaqa. Tukuy chay imasqa, puraj uyas kajkunaj yuyaynimpí junt'a kashan. Bibliapi nin: “Kusikuyniyojmin kanku llimphu sonqoyojkunaqa, imaraykuchus paykunaqa Diosta rikonqanku,” nispá. (Mateo 5:8).

Dios Tatayku, karunchawayku puraj uya kaymanta. Kutirichiwayku llimphu kawsayman. Ama saqewaykuchu piwampis phiñanakojta. Sonqoykuman churay sonqo tiyasqa kawsakuyta. Jesucristoj sutimpi. Amén.

“Chaytataj mikhunkichej ajinata: P’achasniykichej p’achallisqas, chakisniykichejman juk’utasniykichej churasqa, tojnoykichej jap’irisqa. Chantapis usqhayta mikhunkichej, imaraykuchus chayqa Tata Diospa Pascuan.” (Exodo 12:11)

Chay imasta Diosqa kamacherqa israelitakunaman wakichisqa kanankupaj, Egipto llajtapi wata runa kayninkumanta kacharichispa, chay llajtamanta llojsipunankupaj. Jinallataj chayqa noqanchej imachus Pascua kasqanta yachananchejpaj. Pischus Jesucristoman rispa Yawarnimpi llimpuchasqaña kajkunaqa, wakichisqa kashancej kashan ima ratopis ripunanchejpaj. Manaraj qan Jesucristoman chimpakunki chayqa, kunan pacha usqhayllata chimpakuy mosoj kawsaypi qallarínaykipaj; qhepata mana qhawarispataj ñawpajman risunchej, kay pacha mana allin imasta manaña munapayaspa, manataj chaykunallapi yuyaspa. Imaraykuchus llajtanchejqqa maypichus Dios tiyakun chayman ripusunchej.

Apóstol Pablo nin: “Cristowan khuska kawsarichisqa kaspera, mask’aychej Janaj Pachapi kaj imasta, maypichus Cristoqa Dios Tataj pañampi tiyasqa kashan, chaymanta,” nispa. (Colosenses 3:1).

Uj ch’isipi israelita runakuna, sumaj wakichisqas Pascua mikhuyta usqhay usqhayta mikhunanku karqa Egipcio runakunamanta ayqhenankupaj. Manaraj imapitaj, Egipcio runakunaj soldadosnin qhepankuta rispa taripaykusharqankuña. Israelitakunataj, may jinata mancharikorqanku.

Noqanchejpis kikillantaj Diospa K’acha Yanapayninta jap’erqanchej, kay pachaj sajra imasninmanta kacharichisqa kaspera, Jesucristo noqanchejrayku wañorqa, Paynejtataj kunanqa wakichisqa kashanchej, Janaj Pacha wasinchejman chayananchejkama. Ni jayk’aj qonqananchejchu tiyan, Jesucristoman chimpakusqanchejmantapacha sajra supayqa qhatiykachashawanchej chay egiptomanta soldados jina.

Ari, mana qonqanaykichu kashan sajra runakuna ukhupi kashasqaykita, chantapis, ashkha valorniyoj perlas uj t’uru wich’ipi jina kashasqaykita. Uj ladoykipi kashan sajra kuraj supay satanás sutiyoj, payqa imaymanapi chinkarparichisuyta munashan. Uj ladoykipitaj kashan sajra mundo kawsay, chanta sajra aychanchej juchaman aysayta munashawanchej. Chaykunaqa munakoj Diosmanta t’aqasuyta munashan.

Señor, khuyawayku, waqaychawayku enemigosniykumanta. Jesucristoj sutimpi. Amén.

Marzo 7

“... Sapa ujnyikichej sonqoykichejta allinta qhawarikuychej, manaraj t’antata mikhushaspa, nitaj copamanta ujjashaspa.” (1 Corintios 11:28)

Señorpa Cenampeqa espirituman jina kawsayninchejpi sumaj yanapa kallpata jap’inchej. Señorpa Cenanta mikhoyqa, mana ñawisninchejpa rikusqallanchu, nitaj noqanchej yuyasqanchej jinachu pisipaj qhawasqa kanan tiyan. Manachayqa jatumpaj qhawasqa kanan tiyan. Imaraykuchus chay kamachisqaqa Diosmanta jamun. Chayrayku Paymanta mañakuna chaypi atienikunapaj.

Señorpa Cenampi kashani ñawisniypa rikusqallampi yuyaspa chayqa, t’antaqa t’antalla kashan, vinopis vinulla kanman, manataj Diosqa chaypichu kashanman. Ajina yuyaywanqa mana yanapa canmanchu kawsayninchejpeqa.

Ajina kajtenqa, may chhika kutistapis Santa Cenapi kashawaj, mana ni ima yanapata jap’iwajchu kawsayniykipeqa, nitaj kallpatapis jap’iwajchu. Chaymanta jawataj, enemigo supayqa kawsayniyki munasqanta ruwayta munanman; imaraykuchus chay Feta, kallpata, kusiya imaqa, mana saquesunqachu jap’ejta. Imaraykuchus, chay tukuyta supayqa ruwashan mana reparayllata, chirilla kanaykipaj mana reparanaykipaj imachus cheqapipuni Santa Cena kasqantaqa.

Noqanchej Diospa wawasnenqa, umanchejpi jap’inanchej tiyan, Imachus Santa Cena kasqanta, chayqa ichus ashkhaspaj pakasqa jinalla kashan. Charaykutaj pisimanta pisi jap’inqanku, creena aswan jatunraj kasqampi creenankupaj. Tukuy Atiyniyoj Diospa Simi Nisqanqa cheqapuni niwanchej, Santa Cenapeqa tukuy juchanchejpaj perdonta jap’isqanchejta.

Dios Tatayku, qampa munayniykiqa noqaykupajqa jatuchej imasta ruwanki. Chayrayku kunan gracias niyku, mañakuykutaj khayakuyniykita. Jesucristoj sutimpi. Amén.

“Kayqa tratomanta yawarniy, chaytaj jich’asqa kanqa ashkha runaspa juchasninku pampachasqa kanampaj.” (Mateo 26:28)

Jesucristoqa cruzpi yawarninta jich’aspa wañorqa, chay yawarninneja salvasqa kananchejpaj. Chaymanta jawataj kusiasqa kananchejpaj, yachayta qonawanchejpaj, Dioswan allinyachisqa kananchejpaj ima. Chayrayku Santa Cenataqa churapuwanchej, imaraykuchus Cristo qhapaj yawarninta jich’asqanrayku Dios ruwarqa uj Tratota perdonasqa kananchejpaj.

Chayrayku Señor Jesucristo, nin: “Noqaman jamuychej, tukuy sayk’usqa kajkuna, llasa q’epiyokuna ima, noqataj samarichisqaykichej,” nispa. (Mateo 11:28). Chay tukuy ñak’ariykunamanta, phutikuymanta, juchaj sayk’uchiyninmata imaqa, Señorninchej Jesucristolla sonqo tiyaykuyta qowasun. Waranqa waranqas mana creejkunapis, puñusqa kajkunapis, rijch’arichisqa kanqanku. Paykunapaj kashan Santa Cenaqa, perdonta tarinankupaj.

Sichus qan, Santa Cenaman jamunki mancharisqa, juchallini mana sina chimpaymanchu nispa, Diospa qhawaynimpí munashanki allinmanraj tukuyta. Uyariy Jesuspa nisqanta: “Kayqa tratomanta yawarniy... chaytaj jich’asqa kanqa ashkha runaspa juchasninku pampachasqa kanampaj,” nishan. (Mateo 26:28). Paypa siminmanta uyarinki imapajchus yawarnin jich’asqa karka chayta. Jich’asqaqa karka: Kay pachapi kaj chhika runaspa juchasnin panpachasqa kanampaj. Chayrayku amapuni iskayrayaychu nitaj manchachikuychu. Juchasapa kasqaykita reparanki chayqa riy perdonta jap’ikoj Santa Cenapi.

Mana juchayoj kasqaykita yuyakunki chayqa ama Santa Cenaman chimpaychu, mana necesitankichu Jesucristoj perdonnintaqa, imaraykuchus Payqa wañorqa juchasapa runas perdonasqa kanankupaj. Onqosqa runa necesitan uj medicotaqa, mana sano runaqa necesitanchu.

Jesucristoj apostolnimpis, ni ujpis mana juchayojqa kargachu. Chaytaqa Señorninchej Jesucristo yacharqa Payta wasanchanankuta, tukuy kawsayninkupipis munaspa mana munaspa juchallirqankuraj. Payqa yachan noqanchejpissapap’unchayimaymanamantajuchallisqanchejta. Chayraykumá Santa Cenataqa qowanchej juchasninchejmanta perdonasqa kananchejpaj.

“Kunanqa mana ima juchachaypis kanchu Cristo Jesuspi kajkunapaj,” nispa nin. (Romanos 8:1)

Señor, yanapawayku Santa Cenaykiman rispa perdonta tarinaykupaj, Bendicionniykita jap’inaykupaj ima. Jesucristoj sutimpí. Amén.

Marzo 9

“... Pipis aychayta mikhun, yawarniytataj ujyan chayqa, noqapi kawsan noqataj paypi.” (Juan 6:56)

Jesucristoqa apostolesninwan Santa Cenata mikhuytawan nerqa: “Noqaqa paykunapi kashani, Qantaj noqapi. Ajinamanta paykuna uj sonqolla kanqanku,” nispá. (Juan 17:23). Imatataj niyta munan chay? Kaytaqa mana mayqen runallachu nerqa, Diospa kikin Churin nerqa.

“Dios Tata munallarqataj tukuy kaj chhikata Paywan allinyachikuyta... Churimpa yawarninrayku,” (Colosenses 1:20). Chaytaqa ruwarqa cruzpa altarnimpi Pay kikinta wañuyman jaywakuspa, Diosman jaywakorqa uj k’acha ofrenda jina. Chaywantaj juchamanta mayllawarqanchej. Dios munarqa ajinamanta Paywan allimpi kananchejta sapa ujninchejwan, noqanchejman qospa Aychanta mikhunanchejpaj, yawarninta ujyananchejpaj ima. (Chay kashan Santa Cena).

Imatapis mikhojtinchejqá, chay mikhusqanchej ukhunchejman yaykun, chayraykutaj chay mikhunaqa noqanchejwan ujllaña. Señorninchej Jesucristo cuerponta yawarnintawan qowanchej mikhunanchejpaj ujyananchejpajtaj, Espiritunwan espiritunchejwan ujllaña kananchejpaj. Ajinamanta Paypa munakuynin juchamanta llimphu kaynin noqanchejpata kanampaj wiñaypaj.

Santa Cenata Jesucristo kamachispa qowanchej, noqanchejwan ujchasqa kanampaj, chay bendecisqa t’antata mikhusqanchejwan, chanta chay bendecisqa vinota ujasqanchejwan ima. Chayraykumari Santa Cenaqa, ancha valorniyoj kashan. Chayqa Jesuspi creejkunapaj bautisasqa kajkunapaj ima, Janaj Pacha mikhuy kashan, kay pachapi cristianospaj.

Munasqa Tatayku, ama saqewaykuchu sajra imasta ruwajta. Yanapawayku ari, imatachus munasqaykuta saquespa, munayniykita ruwanaykupaj. Jesucristoj sutimpi. Amén.

“Tukuy runas juchallikusqankurayku, paykunaqa Diospa Jatun kaynimpa k’anchayninta mana taripayta atinkuchu.” (Romanos 3:23)

Kayta nispaqa reparachiwanchej, runaqa Paypa t’aqasqa wawasnin kashaspapis atinkuraj juchaman urmaytaqa; yachananchej tiyan pikunamantachus parlashasqantaqa, paykunapis noqanchej jina runasllataj kasqanku, chayrayku juchallirqanku. Ajinallataj noqanchejpis juchallisunman, chayrayku allin kawsaynillanchejmanta parlayta munasunman chayqa p’enqaypi rikhurisunman, astawantaj karunchakusunman.

Ama anchata paykunapaj rimaspa, nitaj anchata jatunchaspa cheqata parlasun. Ama yuyanachu: apostolkuna, profetacuna, reykuna, sacerdotekuna imaqa, jaqay kutipi noqanchejmanta nisqaqa mana pantayniyoj kasqankutaqa, imaraykuchus paykunapis noqanchej jina runas karqanku.

Mana yuyanachu uj wajcha creyenteqa mana jatumpaj qhawana jina kasqantaqa. Dios Tatapajqa mana pipis mana juchayojqa kanchu. Chayrayku Diospa Qhasilla K’acha yanapaynenqa noqanchejta khuyanawanchejpaj kashan. Arí, ichus wakinmanqa Dios qon jatuchej imasta ruwanankupaj, chaywampis tukuyninchej uj preciollawan rantisqa kanchej. Noqa kayman chunka kuti aswan juchasapa chaypis, tukuy runakuna juchasapas kanchej, necesitanchej Diospa khuyakuyninta.

Qampis noqapis, apostol Pablo, apostol Pedro, apostol Juanpis Diospajqa jatun valorniyoj kanchej, imaraykuchus Cristoqa uj preciollata pagarqa tukuypaj. Bibliapi rikukun ajina kasqanqa.

Cristoj salvasqan kajkunamanta, wakin aswan sinch’ita sayajkuna kanku chaypis, uj layalla kanchej, uj laya aychayoj, uj laya yawarniyoj, tukuyninchej runas kanchej.

Ñawpa runakuna, Diospi creejkunamanta wakenqa ancha yuyarisqastaj kanku, ichari? Paykunamanta Bibliapi qhelqasqa kashan noqanchej paykunaj kawsayninkumanta yachakunanchejpaj.

Dios Tatayku, pikunachus k’amishawayku chaykunapajqa ama thutojta saqewaykuchu; astawanqa paykunata yanapayta yachachiwayku. Jesucristoj sutimpi. Amén.

Marzo 11

“... Tukuy imata sutiypi mañakojtiykichejqa, Dios Tata qosonqachej.”
(Juan 16:23)

Diosmanta mañakuspaqa, mañakuy Jesucristoj sutimpi, chantá imatachus mañakusqaykita jap'inki. Kikin Dios ajinata kamachiwanchej. Jinallataj, ruway Paypa nisqanta. Qanqa atienekuy chay nisqasnimpi, amapis chay rato pacha jap'inkichu chaypis.

Diospajqa, mana imapis kanchu mana ruwayta atinampajqa. Qhawariy Bibliapi israelitakunawan imastachus Dios ruwasqanta, Egipto llajtayoj soldadosmanta aygekushajtinku Puka jatun qocha cantopi, chayta. Qhawarillaytaj, Daniel leonesman wijch'uykusqa kashajtin, chayta. Qhawarillaytaj, Jesucristoj milagrosta ruwasqasnintapis. Manachayrí qhawariy cielopi ch'askasta, jinallataj qhoraswan q'omeryashaj t'ikawan junt'a pampastapis.

Kunantaj tapurisqayki: Imallapis kanchu Dios mana ruwayta atinampaj? Sitajchus creenki Diosqa atiyniyoj kasqanta chayqa, atienikuy chay nisqasnimpi. Chayri ichus iskarayashankiraj Dios yanapasunanta chayqa, ñawiriy Bibliapi uj viudamanta, payqa uj juezman risqa nin kutin kutinta uyarichikunankama. Chay juezqa phiña runa, ni pita manchachikoj runa kashaspapis, sonqompí nerqa: “Noqaqa ni pita manchachikuni chaypis, kay viuda sapa kuti jamuspa umayta mana nanachinawampajqa justiciata paypaj ruwasaj, nispa. Chantá Jesús nerqa: Uyarerqankichejchu chay juezpa nisqanta? Diosqa manachu justiciata ruwanqa Paypa ajllakusqasnimpaj tuta p'unchay mañakushajtinku? Unaytarajchu suyachikonqa?” Nispa. (Lucas 18:1-8).

Ama mancharispa kharkatitinachejchu p'enqaywan mana creeta atisqanchejmantaqa. Diosqa mana phiña juez jinachu, yanapawasun Paypi astawan creenanchejpajqa. Payqa tukuy atiyniyoj chaypis, khuyakuyniyoj, munakuyniyojtaj perdonanawanchejpaj kallpachanawanchejpaj imaqa.

Diosniy Tatayku, yanapawayku onqosqa kashajtiyku, mana usqayta iskayrayaspa Qampi suyakuyta. Creesqaykupi sinch'i kanaykupaj kallpachawayku. Jesucristoj sutimpi. Amén.

“Noqanchejrí Janaj Pacha llajtayojkuna kaspá, tukuy sonqo suyarishanchej Salvawajninchej Señor Jesucristo Janaj Pachamanta jamunanta. Payqa kay pisi kallpa wañoj cuerponchejta waj jinaman tukuchenqa, Paypa may sumaj llihiphej cuerpon jina kanampaj...” (Filipenses 3:20-21)

iReparay, apóstolqa ni chhikitanta iskayrayaspa nin tukuy chaytaqa! Parlasharqa chayta, pay ajina salvasqa kasqanmanta, chay nisqanwantaj sonqochawanchej kusichiwanchejtaj.

Ñawpajpeqa reparana kachun, kay pacha kawsayninchejpíqa junchanchejmanta perdonasqaña kanchej Jesucristo Salvadorninchejnejtá, ajinamanta suyashawanchej Janaj Pachapi wiñay kawsay. Pabloqa salvasqa kayninmantaqa, ni uj chhikantapis jinachu kanman manachu? nispaqa ninchu. Kay ñawisqanchejqa ima munay kashan noqanchejpajqa, imajtinchus chaytaqa mana runallachu parlan. Kikin Diospuni niwanchej.

Cheqamanta salvasqa kayqa, sinch'i cimientó patapi wasi ruwasqa jina kanchej; mana jayk'aj kuyurej Espiritupi sayasqa kawsayninchejqa kashan. Janaj Pachapi kawsananchejmanta yachakuspaqa, mana pata patallantachu qhawana. Chaykunataqa tukuy imamanta aswan yuyasqa kanan tiyan sonqonchejpeqa. Chay jina kawsayta mana rikunchejrajchu ñawisninchej chaypis, ajinapuni kasqanta tukuy sonqo creenanchej tiyan.

Chay tukoyqa, kallpata qowanchej Dioswan kawsayta munanapajpuni. Chayqa mana mayqen runaj parlasqan jinallachu, chay nisqasqa Diospaj nisqasnin. Chayrayku chay imasmanta parlayqa kallpata qowanchej kay pachamanta chay millay imasmanta t'aqakunapaj, llakiy jamuajtínchejpis usqayllata Jesucristoman ayqhekunapaj ima. Señorninchej Jesucristoj Evangelíompi creesqanchejqa, “jatun atiy salvasqa kananchejpaj kashan.” Chay creeyqa runakunata mosojyachin, mosoj yuyayniyojman tukuchin, Diospaj t'aqasqa kanapaj, imaraykuchus chaykunaqa ajina kashan, Janaj Pacha llajtayojña kasqanchejrayku.

Chaywampis Cristopi creej runamasinchejmampis, kaykunamantaqa yuyarichinapuni kashan, salvasqa kasqanchejqa Diospa Churin Qhasilla K'acha yanapayninta qowasqanchejraykulla kasqampi.

Señor, yanapawayku, pipis imaniwajtiyku, mana kutichikunaykupaj. Jesucristoj sutimpi. Amén

Marzo 13

“Warmitaj kuticherqa: atiyku mikhuyta tukuynin sach’aspa poqoyninta. Huerta chawpipi kaj sach’allamanta Diosqa niwayku amapuni mikhunaykuta, ni llojchirinallaykutapis. Chaymantachus mikhunkichej chayqa, wañunkichej, niwayku.” (Génesis 3:2-3)

Katareqa repararqapacha Eva allin parlaywan kutichisqanta. Chaywantaj Evaqa qallarercaña juchaman urmayta, katariwan parlashasqanrayku. Chay pantachijwanqa mana parlananchu karqa ni uj simillatapis. Chay katarej parlasqanqa Diospa nisqasninmanta iskayrayacherqa, chay tentacionmanta ayqhenantaqa chayllapipuni kasharqa uj wawa jina ni imata reparaspa. Imachus allin imatajchus mana allinchu, chanta imachus jucha kasqantapis yachashaspa mana reparakurqachu. iiiChay karqa chay llakiy ruwayqa!!! Evawan Adanwan ajinata juchallisqankurayku tukuy kay pachantimpi runakunapaj llakiy, nanay, waqay, wañuy yaykumun, Diosmantapis wiñaypaj t’aqasqa rikhurin runaqa. Chay tukuytaj karqa katariwan parlaykusqanrayku.

Chay katareqa, Evata Diospa nisqanmanta iskayrachiytawan, Diospa contrampi qallarin parlaykuyta, nispa: “Mana wañunkichejchu”, nispa. Chayrayku, ama qonqaychejchu kuraj supaypa nisqanta: i“Mana wañunkichejchu”! nispa. Kunampis ajina llullakuywan noqanchejtapis iskayrachiya munashan ajina llulliriyuwan ch’awkiyaspa. Ajinata runakunaj yuyayninmanqa chay llulla yachachiyta churashan. Arí, ajinata supayqa mana creej runaspa siminneja llulla yachachiyta yachachishan, chay llullatataj ashkhas creeshanku. “iKaypis, jaqaypis allillan kaspajinashan manapis ancha sajrachu kanman jinata rikuchin.” Chay sajra supayqa nishan: “Diosqa mana wijch’umusonqachejchu, mana wañunkichejchu,” nispa.

Ajiinallatataj sajra supayqa Judasta tanqarqa Jesusta wasanchanampaj. Judasqa sonqompi nerqa Jesusqa may jina atiyniyoj mana pipis atinmanchu atipayta, atillanqa kacharichikuyta, nispa. Chanta wañuchisqa kananta yachaspataj, chay qolqeta jap’ikusqanta temploman qhalliykamporqa. Chay qolqeta jap’ispa kusikuynenqa mana unaypajchu karqa.

Munasqa Dios Tatayku, Qampa munasqaykiman jina kallpachawayku Qanta kasojkuna kanaykupaj. Ama qolqellapi yuyanaykupaj. Jesucristoj sutimpi. Amén.

“Noqanchejrí, Janaj Pacha llajtayojkuna kaspá, tukuy sonqo suyarishanchej Salvawajninchej Señor Jesucristo, Janaj Pachamanta jamunanta. Payqa kay pisi kallpa wañoj cuerponchejta waj jinaman tukuchenqa, Paypa may sumaj lliphipiej cuerpon jina kanampaj. Chayta ruwanqa mayqen atiyinwanchus tukuy imata kamachiyninman churanqa, chaywan.” (Filipenses 3:20-21)

Uyarishankichu? Suyashanchej Salvawajninchej Jesucristota kutimunanta. Chay kutimuynimpi kay kunan cuerponchejta uj jina mosojman tukuchenqa, Pay imaynachus kunan kashan, ajinaman. Chaypi yuyaspa pitaj atinman niyta, imaynapunichus Cristoj chayamuynin kanqa, nispa?

Diosqa, tukuy kay pachapi kajta ruwashaspa, tukuy atiyinwan ruwarqa. Ajinallataj kutimuspapis tukuy atiyinwan wañusqasta kawsarichenqa. Astawampis kutirimonqa tukuy Payta munakojkuna kusikunankupaj. Kay ñak'arej cuerponchejta mosojman tukuchenqa, chaytataj ruwanqa imayna cuerpowanchus wañusqamanta kawsarimporqa, ajinaman.

Sichus tapukushanki, imaynataj kanqa chayrí? Nispa chayqa, apostolqa nisunki: Chaytaqa ruwanqa, makimpi kashan chay atiyinwan. Atiyiniyoj Diosninchejqa manachu atinman ruwayta chay jatun imasta?

Chayta astawan sut'inchanapajqa, atisunman qhawariyta uj muju tarpusqa imaynatachus ñawpajtaqa wañun musoj sach'a llojsimunampajqa. Mujuta sapa kuti tarpushaspaqa, yuyariypuni ajina kananta: Kunan cuerponchejqa, mosoj cuerpoman tukonqa.

Muju t'akasqaqa qhepakapun jallp'api, mosoj poqoy llojsimunampaj. Ajinallataj cuerponchejpis mosoj cuerpo kawsarimponqa. Ari, kunan cuerponchejtaqa Dios saqenqa cheqamanta jallp'api qhepakapojta, mosoj cuerpowan kawsarimunanchejpaj. Chaypajmá Cristoqa pagarqa jatun preciotaqa.

Janaj Pachapi kashaj Diosniyku, tukuy cuerpoyku Qampa munaynillaykita ruwayta yanapawayku. Ama saqeychu kay sajra aychaykoj munayninta ruwajta. Jesucristoj sutimpi. Amén.

Marzo 15

“Warmeqa sach’ataqa qhawarerqa, mikhunapaj jina moq’eyta... Ujnin poqoyninta p’itispataj, mikhuykorqa; qosanmampis jaywarqa, paypis mikhuykullarqataj.” (Génesis 3:6)

Kaypeqa, rikunchej supay imaynatachus warmita ch’awkiyasqanta. Ñawpajtaqa, ñawisnimpa rikunanta may jina k’achitu chay sach’a kasqanta qhawacherqa, warme j qhawaynimpeqa poqoyninqa ima munay kasharqa, sumajtapuni moq’ericherqa. Arí, kunampis ajinallataj supayqa ch’awkiyashan juchata moq’enapaj jina rikuchispa. Ajina sajra supayqa ch’awkiyayman yachasqa, runata allin imasmanta misk’achinampaj.

Evaqa, supaywan parlaspa qonqaporqa Diospa nisqantaqa, ni yuyarillarqapischu castigasqa kanantaqa, nitaj manchachikullarqapischu, chay ratoqa munapayaywan junt’a kasharqa. Kunampis sajra supayqa ajinata ruwashan pillatapis urmachinampajqa.

Juchaman urmanaman tanqasqa ratopi juchaqa sumaj k’achanchasqa rikukun, manchay misk’itaj kasper jinan, sajra aychanchej moq’enampaj jinapuni chay millay supayqa rikuchiwanchej. Chantapis mana urmanapaj jinachu kasper jinan, manachayqa noqanchej allin kashasqanchej rikukun.

Arí, chay imaspuni Judaspa yuyaynimpipis rikhurerqa Jesusta wasanchanampajqa. “iKinsa chunka qolqe phisus!” Moq’erinampaj jina kasharqa. (Mateo 26:15). Ni pipis yachanqachu, nispa nerqa Judasqa.

Evapis ajinallataj ch’awkiyasqa karqa. Chay sach’aj poqoynenqa mikhurinapaj jina moq’ey kasqampi, chayrayku katarej nisqanta uyarerqa: “mana wañunkichu,” nisqanta. Apostol Santiagoqa nin: “Chanta chay runaqa sajra munayninta kasuspa, juchallikun, jucharaykutaj wañoyqa jamun,” nispa. (Santiago 1:15). Evaqa mikhuykuspa qosanmampis jawallantaj, paypis mikhuykullantaj.

Arí, kunampis ajina mañasniyojpuni supayqa kashan, ama ch’awkiyachikuychu. Chayrayku Diosqa niwanchej: Ama pantayman urmaychejchu, noqapi atienekuychej, nispaqa.

Khuyakoj Dios Tatayku, kasukoj sonqoyoj kayta qowayku, Qanllata kasunaykupaj. Jesucristoj sutimpi. Amén

“Cielopis, kay pachapis tukukaponqanku, nisqasniytajrí mana jayk’ajpis tukukonqankuchu, junt’akonqapuni... Imaynachus Noepa tiempompí karqa ajinallataj Runaj Churimpa kutimuynimpis kanqa.” (Mateo 24:35-37)

Señor Jesusqa apostolesnimpa sonqosninman churarqa ajina willayta, paykuna wakichisqas kanankupaj; noqanchejpipis yuyayninchejpi kachun, mana noqallanchejpi yuyayninchejta churaspa.

Noqanchejqqa mana yachanchejchu mayk’ajchus ima horachus Señor Jesús kutimunantaqa; sumajta reparananchej tiyan ima señaalkunachus kutimunan qayllapi kanqa chaykunata. Kay chhika unay manaraj kutimusqanrayku ashkhas sayk’upunku suyayta. Noqanchej ichus kikinta yuyashanchej, manarajpuni kutimusqanrayku. Jinaqa ichus machu k’aywiysitukamapis manapuni kutimuspa jinanchu, ichus wañupunanchejkamapis manaraj kutirimunqachu. Chaywampis yuyarikunanchej tiyan chay iskay angelkuna nisqanta apostolesman, Jesús janaj pachaman wicharipushajtin: “Imaraykutaj patata qhawaspallapuni kashankichejri? Kay kikin Jesús, imaynatachus qankuna ukhumanta janaj pachaman ripun, ajinallatataj ujtawan kutirimunqa,” nispa. (Hechos 1:11).

Chay angelkunaj nisqankoqa sumaj sut’i mana waj imaspi yuyanapaj jinachu kashan. Chayraykumá Iglesias qallariyninmanta kunankamapis, tukuy cristianos kajkunaqa mana sayk’uspa suyashallankupuni Jesuspa kutimunantaqa. Paykuna kawsakushajtinku mana kutimorqa chaypis, noqanchejqqa mana yuyananchejchu chaypacha runasqa ch’awkiyasqa karqanku nispaqa. Manachayrí Diospa Simi Nisqanqa nishallampuni Jesucristoj kutimunanqa qayllapiña kashasqanta, noqanchejtaj tukuy sonqo suyallasumpuni.

Unaymantapacha Salvadorninchejpa kutimuyninqa allin suyasqapuni karqa, jatun yuyasqataj karqa, manataj chiriyaporqankuchu chay suyakuyninkupi creesqankoqa. Apostolesqa suyarqanku chayamunanta wañupunanku p’unchaykama, sonqonkupi karqa Señorninchej Janaj Pachaman pusakapunampi. Arí, ajinata noqanchejpis Jesucristoj kutimuynintaqa suyananchej tiyan.

Munasqa Dios Tatayku, ama saqewaykuchu waj imaspi yuyajta Salvawajniyku kutimunankama. Kallpachawaykupuni tuta p’unchay suyakuyta. Jesucristoj sutimpi. Amén.

Marzo 17

“Mana wata runa kay sonqochu qankunaman qosqa karqa, ujtawan manchasqalla kanaykichejpaj, astawanqa Diospa Espíritun qankunaman qosqa karqa Diospa wawasnin kanaykichejpaj. Chayrayku Diosmanta mañakunchej: Tatáy, Tatáy, nispa.” (Romanos 8:15)

Kay ñawisqanchejpaj qhepitampi nin: “Chay kikin Espiritullataj espíritunchejwan khuska testigo jina sut’inchán Diospa wawasnin kasqanchejta,” nispa. (Romanos 8:16). Chayrayku sumaj sut’í kanampajqa, ñawirisqanchejpi nishan: “Diospa Espíritun qankunaman qosqa karqa, Diospa wawasnin kanaykichejpaj,” nispa. Chantapis, nillantaj: “Mana wata runa kay sonqochu qankunaman qosqa karqa, ujtawan manchasqalla kanaykichejpaj, astawanqa Diospa Espíritun qankunaman qosqa karqa, Diospa wawasnin kanaykichejpaj”, nispa.

Mana wata runa kaychu, sajra aychanchejpa ruwaykunasninta wañuchenqa, manachayqa Diospa Chirin Jesucristoj ruwasqanraykulla wañuchisqa kanqa, Cristo mosoj kawsayta qowasun. Ajinamanta tukuy kawsayninchejpi, Diospa Qhasilla K’acha Yanapaynin kallpachawanchej munakuyninraykulla. Chayta yachachishan apóstol Pablo kaypeqa.

Chaywampis, chayta nispaqa mana nishanchu Diosta mana manchachikuna kasqantaqa. Apostolqa, ashkha kutita yachachin Diospajpuni kawsana kasqanta, imaraykuchus Paypaj t’aqasqa kanchej. Imataj manchachikuy? Diosta manchachikuspa mana munanchejchu Payta wasanchayta, ima juchata ruwaspapis. Pichus juchata gustumpi mana manchachikuspa ruwayta munan, chaypi kawsakuytataj munan chayqa, Dios kikin manchachikuyta apachimunqa Payman pusanampaj.

Wakin kuteqa, Diosta pantasqata manchachikunchej, phiña Diosta jina qhawasqanchejrayku, ajina kashan, Evangeliopí mana atienikusqanchejrayku. Ajinata manchachikujkunaqa allin imasta ruwaspalla salvakuyta yuyanku. Imaraykuchus manchachikunku Diospa castigonta, chayraykutaj paykunallamanta allin imasta ruwayta munanku. Ajinamantataj munanku ruwayninkuwan sonqo tiyaykuyta jap’iyta.

Hechos 9:31 nin: “Creejkunaqa Señorpi wiñasharqanku, ashkhayasharqankutaj Espiritu Santoj yanapayninwan. Chantá Señorta manchachikuspa kawsakusharqanku,” nispa.

Janaj Pachapi kashaj Diosniyku, yanapawayku tukuy sonqo perdonayta pikunachus contraykupi kajkunata, paykunata munakuyta atinaykupaj. Jesucristoj sutimpi. Amén.

“Kunanrí Leymanta kacharichisqaña kanchej. Chay Leyqa kamachiynimpi jap’iwarqanchej, chaypajqa wañunchejña. Chayrayku Espiritunejta Diospa mosoj kamachisqanta kasuna; amañá chay Leypa nisqantaqa.”
(Romanos 7:6)

Kaypi rikushanchej iskay atiyniyojkuna uyapura kashasqankuta. Chay iskayninku runataqa makinkupi jap’inku. Leyqa kamachiyykunanwan, Diospa Espirituntaj kawsayta qospa, sonqomantaj kusiya churaspa.

Espíritoj yachachiynenqa mosoj kawsay, Diospa Espiritumpa ruwasqan; chaytaj kacharichiwanchej Leypa wata runan kayninchejmanta, Diospa khuyakuynimpi wawasninman tukuchiwasqanchejpi. Espíritu Santo sonqonchejpi tiyakun, chayrayku tukuy sonqo Churin Jesucristopi Diostaqa sirvishanchej, manataj Leypa kamachisqanta junt’aspachu.

“Espíritoj yachachisqanman jina sirveyqa” mana jornalero jinachu, manachayqa Diospa wawan jina; mana wata runas jinachu, manachayqa, uj kawsaqe jina. Diostaqa mana sirvishanchejchu sonqonta suwananchejraykullachu, manachayqa graciasta qospa kawsaqempaj jap’iwasqanchejrayku. Lutero nerqa: “Diospa leyninta kasuni, mana kallpaywan Janaj Pachata ganakunaypajchu, manachayqa Jesucristopi creesqayrayku, Paypi atienekusqayrayku. Mana Leypa kamachisqanman jinachu kawsashani, chaypis kusiyan ruwallasajpuni tukuy nisqanta,” nispa.

Luteroqa nillarqataj: “Leypa nisqanman jina imata ruwani chaypis, mana Paypaj kamachiynimpichu kani. Arí, Leymanta kacharichisqa kani Cristopi creesqayrayku, mana Leyman watasqachu kani, nitaj ima ruwaypa wata runanchu. Cristopi fenyqa churasqa kashan mana yuyaynillaypichu, leyqa sonqoypi tukuy imapi reparachiwan mana allin imasta ruwasqaypi, mana chaypi atienekunaypaj. Chayqa pusawan Cristoj ruwasqmpí atienikunaypaj, ajinamanta Diospa khuyakuynimpi kawsanaypaj,” nispa.

Apóstol Pablopis nin: “Cristowan khuska chakatasqa qarqani, manañataj noqachu kawsani, manachayqa Cristo kawsashan noqapi,” nispa. (Gálatas 2:20).

Munasqa Dios Tatayku, yanapawayku perdonayta pikunachus noqaykuta ñak’arichejkunata. Paykunata perdonay ajina kasqankumanta. Jesucristoj sutimpi. Amén.

Marzo 19

“Kunanrí Leymanta kacharichisqaña kanchej. Chay Leyqa kamachiynimpi jap’iwarqanchej, chaypajqa wañunchejña. Chayrayku Espiritunejta Diospa mosoj kamachisqanta kasuna; amaña chay ñawpa Leypa nisqantaqa.” (Romanos 7:6)

Espíritoj mosoj yachachiynenqa churasqa kashan kawsayta noqanchejman apamunawanchejpaj, Leypa ñawpa yachachiyninrí wañuyta apamun mana junt’ayta atisqanchijrayku.

Leyqa sirvichikuyta munasqan rikukun, uj runapis garrote jap’irisqa qhepampi kashanman jina, imaynachus wata runaswan uj patron kasuchikun, ajinata. Aswan llakeyqa pikunachus chay Leymanta mana kacharichikunkurajchu, chaykunaqa manaraj watejmanta nacenkuchu, juchaj wata runallanraj kasqankurayku. Imaraykuchus paykunamanqa Ley rikuchishan sajra imasman qosqa kasqankuta, juchasapa kasqankuraykutaj rikhurichin Diospaj phiñakuynimpi kawasasqankuta. Diospa Qhasilla K’acha Yanapayninrí runaj sonqonman churan, Jesucristoj ruwasqanraykulla cheqampaj qhawasqa kasqanchejta.

Chay “Leypa yachachiynimpi” kajkunaqa, atispa mana atispa paykunallamanta allin imasta ruwaspa Diosta sirviyta munanku. Chay ruwasqankoqa mana paykuna ajinata munasqankuraykuchu, manachayqa chay Ley garrote jap’irisqa qhepankupi kashasqanrayku. Jinallataj ajinapi kawsakojkunaqa chay tukuyta ruwanku Diosmanta t’inkata jap’iyta munaspa. Yuyayninkupi kashan: kayta, jaqayta ruwasaj chayqa Diosqa perdonallawanqa ima juchaymantapis, nispa.

Chaymanta jawa, ni imata ruwayta atisqankuraykutaj, sonqonkupi rikhurin phiñakuy, chejnikuy ima. Espíritu Santori Leymanta kacharichin, paykunapitaj rikhurichin kusikuyta Señor Jesucristota jatunchaspa sirvita ima.

Tuykuy atiyniyoj Diosniyku, sonqoykuman churay kusikuyta runa masiyku ima llakiypi rikhurejtinkupis yanapaspa Qanman pusamuyta. Jesucristoj sutimpi. Amen.

“... Tata Diostajrí tukuyninchejpa juchasninchejta Payman q’epiricherqa. ... Diosrí noqanchejrayku Cristota castigarqa (jasut’erqa)...” (Isaías 53:6; 2 Corintios 5:21)

Chayqa niyta munan: Tukuy Kay pachapi runasqa juchaswan p’ampasqa kasharqa. Chayraykutaj Diosqa uj k’ata churin Jesucristota kikin juchapunipis kanman jina, noqanchej lugarninchejpi ajinata castigarqa.

Yuyariypuni israelita nacionmanta kajkunawan imaschus karka chayta. Paykunamantaqa qallariymanta tukukuykama Bibliapi parlan, imynatachus Tata Diosqa ni jayk’aj qonqarparerqachu; astawanqa mana kasukujtinku jasut’ispa Payman kutirichimorqa. “Ñak’ariypi rikhurispataj Diosta qhaparikoj kanku, perdonasqa kanankupaj”, Diospa wawasnullapuni kayta munaspa. Diostaj tukuy munakuyninwan perdonarqa.

Uyarina imatachus Dios nerqa paykunaman: “Ajinata nin patapi kaj Diosqa, wiñaypaj tiyakojqa, Santo kaj Dios sutiyojqa: Noqaqa patapi tiyakuni, may santo cheqapi. Jinallataj llap’u sonqoyojwan, k’umuykukojwan kashani, k’umuykukoj sonqoyojkunata, sonqo p’akisqastapis kusichinaypaj. Mana wiñaypajchu juchachasaj, nitaj wiñaypajchu phiñakusaj, imaraykuchus ajina kajtinga, ruwasqay runas ñawpaqeypi q’enaqakunkuman. Runaqa sajrata munapayasqanrayku noqa phiñakorqani; chayrayku payta sinch’ita castigarqani, phiñakuyniypitaj uyayta pakarqani. Jinapis payqa mana kasuwaspa, sonqompa munasqanta ruwallarqapuni. Imaynatachus kawsasqanta rikuni; chaywampis noqaqa payta sanoyachisaj, kusichisaj ima. Tata Diosqa nin: Noqa siminkuman kusiy takiyta churasaj: Karupi kajkunapaj, qayllapi kajkunapajpis kusiy kawsay kachun, nispa. Noqataj aylluyta sanuyachisaj,” nispa ima. (Isaías 57:15-19).

Chayta nejqa, chay Diospi creenchej chayllatajchu nishan? Arí chayta nejqa Tata Diosninchej. Jina chayqa, Paypa nisqantaqa creey ari. Wakin kutisqa yuyanchej mana uyariwasqanchejta, ajinapis chay Canaán llajtayoj warmi jina chimpakunallapuni. Chay warmeqa, Jesús mana uyarej jina kashajtimpis, Jesuspi creellarqapuni. Chantá Jesús nerqa: “Warmi, creesqaykeqa may jatun. Munasqaykiman jina ruwasqa kachun,” nispa. (Mateo 15:28).

Ajinata, Noqanchejpis Jesuspi creellasumpuni.

Tatayku Dios, noqaykuta chejnikojkunaqa juchallinku contraykipi, noqaykuta chejnikuspa Qanta chejnikusunku; perdonay paykunata. Jesucristoj sutimpi. Amén.

Marzo 21

“Yachanchej Leyqa allin kasqanta, sichus imapajchus churasqa kasqanman jina apaykachasunman chayqa.” (1 Timoteo 1:8)

Jesupa salvasqan kajkuna, mashkha kutis mana allintachu entiendenku Leymantaqa, manataj anchata valechinkuchu. Chayrayku Leyqa, jinallataj tukuynin Biblia mana sonqonkuman yaykuyta atinchu; imaymana pantasqa yachachiyman ima k’askakapunku, cheqan yachachiyman karunchakapuspa.

Chayta nispaga, astawampis chaytaqa nishani mana pikunachus sut’imanta Diospa Leyninta pisipaj qhawajkunamantachu. Tukuy yachanchej Diospa Leyninta p’akijkunaqa ni Jayk’aj salvasqa kayta atinqankuchu, imaraykuchus juchasapa runa jinaqa, mana tukuyninta junt’ayta atisunchu. Señorninchej Jesusucristolla junt’an tukuyninta Leytaqa, Paynijllata salvos kasunchej.

Diosqa nin: Cristoraykulla pipis khuyasqa, perdonasqa, salvasqataj kananta. Ni ujchhikitanta Diosman k’umuykunkichu, nitaj Payta munakuyta munankichu chayqa, yuyankichu perdonasqa kayta? Ajina kaspaqa, yuyankichu Janaj Pachaman chayayta?

Apóstol Pablo chaymanta k’amerqaña israelita masisninta, paykunaqa Diosmanta celosos karqanku, Leyta junt’ayta munaspa ashkhata ñawirej kanku. Kunankamapis israelitakunaqa Moisespa qhelqasqanta sapa kuti ñawejtinku sonqonkoj ñak’ariyninta thasnuyta munaspa waqarikunku. Manataj reparankuchu Leyqa paykunata Jesucristoman pusanampaj kasqantaqa. Yuyayninkuman jinalla, paykunaj allin ruwasqallankuwan Janaj Pachaman chayayta munashanku.

Runakunaqa, Diospa Leynimpa Kamachisqanta junt’ana kasqantaqa yachankupuni, Evangeliomantari ni chhikantapis yanchankuchu. Cheqamanta Diospa Leyninqa runaj sonqompi juchallikusqanrayku wañusqa kasqanta reparachinampaj kashan, ajina kawsayniyoj kasqanta reparakojtintaj Cristoman pusan. Arí, “Leyqa Cristopi junt’akun, Paypi tukuy creejkuna Diospa ñawisnimpi cheqan runaspaj qhawasqa kanankupaj,” nista nin (Romanos 10:4).

Tukuy Atiyiniyoj Dios Tatayku yanapawayku Jesucristoj yachachisqanta tukuy sonqo jap’ikuyta chayman jina kawsakunaykupaj. Jesucristoj sutimpi. Amén.

“Yachanchej leyqa nisqanqa leypi kajkunapaj churasqa kasqanta, kay pachapi kaj chhika runas ch’inyachisqa kanankupaj, tukuy runas Diospa ñawpaqempi juchachasqa rikhurinankupaj.” (Romanos 3:19)

Leyqa cheqamanta: “kay pachapi kaj chhika runas ch’inyachisqa kanankupaj, tukuy runas Diospa ñawpaqempi juchachasqa rikhurinankupaj,” nin. (Romanos 3:19). Leyqa, mana cheqan runa kayman chayanapajchu, mana llimphu santo kanampajchu, manachayqa juchachasqa kasqanchejta reparakunapaj. Chay ajina kasqantataj, apóstol Pablo ninllantaj: “Manachayqa leynejta juchayoj kasqanchejta reparakunchej,” nispa. (Romanos 3:20). Leyqa runa Diosman Jesucristonejta kutirikunampaj kashan.

Chayrayku, Luteropis nerqa: “Leyqa imatataj ruwan? Juchanchejta rikuchiwanchej. Chaytaj juchaj kallpanman tukun, Diospa k’ajaj phiñakuyninta runapi rikhurichin, Leypa nisqanman jinalla runaj kawsaynimpi payllamanta salvakuyta yuyasqanta qhasi manakajpaj kasqanta reparachin. Chayta mana taripayta atispataj runaqa, ni imanakuyta atispa Jesucristoj ruwasqallampi atienikun,” nispa.

Chaypi yuyaspataj Apostol Pabloqa, nerqa: “Jucharí Leymanta valekuspa, tukuy imaymana munapayayta noqapi rikhuricherqa, imararykuchus Ley mana kajtenqa, juchaqa wañusqa jina,” nispa. (Romanos 7:8). Leyta junt’ayta munanki chayqa, astawan juchasapa rikhurinki, mana Diospa leyninta junt’ayta atispa; chantaraj Cristoman pusasonqa, Pay tukuy imata qampaj cuentaykipi junt’asqanta rikuchisuspa. Chaytachu mask’ashanki, mosoj kawsayniyoj kanaykipaj? Jesucristollapi tarinki.

Janaj pachapi kashaj Tatayku, ñak’arishajtiykoqa yanapariwayku ari, Churiyki Jesucristoj ruwasqampi sonqochakuyta. Jesucristoj sutimpi. Amén.

Marzo 23

“Maypichá kapuyniykichej kashan, chayllapitaj sonqoykichejpis kanqa... Imawanchus sonqon junt’a kasqanman jina simenqa parlan.” (Lucas 12:34; 6:45)

Pichus Cristomanta mana parlajqa, Cristopi mana tarinrajchu kusikuytaqa. Astawan misk’ita waj imasmanta parlan chayrí, chaypi kashan sonqon, kusikuynimpis.

Wakenqa cristiano kani nishanku chaypis, mana allinta rejsenkurajchu k’ata Salvaj Jesucristotaqa (Mana kanchu feninku k’ata Salvaj Jesucristopi.) Pikunachus cheqapipuni Jesucristonejta perdonasqa kanchej chaykunarí, Cristowan sapa p’unchay kawsakunchej, wajkunamampis Paymanta parlayta mana saqenchejchu. Manachus ajina kashan chayqa, Leypa wata runan jina noqanchej ruwasqallanchejwan salvakuyta munashasunman.

Israelitaspis Babiloniapi kashaspa nerqanku: Babilonia mayu qayllapi tiyaykuytawan Sionmanta yuyarikuspa waqaj kayku, chaypi kaj sawce sach’asman arpasniykuta warkhuspa. Mayqenkunachus presosta apawarqayku, tukuy imaykuta qhechuwarqayku niwarqaykutaj kusiya takiykunata takinaykuta; Sionpi takej kankichej, chay takiykunata takiripuwayku, nispa. Imaynatataj runaj llajtampi Tata Diospa takiykunanta takisqaykuri? Nispa nerqanku.

Creejkuna mana creejkunawan khuskachakuspa imamantapis kusikunkumanchu? Cheqapipuneqa, mana kusikunkumanchu. Ichari? Chayta ruwayqa ninakun uj chhullunkamampis ninata jap’ichiyta munawaj ajina. Ichapis mayqen atinman jawa sonqollanmanta kusirikuyta, manataj cheqapipuniqa kusikunmanchu; ajina kashan, mana atinkumanchu mundo runaspaj rayminku chawpimpi rikhurispa kusikuytaqa.

Salvasqa Cristota qhatikujkunaqa, ni pej kamachisqan kusikunku Cristota yupaychaspa, sonqonkupis t’ikarin Paypi creesqanchejrayku, chay tukuytataj Diospa Espíritun ruwan sonqonchejpeqa.

Janaj Pachapi uj raymi ruwakun wiñaypaj, chaypi kusiyya mana tukukuyniyoj Cristota yupaychaspa kasun. (Apocalipsis 5:9). Kay pachapeqa, ni pipis atinmanchu cheqapipuni Cristorayku kusikuyqa, sichus Jesucristo manaraj sonqompi kashaman chayqa; jinallataj, Evangelio sonqompi kanan tiyan kusiyyan yupaychanapajqa.

Tukuy Atiyniyoj Dios, jark’awayku supaymanta, runaj wakichisqallan yachachiymantapis. Jesucristoj sutimpi. Amén.

“... Qanta yuyaychayki noqamanta rantikunaykita ninapi ch’uwachasqa qorita... ñawisniykipaj ñawi jampinata, rikuyta atinaykipaj.” (Apocalipsis 3:18)

Salvasqa kasqanchejqa sut’ita rikunapaj allin imasta Dios qowasqanchejta, ajinamanta mosojman tukun kawsayninchejqa; Diospi kaspaqa usqayllata juchatapis reparasunchej mana urmananchejpaj. Tukuy chay k’acha imasta rikuspaqa munasunchejpuni Jesucristowan kawsakuyta, Paypi kaspaqa sonqonchej sanuyanqa.

Allinta yachananchej tiyan, salvasqa kananchejpajqa, may chhika allin imasta ruwasqasninchejqa ni imapaj valesqanta; chayraykutaj noqanchejqa nisunman: “Manaña munanichu chay imasta ruwayta Diospa qhawaynimpi salvasqa kanaypajqa; chay imasta ruwashaspa mashkha kuti pantani, jinaqa reparani ni jayk’aj junt’asqata junt’anaypaj jina kasqayta. Chayraykutaj Señorniy Jesucristo junt’asqata junt’anña noqapajqa, chayrayku Payman risaj sonqoypi tiyakunampaj,” nispa.

“Llimphuchasqa qori,” niyta munan, Cristoj yawarnin mayllawanchej tukuy juchamanta, chayraykutaj janaj pachapi qhapaj imasqa nonqanchejpaj kashan, chay valen uj qory jina. Dios Tataj palabran, nin: “Tukuyninku jatunmanta nisharqanku: wakichisqa karqa, chay Corderoqa, jap’inampaj jinapuni atiyta, qhapaj kayta, yachayta, kallpata, allimpaj qhawasqa kayta, jatunchasqa kayta, yupaychayta ima... imaraykuchus Qan wañuchisqa karqanki, yawarniykiwantaj Diospaj runasta ranterqanki,” nispa. (Apocalipsis 5:12,9).

“Yuraj p’acha,” nispaqa parlashan Cristoj wakichisqa Justiciamanta, Paypa yawarninwan sonqonchejqa llimphuchasqa. Pay llimphu kasqan, kasukoj kasqan ima, qhataykun tukuy juchasninchejta

Espíritu Santo, chay imasta rikuchiwanchej sut’ita, “Cristo rantipuwasqanchejta rikunapaj, ñawi jampi (colirio) chaypaj kashan”. Ajinata ari, chay chiriyasqalla runataqa Diospa wawanman tukuchin. Pichus tumpa q’oñichisqalla sonqonku kashan chaykunapis, Cristopi taringanku rupha sonqo kaytaqa. Imaynatachus iskay runas Emaus llajtitaman rishajtinku, ñawisninku kicharisqa karqa Jesusta rejsikapunankupaj, ajinata.

Wiñaypa Dios Tatayku, ujtawan mañakuyku Qampa Simi Nisqaykita, munakuyta yachaj sonqota qowayku. Ama ari, uyarejkunalla kasqaykuchu, uyarisqaykuman jina kawsakuyta sonqoykuman churay. Jesucristoj sutimpi. Amén.

Marzo 25

“Cristochus mana kawsarimporqa chayqa, qhasi manakajllataj creesqaykichejpis. Ajinaqa, juchaykichejpiraj kashankichej.” (1 Corintios 15:17)

Apostolesqa, cheqamantapuni Diospi tukuy sonqo creerqanku. Paykunaman nisqa karqa Churin Jesuslla Dioswan allinyachejqa kasqanta. Credo apostólico nisqapipis, iskay kaj articulo nisqapi nishan imaynatachus Cristo ruwarqa salvasqa kananchejpaj. Chayrayku mañakuna rijch'arichinawanchejta sumajta entiedenapaj, chay nisqasninta tukuy sonqo creenanchejpaj.

Noqanchejrí noqallanchejmanta ruawasqasninchejwan juchanchejmantaqa pagayta munashanchej. Ajinata yuyaspaqa, imanishanchejtaj Diosta? Ajinata yuyaspaqa, nishanchej: Jesucristoj ruwasqanqa mana valesqanta, noqanchej ruwanqanchej aswan valorniyoj kasqanta. Mana siminchej nishan chaypis, ichus sonqonchejpeqa ajinata nishanchej. Jesucristo Diospa corderonpa ruwasqallampi salvakunaqa tarikun; mana kay pachantimpi runakunaj juchankuta pampachajqa kanchu.

Apóstolesqa, mana iskay sonqochu creerqanku, Jesuspa ruwasqampi salvasqa kanankupajqa. Paykunaqa tukuy sonqo creerqanku juchankoj pampachasqa kasqantaqa, Dios Tata Churin Jesucristonejta juchankumanta perdonasqantaqa. Paykuna yacharqanku juchasapas kasqankuta, chayrayku Jesucristoj ruwasqampi atienikorqanku.

Noqanchejpis, ujkama saquenachej chay iskarayayta. Tukuy sonqo creenachej Jesucristo noqanchejrayku wañusqampi, Paynejtataj tukuy juchanchej pampachasqa kasqampi. Chaytaqa, Jesucristo rikuchiwanchej, juchanchejmanta perdonasqa kasqanchejta, wañusqamanta kawsarimpuspataj wiñay kawsayta qowanchej.

Mana creenachu k'acha sonqoyoj kasqallanchejwan Janaj pachaman yaykuytaqa. Ajina kajtenqa, Diospa Simi Nisqanta ñawispapis sayk'unalla kaspa jinan yuyayninchejpeqa kanqa. Diospis karupipis kanman jina yuyayninchejpeqa kanqa. Tukuy feninchej (creeyninchej) Jesucristoj ruwasqallampi kanan tiyan, Diospa Simi Nisqampiwana ima. Sonqonchejta churana perdonasqa kasqanchejpi, imaraykuchus chaytaqa kikin Dios niwanchej.

Dios Tatayku, Churiyki Jesucristoraykulla mañakuyku sonqoykuman churawayku Qampa Simi Nisqaykipi atienekuyta. Jesucristoj sutimpi. Amén.

“Kunanqa Diosman gracias qosqa kachun, wañuyta atipayta yanapawasqanchejrayku, Señorninchej Jesucristonejta.” (1 Corintios 15:57)

Wañuypi yuyajtiyki, uj manchariy jamusunki chayqa, Cristopi tukuy sonqo atienekuy. Payman sonqoykita, chanta tukuy kawsayniykita churay. Ama qonqaychu yuyariypuni, Payqa cruzpi chakatasqa wañorqa iskay suwas chawpimpi, wañuyta mancharichiyninta chinkachinampaj.

Lachiwanaqa, (wayronqoqa) uj kutillata wach'in, ujtawanqa manaña atinchu. Wañuyta chay nanachiynenqa cruzpi clavasqa qhepakorqa, imaraykuchus Señorninchej Jesucristoqa kinsa p'unchayninman kawsarimorqa wañuyta atipaspa. Chayrayku wañoyqa manaña mancharichisunanchu. Qanqa Cristojtaña kanki, Paytaj Salvasojniyki, ni imamanta llakikuyñachu.

Supay uyaykipi nishasunki juchasapa kasqaykita, infierno ninamantaj yaykunaykita chayqa, payta niy: Chaymantaqa Cristoman parlamuy, Payqa atipanña nispa.

Jesucristoj atipasqan supaychus, noqanchejta mancharichiwanchej chayqa, yuyarinapuni, mana Cristowanqa ichus infiernoman cheqanta risunman karga. Kunanrí kisisqa kashanchej, imaraykuchus Señorninchej Jesucristowanqa mana wañusuncho.

Ama anchata yuyaychu pantasqasniyki, chayta ruwaspaqa urmaykunki mana pantaj runa kasqaykita yuyakuspa. Jatunchakuy qampi rikhurinman, chanta manaña qanrayku Dios imatachus ruwarqa salvasqa kanaykipaj chaytapis yuyawajchu. Ajinamantaqa chinkapuwaj Diospa makinmanta kacharichikuspa.

Cristianos kajkunaqa, tukuy kawsayninchejpi imallapajpis Cristomanta qhaparikuspa kawsakunchej, Paypi atienekuspa tukuy imapi yanapanawanchejpaj. Imaynatachus isrelitaspis maytapuni kusirakorqanku chay jatunkaray runa Goliatta David atipasqanmanta, ajinata. Ni imayoj pisi kallpa kashajtiykipis, Jesuspa atipaynin astawan valen tukuy juchasninchejmanta. Chayrayku, qanqa salvasqa kanki, Jesucristoj yanapayninwan ñawpajllamampuni rinapaj. Imaynatachus Efesios 6:10-21 nishan, ajinata.

Pisi p'unchaymantawan ripusunchej kay pachamanta, chaypeqa mana kanqañachu wañuy, maqanakus, jucha, ni supaypis. Chaykamataj sinch'ita sayana, Diospa wawasnin jina Salvajninchajpa makinman sonqonchejta churaspa.

Kunampeqa, kawsakushanchej Diospa nisqasninta creespa. Kay imas tukukuytataj ñawisninchejwan rikusunchej Diospa chay nisqasnintaqa.

Dios Tatayku, gracias niyku chay tukuy imasmanta. Jesucristoj sutimpi. Amén.

Marzo 27

“Imatachus Moisespa leynin mana ruwayta aterqachu, runaj aychan pisi kallapayoj kasqanrayku, chaytaqa Diosmin ruwarqa. Diosqa, Churinta kachamorqa juchallikoj runaman rich´akojta, jucharayku wañunampaj. Ajinamanta chay juchata aychampi juzgarqa...” (Romanos 8:3)

Chay tukuymantaqa, Dios kikin sut´incharqa Churin Jesústa warmeji mirayninmanta kachamunanta, chaytaj junt´akurqa; runakuna Diospa kamachisqanta mana kasuspa, mana ruwanasta ruwasqankumanta perdonta wakichinampaj. Chaytaqa, uj similla parlarqanku: Profetas, Angelkuna, may chhika evangelistas ima.

Chaymanta Cristo sut´inchawanchej kawsayninta qonanta, juchasninchej pampachasqa kanampaj. Payta mana creesun chayqa, pitataj creesun? Chay nisqa mana ajina chayqa, ni ima ajinachu kay pachapi kanman, nitaj Janaj Pachapipis ajinachu kanman.

Adanwan, Evawan juchaman urmasqankoqa, juchata apamorqa tukuy runakunaj kawsayninkuman, chaytaj noqapi kashan, concienciay ch´ataykuwajtin reparakuni, chayraykutaj chay jucha noqanchejpi wañunan karqa Diospa nisqanman jina. Chaychus ajinapuni chayqa, tukuy ima kajpis Dios Tataj ñawpaqempeqa ajinallataj kanan tiyan. Chaytaj qhelqasqa kashan Jesucristollapi salvasqa kasqanchej.

Juchaqa kay pachapi tukuy imapi rikukun. Sapa ujninchej reparakunchej juchasapa kasqanchejta. Ari, ajinapuni kashan. Chaywampis ajinallataj: Dios ajllakuwasqanchej, manaraj imapis kashajtin. Chaypaj Dios Tata, k´ata Churinta kay pachaman kachamorqa, supaypa chay thuñisqanta watejmanta ruwanampaj, katarejpa (supaypa) umanta saruspa p´altanampaj.

Jesucristo Diospa Leyninta tukuyninta junt´arqa cuentanchejmanta; ajinamanta salvanawanchejpaj supaypa makinmanta kacharichispa. Ari, chay tukuy cheqapuni, jucha Diosmanta t´aqawanchej, Jesucristotaj Diosman qayllachiwanchej, allinyachiwanchejtaj. Chayrayku, ninchej: Jesucristopi creen, Pay tukuy juchaymanta perdonawan, supaymanta kacharichiwan yawarninwan pagaspa, Payta sirvinaypaj tukuy kawsayniypi. ¡iChayqa ajinapuni kashan!!

Señor Diosniyku waqaychawayku pantasqa yachachiyanta. Jesucristoj sutimpi. Amén.

“Diosninchejqqa jark’akuwajninchej, kallpanchejtaj, Phutiywan mana allin kashajtinchej usqhayta yanapawanchej. Chayrayku, mana manchachikusunchejchu, kay jallp’a ikhakushajtimpis, mama qocha ukhuman orqos chinkaykojtimpis; mama qocha yakupis phiñakuspa qhollchonqeajtimpis, phiñakuyninwan orqos kharkatitejtinkupis, mana manchachikusunchejchu. Uj mayu yakoqa Diospa llajtanta kusichin patapi kaj Diosninchejpa santo llajtanta. Diosninchejqqa chay llajta chawpipi kashan; Payqa llajtata sayachenqa, tutamantataj yanapanqa.”
(Salmos 46:1-5)

Tukuy kawsayninchejpi chay “ñawpa katari, supay sutiyoj, satanás nisqataj” (Apocalipsis 12:9), sapa p’unchay urmachinawanchejpaj mask’ashawanchej: “Phiña leon jina qhaparirispá muyuykachasunkichej, mayqellantapis oqoykunampaj.” (1 Pedro 5:8). Kunampis uyarinchej uj ovejata chay “phiña león jap’isqanta”, kunantaj manaña kasqan jinachu kashan. Jinallataj uyarinchej, Diosman kutirikojkuna watejmanta sajra kawsayman urmasqanku nisqata. Chayrayku paykunaqa manaña jamunkuñachu iglesiamampis, wakintaj jatunchakuymán qokunku, manachayri wakinqa chiriypunku.

Ajina ruanakunaqa, pejpa yuyaychasqantapis manaña jap’ikunchu. Wakintajrî, wist’u yachachiya uyarispá iglesiapeqa churanakuyllapiña purinku. ¡Chay tukoyqa llakiy! Reparay kay pacha kawsaypeqa, chay imas kashallampuni. Chayrayku Señorninchej Jesusqa, jinallataj apóstolesnimpis, chay imasmanta mana yanqhatachu k’amiwarqanchej.

Chayrayku chay imasta reparakuspaqa Diosmanta mañakuna mana sayk’uspa, ujkuna ujkuna kallpachanakuspa. Ujta nisqayki: Ni uj creyentepis kanchu chay imasta mana rikojqa. Chaywampis Jatun michejniyoj kanchej, chay michejninchejqqa Salvawajninchej Jesús. Pay jap’iwanchej cheqa ñampi Evangelionnejta.

Señorninchej Jesucristoj kutimunan qayllapiña kasqampi yuyaspa aswan qayllamanta Paywan kawsakuna kachun; sapa p’unchay mosoj kawsayniyoj kanachej. Sapanchejpita, iglesiapita Diosmanta mañakuspa kallpachanawanchejpaj, ñawpajllamampuni riyta atinapaj.

Dios Tatayku, Jesucristo Churiyki ñak’arisqannejta sinch’is kayta yanapawayku. Jesucristoj sutimpi. Amén.

Marzo 29

“Kutiripusaj tataypa wasinman, paymantaj nisaj: Tatáy, Diospa contranta juchallini qampa contraykitapis. Manaña wawayki kanaypaj jinachu kani; ujnin peonniykita jinallaña jap’iway ari, nispa.” (Lucas 15:18-19)

Wasimpi kajkunamanta “karupi”, runaj llajtampi kashaspa chay chinkaj waynaqa unancharikushasqa. Chantá yuyayninman churakuspa wakichikorqa, tatanpajman kutiripunampaj; ajinamanta tatampa khuyakuyninta tariyta munaspa.

Chay chinkaj waynaqa mana yuyarqachu tatan khuyananta, nitaj perdonananta. Chayraykutaj payqa, may jinata k’umuykachaspa, uj peonta jinallañapis tatan trabajachinanta munarqa. Diosman mana kutirikoq runaqa, ajinata yuyan. Icharí? Diosman kutirpuyta munaspapis runaqa imaymana allin imastaraj kallpanwan ruwayta munan Dioswan khuyachikuyta munaspaqa.

Creyente kajkunapis ashkhas kanku ajina yuyajkunaqa. Munankupuni ganakuyta Diospa khuyayninta, perdonninta ima sumaj imata ruwaspa, mañakuspapis ninku: mañakusaj Diosmanta kallpanchejwan mañakuna kasqanta, sumaj wakichisqa parlaykunawan Dios uyarinawampaj, nispa. Ajina ruwaspaqa, chay kallpakusqampi atienekuyman qokun salvasqa kanampajqa. Ajinata noqallanchej ruwasqallanchejpi, mana Diospa songontaqa kuyurichisunchu. Chay chinkaj waynaqa wakichikusqa imastachus tatanman ninanta: “Manaña wawayki kanaypaj jinachu kani”; Tatanqa manaray chayta parlarishajtin, ujllaykuspa much’aykurqa, munasqa wawantaqa. Tatanqa khuyakuyninwan jatun munakuyninwantaj mosoj p’achawan p’achallicherqa, raimitapis ruwaporqa.

Arí, Diosqa ajinata munakuwanchej. Chayrayku noqanchejpis ajinallatataj cheqamanta Diosninchejtaqa munakuyta yachananchej tiyan.

Dios Tatayku mana wawaykipaj jina qhawanapaj jinachu kani, juchasapa kani. yanapaway Qanman jamuyta, Jesucristoj ruwasqallanta jatunchaspa. Jesucristoj sutimpi. Amén.

“... Karullapiraj kashajtin, tatampa sonqon wawayasqa payta rikojtin, taripamuspataj, ujllaykuytawan much´aykusqa.” (Lucas 15:20)

Kay rijch´anachinapi, Jesusqa rikuchiwanchej imaynachus Diospa munakuynin noqanchejpaj kasqanta. Cheqapipuni chay chinkaj waynaj tatanqa, wawan jampushajta rikuytawan mana pachallampi suyasqachu; wawanta jamushajta rikuspa usqayllata taripaj risqa, chay waynaqa manaña parlarisqachu chay imatachus ninampaj wakichisqantaqa. Imaraykuchus, chay churin karullapiraj kashajtin, niraj imatapis chay churin nishajtin, tatanqa usqhay usqhayta taripamuspa, ojllaykuspataj much´aykusqa chay chinkaj churintaqa.

T´ukuna Dios Tataj munakuyninqa. Ichari? Juchasapa runaqa ni jayk´aj yuyanchu ajina kananta, Tata Diospa perdonanantaqa.

Chay chinkaj waynaj tatanqa, ni tumpallatapis phiñakuyninta rikuchisqachu chay q´elliskiri wawanmanqa. Ima t´ukuna ch´ichichus kasharqapis, ujllata ojllaykuspa waqarikusqa tatanqa kusiymanta much´aykorqa. Kay jina munakuywan nisqa: “Kay wawayqa wañusqa karqa, kawsarimuntaj; chinkasqa karqa, kunantaj tarisqa... Kunanpacha aswan sumaj p´achata orqhomuspa, p´achallichiychej. Anillotapis makinman churaychej, juk´utastastataj chakisninman. Wira kaj torillota aysamuspa, ñak´aychej; fiestata ruwaspa, sumajta mikhusunchej,” nispa. (Lucas 15:24, 22-23).

Kaytaqa ni jayk´aj qonqasunchejchu, imaraykuchus Jesúsqa chaywan yachachiwanchej imaynatachus Dios munakuwasqanchejta. Sonqon noqanchejpaj imayna munakojchus kasqanmanta yachananchejpaj. Arí, Noqanchejpis kusikunachej Diosman kutirikuspaqa, Janaj Pachapiñapis kashasunman jina.

Imajtinchus noqanchejpis, chay wayna jina juchapi pejtusqa millay ch´ichi kashajtinchej, infierno cheqanta rishajtinchej, chhika munakoj Dios Tatanchejqa usqhaylla qayllaykamuwanchej Jesucristonejta; oqharikapuwanchej wawan kananchejta munaspa. Chaytamari nin: “Nillaykichejtaj ajina kusiya kasqanta Diospa angelesnimpa ñawpaqempi, juchasapa runaqa Diosman kutirikojtin,” nispa. (Lucas 15:10)

Khuyakoj Dios, yanapawayku k´acha wawasniyki kanaykupaj. Yanapawayku tukuy aylluyku qampata kayta atinaykupaj. Jesucristoj sutimpi. Amén.

Marzo 31

“Chantá tatanqa runasninta kamachisqa: Kunanpacha aswan sumaj p’achata orqhomuspa p’achallichiychej...” (Lucas 15:22)

Imaraykutaj Cristo, chay chinkaj waynamanta parlaspa, nisharqa: “Aswan sumaj p’achata,” nispa? Ichus chay tataqa, atinman karqa niyta: “Uj p’achata,” nispalla. Astawampis kamachisninta nin: “Orqhomuychej aswan sumajnin p’achata, p’achallichiychejtaj,” nispa.

Cristoqa, “Cheqapuni” kasqanraykuqa cheqata parlan, mana llullatachu parlan. Ajina kajtinqa, imatataj niyta munasharqa “aswan sumajnin p’achata, nispa?” Payqa, nisharqa: May jina juchasapapis Jesucristoj perdonninwanqa yurajsito sonqonchejqqa, mosoj kawsajta jap’in, tatampa wasimpi tiyakunampaj jina, p’enqaynin chinkapunampaj ima.

Evangelioqa chayta yachachin. “Jucha astawan ashkhayajtinrí, Diospa qhasilla k’acha yanapaynin astawanrajpuni ashkhayarqa,” nispa. (Romanos 5:20). Tarso llajtayoj Saulopis chayta nerqa: “Chay juchasapasmantataj noqa aswan kuraj kani. Ajina may juchasapa kajtiypis, Diosqa khuyawarqa,” nispa. (1 Timoteo 1:15-16).

Chay chinkaj waynaqa, iimatachus p’enqakorqapis! Imaraykuchus payqa yacharqa mana perdonanapaj jina kasqantaqa. Payqa tatanta pisipaj qhawaspa waqashajta saqerparerqa, tatampa qosqan qolqe herencia q’epirisqa riporqa. Manaraj imapitaj chay apasqan herenciataqa wayrarparichimorqa mana allin imaspi. Ajinata ruwashajtimpis tatanqa munakuywan jap’ikaporqa, aswan sumajnin p’achawan p’achallichispa. iDiospa sonqonqa Qhasilla K’acha Yanapayninwan junt’a kashan, maytataj kusikun juchasapa runa payman rejtinga!

Diosqa, tukuy imamanta astawanqa, kusikun uj juchasapa Payman k’umuykusqanta rikuspa, imaynatachus chay chinkaj waynaqa thantamanta t’akakushaj, asnashajtaj, tatanman chimpaykojtimpis, aswan sumajnin p’achawan p’achallicherqa, ajinata.

Dios Tatayku, tukuy chejnikuyta noqaykumanta chinkachiy, amataj kachunchu ni ima ch’ajwaykuna noqayku ukhupi; jatunchasqa, honrasqataj kay noqayku ukhupi. Jesucristoj sutimpi. Amén.



Abril

"Maypachachus Salvawajninchej Diospa k'acha kaynin, munakuynintaj rikuchikorqa runasman chaypacha, Payqa salvawarqanchej. Chaytaj mana noqanchej ima allinta ruwasqanchejraykuchu karqa, astawanqa khuyakuyninraykulla..." (Tito 3:4-5).

Abril 1

“Diospa contrampi kashasparaj, noqanchejqqa Churimpa wañuyinnejta Dioswanallinyachisqakarqanchej, astawanrajari Dioswanallinyachisqaña kaspa salvasqa kasunchej kawsasqanrayku.” (Romanos 5:10)

Diospa yuyaychasqan apóstol Pabloj qhelqasqampi nisqanqa, uj jatun mayu jatuchaj rumista apan, ajinata sonqonchejmanta iskayrayayta orqhoyta atin Diospa atiyneqqa (Romanos 1:16). Apóstol Pablo nin: Diospa munakuynin noqanchejpaj chayjinajatun kashan chayqa, Diospa contrampi Payta mana kasuspa kawsakushajtinchejpis, Diosninchejqqa k’ata Churinta ñak’arejta saqerqa noqanchejrayku. Imaraykutaj mana Paypi atienekusunmanchu, Diospa castigon ñak’arichinawanchej kashajtin, Pay ñak’arishajtin noqanchejrayku? Kunanqa, Dioswan allinchasqa kanchej, chayqa ruwasqa kashan Jesucristo yawarninta jich’asqanraykulla, cruzpi chakatasqa wañusqanrayku.

Jesucristoj salvasqan kajkunaqa, ashkhata munanchej sonqochasqa, chanta kallpachasqa kaytaqa. Noqanchej juchallispapis sonqonchejta anchatataj nanachikunchej, usqasllata munanchej Dios pedonaspa sonqochanawanchejtaqa. Apóstol Pablo niwanchej: “Diosqa uj k’ata Churinta mana mich’akuspa qorqa, tukuyninchejrayku wañunampaj. Ajina chayqa, imaraykutaj qowasunmanchu Churinwan khuskata tukuy imatawan?,” nispá. (Romanos 8:32).

Arí, “Diosqa mana kay pacha runasta juchachanampajchu Churinta kachamorqa, manachayqa paynejta salvasqa kanankupaj,” (Juan 3:17). Tukuy juchanchejmanta cuentanchejpi Jesúsqa castigasqaña karka. Chayta tukuy sonqo creena tiyan, manataj uyarinañachu supay yuyayninchejman chhichiykunawanchejtaqa. Sonqonchejta Diospa nisqampi churana.

Dios Tatayku, noqaykumanta karunchay tukuy juchata. Tukuy aylluykutapis waqaychay mana allin imasmanta. Jesucristoj sutimpi. Amén.

“Cristoqa mana ima juchatapis ruwarqachu. Diosrí noqanchejrayku Cristota castigarqa kikin juchapis kanman jinata, noqanchej Cristopi kaspá, Diospa cheqan kaynin ruwasqa kananchejpaj.” (2 Corintios 5:21)

Cheqan runapaj Dios qowasqanchej “p’achaqa”, aswan sumaj p’acha; imaraykuchus chay p’achaqa, Cristoj wakichisqan p’acha. Arí, Jesucristo wakicherqa chay p’achata, Diospa Leyninta junt’aspa kay pachapi tukuy kawsaynimpi junt’aspa.

Juchasapaman chay cheqan runa kayta Dios kikin qon Jesucristopi creesqarayku. Cristoqa nacerqa Diospa Leynin runasman qosqa kashajtin. Chay Leyman jinataj ruwaspa imatapis junt’arqa. Chaywampis tukuy juchasapa runamantapis aswan juchasapata jinapuni Payqa qhawasqa karqa. Jinallataj Payqa, tukuy runamanta astawan ñak’arerqa. Noqanchejrayku chay jinatapuni k’umuykachachisqa karqa, noqanchejpunipis k’umuychachisqa kasunman jina, noqanchejpunipis ñak’arishasunman jina. Chaypi creesqanchejraykutaj Paypis justicianta noqanchejman qowanchej, cheqan runata jinapunitaj qhawawanchej. (Jeremias 23:6).

Lutero nerqa: “Chay justiciaqa pakasqa jinalla noqanchejpi kashan, manaraj rikukunchu mana creejkunaj qhawaynimpeqa, jinallataj creejkuna masinchejpa qhawaynimpipis. Imaraykutaj ajina? Imaraykuchus chayqa Diospa ruwasqan kashan, mana ni pí runaj ruwasqanchu rikukunampajqa. Imachus llakeyqa, wakin yachachejkuna ajina kasqanta mana sut’itachu yachachishanku. Cristomanta justiciantaqa jap’ikunchej Paypi creespalla; chaytaj Cristo Dios Tataj Leyninta kasusqanrayku, noqanchejrayku wañusqanrayku, kawsarimpuspa Dios Tataj pañanman kutipusqanrayku, ima,” nispa.

Chay tukuyta Diospa Simi Nisqan willawanchej, mana mayqen runaj nisqanraykuchu

Noqaqa mana imatapis ruwanichu cheqan runa kanaypajqa, creellani Jesucristopi atienikuspa noqaj Salvawajniy kasqampi. Noqata aswan sumaj p’achawan p’achallichibasqampi ima.

Khuyakoj Diosniyku, graciasta qoyki, wawaykipaj rejsikapuwasqaykimanta. Jesucristoj sutimpi. Amén

Abril 3

“Kay wawayqa wañusqa karqa, kawsarimuntaj; chinkasqa karqa, kunantaj tarisqa... Ajinata kusikuyta qallarisqanku.” (Lucas 15:24)

Chinkaj waynamanta raymichayqa, chay chinkaj wayna kutipusqanrayku kusiya karqa, chay niyta munan Diospajqa manchay munasqa kasqanchej. Chayrayku nin, Janaj Pachapi jatun kusiya kasqanta uj juchasapa Diosman kutirikusqanraykuqa.

Diosman kutiriko j runaqa, mayta kusikun juchasninmanta perdonasqa kasqanrayku. Kunanqa Cristoj cheqan kayninwan (Justicianwan) p'achallisqa kasqanrayku, Ajinamanta Cristowan uj sonqollaña kawsakun, Pay salvajnin kasqanraykutaj, sonqompi Espiritu Santo tiyakun.

Uj juchasapa runa Diosman kutirikujtenqa, Janaj Pachapi jatun kusiya kasqanmanta willawanchej. Tatan nerqa: “Jatun raymita ruwasun, mikhusun ujasun, imaraykuchus kay wawayqa wañusqa karqa, kunantaj kawsarimpun; chinkasqa karqa, kunantaj tarisqa” nispa; kaypeqa sut'ita rikuchiwanchej Dios munakuwasqanchejta.

Cristo chayta nishajtimpis, noqanchejqa manapuni creeyta atinchejchu ajinata Dios munakuwasqanchejtaqa, mana munakunapaj jina kashajtichejpis Jesucristo wañorqa noqanchejrayku. Chayrayku Janaj pachapi tukuy angelkuna kusikunku, astawanraj Dios Tatapis kusikun, uj juchasapa Diosman kutirikujtenqa. Chayqa iumanchejman mana yaykuyta atinchu chaypi creenapaj jinaqa! Chayrayku, noqanchejqa chay jina munakuyniyoj Diosta yupaychanachej. Paypa Simi Nisqampitaj atienekusun: “Cielopis, kay pachapis tukukapunqanku, nisqasnistajrĩ mana jayk'apis tukukonqankuchu, junt'akunqankupuni,” nispa nin. (Mateo 24:35).

Cristoqa tukuy nisqasninwan, tukuy imastachus ruwasqasninwan sut'inchawanchej Janaj Pacha Diospa ñawpaqempi, tukuy angelkunaj ñawpaqempi kusiya kasqanta, uj juchasapa Diosman kutirikujtenqa.

Dios Tatayku, sonqo tiyaykuyta qowayku. Uj k'ata churiyki Jesucristoj munakuynin sonqoykupi junt'a kachun, ajinamanta kusiyniyku rikukunampaj, Qanta rejsisunankupaj. Jesucristoj sutimpi. Amén.

“Chantá creeyrayku Leyta manakajman tukuchinchejchu? Ni imarayku; astawanqa Leyta aswan sinch’itaraj sayachinchej.” (Romanos 3:31)

Pipis ninman evangelicospis pantallankutaj Diospa Leyninta qhesachaspa, imapis kachunta kawsanku nispa chayqa. Noqapis llakikuni ajinata kawsajkunata rikuspaqa. Chay wakin evangelicos ajinata nijkunaqa yuyarqanku Evangeliollata tarisqankuta, chayllatataj predicana kasqanta, manataj Leytaqa.

Chay pantayqa rikhuriyta yachan, maypachachus Diosman kutikushaspa sonqonkupi jatun kusi y rikhurisqanrayku, Cristoj Evangelionta uyarispa. Paykunaj reparasqankuman jinaqa, chay mosoj kawsayninkupi reparanku kacharichisqa kasqankuta, chayraykutaj imachus kachunta kawsayta munanku, Diosqa perdonallasun nispa. Yuyanku “Leymantaqa manaña parlana kasqanta yuyaspa, Leyqa wañuyta apamusqanta yuyaspa ima.” “Evangeliolla kawsaytaqa qon, nispataj ninku. Chayrayku Esvageliollata predicanaqa nispaqa pantanku.”

Llaki y, yachashaspa wakin creyentes chay pantayman urmasqankoqa. Mana reparankuchu Leyqa juchallijtinchejqach’ataykuwanchej rikuchiwanchejtaj Diospa phiñakuynin urapi kasqanchejta; Espiritu Santotaj rikuchiwanchej Allin Willayta, Jesucristo Leyta junt’asqantaña, Paytaj kunanqa kawsayninta qowasqanchejta

“Qheshñu llant’aqa usqhayllata larwarparin, rakhu llant’asmanta nisqaqa”, chayrayku chay qheshñu llant’asta rakhu llant’astawan larwachina, unayta larwananpajqa. Leyqa Juchanchejta reparachiwanchej, manachus juchasapa kasqanchejta reparakusunman chayqa, imaynatataj uj Salvacionta mask’asunman? Chayrayku, Evangeliollata sumajpaj jap’isunman, Leytataj qhesachasunman chayqa, ima laya creyentestaj kankuman?

Janaj Pachapi kashaj Diosniyku, ima pantasqaykumantapis reparachiwayku. Yachachiwayku Salvawajniykupi sonqoykuta churayta. Jesucristoj sutimpi. Amén.

Abril 5

“Diospa contrampi kashasparaj, noqanchejqqa Churimpa wañuyninnejqta Dioswan allinyachisqa karqanchejq.” (Romanos 5:10)

¡Allinta ñawiriy! Chaypeqa mana ninchu allinyachisqa “kasunchejq” nispaqa, manachayqa nin allinyachisqa “karqanchejq” nispaqa. Nillatajq ninchu, allinyachisqa karqanchejq noqanchejq ruwasqanchejqrayku nispaqa, manachayqa noqanchejqrayku “Churin wañusqanrayku,” nin. Nillatajq ninchu noqanchejq kallpanchejqwan mask’asqanchejqrayku, nispaqa; manachayqa, “Diospa contrampi kashasparaj, Churimpa wañuyninnejqta,” nispa nin.

Diospa Simi Nisqan Bibliaqqa, nin: “Dios Tata cheqamanta Cristonejqta kay pacha runasta Pay kikinwan allinyacherqa, runaspa juchasninkuta qonqayman churaspa. Noqaykumantaj kamachiwarqayku chay allinyakuymanta willanaykupaj,” nispa. (2 Corintios 5:19). Noqanchejqmantaj kay allin willayta jaywaspa kamachiwanchejq, chay allinyachejq Evangeliota tukuyman willarananchejqpaj.

Juchamanta t’aqasqa Santo Dios, munarqa chay tukuy nisqan qhelqasqa kananta, chayman jina kawsakunanchejqpaj. Tukuynin Diospa nisqasninqa ch’uwa kashan, manatajq pipis atinchu munasqanman q’ewiytaqa. Manachayqa, chay tukuy nisqasninman jina creen an tiyan. Chay tukuyta junt’aspa Salvadorninchejq Jesucristolla tukuyninta juntarqa, Paylla Dios Tatatawan allinyachiwarqanchejq tukuy juchasninchejqta pampachaspa (perdonaspa).

Chay tukuy millay juchasninchejqqa Jesucristoman q’epirichisqa karqa, manaña noqanchejq juchachasqa kananchejqpaj. Manunchejqta Jesucristo pagan, Dios Tatajq ñawpaqempeqa manaña manunachu kanchejq, manachayqa noqanchejqpis pagasunman jina kashanchejq.

Munasqa Dios Tatayku, ama saqeychu ima juchaykupis urmachinawaykuta, munakuyniykipi kallpachawayku. Jesucristoj sutimpi. Amén.

“... Imaraykuchus noqamin Señorniyki Tata Dios kani, sinch'i celoso Dios, noqata chejniwajkunaj juchasninkuta castigaj. Tataspa juchasninkuta wawasninkupi castigani, chanta allchhisninkupi, allchhisninkoj wawasnimpipi ima. Khuyakuyniytaqa waranqa waranqa runasman rikuchini, pikunachus munakuwanku, kamachisqasniytataj kasunku, chaykunaman.” (Exodo 20:5-6)

Diospa chay nisqantaqa uyarina, kasunataj kachun. Payqa nin: “Noqamin Tata Dios kani,” nispa. Paymanta astawan pitataj uyarina kasunataj kanman? Pitataj manchachikusunman, pipitaj atienikusunman, mana kanchu ajina atiyniyojqa. Atienikusunmanqa Diosllapi. Imaraykuchus Payqa, nin kayjinata: “Noqamin Tata Dios kani,” nispa. Arí, uj p'unchay Paypa ñawpaqempi rikhurisun chaypacharaj reparakusun kay nisqasniyantaqa cheqapipuni rikusun, niwasqanchejta uyarerqanchijchus manachus chaytaqa.

Payqa nishan: “Noqamin Señorniyki Tata Dios kani, sinch'i, celoso Dios, noqata chejniwajkunaj juchasninkuta castigaj. Tataspa juchasninkuta wawasninkupi castigani, chantá allchhisninkupi, allchhisninkoj wawasninkupipis,” nispa. (Exodo 20:5). Uyariychej kay jinata nisqanta: “Noqata chejnikuwajkunata castigani”, nispa nin.

Diosta mana munakojqa, amapis sajra imasta ruwashachunchu, Jesucristo mana sonqompi kawsakun chayqa, Diospa phiñakuynimpi kashan. Señor Jesús nin: “Mana noqawan kajqa contraypi kashan,” nispa. (Mateo 12:30). Nishallantaj kay jinata: “Munakuwankichejchus chayqa, kamachisqasniyta kasuychej,” nispa. (Juan 14:15). Tukuy imamanta astawanqa Señorninchejqa sonqonchejta munan. Arí, Diosta mana munakunki chayqa, yanqhallaipaj imata ruwasqaykipis, astawampis Diospa nisusqanta mana kasusqaykirayku.

Ruwawajninchej Diosqa, juchamanta kacharichiwanchej munakuwanchejtaj, chayrayku Payta tukuy sonqo munakuna kachun.

Dios Tatayku, ama saqeychu imamantapis yapasqata parlajta. Jinallataj, chay juchaykumanta ni imanakuyta atishajtiykupis sonqoykuta tiyaykuchiwayku. Jesucristoj sutimpi. Amén.

Abril 7

“Wawitasnáy chay imasta qhelqamuykichej ama juchallikunaykichejpaj. Chaywampis sichus pipis juchallikun chayqa, Dios Tataj ñawpaqempi uj kutikuwajninchej tiyan. Chayqa Jesucristo, Paytaj cheqa.” (1 Juan 2:1)

Kaypeqa apóstol Juan munakuyninwan nin: “Wawitasnáy,” nispaqa. Ajinapis k’amiwanchej “ama juchallinanchejta.” Payqa yachan pisi kallpa kasqanchejta, sichus mana cuentata qokuspa juchallinchej chaypis Payllataj yanapawanchej, chayraykutaj yapaykun kay jinata nispa: “sichus pipis juchallikun chayqa...” nispa.

Jesucristoj salvasqan runapis mana munashaspapis ichus juchallikunraj. Ajina kasqanta yachaspataj apóstol Juanqa, niwanchej: “Pipis juchallikunman chayqa, Dios Tataj ñawpaqempi uj kutikuwajninchej, abogado tiyapuwanchej Jesucristo, paytaj cheqa, nispa”. Kaypeqa Apóstol Juan nishawanchej: Ama kawsaychu ima kachuntaqa ni imamanta dakuspaqa; juchasniykichejmanta llimphuchasqaña kankichej Jesucristoj yawarninwan. Perdonasqaña kankichej. Chayraykutaj sumajta qhawakuychej kuraj supay mana urmachisunaykichejpaj, Diosmantataj mañakuychej kallpata qosunaykichejpaj.

Chaywampis ama chaykamaqa phutikuychejchu mana munashaspa juchallinkichej chayqa; Diosman k’umuykukuson chayqa, abogadoykichej Janaj Pachapi noqanchejmanta parlaringa, nispa niwanchej Apóstol Juanqa. Mana juchallejqa mana necesitanchu abogadotaqa. Icharí? Diosqa mana munanchu juchallapipuni kawsakapunanchejtaqa. Chayrayku Janaj Pachapi Dios Tataj ñawpaqempi uj k’ata Churin, abogadota jina churapuwanchej noqanchejmanta kutikunawanchejpaj.

Dios Tatayku, ama saqeychu contraykupi pipis parlajta. Sonqoykutapis tiyaykuchiy chay juchallisqaykumanta perdonaspa. Jesucristo Churiykinejta. Amén.

“Jesucristoqa uywa wañuchisqa q’olachina jina juchasnincheyrayku jaywasqa karqa, manataj noqanchejpa juchasnincheyraykullachu, astawanqa kay pachapi kaj chhika runaspa juchasninkurayku.” (1 Juan 2:2)

Diospa Qhasilla K’acha Yanapayninmanta, Jesucristo ñak’arisqanmantapis simillanchejwan ashkhata parlanchej. Arí, ajina, imaraykuchus yuyayninchejpeqa kashan chaykunata parlaspaga, k’acha runa kasqanchejta yuyakunchej, Bibliatapis tukuytaj rikunanta ñawirinchej, Diosmantapis jatunmanta qhaparipa mañakunchej. Chaywampis, ima juchaman urmaytawankamari? Qonqpunchej. Manaña Diosmanta mañakunchejchu, ni dakullanchejpischu. Ajina kasqanchejqa, astawan jatun phutiyman apawasun.

Chay imasqa noqanchejpi pasan, Jesucristo mana sonqonchejpi kawsakusqanrayku, umallanchejpiraj kahan, manataj sonqonchejman uraykunrajchu. Chayrayku, allimpuni kashan Cristomanta astawan yachakuna palabranta ñawirispa, ajinamanta sapa p’unchay Payta rejsinapaj. Apostol Juanqa niwanchej, juchaman urmajtinchejqa Abogadonchej noqanchejmanta kutikuspa parlarishan. Ajinatachus Cristopi creenchej chayqa, Diospa Qhasilla K’acha Yanapaynimpis kashanchej, chaytaj sonqo tiyaykuyta qowanchej.

Tukuynin Bibliapi parlan sapa p’unchay perdonasqa kanamanta. Kay yachachiyta sumaj sut’ita sonqonchejpi, chanta umanchejpi jap’isqanchejqa sumajta kallpachawasun, sonqochawasuntaj. Pikunachus mana ajinata sonqonkupi jap’ijkunapajqa, juchaman urmayqa ni chhikanta llakichinchu, chayraykutaj paykunaqa ajina kawsayman yachakapunku. Chayrayku, noqanchejqa sapa p’unchay Jesucristonejta perdonasqa kasqanchejta sonqonchejpi jap’ikuna tiyan.

Kay 1 Juan 3:8-12 t’aqapi, nishan: “Pichus juchapi kawsakapojqa supaypata,” nispa. Pichus Diosmanta watejmanta nacejqa, mana juchapeqa kawsakapunchu. Imarayku? Imaraykuchus payqa Diosmanta nacesqa kasqanrayku. Sichus ninchej noqaqa manapuni juchallinichu nispa chayqa, llullakunchej. Imaraykuchus, imaymanapi juchallinchej, chayrayku Juchanchejtachus Diosman willakunchej chaytaj, Payqa perdonawanchej.

Munasqa Dios Tatayku, makiykiipi sumajta jap’iwayku, ajinanamanta tukuy wawasniykiptis mana juchaman urmanaykupaj. Jesucristoj sutimpi. Amén.

Abril 9

“Tukuy runas juchallikusqankurayku, paykunaqa Diospa Jatun kaynimpa k’anchayninta mana taripayta atinkuchu. Jinaqa, Diospa Qhasilla K’acha Yanapayninrayku runasqa Cheqan runapaj qhawasqa kanku, Cristo Jesusnejta juchamanta kacharichisqa kasqankurayku... Pichus mana imata ruwaspalla, creellan juchasapata cheqan runapaj rikhurichejnimpi, chay runataqa, creesqanrayku Diosqa cheqan runapaj qhawan.”
(Romanos 3:23-24; 4:5)

Chay ñawerqosqanchejqa ch’uwamantapis aswan ch’uwa kashan, imaynatachus jatuchaj orqos mana kuyurej kanku, ajinapuni kashan kay yachachiyqa. Sichus kawsayninchejpi yuyanchej imatapis noqanchej ruwasqanchejraykulla Dios jap’ikuwasqanchejta chayqa, pantasqa kashan; Ajina pantasqa yuyaytaqa, Diospa Qhasilla K’acha Yanapaynin noqanchejmanta chinkachin. Chaytataj Jesucristolla tarerqa cruzpi wañuspa noqanchejrayku. Arí, noqallanchejmanta mashkha k’acha runa kasqanchejpis, maskha sumaj imasta ruwasqanchejpis chinkarin, chay atiyin noqanchejpi kajtenqa.

Dios Tataj Churin salvanawanchejpajqa ñak’aripa wañusqan, chay mana allin imasta yuyayniymanta chinkachin. Ni ima juchapis jark’awannqachu Diospa perdonninta noqapeqa; Jesucristo Salvadorniypa ruwasqallan noqapeqa jatumpaj qhawasqa kanqa. Chayraykutaj, ni ima juchapis atenqachu jark’awayta Jesucristoman chimpanaypajqa, imajtinchus salvasqa kanaypajqa, noqapaj Jesucristo cruzpi ruwasqallan juchamanta kacharichiwan.

Sichus Diosman chimpanapaj k’acha runamanaraj tukuna kanman chayqa, qhasipaj kanman Diospa Qhasilla K’acha Yanapaynenqa, jinallataj Jesucristoj wañusqampis yanqhalla kanman, sichus noqallanchejmanta salvakusunman chayqa. Ichari? Jesucristo nerqa wañushaspa: “Tukuy ima tukusqaña,” nispa. (Juan 19:30). Ni qan, ni noqa, imatapis ruwananchejñachu tiyan salvasqa kanapajqa, Señorninchej Jesucristo ruwananta juntasqata tukuchan.

Dios Tatayku, Ima juchaman urmajtiykupis Perdonawaykupuni ari, jatun khuyayniykipi kusionqa kawsakunaykupaj. Jesucristoj sutimpi. Amén.

“Khuyakuyniytaqa waranqa waranqa runasman rikuchini, pikunachus munakuwanku, kamachisqasniytataj kasunku, chaykunaman.” (Exodo 20:6)

Imaniytataj munan chay? Diospa Qhasilla K’acha khuyakuynenqa runata salvanampaj kashan. Chayqa, mana runa payllamanta yuyasqanman jinachu kashan. Ajina kanman chayqa, pitaj salvasqa kayta atinman? Pitaj cheqamanta atinman junt’asqata junt’ayta Diospa Leynimpa kamachisqanta? Kanmanchu uj runallapis kay pachapi mana juchallej?

Diospa kamachisqantarajchu ruwaspa junt’asajraj nisunman, chaymantaraj perdonninta jap’inapaj? Jesucristoqa nin: “Sichus pipis kay kamachisqasmanta aswan juch’uy kajllatapis p’akinman, kkillantataj wajkunamampis p’akiyta yachachinman chayqa, janaj pacha reinopeqa ancha juch’uypaj qhawasqa kanqa. Ajinallataj sichus pipis chay kamachisqasta junt’anqa, wajkunamampis junt’ayta yachachinqa chayqa, chaymá sumajjatumpaj qhawasqa kanqa...” nispa. (Mateo 5:19). Diospa kamachisqanta mana junt’ajqa, Diostaqa mana rikunqachu. Apóstol Pablopis nin: “Leyta kasusqankurayku cheqampaj qhawasqa kayta tukuy munajkunaqa maldicisqa kanku, imaraykuchus Diosmanta qhelqasqapi nin: Pichus mana junt’anchu, Diospa leynimpi qhelqasqa kashan, chay tukuy imasta, payqa maldecisqa,” nispa. (Gálatas 3:10).

Parlanachej pikunachus kallpakushanku, Runaj Churimpa ñawpaqempi sayasqa kayta munaspa, maytapuni mat’iykukunku Diospa kamachisqasninta paykunallamanta junt’ayta yuyaspa. (Lucas 21:35). Chaykunaga, runa masin uj chhikan imitapi pantarqojtin mana munankuchu perdonayta, imaraykuchus Diosqa mana perdonayta atinchu nispa yuyasqankurayku. “Llank’anapeqa, pichus llank’ajmanqa mana khuyaspachu pagontaqa jaywapun, manachayqa manuta jina.” Chayrayku, Leywan Evangeliowanqa mana kikin kkinchu kashanku, mana reparajqa chaypi pantan. Ñawpa Testamentomantopi, jinallataj Mosoj Testamentopipi Leywan Evangeliowanqa, ujina tratotaj kashan. Kayta mana reparaspaga pantallasumpuni. chayta ñawirisunman kay t’aqaspi: Romanos 10:5; 6:8; Hebreos 12:18-24; 10:20; Gálatas 4:22-31

Pikunachus Leypi atienikuspa kawsajkunaqa, Leypa nisqampi wañunku. jinallataj pichus atienekun Jesucristollapi salvasqa kayninkupi, paykunaqa kususqas kanku salvacionta tarisqankupi. “pichus mana imata ruwaspalla, creellan juchasapata cheqan runata rikhurichejpi, creesqanrayku Diosqa cheqan runapaj qhawan.” Chayrayku Jesucristopi creejqa kususqa kawsakun Diosman graciasta qospa salvasqa kasqanmanta.

Diosniyku, yanapawayku sajra aychaykoj munayninta qhesachayta. Jesucristoj sutimpi. Amén.

Abril 11

“... Kusikullanchejtaj llakiykunapi, yachaspa llakiykunaqa pacienciakuyta yachachiwasqanchejta.” (Romanos 5:3)

“Yachaspa” nin. Imata yachaspa? Chaypi sumajta unanchasunchej. “Kusikullanchejtaj llakiykunapi.” Chay kusikuyqa sonqonchejpi rikhurin, Diospa palabranta yachasqanchejrayku. “Diospi atienikuypis kallpayoj, palabranta yachakusqanchejrayku.” Kaymanta jina, ima llakiy jamujtimpis, mana yanapajninchejmanta sut’ita yachaspaqa, mana pipis kusikunmanchu; chayrayku, yachanchej, chay llakiypeqa mana sapanchejchu kashanchej, Jesucristoj jatun kallpan kusichiwanchej.

May chhika imas cristianotaqa llakichin, imaraykuchus runaj sonqonqa mana rumimantachu, chayrayku necesitanchej yanapata. Apóstol Pablopis may chhika llakiykunapi rikhurerqa, chayraykutaj nerqa: “Anchatapuni ñak’arerqayku; manaña kallpaykupis kaj jinachu karqa astawan ñak’arinaykupaj, manañataj yuyarqaykuchu kawsaytapis,” nispa. (2 Corintios 1:8).

Ajina llakiykunasllapipuni yuyaspa, jinallataj noqanchej kallpallanchejwanqa ni imanakuyta atisunmanchu, iskayrayasunman. Wakin hermanoswan ajina pasan, mashskhas iskayrayayman chayanku. Chay mana ajina noqanchejpi kanampajqa yachananchej tiyan, imapajchus chay pruebas kasqantaqa. Diospa wawasnenqa, ni imarayku ninachu, imaraykutaj kay tukuy ima jamuwan nispaqa. Manachayqa, imapajtaj kay kashan, nispa Dioswan parlarikuna kachun. Chayqa kashan, imatachus noqanchejmanta munashan Reyninchej, chaypaj. Jatumpis, juch’uypis llakiykunaqa jamun Diosman astawan chimpakunapajpuni.

Jesucristo nin: “Chaywampis umaykichejmanta mana uj chujchallapis chinkanqachu. Manachayqa pacienciaykichejwan salvasqa kankichej,” nispa. (Lucas 21:18-19). Chay niyta munan, Diosninchejqa tukuy ima sajramanta jark’awanchej, cuidawanchej ima,

Diosqa munakuwasqanchejrayku jasut’iwanchej, mana allinta ruwaspa juchallisqanchejta saqenapaj, ajinamanta Payman kutipunapaj. Diospa, Simi Nisqampi, nin: “Wawáy, Señorpa wanachina castigonta ama pisipaj qhawaychu, nitaj q’enaqakuychu qanta k’amisojton, imaraykuchus pitachá munakun, chayta castigan wanachinampaj. Pitachá wawampaj rejsikapun, chayta seq’on,” nispa. (Hebreos 12:5-6). Arí, Janaj pachapi tiyakamunapaj wakichishawanchej.

Munakoj Dios Tatayku, k’acha wawasniyki kayta yachachiwayku. Qanman atienikoj kamachisniyki kanaykupaj; jinallataj allin imasta ruwayta yachaqanaykupaj ima, Qanta kusichinaykupaj jinapuni. Jesucristoj sutimpi. Amén.

“Kaytaj chay willayqa: Diosqa wiñay kawsayta qowasqanchej, chay wiñay kawsaytaj Churimpi kashan. Diospa Churinta sonqompi jap’ikojqa wiñay kawsayniyoj. Diospa Churinta mana sonqompi jap’ikojrí mana wiñay kawsayniyojchu... Yachallanchejtaj Diospa Churin jamuspa yachayta qowasqanchejta cheqa kaj Diosta rejsinanchejpaj, cheqa kaj Churimpitaj kananchejpaj. Paymin cheqa kaj Diosqa, wiñay kawsaytaj.” (1 Juan 5:11-13, 20)

“Diosqa chay jinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis paypi creejqa mana chinkayman rinqachu, astawanqa wiñay kawsayniyoj kanqa,” nispa nin Juan 3:16. Kachamosqa uj k’ata Churinta, Paynejta salvasqa kananchejpaj. Dios Tatataqa kusikorqa, imaraykuchus Churinnejtay kay pachapi kaj runakunata Pay kikinwan allinyachikusqanmanta.

Maypichus Diospa Churin tiyakun chaypeqa, mana imapis pisiyta atinchu. Arí, maypichus almanchejta michej Señorninchej kashan chaypeqa sonqo tiyaykuy kashan, ñawisnimpeqa cheqan runata jina qhawawanchej. Chantapis, Payqa abogadonchej Dios Tataj ñawpaqempi kutikuwajninchej. “Paypi creejqa perdonasqa kanqa, wiñay kawsayniyojtaj.”

Chay jina jatun munakuynenqa tukuy Payman rejkunapaj kashan. Yachanchej jina, tukuy atiyniyoj Diosninchejqa, Pay kay pachata ruwan, makimpitaj purichishan. Jinallataj, pikunachus salvasqa kayta munajkunapajqa kanqapuni salvaciónqa. Señorninchejqa munan tukuy wiñay kawsayniyoj kanankuta, chaypaj jamorqa mana pagaspalla janaj pachaman pusanawanchejpaj.

Kay pachapi imamantapis ñak’arisqanchejqa mana imachu kashan, Janaj Pachapi wiñaypaj tiyakunanchejmanta nisqaqa. Jesucristo Dios Tatawan allinyachiwanchejña. Pichus Jesucristota qhesachajtaj Diospa uyantaqa mana rikullanqapischu.

Dios Tatayku, yanapawayku cruzman chakatayta sajra aychaykoj tukuy munayninta. Jesucristoj sutimpi. Amén.

Abril 13

“Noqa sumaj michej kani. Ovejasniyta rejsini, noqajta kajkunataj rejsiwanku... Noqaqa ovejasniyta rejsini, paykunataj parlasqayta uyariwanku, qhepaytataj jamunku... manataj jayk’ajpis chinkanqankuchu, makisniymantataj mana paykunata pipis qhechuwanqachu.” (Juan 10:14, 27-28)

Kay ñawisqanchej may k’achapuni, jinallantaj Romanos 8:35-39-pis, sut’ita rikuchiwanchej, Jesuspa makinmantaqa mana pipis qhechuyta atiwasqanchejta, imaraykuchus Payqa tukuy atiyniyoj Michejninchej kashan.

Noqanchejqa kay nisqanwanqa jatun sonqochasqa kanchej, Cristo Diospa Churin, sumaj Michej jinaqa noqanchejrayku kawsayninta qorqa. Payqa, noqanchejta salvanawanchejpaj runaman tukorqa, “noqanchej jina aychaman tukorqa,” noqanchej jina juchaman tanqasqa karqa manataj juchallirqachu. Chay tukuy imata yachashaspa, yuyankichu manajap’inanchejta allin imasta Paymanta?

Chantapis, Paypa makimpi ovejasnin kashajtin, pipis atinmanchu juchachayta? Paypa ovejasnenqa Michejnimpa nisqanta uyarinku. Arí, kikin Dios Jesucristopuni chay sumaj michejninchejqa kashan, Pay waqaychanqa Evangelionpi atienikujkunataqa; Pay kallpachawasun, sonqochawasun ima. Juchallikuspa Paymanta karunchakusaj nejtenchejpis, munakuyninwan kutichimuwasun tropaman.

“Noqa ovejasniytaqa michikusaj, noqallataj puñuchikusaj... chinkasqata noqa mask’amusaj, ch’eqerasqastataj tropaman kutirichimusaj. Chakin p’akisqata tableyaykusaj, mayt’uykusajtaj,” nispa. (Ezequiel 34:15-16). May jina ñak’ariypipis Payqa munakuyninwan yanapaspa sonqochawasun. Onqosqa kashajtinchejpis jampiykuwasun, kallpachaspataj allin ñanman churawasun.

Janaj Pachapi kashaj Tatayku, ama saqewaykuchu qanmanta karunchakujta, makiykipi jap’ikuwayku ama juchaman urmanaykupaj. Jesucristoj sutimpi. Amén.

“... ovejasniytaj parlasqayta uyariwanku...” (Juan 10:27)

Kay pacha kawsayninchejpi phutisqa kashajtincej, mayqen sonqochaj jamuwajtincejqa, allimpuni uyarinaqa. Icharí?

Michejpa ikunta uyareyqa aswan kusiyray kashan, chayqa mana ninriwan uyariyllachu; manachayqa, Simi nisqanta tukuy sonqonchejwan uyariy kashan, usqhayllata Payman rinapaj; chantapis michejpa ikonqa mana wajwan pantachikuna jinallachu, sumaj rejsisqa kasqanrayku.

Arí, chaytapuni necesitanchej cheqanta ñannimpi thaskinapajqa. Supaypa imaymanamanta qhatiykachashawanchej, sajra aychanchejpis juchaman tanqayta munaspa. Kay sajra mundoj trampasnimpis, tentacionisninwan urmachiyta munashawanchej. Michejninchejpa ikonta (Palabranta) uyarispataj, mana allin imasta noqanchejmanta chinkachin. Diospa wawasnin ni ujllapis kanchu mana allin imas rikhurejtin payllamanta sinch'illatapuni sayajqa.

Señorninchej Jesuspa yachachisqasnimpis, sapa kutilla pantaj kanku. Ajinamanta, Paypa parlayninta uyarispapapuni sapa p'unchay kawsakuj kanku. Chaywampis Sumaj Michejninkoj qayllampi kaspapuni wiñarqanku ceeyninkupeqa, chayrayku paykunaqa k'amichikun k'amichikun Michejninkuwan pusaykachachikoj kanku.

iUyariypuni sumaj Michejpa ikuntaqa! iMunakuy Paypa parlasqanta! Ñawiriy Paymanta qhelqasqata kallpayoj kanaykipaj, ceeyniyki mana pisiyanampaj ima; jinallataj Diosta munakuyniykipis, Payta manchachikuyniykipis jatun kanqa. Paypa parlaykusqanta ninrisniyki mana uyarin chaypis, Payqa Espíritu Santonejta sonqoykiman parlaykunqa, qanwampunitaj kanqa yanapasunampaj, llakiyniykipi sonqochasunampaj ima. Ajinamanta, iEspíritu Santota ama llakichiychu! Sumaj Michejninkita uyariypuni.

Ajinata tukuy imapi ruwanki chayqa, ni ima kay pachapi kaj, ni supaypis, “Jesucristomantaqa t'aqasonqachu.”

Dios Tatayku, sajra yuyaykunata noqaykumanta chinkachiy, Qampi mana creejkuna usunkumanta karunchawayku. Yachachiwayku llimphu sonqo kawsakuyta mayllapipis kashaspa. Jesucristoj sutimpi. Amén.

Abril 15

“... Juchasniyki pampachasqaña ... Creesqaykiqa salvasunki; sonqo junt’asqa ripuy...” (Lucas 7:48-50)

Diospa Simi Nisqan Bibliapi rikunchej, imaynatachus Cristo perdonasqanta juchasapasta. Noqanchejwampis kikillantataj ruwashan.

Sajra kawsayniyoj warmi tukuypa rejsisqan, Jesusman chimpaykorqa, “chakisnin chaypi k’umuykuspa waqasharqa.” Chantá Jesúsqa neerqa: “Juchasniykimanta perdonasqaña kanki”, nispa. (Mateo 9:2). Jinallataj Tarso llajtayoj Sauloqa, mana khuyayniyoj runa karqa, Jesuspi creejkunata qhatiykachaj runa karqa. Paytataj Señorninchej Jesucristoqa perdonarqa, Paypa apostolninman tukucherqa. Kikillantaj Rey Davidpis Diospa khuyayninta tarej runa kashaspa, may jina bendecisqa runa kashaspa, millay juchata ruwarqa. Paypis perdonasqallataj karqa.

Chay uj chhikata qhawarisollaraj reparanchej, Señorninchej Jesucristoj khuyaynenqa may jina jatun kasqantaqa. Kunampis, tukuy payman chimpajkunata perdonayta munan. Jesusqa, Apostolesnintapis mana phiñakuspalla misk’i simiwan k’amiraj. Chayrayku, noqanchejwampis ajinallatataj Salvawajninchejqqa ruwanqa. Paymanta tukuy mañakusqanchejtapis qoshawanchej. Ichari?

Ama qonqasunchu, “Jesucristoqa qaynapis kunampis kikillampuni,” kasqanta. (Hebreos 13:8). Chayqa noqanchejpaj kanan jatun sonqochay, kay jina sajra kawsayllaña imaymana llakiy, millay onqoykuna junt’aykamushajtimpis, Salmospis nin Jina, ajinata nisun: “Patapi kaj Diospa waqaychaynimpis kawsakojqa Tukuy Atiyniyoj Diospa llanthumpi samarikonqa. Tata Diosman nisaj: Qan kanki pakakunay, jark’achasqa wasiy, Diosniytaj; qampi atienekusaj, nispa.” (Salmos 91:1-2)

Chay tukoyqa ajina kanqa, Jesucristo sonqonchejpi junt’a kawsakojtin.

Dios Tatayku, qampi creeyniyta kallpachay. Kay pachapi mana allin kawsaymanta karunchaway. Jesucristoj sutimpi. Amén.

“Kunanrí, Leymanta kacharichisqaña kanchej. Chay Leyqa, kamachiynimpi jap’iwarqanchej, chaypajqa wañunchejña...” (Romanos 7:6)

Leymanta kachachirichisqa kaspá, uj k’ata Churin Jesucristonejta chenqan runapaj qhawasqa kanchej, ajinamanta Diospa t’aqasqa kanchej.

Allimpuni kashan, chay imasmanta allin sut’ita yachanaqa, Cristopi atienekuspalla kawsaspa, leypa ruwanasnintataj saquespa Diospa Qhasilla K’acha Yanapayninwan sonqo tiyaykuyta tarinchej.

Sonqonchej reparachiwanchej, leypa kamachisqasninta tukuyninta mana junt’ayta atisqanchejta, chayrayku necesitanchej Jesucristoman chimpakuyta, Paylla tukuyninta junt’arqa noqanchejrayku. Ajina kajtenqa, kusiyan nisunchej: Mana uyariyta munaniñachu leymantaqa, yachallani mana junt’ayta atisqaytaqa, salvasqa kanaypajqa noqaj cuentaymanta waj junt’anña, “Jesucristoj justician noqapi kashan.” Ajina kajtinqa, kunanmanta saquesaj leypa nisqanta kasuspalla salvasqa kaytaqa, imaraykuchus Jesucristo Salvadorniyqa, junt’anña tukuyninta, Paynijllata salvos kanchej.

“Pichus juchapaj wañojqa juchamanta kacharichisqaña,” nispá nin. (Romanos 7:6). Jesucristoj cuerponmantaña kaspaqa, tukuy sonqo leypa kamachisqantaqa munakusaj, Jesucristoj junt’asqampi atienikuspalla.

Diosmanta jamoj k’anchawanqa, kunanqa sut’ita rikuspáqa yachani leymanta kacharichisqaña kasqaytaqa. Kaytaqa, tukuy hermanosman yachayta qonanchej tiyan, manataj pata patallantachu, manachayqa sut’inchanakamapuni mashkha unaypipis yachanankukama. Noqanchejqa, chaypaj kay pachapi kashanchej, cheqa yachachiyta tukuyman yachayta qonapaj.

Munasqa Dios Tatayku, kallpachawayku ama ima pantasqa yachachiypi umaykuta muyuchinampaj. Jesucristoj sutimpi. Amén.

Abril 17

“... Sichus noqanchej chay jina jatun salvacionta mana kasuta ruwasunman chayqa, imaynatataj llusp'isunman castigomantari?...” (Hebreos 2:3)

Diospa K'acha Yanapayninta rejsejkunaqa, yachanchej Evangelionejta kallpayoj kasqanchejta, jinallataj yachanchej Diosqa wawampaj rejsikapuwasqanchejta Cristopi creesqanchejraykulla. Chay jinapi kashaspapis Diospa Qhasilla K'acha Yanapayninta, Evangeliotawan imaqa, wakin kutis pisipaj qhawaspa, Diosmanqa ni gracias nillanchejpischu. Chaymanta imanintaj Jesús? “Qanqa manaña ñawpajta jinachu munakuwanki,” nispa nin. (Apocalipsis 2:4).

Apostol Pabloqa parlallantaj chay ñawpaj munakuymanta, Gálatasman cartata qhelqasqampi. Chay iglesiamanta kajkuna qallariypeqa tukuy sonqo jap'ikusqanku Evangeliotaqa. Kikin Pablo nin, kay jinata: “Wajyarikuwarqankichej Diospa angelninta jina, Cristo Jesuspis kayman karqa, ajinata,” nispa. (Gálatas 4:14). Manaraj imapitaj wajyachachejkunaj parlasqankuta uyarispa, uma muyusqas Leypa nisqanmanñataj chhapukusqanku.

Chayraykutaj Apóstolqa, tapun: “Maytaj kunan chay jina kusiyniykichejri? ... chay kutipeqa atiwajchijchus karqa chayqa, ñawisniykichejtapis orqhukuspa, qowankichejman karqa,” nispa. (Gálatas 4:15). Arí, chaytaqa nin sinch'i llakisqa, sonqon yawarta waqashaj jinapuni. Chayrayku chaymantatukuchinampajtajn: “Chayjinawampuspunichukankichej? Espíritoj atiyinwan qallarishaspa, kunanqa aychaj kallpakusqanman jinachu tukuychayta munashankichej?” nispa. (Gálatas 3:3).

Apocalipsis libropi, nin: Ñawpajtaqa, “Mana sayk'uspa sayarqanki, noqarayku ñak'arerqanki, manataj llawch'iyarqankichu. Chaywampis, kayta contraykipi nini: Qanqa manaña ñawpajta jinachu munakuwanki,” nispa. (Apocalipsis 2:3-4).

Sichus Cristo noqanchejpi tiyakun chayqa, tukuy qhapaj kayninwan, payllawampuni kawsakunachej Janaj Pachaman chayananchejkama, ajinatapuni tukuy ninchej kawsakusun. Mana ancha unaytañachu kutimuyninta suyakusun. Chaykamataj cheqan Yachachiypi sinch'ita sayana. Chay cheqa yachacheyqa, Cristota astawanrejsiy kashan.

Atiyniyoj Dios Tatayku, yanapawayku Qampi kallpachakuyta, Bautisakusqaykuman jina kawsakuyta yanapawayku. Jesucristoj sutimpi. Amén.

“Noqaqa, manapuni munanichu juchallikoj runa wañunanta, manachayqa munani juchanmanta kutirimpunanta, kawsanantataj...” (Ezequiel 18:23)

Tukuy atiyinij Diosqa, juchasapa runata juchanmanta kacharichiyta munan; jatuchejjuchapis kachun, chayri juch'uyjuchapis kachun, Payqa perdonawasumpuni.

Diospa chay nisqampi mana ninchu, kayta, jaqayta ruwajtiykeraj perdonasqayki, nispaqa. Juchasapa, mashkha sumaj imastapis ruwachun mana valenchu Diospa ñawpaqempi perdonasqa kanampajqa. Imachus cheqamanta valenqa, Jesucristoj ruwasqanllan juchasapa runarayku wañusqan. Chay juchasapaj cuentampi cruzpi wañusqan perdonta qon, salvantaj, wiñay kawsayta qon. Juchasapa runaqa kutirikunallan tiyan Diosman, Jesucristo Churinneja salvasqa kanampajqa.

Cheqan sonqoyoj Diosqa, ni pitapis juchantaqa perdonallanchu mana Jesucristoneja kaspaga. Paypa, Simi Nisqampi nin: “Yawarwan llimphuchakun. Jaywanapaj yawar mana kajtin, mana juchapis pampachakunchu,” nispa. (Hebreos 9:22). Nillantaj: “Dios Tata cheqamanta Cristoneja kay pacha runasta pay kikinwan allinyacherqa, runaspa juchasninkuta qonqayman churaspa,” nispa. (2 Corintios 5:19). Imaynataj chay ruwakorqa? Diospa Simi Nisqan, nin: “Tata Diostajrí tukuyninchejpa juchasninchejta Payman q'epiricherqa,” nispa. (Isaías 53:6). Piman q'epiricherqa? Jesucristoman: “Kaymá Diospa Corederon, runaspa juchanta apaspa pichajqa,” nispa nin. (Juan 1:29). Arí. Chaymá kusiyqa. Dios Tataqa, tukuy juchanchejta perdonawanchej.

Supayqa makimpi jap'iwarqanchej, mana pay rantiwasqanchejrajkuchu, pay suwa jina wata runapaj tukuchiwasqanchejrayku. Chayrayku Dios nin: “Diosqa preciowan kacharichisorqachej chay qhasi manakaj kawsaymanta,” nispa. (1 Pedro 1:18).

Noqanchej sapanchejqa, mana yaykuyta atisunchu karqa Janaj Pachamanqa; Jesucristolla noqanchejta pusaykuwasun chay k'acha cheqamanqa. iPaylla k'ata salvawajninchejqa!

Dios Tatayku, tukuy sajra imasmanta waqaychawayku. Amapuni saqewaykuchu juchaman urmajtaqa. Jesucristoj sutimpi. Amén.

Abril 19

“... Jucha q’episniykiwan llasaykuwarqanki, chay jina millay juchata ruwasqasniykiwantaj sayk’uchiwarqanki... Noqarí, noqa kikiyta munakusqayrayku, chay millay juchaykita pichani. Chay juchasniykitaqa, qonqayman churasaj... Noqa juchasniykitaqa uj phuyuta jina chinkarparichini, mana kasukusqaykitataj kamanchakata jina. Noqaman kutirimuy, imaraykuchus noqamin preciowan kacharicherqayki.” (Isaías 43:24-25; 44:22)

“Hermanos sumajta qhawakuychej; ama pipis qankunamanta sajra mana creej sonqoyoq kachunchu, kawsaj Diosmanta karunchakunampaj,” nispa nin. (Hebreos 3:12)

Greenchej chay jinatapuni Dios kay pachapi runasta munakusqampi, creenchej noqanchejrayku runaman tukusqampi, creellanchejtaj kinsa chunka kuraj watasta kay pachapi purisqanta tukuypa qhesachasqan, jinallataj creenchej Getsemaní nisqa huertapi Dios Tatanmanta mañakushaspa yawarta jump’isqanta, jinallataj creenchej Sonqo nanay jasut’isqa cruzman chakatasqa wañusqanta ima. Chayta ruwarqa, noqanchejta salvanawanchejpaj, mana yupay atina juchasninchejta pampachanampaj ima.

Juchasninchejmanta parlaspaqa, may chhika imastawanraj atisunman niyta, chaykuwanqa Diosta phiñachinchej. Noqanchejri, ajina kashaspa, imaynatataj Diospa phiñakuyninta thasnusunman? Noqanchej kallpallanchejwanqa ni imaynamanta atisunmanchu kacharichikuytaqa.

Chayrayku Diosqa munan Payman kutirikunanchejta. Paytaj rikuchiwanchejña pichus phiñakuyninta thasnusqantaña, paytaj kashan JESUCRISTO uj k’ata Churin. Paypi creespalla perdonasqa, salvasqataj kanapaj. Noqanchejqqa, mana perdonanapaj jina kashajtinchepis Paypa ruwasqanrayku perdonawanchej.

Jesucristo nerqa: “Diosqa mana kay pacha runastajuchachanampajchu Churinta kachamorqa, manachayqa Paynejta salvasqa kanankupaj,” nispa. (Juan 3:17).

Dios Tatayku, librawayku sajraj atiyinmanta. Ama ima chejniypis atipanawaykupaj. Nillataj saqewaykuchu ima sajra munapayaypis noqaykupi rikhurinanta. Jesucristoj sutimpi. Amén.

“Uj runaj juchanraykulla wañuy atiyniyoj karqa. Jesucristoj ruwasqanri aswan atiyniyoj... Diospa Qhasilla K’acha Yanapayninta, cheqan sonqo kaynintawan jap’ejkunaqa, mosoj kawsaypi atiywan kawsanqanku uj runarayku, chaytaj JESUCRISTO.” (Romanos 5:17)

Juchaj castigonmanta Dios parlan chayqa, juchasapa runata yuyayninman kutirichinampaj; castigasqayki nin chaypis, pikunachus mana munankuchu Diosman kutirikuyta, chaykunata Payman kutirichinampaj. Dios Tataqa, munan tukuy runakunata Payman rinankuta Cristo Churinneja, Paynejta salvasqa kanankupaj.

Tukuy pikunachus Cristopi creejkunaqa, wiñaypaj leypa maldicionninmanta kacharichisqa kanku, wiñaypajtaj Janaj Pachapi tiyakunqanku. Jaqaypeqa, mana pipis nenqañachu juchasapa kani nispaqa. Diospa palabrampi, nin: “Kusikuyniyojmin runaqa, juchanmanta Señor mana cuentata mañajtin,” nispa. (Romanos 4:8). ¡Allinta reparay chay nisqanta: “Mana cuentata mañajtin”, nispa nin!

Ajina kashan Cristoj reinompeqa, chayman rejkunajta juchankuqa wiñaypaj perdonasqa. Chaytaqa Dios mana nishallanchu, nin chayqa nisqaña junt’akunampaj. Jaqaypi kajkunaqa juchasninkuqa perdonasqa kashan.

Mana allin imata noqapi reparakuni: Chiriyapuyniyta, qhella kayniyta, phiñakuyta, sajra imaspi yuyasqayta; tukuy chaykunamantaqa castigasqa kanay kashajtin, Diospa Qhasilla K’acha Yanapayninwan, Dios Jesucristo Churimpi perdonawan. Chayraku noqaqa Cristollawampuni kawsakuspa wiñay kawsayta tarisaj.

Chaywampis kay pachapeqa, sapa p’unchay kawsayniypi juchamanta t’aqasqa kaytapuni mask’asaj, imaraykuchus Salvawajinillay noqapi juchata atipanqa.

Juchaymanta perdonasqa kasqayta Dios nin chayqa, mana kunan p’unchayllapajchu, nitaj q’ayallapajchu, manachayqa wiñaypaj. Chayqa ajinapuni, mana llullachu.

Janaj Pachapi kashaj Diosniyku, pikunachus anchatapuni juchaman tanqasqa kajkunata makisniykiman churayku, urmajkunatataj sayarichiy ari. Jesucristoj sutimpi. Amén.

Abril 21

“... Ama pimampis manuchu kaychej, manachayqa purajmanta munanakuychej, imaraykuchus runa masinta munakojqa ñapis leyta junt'anña.” (Romanos 13:8)

Diospa wawan jina kawsakoyqa, munakuypi kawsakuy kashan. Imaynatataj atisuman ujkunata munakuyta tukuy tiempo? Imaynatachus Diosqa juchallishajtinchejpis noqallanchejwampuni, ajinallataj noqanchejpis runa masinchejta khuyakuspa munakuna.

Munakullasunpuni runa masinchejtaqa, ajina munakuy kajtinga tukuy allin kawsaypi kasun. Sichus: Ayllunchejmanta kajkunata, noqanchej qayllapi tiyakojkunallata, k'achas noqanchejwan kajkunallata allimpi qhawasanman chayqa, mana Diospa munakuynimpichu kawsashasunman.

Chaypajqa, santo remedio kashan, “perdonay”. Mana perdón kajtenqa, mana atisunchu munakuyta pitapis. Chayrayku Jesucristoqa parlawanchej, noqanchejwan juchallikujkunata perdonanapuni kasqantaqa. Uj rey qolqeta mañasqa ujnin kamachinman **chunka waranqa** qolqeta. Paytaj kamachi masinman mañallasqataj **pachaj** qolqeta. Chantá chay chunka waranqa mañasqanta mañakapojtintaj mana qopuyta atejtintaj, perdonaposqa chay ashkha qolqe manuta. (Mateo 18:23-35).

Jesusqa, yachachisharqa pipis ajinata perdonapunanta chay kamachi masinta. Uj kutipi Jesusqa “Janaj Pachapi kashay Tatayku”, nisqapi, perdonana kasqanta yachacherqa, kay jinata nispa: “Juchasniykuta pampachapuguayku, imaynatachus noqaykupis contraykupi juchallikujkunata perdonapuyku, ajinata” nispa. (Mateo 6:12)

Chay tukuymanta apóstol Juanpis nillantaj: “Kaymin Diospa kamachisqanqa: Diospa Churin Jesucristoj sutimpi creenanchej, jinataj ujkuna ujkunawan munanakunanchej, kamachiwasqanchejman jina,” nispa. (1 Juan 3:23). Chay jinamanta sonqo tiyaykusqa kasunchej, jinallataj uj sonqolla kayta atinchej Dioswan, jinallataj noqanchej ukhupipis.

Tukuy Atinyiyoj Dios, Qhasilla K'acha Yanapayniykita qowayku, kay sajrayasqa mundopi, chanta sajra sonqo runakuna chawpipipis k'achapi kawsakuyta yanapawayku. Jesucristoj sutimpi. Amén.

“... Señor, wawqey contrayta juchallikojtenqa mashkha kutitataj juchasninta perdonasajrí? Qanchis kutitachu? Nispa. Jesustajrí payman kuticherqa: Noqa niyki: Mana qanchis kutillatachu; astawanqa qanchis chuka kuti qanchiskamaraj.” (Mateo 18:21-22)

Qanpa sonqoyki kuisqa kanampaj, reparay qampi mashkha kutitachus Señorninchej perdonasunki chayta. Ujtawan, ujtawampis Payqa, mana sayk'uspa perdonasunki, kikillantataj ruwasun noqanchejpis runamasinchejwanqa.

Ichapisqanqanishawaj: Cristo nerqa, sichusperdonniykita mañakusunki chayqa, perdonay, nispa? Arí, chaywampis reparay imaynatachus Jesusqa sut'incharqa chayta: “Qanchis kutitachus uj p'unchaypi contraykita juchallikuspa, sichus qanchis kutita kutimun: Perdonaway, nispa chayqa, perdonapuy,” nispa nerqa. (Lucas 17:3-4).

“Kaytaqa mana allintachu ruwani” nispa pipis jamunman willakusuj chayqa, chaywampis qanqa chay juchanta perdonaypuni; watejmanta urmanman juchapi chaypis, perdonta mañasujtin munakuyniykipi perdonay. Jinallatapuni ruwashanman chaypis perdonallaypuni. Ajinamanta Cristoj reinonqa sayasqa kayta atin noqanchej ukhupeqa. Ajinata noqanchej ukhupi perdón kajtenqa, kusi y kawsay kanqa.

Apostol Juampa qhelqasqampi rikunchej Señorninchej Jesucristo yachachisqasnimpa chakisninta mayllasqanta. Chaypi yuyaspa, Martín Lutero nerqa: “Tukuy kay pachapi mana uj cristianollatapis tariwajchu chaykama llimphuta, nitaj iskayrayayta yachajtaqa. Ujqa usqhayllata phiñarparikuyta yachan, ujtaj imatapis ruwarparillan, ujtajrí payllapaj imatapis munaj runa kasqanta yuyakuspa kanku,” nispa.

Uj runaqa q'ara simi, imatapis parlarparillan. Ajina ari, sapa uj runakunaqa imaymana kawsayniyoj kay pachapi kanchej. Uj runata reparanki ajina kasqanta chayqa, “chakisninta mayllay”. Chayqa niyta munan, perdonay. Chantá rikunki allin kawsay ñanman churasqaykita. Kay pacha kawsayqa millay ch'ichi corral jina. Mana pipis atisunmanchu chakisninchejta “mana ch'ichichakuytaqa.”

Janaj Pachapi kashaj Dios Tatayku, amapuni jayk'ajpis phiñakuyniykita rikuchiwaykuchu ari. Perdonawaykupuni jatun munakuyniykipi. Jesucristoj sutimpi. Amén.

Abril 23

“Maypachachus kay ismoj cuerpo tukuponqa mana ismojman, kay wañoj cuerpotaj tukuponqa mana jayk’aj wañojman, chaypacha junt’akonqa Diosmanta Qhelqasqapi kasqanman jina: Wañoyqa atipasqaña chinkachisqataj.” (1 Corintios 15:54)

Chay ñawerqosqanchejqa, parlashan “Cheqampaj qhawasqa” runakuna, Janaj Pachaman yaykupunankumanta, chayqa uj takiy jina kashan. Kay takiytaqa takirisun infiernos rikunanta, wañuyqa rikunanta, juchaj rikunanta, chay tukuy imachus mayta ñak’arichiwarqanchej kay pachapi, chaykunaj rikunanta. (1 Corintios 15:53).

Chaypi takirisun kay jinata nispa: “Wañoyqa atipasqaña, chinkachisqataj,” nispa. (1 Corintios 15:54). Arí, kusi raymi kanqa. Mana wañoj cuerpoyoj wañusqamanta kawsarimpusun, chaypacha kanqa jatun kusiyninchejqa. Chay tukuy imasqa noqanchejpi valorniyoj alajas uj “t’uru p’uñupi” jallch’asqa jina kashan. Chay t’urumanta p’uñuqa kashan cuerponchej.

Wañupojkunaj almankoqa Dioswanña Janaj Pachapi kashanku. Uj p’unchaytaj chay almasqa mosoj cuerponkuwan kawsarimponqanku, mana ni jayk’aj wañoj cuerpowan. Chayrayku apóstol Pablo nerqa: “Munayman wañupuyta, Cristowan khuska kamunaypaj. Chaytaj aswan sumaj noqapajqa,” nispa. (Filipenses 1:23). Kunanqa yachanchej, Jesucristoj salvasqan kajkuna wañupuspaqa Señorwan kashanku Janaj Pachapi. Chayman chayanankupajqa, mana imatapis ruwarqankuchu kay pachapi kawsashaspaqa, Jesucristo Salvawajnillanchejpi atienikorqanku.

Janaj Pachapi kashaj Tatayku, kallpachawayku, kay pachapi wawasniyki jinapuni kawsakunaykupaj. Chay cheqa FETA noqaykuman churay. Jesucristoj sutimpi. Amén.

“Maypachachus kay ismoj cuerpo tukuponqa mana ismojman, kay wañoj cuerpotaj tukuponqa mana jayk’aj wañojman, chaypacha junt’akonqa Diosmanta Qhelqasqapi kasqanman jina: Wañoypa atipasqaña, chinkachisqataj. Kunanqa wañuypa atiyin atipanawanchejpaj manaña kanchu, nitaj ima sajratapis ruwayta atiwanchejchu. Wañoypa sajrata ruwawanchej jucharayku, juchataj atiyinijoj rikhurin leyrayku.” (1 Corintios 15:54-56)

Juchaj atiyenenqa “wañuy”, jucha kajtin wañuypis rikhurin. “Leytaj chayta reparachiwanchej”. Apostol Pablo niwanchej: “Maypichus ley mana kanchu, chaypi runaqa mana juchachasqachu,” nispa. (Romanos 5:15). Juchaqa phutichiwanchej wañuchiwanchejtaj, leypa kamachisqanta mana junt’ayta atisqanchijrayku.

Apóstol Pabloqa wañuypaj contrampi sayaykun, kayta nispa: **“Wañuy**, maytaj atiyinikiri? Ima ratollapis jamuy noqaman, mana manchachikuykiñachu, mana kapusunkiñachu imawanchus manchachiway kayku chay **juchaqa**. Qan sajra jucha tukuy kawsayniypi kharkatitichiway kanki, Diospa castigonta rikuspa ni imanayta atijchu kanki, kunanqa mana manchachikuykiñachu,” nispa.

ilmayna tonopichus chay raymipi takiyninchejqqa kanqapis! ilmayna kusiypunichus kanqapis chay p’unchayqa! Chaypacharaj kusiwan tapukusun: Kunanri maypitaj kashan juchari? Chayta uyarejtaj niwasun: Mana kanñachu, mana ujtawan kanqañachu, nispa. Wañuyrí maypitaj kashan? Wañuytaqa Cristo chinkacherqa cruzpi wañushaspa: “Tukuychasqaña,” nispa. (Juan 19:30).

Leypa maldicionnin Jesusman q’epirichisqa karqa, chaypitaj supay atipasqa karqa; ajinamanta Janaj Pacha punku watejmanta kicharisqa kanampaj. Uj k’ata Churimpaj ruwasqanraykulla, Diosqa watejmanta wawampaj rejsikapuwarqanchej; kunantaj uj k’ata Churinwan khuka Janaj Pachapi herenciayoj kanchej.

Diosman gracias ninchej, chay tukuy imata noqanchejpaj ruwasqanmanta.

Janaj Pachapi kashaj Diosniyku, kay pacha kawsayniykupi tukuy mana allin imasmanta waqaychawayku. Jesucristoj sutimpi. Amén.

Abрил 25

“... Ama manchachikuychejchu. Noqa yachani Jesusta mask’ashasqaykichejta, pichus chakatasqa karqa, chayta. Mana kaypiñachu. Nisqanmanjina kawsarimpunña, jamuychej, qhawaykuychej, maypichus Señor churasqa karqa chayta.” (Mateo 28:5-6)

Jesupa nacekusqanmantapacha angelkuna ñawpajta willajkuna karqanku. Paykunallataj Jesupa kawsarimpuyinmantapis ñawpajta willajkuna karqanku. Nisqaña karqa: “Janaj pachata kichasqata rikunki, Diospa angelisnintataj Runaj Churinman urayk’amushajta, wicharishajtataj,” nispa. (Juan 1:51). Jesupa chay nisqasnintaj chaypacha junt’akorqa.

Cristo nerqa Angelkuna kusikusqankumanta, “juchasapa runaqa Diosman kutirikojin.” (Lucas 15:10). Pipis atisumanchu niyta, imaynatapunichus chay angelkuna kusikusqankuta? Astawanraj kusikorqanku Jesucristoj kawsarimpusqanrayku, ajinallataj chay waranqa waranqa runakuna Diosman kutirikusqankurayku kusikunku.

Jesusa wañuymanta kawsarimuspa atipaparqa wañoytaqa. (1 Corintios 15:54). Juchaqa pampachasqaña, Jesucristonejta leypa mañasqanqa junt’asqaña. Diosqa pay kikinwan allinyachikun uj k’ata churin Cristorayku. Satanaspa thuñisqantaqa Diosninchejqqa mosojman tukuchin. Kunanqa, chay nina larwaj infiernoqa manaña suyashanchu Jesuspi creejkunataqa, Diospa ñawpaqempi Janaj Pacha k’anchashaj llajta paykunataqa suyashan.

Chay tukuymanta, tukuy angelkunaqa jatunta kusikorqanku. Chayrayku kusikunku kay pachapi pikunachus creespa Jesucristoman chimpajkunamantapis. Chantapis Angelkunaqa Janaj Pachaman rejkunata waqaychashanku, imaraykuchus cristianospaj herencianku Cristowan khuska kasqanrayku. (Hebreos 12:22)

Noqanchejtaj jaqayman chayaspañaqa, angeleswan khusqa Diosta yupaychasun. (Hebreos 12:22).

Dios Tatayku, ama saqeychu ni ima wañuchinaku kay pachapi kananta. Reinoyki noqaykuman jamuchun. Sutyki jatunchasqa kachun. Jesucristoj sutimpi. Amén.

“... Pay munakuwasqanrayku, noqa payta salvasaj patamantaj payta oqharisaj noqata rejsiwasqanrayku. Pay wajyawajtin, noqa uyarisaj. Llakiypipis noqa paywan kasaj...” (Salmos 91:14-15).

Ichus qan nishanki: Cheqapipuni noqaqa ni chhikitantapis iskayrayanichu Diospa wawanña kasqayrayku, nispa

Diospa Simi Nisqan Bibliapi rikuchiwanchej ashkhas ajinata kawsajkuna kasqankutaqa. Ajinata creejkunaqa karqankupuni, jinataj ima ñak'ariy jamojtimpis, ch'inmanta Señorman k'umuykukuspa ñak'arerqanku, wakintaj wañuchisqa ima karqanku.

Apostol Pablo, nerqa: “Chay kikin Espiritullataj espiritunchejwan khuska testigo jina sut'inchan Diospa wawasnin kasqanchejta,” nispa. (Romanos 8:16). Apostol Juanpis, nin: “Diospa Churimpi creejqa Diospa testigo jina willasqanta sonqompi jap'in,” nispa. (1 Juan 5:10) Ujtawampis Apostol Juanqa, nillantaj: “Diospa Churimpi creejkunaman, yachanaykichejpaj wiñay kawsayniyoj kasqaykichejta,” nispa. (1 Juan 5:13).

Señorninchej Jesusqa wajyakuwanchej: “Ch'akichikojqa jamuchun, munajtaj, kawsay yakumanta qhasilla uyyachun,” nispa. (Apocalipsis 22:17). Isaías 1:18-pis nin: “Juchasniykichejqa may jina pukapis kachunku, rit'i jina yuraj kanqanku; may jina kullipis kachunku, yuraj millma jina kanqanku,” nispa.

Gálatas 6:4 imanishanchus chayta rikuspa, Martín Lutero nerqa: “Kallpakunapuni chayta sut'iman orqhoyta, sut'ita entiendenakama. Mana qhellakuspa kutin kutinta ñawerqospa unanchanallapuni, ajinamanta sumajta etiendesun Diospa Qhasilla K'acha Yanapaynimpichus kashanchej manachus chaytaqa,” nispa.

Sichus iskay sonqollarajpuni kashanchej chayqa, mana sumajta entiendesunchu; manataj sonqonchejpi kanqachu Jesucristopi sonqo junt'asqa kayqa. Iskayrayay sonqo kayninchejqa karunchawasunman Diosmantaqa. Payta munakuspa kawsakusun chayrí, kallpachawasun jatun kusikuy noqanchejpi kanqa, Jesucristo kallpachawasun, ni imataj iskarayachiwasunchu.

Dios Tatayku, qanqa uyariwaykupuni tukuy mañakususqaykutaqa, munayniykiman jinataj qowayku. Noqaykutaj tukuy sonqo Qanta yupaychayku. Jesucristoj sutimpi. Amén.

Abril 27

“Kunanqa yachanchej Cristo kawsarimpusqanta. Wañusqakunamanta ñawpajta kawsarimpun uj ñawpaj poqoy jina.” (1 Corintios 15:20)

Apóstol Pablo nishan: “Ñawpaj poqoy,” nispa. Chaytaqa parlashan Jesucristoj kawsarimpuyinmanta rijch’anachispa, imaynatachus imatapis poqochispa Israelitas apaj kanku Temploman, chajramanta ñawpa poqoyta, Deuteronomio 26 t’aqapi chayta nin. Levítico 23 t’aqapi nillantaj, trigo poqochisqankumanta ñawpaj kaj marq’ata sacerdoteman apamunankuta. Samarikuna p’unchaypa q’ayantin sacerdoteqa, chay trigo marq’ata Tata Diosman rikuchinan karqa.

Chay “ñawpaj kaj gavillaqa,” niyta munashan, chay cosechaqa sumaj poqoy kananta. Chayta nispa Apóstol Pabloqa yachachisharqa Cristoj kawsarimpuyinca ñawpaj poqoy jina kasqanta; Jesucristo kashan “ñawpaj kaj Kawsarimpoj poqoyqa.” Pay ñawpajta kawsarimusqampi, noqanchejqqa manaña ujtawan wañusunchu. Chay kawsarimpusqantaj noqanchejpajpis ajina kananta qowanchej, imaynatachus trigo mujoqa jallp’aman urmasqa wañun, mosoj trigotaj wiñachimun askhata poqoyniyojtataj, ajinata.

Chayta nispaqa yachachisharqa, pikunachus Jesuspa salvasqan kajkunaqa, Cristo jina kawsarimpunallanchejtataj. Ajinata Cristoqa wañorqa, Pascua corderota mikhoj kanku chay p’unchaypi. Kawasarimporqataj chay Pascua Cordero aychata mikhorqanku chay p’unchaypi; kawsarimporqa “Uj ñawpaj poqoy jina.” (1 Corintios 15:20). Chay tukuy imaqa, ajinapuni junt’akorqa. Chay tukuy imas cheqapuni ajina kashajtimpis, pipis ninmanrajchu Cristianospa yachachisqankoqa uj religionlla kasqanta?

Tukuy kay pachapi Jesucristopi creejukuna p’ampasqa kajkunaqa, chay Cristo kawsarimpun ñawpajta, ajinata kawsarimpunqanku. Chay Cristoj ruwasqanqa, noqanchejpajqa sumaj garantía, noqanchejpis ajinata kawsaripunallanchejtataj.

Janaj pachapi kashaj Tatayku, noqaqa juchasapa kani, mana qanman uyallaytapis oqharimunaypaj jinallapischu kani. Chaywampis, Salvawajniy Jesucristoj sutimpi mañakuyki khuyarikunawaykita. Jesucristoj sutimpi. Amén.

“... Diosqa chay unanchay mana atina sonqo tiyaykuyninta sonqosniykichejman churanqa, chaytaj sonqoykichejta yuyayniykichejtawan waqaychanqa Cristo Jesuspi. (Filipenses 4:7)”

Khuyakoj Diosninchejqqa, mana munanchu tiempo usuchispa, iskay sonqolla, llakisqallataj kawsakunataqa. Payqa munan kawsakunanchejta kay pachapeqa sonqo tiyaykusqa, kusijsqataj. Apóstol Pabloqa, nin: “kusikuychejpuni Señorpi,” nispa. (Filipenses 4:4). Chaymin Diospa munaynenqa Cristo Jesuspi tukuy noqanchejpajqa. Maypachachus sonqo tiyaykusqa kanchej, sonqo junt’asqataj kanchej Cristo Jesuspi chayqa, kusiyan Diosta yupaychasunchej.

Janaj Pachaman ripunampachapi, salvawajninchej Jesucristoqa yachachisqasninman nerqa: “Kay tukuy imata niykichej, noqapi sonqoykichej tiyaykusqa kanampaj. Kay pachapeqa ñak’arinaykichej tiyan; chaywampis sonqoykichejpi kallpachakuchej, imaraykuchus kay pachaj sajra kayninta atipaniña,” nispa. (Juan 16:33). Chayta nispa Jesusqa yacharqa, kay pachapi kallpallanchejwanqa mana atipayta atisqanchejta, chayrayku Paypaj kallpan noqanchejpi atipan. Paypa nisqampi samarikunachej, imaynachus ñuñoj wawitapis mamanpa marq’ampi samarikun ajinata.

Kay laya sonqo tiyaykoyqa kallpachawanchej, waqaychawanchej sonqonchejta Cristo Jesuspi. Allimpi kawsachiwanchej kusichiwanchej, chantapis kallpachawanchej allin imasta ruwayman. Kawsayninchejqqa Salvawajninchejta yupaychaspa jatunchanapaj jinapuni kanqa, imaraykuchus “Tata Diospa kusikuynenqa kallpachawanchej,” nispa nin. (Nehemías 8:10).

Sonqo tiyaykuyniyqa Diosllapi kashan, Cristopi creesqayrayku chayqa tukuy imata atinapaj jinapuni qowan, ima llakiypi kashaspis Jesucristolla kallpayqa. Mana Dioswanqa wajcha rikhuriyman, mana kallpayojtaj. Ima juchaman tanqasqa rikhurispapis Espíritu Santo riparachispa Cristomanpuni pusawanqa. Apostol Pablopis nin: “Sonqoykichejta, yuyayniykichejtawan waqaychanqa Cristo Jesuspi,” nispa. (Filipenses 4:7). Bibliapi nillantaj: “Imaraykuchus Tata Diospa kusikuynenqa kallpachawanchej,” nin. (Nehemías 8:10).

Munasqa Tatayku, jatunchasqa sutiyki kachun kawsayniykupi, Iglesiykipipis. Jesucristoj sutimpi. Amén.

Abril 29

“... Noqa kani tukuy Imañ Qallariynin, Tukukuynintaj. Tukuy ima ruwasqaña. Ch’akichikojmanqa kawsachej yaku juturimanta qhasilla yakuta ujjachisaj.” (Apocalipsis 21:6; 22:17)

Señorpa kay k’achitu Simi Nisqasnenqa, tukuy tiempopaj nisqas kashan. “Ch’akichikojqa jamuchun, munajtaj, kawsaj yakumanta qhasilla ujjachun,” nispa nin. (Apocalipsis 22:17).

Diospa munakuyninmanta parlaspaqa, kay jinata nin: “Diosqa chay jinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis Paypi creejqqa mana chinkayman renqachu, astawanqa wiñay kawsayniyoj kanqa,” nispa. (Juan 3:16). Nishallantaj: “Runaj Churenqa jamun chinkasqa kajta mask’aj, salvajtaj,” nispa. (Lucas 19:10)

“Ch’akichikojqa jamuchun, munajtaj, kawsaj yakumanta qhasilla ujjachun,” nispa nin. (Apocalipsis 22:17). Dios wajyashan mana wakillantachu, manachayqa tukuy kay pachapi runakunata wajyashan, ni pita qhesachaspa. Mayqen juchasapachus Diosman kutirikuyta munan chayqa, usqhayllata Salvajnin Jesucristoman chimpachun, juchasnin pampachasqa kanampaj.

Sichus munanki sonqo tiyaykusqa kayta, munankitaj Dioswan uj sonqolla kawsayta chayqa, usqayllata jamuy Jesucristoman, wiñay kawsaytataj jap’inki.

Pikunachus mana munankupunichu Diospa Qhasilla K’acha Yanapaynintajap’ikuyta chaykunata Diosmantakarunchasqakanqanku. Chay jina runasmanta Bibliaqa, kinsa kuta nin: “¡Ay! ¡Ay! ¡Ay!” Nispa. (Apocalipsis 8:13). Qanrí. Diosta munakuspa creeya munankichu? Ajina kajtenqa, Jesucristoman chimpakuy. Payqa nisunki: “pichus munajqa jamuchun,” nispa. Arí, kunanpacha Payman chinpaykuy.

Khuayakoj Dios, qanman kutirikamuyta munajkunataqa, kutirichimuy ari; paykunawan khuska Qampa sutykita jatunchasunaykupaj, kay sumaj yachachiyta uyarisqaykuman jina. Jesucristoj sutimpi. Amén.

“Pitaj Cristoj munakuyninmanta t’aqawasunrí?...” (Romanos 8:35)

Ajinata tapukun apóstol Pablo, pay Jesucristoj munakuynin may jatun kasqanta yachaspa, nerqa: “Mana pipis Diospa munakuyninmanta t’aqawasunmanchu,” nispa. (Romanos 8:38). Ajinata nerqa Apostol Pabloqa, imaraykuchus paypaj kawsayninqa Jesucristo karqa.

Apóstol Pabloqa, mana payllapi yuyaspachu kayta qhelqarqa. Manachayqa mashkha hermanos chay jinapi rikhursqankurayku kallpachanampaj chaytaqa qhelqaspa saqewarqanchej; Ajinata kawsajkunapi Diospa qhasilla k’acha Yanapayninqa rikukun sonqonkupi kasqanqa.

Sonqoykipi chay imas, Apostol Pabloj nisqanman jina kashan chayqa, Cristolla kallpayki kashan, Paypi atienikusqaykirayku sinch’i sayashanki Diosniyki creespa. Allintapuni qhawakuy ama karunchakuychu Salvadorniykimantaqa yanapasunqa sinch’i kanaykipaj.

Sonqonchejqqa, kaymanta jina iskayrayasqa rikhurin, mancharikunchej noqanchejmanta chay allin imas chinkarisqanta yuyaspa, jinataj Jesucristota munakusqayraykutaj, mana munankichu karunchakuyta. Ajina kajtenqa usqayllata Diospa jatun Trononman chimpakuy Jesucristo Churimpa sutimpi, watejmanta kusiy qampi kanampaj, kallpatataj jap’inki.

Arí, maypachachus pisi qolqe jallch’akusqanchej chinkanman chayqa, mana anchata llakikunchejchu. Ashka qolqe chinkanman chayrí, jatun llakiy jamun. Munanchejpuni ahska qolqenchej kajtenqa sumjtapuni maypipis waqaychasqa kanantaqa. Ajinallataj Salvasqa kasqanchej chinkanantaqa mana munasunmanchu. Chaypi rikunki Diosqa qampi ruwashasqanta sumaj imastaqa. Apóstol Pablopis nin: “Pitaj Cristoj munakuyninmanta t’aqawasunrí,” nispaqa. (Romanos 8:35).

Janaj Pachapi kashaj Tatayku, ama saqeychu mana qampi creejkuna, creeyta munajkunata pantachinankutaqa. Jesucristoj sutimpi. Amén.



Mayo

*"Juchasninchejtachus Diosman willakunchej
chayrí, juchasninchejta pampachanqa, nisqanta
junt'aj, cheqantaj kasqanrayku." (1 Juan 1:9).*

Mayo 1

“... Kawsaqey, imajtintaj kayman yaykumorqanki mana casamiento p’achayojrí?...” (Mateo 22:12)

Jesúsqa nin: “Janaj Pacha reinoqa,” Diospa Qhasilla K’acha Yanapaynin Reino, rijch’akun uj Rey wawampaj wakichisqan casarakuman wajyakusqampi. Chay raymimantaj ashkha mink’asqas karganku.

Chaykunamanta wakintaj, manajamuyta munaspa imaymana achakista churasqanku. Chaykunamanta ujnin nisqa: Jallp’ayta llank’anay kashan, nispa. Ujnintaj nisqa: Qhatuypi rak’imunay kashan, nisqa. Ujnimpis nillasqataj: Manachá atiymanchu kunallanraj casarakuni, nispa. Wakinrí risqankupuni chay casarakumanqa. “Casaraku wasepeqa runa junt’a” kashasqa. Arí, ajina kasqa; ajinata Cristoqa parlaykusharqa: Chay nisqampi nin, chay runa ukhupi uj runa kashasqa mana casaraku p’achayoj. Chaytaj mayta phiñachisqa Reytaqa, chay runatataj qharqochimusqa, makin chakin watasqata jawa laqhaman.

Chay wijch’uchikamoj runaqa, mana chay ujku jina qhesachasqachu reypa wajyasqan casarakumanqa, chayraykutaj chay runaqa chaypi kasharqa. Chantá imaraykutaj pay qharqochikamorqa? Imaniytataj munaqqa Jesús chayta nispa? Yachachisharqa, kunampis jinallataj askhas kashanku Evangelionejta wajyasqas kajkunaqa, ichus chay wakin jamojkunaqa cristianoswan khuska kashanku, chay ñawpa kawasayninkuta saqeyta munaspa.

Paykunapis Cristianos imatachus, imaynatatajchus ruwashanku, chaykunata paykunapis kichallantataj ruwaspa kashanku. Chaywampis nin ñawirisqanchejman jinaqa, paykunajtaqa mana kaporqachu casaraku p’achanku. Chaytaj niyta munan, sonqonkupiqa mana kargachu Señorninchej Jesucristo. Chayrayku nin, chay casarakumanta qharqochikoj runaqa, cheqamanta Jesucristoj salvasqan kajkunawan kasharqa, paykuna ukhupi. Chaywampis ñawej rikusqallan k’acha creyentes jina kasharqanku, sonqonkupitaj mana Jesucristo kawsakurqachu; cristianopis kanman jinalla, manataj salvasqapunichu karga.

Cristopipuni perdonasqa kananchej tiyan, ajinamanta almanchej perdonasqa qhapaj Yawarnimpi mayllasqa kaspas, Diospa rikuyinimpita Cheqampaj qhawasqa kasunchej. Chayrayku Jesucristoj llimphuchasqanraykulla salvasqa kanchej.

Munasqa Tatayku, chay qhasi manakaj kawsaymanta Qan orqhowarqayku, ajinallatataj ruway ari waj kawsaqesniyuwampis. Jesucristoj sutimpi mañakuyku. Amén.

“... Chaypitaj uj runata rikusqa mana casamiento p’achayojta” (Mateo 22:11)

Mayqentaj, imaynataj chay casamiento p’acha? Apocalipsis 7:14-15 nin: “Kaykunaqa chay jatun ñak’ariy tiempomanta llojsimojkuna kanku. Paykunaqa p’achasninkuta yurajyacherqanku, Corderoj yawarnimpi t’ajsaspa. Chayrayku Diospa kamachina tiyanampa ñawpaqempi kashanku,” nispa. Laodisea llajtapi kaj iglesiaman Jesusqa nin kay jinata: “Yuyaychayki rantikunaykita yuraj p’achata p’achallikunaykipaj, ama q’alalla kasqaykej p’enqaynin rikukunampaj,” nispa. (Apocalipsis 3:18).

Chay casamiento p’achaga, Jesucristoj Cruzpi yawar jich’asqanwan sonqonko yurajyachisqan kashan. Ichus wakinqa, ñawej rikusqallan iglesiapi kashanku, sonqonkupitaj mana Jesucristo kasashanchu chayqa, sonqonchejqqa ch’ichillaraj kashanman. Jesucristoj qosqan p’achata, pipis jap’in Paypi creesqanraykulla. Arí, chay p’achallawan cheqamanta p’achallisqa kayta atinchej Reyqa ñawpaqempeqa (Filipenses 3:8,9).

Pikunatajchus paykunallamanta allin ruwasqasninkuwan cheqampaj qhawasqa kasqankuta yuyakojkuna, manaraj chay casamiento p’achan kapunrajchu. Wakintajrí yachanku mana Cristowanqa chinkasqa kasqankuta, chayraykutaj yachanku Cristoj yurajyachisqa p’achalla salvaj kasqantaqa. Paykunaqa munanku Cristoj yachachisqanta jap’ikuyta, iglesiapi khuska kayta ima.

Manaraj yuraj p’achasniyoj kajkunaqa, Diospa ñawpaqempeqa may jina uma oqharisqa llimphu makisniyoj kasqankuta yuyanku, kawsayninkupitaj mana ajinatachu kawsanku, nitaj Cristopichu atienikunku, manachayqa paykunaj ruwasqasnillampi (Buenas obras nisqapi). Cheqa cristianos kajkunari, yachanku juchasapa kasqankurayku, Diosqa khuyakuynillan Cristopi salvasqanta, chaytaj creesqanraykulla. Ajinallamanta mosoj runaman tukuchiwanchej.

Munasqa Diosniyku, pantasqa kajkunata cheqamanta mosoj runaman tukuchiy ari. Paykunapis noqaykuwan khuska Qanta yupatchasunaykupaj. Jesucristoj sutimpi. Amén.

Mayo 3

“Noqaqa cheqa uva sach’a kani, Tataytaj llank’aj. Noqapi kaj rama sichus mana poqon chayqa, Dios Tata k’utonqa. Poqoj ramatataj podaspa llimphuchanqa, astawan poqonampaj.” (Juan 15:1-2)

Kaypeqa, Cristo parlan “uva sach’aj wakin ramasnin mana poqojmanta.” Chay mana poqoj ramasqa k’utusqa kanqa nin, ch’akirajtintaj ninaman wich’uykuspa q’olachinankumanta ima parlan. Khuyayniyoj Salvajpa simimpi uyarikun, jatunta mancharinapaj parlaykuna. Astawan mancharinaqa, chay ramas Paypi kashaspa mana poqoshankuchu, chaykunamanta.

Ni pi Paypi kaspaqa mana poqoyniyoj kaytaqa. Payqa nin: “Pillapis noqapi kajqa, noqataj paypi, chaymá ashkhata poqonqa. Mana noqawanqa, mana imatapis ruwayta atinkichejchu,” nispá. (Juan 15:5). Señorninchejqá chaymanta parlaspaqa rijch’anachisharqa wawasninqa, mana kikinchu karqa, chaypi chay puraj uyasmantawanqa. (Hebreos 12:8).

Jesusqa nerqa: Chay poqoj ramasqa llimphuchasqa kananta. Mana poqoj ramastari, mana poqoyniyoj kasqankurayku k’uturasqa kanankuta nin, chay mana allin ramasqa, ni retoñaspapis poqonkumampunichu. Wakin kutiqa, ajina creyentes kajkunaqa ni mashkhata parlapayasqapis, ni mashkhata yachachisqapis cheqamanta munankupunichu Diosman kutirikuytaqa.

Sapa ujninchej, chaypi unancharina tiyan, cheqamanta Diospa wawampunichus, chayri manachus kasqanchejta yachanapajqa; poqoshanchejchus manachus Diospa wawan jinaqa; chaypi rikunanchejpaj, cheqamanta poqoshanchejchus manachus chayta. Imaraykuchus uj Cristowanqa mana imatapis ruwayta atinmanchu mana Cristoj kallpan paypi kajtenqa.

Janaj Pachapi kashaj Tatayku, chay mana creejkunata mosoj runaman tukuchiy, noqaykuwan khuskachakunankupaj, jinallataj Qanta sirvisunankupaj. Jesucristoj sutimpi. Amén.

“... Espirituman jina kawsaj runapirí kay imas poqoy jina rikukun: Munakuyniyoj kay...” (Gálatas 5:22)

Cristo, jinallataj apostolkuna, astawanqa Juan ashkhata parlan munakuyniyoj kanamantaqa, astawampis Cristopi kaj hermanosninchejta munakunamanta parlan. Juanqa nin: “Sichus hermanosta munakunchej chayqa, yachanchej wañuymanta kawsayman chimpapusqanchejta,” nispa. (1 Juan 3:14). “Diosta munakojqa hermanontapis munakullachuntaj,” nispa. (1 Juan 4:21).

Kayta yachashaspapis cristianos jinaqa atisunmanraj pantayta. Kanku kay pachapi runakuna, mana cristianos kashaspapis munakojkunaqa, paykuna kikinku mana Diospa wawan kashaspapis munakunku runamasinkutaqa. Ichus paykunaqa pantanku, paykunata munakojkunallata munakusqankupi.

Apóstol Juanqa, nin: “Tatata munakojqa chay Tataj wawantapis munakullantaj. Kay jinamanta yachanchej Diospa wawasninta munakusqanchejta, maypachachus Diosta munakunchej, kamachisqasnintataj kasunchej chaypacha,” nispa. (1 Juan 5:1-2).

Unanchariy, imaraykupunichus iglesianchejpi kaj hermanosta munakunchej, chayta. Mana watejmanta Diospa ayllun ukhupi nacesqanraykuchu, manallataj paykuna k’achas kasqankuraykuchu. Dios munakuwasqanchejrayku, kikillantataj noqanchejpis munakunchej runamasinchejtaqa. Imaynatachus qampis llakisqa kashaspa sonqo tiyaykuyta Cristopi tarerqanki, ajinallatataj qampis sonqochay runamasiykita Diospa munakuynimpi.

Jesusqa jatumpaj qhawan, wawasnin munanakuypi kawsajtinkoqa. Chayrayku Pay uj kuti nerqa: “Sichus pipis sutiypi uj vaso yakullatapis jaywarisunkichejman, Cristojta kasqaykichejrayku chayqa, cheqatapuni niykichej: T’inkantaqa jap’ikaponqapuni, nispa” (Marcos 9:41).

Janaj pachapi kashaj Tatayku, pikunachus mana kutikamuyta munajkunata kutichimuy Qanman. Jesucristoj sutimpi. Amén.

Mayo 5

“Espirituman jina kawsaj runapirí kay imas poqoy jina rikukun: Munakuyniyoj kay, kusikuyniyoj kay, sonqo tiyaykusqa kay, pacienciayoj kay, khuyakuyniyoj kay, k’acha kay, nisqanta junt’aj kay, llamp’u sonqo kay...ima.” (Gálatas 5:22-23)

Chay poqoykunamanta ujnin kashan, sonqo tiyaykusqa kay. Arí, chaywampis sumajta t’ukurina imachus chay sonqo tiyaykuchisqa kayta rikhurichisqampi. Imajtinchus, ashkha runakuna sumaj religiososlla kanku, qhawarisqalla sonqo tiyaykusqa kaspera jinanku. Chayrayku nisunchey imachus chay sonqo tayaykuyta rikhurichisqanta.

Apóstol Pablo parlan, mayqen sonqo tiyaykuychus cheqapipuni kasqanta. Pay nin: “Creescqanchejrayku cheqan runapaj qhawasqa kaspera, Dioswan allinyachisqa kanchej Señorninchej Jesucristonejta,” nispera. (Romanos 5:1). Qanrí, maypitaj tarerqanki chay sonqo tiyaykusqa kayta? Cristopichu, manachayrí kallpakuspallachu? Chayri juchasniykita qonqayman churaspallachu? Sichus juchallisqaykimanta ni tumpallatapis llakikunkichu, nitaj mask’ankichu Diospa Corderompa yawarnimpi perdonasqa kayta chayqa, imaynachus kashanki chayllapi sonqoykita tiyaykuchiyta munashanki.

Noqanchej wajchas juchasapasqa, atinchej tariyta sonqo tiyaykusqa kaytaqa, Cristollapi. Chay sumaj willaykuna Evangelioipi kashan munakuymanta, perdonmantapis, chay tukuy imataqa Cristollapi tarinchej. Chaymá kashan, cheqa kaj sonqo tiyaykusqa kayqa. Creenanchejpuni kashan, Cristo cruzpi wañushaspa juchasninchejta apasqampi, noqanchej wañusqa kashajtinchey kawsananchejpaj cheqan runapaj qhawasqa kananchejpaj ima.

Jesusqa parlarqa uj runamanta: “Fariseo kajqa sayaspa, payllapaj mañakushasqa: Diosnáy, graciasta qoyki, imaraykuchus mana wakinkuna jina suwachu, sajrachu, qhenchachu kani, nitaj kay impuestero jinachu kani,” nispera. (Lucas 18:11). Qampa poqoyniykiqa ama fariso jina qanllamantachu jamuchun; manachayqa, jamuchun Diospa Qhasilla K’acha yanaynillamanta, Jesucristo rawasqallampi.

Munasqa Dios Tatayku, Churiyki Jesuspa mana salvasqan kajkunata, jinallataj tukuy churanakojkunata allin ñanman kutichimuy ari. Jesucristoj sutimpi. Amén.

“... Diospa wawan kajqa kay pachaj yuyayninman jina kawsayta atipan. Creesqanchejmin kay pachaj yuyayninman jina kawsayta atipan.” (1 Juan 5:4)

Hebreos chunka ujniyoj t'aqapi parlashan, pikunachus kay pachapi tukuyman yachayta qosqankupi mayta ñak'arispas kawsajkunamanta. Arí. paykunaqa kay pachaj yuyayninman kawsayta atiparqanku, Jesucristoj kallpanwan. Mana supaywan qhatatachikuspa kawsakusqanku. Chay imasta atipayqa, sajra aychanchejpa munaninta sapa p'unchay wañuchispa Jesucristoj kallpanwan. Chay tukuyta atipan Cristopi creesqanchej chay FE.

Watejmanta nacejqa, Diospa wawan Jesucristopi creesqanraykulla mosoj runaman tukun. Chay ñawpa kawsayninta saqen, Salvajnin Jesusta munakusqanrayku. Chaywampis, chay mana niyta munanchu ujtawan mana juchallikunantaqa. Mashkha kutitarajchus juchaman tanqasqa kanqa, ichapis urmanqa ima; chaywampis, mana qhepakaponqachu ajina urmasqa, manachayqa sayarikunpa Jesucristoman renqa perdonta tarinampaj. Ajinamantataj kallpanwan ñawpajman rillanqapuni.

Cristoj mana salvasqan kajkunarí, juchaj wata runanman tukupunku nitaj kacharichikuyta atinkuchu; wakin kutasqa waqarikunku ni imanayta atispa. Diosmanta nacesqa kaj Diospa wawanrí, Jesucristowan khuska kawsakun, manaña juchaj wata runanñachu. Ima ratopis sajra aychaj munaynenqa rikhurimuytapuni munan Diospa wawampa kawsaynimpeqa. Manachus reparakuytawankama Diosman qhaparikonqa Jesucristoman rispa chayqa, urmallaqapuni.

Jesucristo Salvajninwampuni mayllapipis kanqa chayqa, ima juchaman tanqasqa kaspapis Jesucristoj kallpanwanqa atipanqapuni.

Dios Tatayku, juchaman urmasqakunata, chay jatun khuyakuyniykipi rijch'arichiy, qanman kutirikamunankupaj wawasniyki kanankupaj, noqaykuwan khuska Qanta jatunchasunaykupaj. Jesucristoj sutimpi. Amén.

Mayo 7

“... Kay pachaj yuyayninman jina kawsakojqa, Diospa contran kasqanta?...”
(Santiago 4:4)

Mana pipis Diospa kawsaqentaj, supaypa kawsaqentaj kayta atinmanchu. Chay jina kaytaqa, ni pipis mask'arqachu, nillataj Cristopis ni apostolkunapis ajinataqa yachachirqachu. Cristota qhatikushaspa ichus atiwaj saqerpariyta. Dioswan kashaspa allinta unanchaj kashaspapis, atiwaj saqepuyta. Diospa Simi Nisqanta uyarisqaykitapis atiwaj saqepuyta. Jinallataj Espíritu santoj parlaykusúsqantapis atiwaj manaña uyariytapis.

Concienciayki imata nishasúsqantapis manaña kasuta ruwayta munawajchu chaypis, Señorninchej Jesucristoqa saqellasonqa ajinata ruwajta, munayniykita imatapis ruwajtaqa. Diosrí imanintaj chaymanta? Payqa nin: “Chaywampis ayllayqa mana uyariwarqachu; Israelqa mana kasukuwarqachu. Chayrayku sonqonkoj munasqanta ruwajta saqerqani, yuyasqankuman jinataj kawsarqanku,,” nispa. (Salmos 81:11-12). Qantapis atillanmantaj ajinata seqepusuyta qampa munasqaykiman jina ruawajta, ajinallapuni kayta munanki chayqa ajina munasqaykiman jina kawsanki. ¡Chaywampis, Señor khuyasuchun qanta!

Uj p'unchayllañapis kawsanayki kashan chaypis, munasqa runamasi uyariy Diospa Espiritun imanishasunkichus chayta, kutirikuy Diosman Jesucristo Salvadorniykinejta. Ajina rumi sonqo kashaspapis ashkha runakuna Dioswan allinyakorqanku. T'ukuriy tumpata, atinkiraj reparakuyta, Diosmanta karunchasqa kashanki chayqa.

Tukuy imamanta astwan munayqa kashan, casaraku p'achawan p'achallisqa kay. Chay p'achaqa, Cristopi kaspacheqan runapaj qhawasqa kay kashan, Diospa qhawaynimpeqa. Diosqa munan, chay p'achayojpuni wiñaypaj kananykita. Chay tukuy k'acha imasmanta qonqaporqakiña chaypis, Diosqa oqharikapusonqa chhika munasqa Churin Jesúsrayku. Chayrayku chimpaykapuy Salvajniykiman. Salvasojniyki Jesusqa suyashasunki.

Ichapis kunankama manaraj entienderqankichu, may jinatapunichus Dios munakusúsqantaqa. Arí, kutirikuy Salvasojniykiman. Payqa nishawanchejpuni: “Pichus ch'akichikojqa Noqaman jamuchun uyyachuntaj, nispa.” (Juan 7:37).

Munakoj Señorniyku, entiendechiwayku chay khuyakuyniykita. Yachachiwaykutaj munayniyki kawsakuyta ima. Jesucristojsutimpi. Amén.

“Tukuy sonqoywan Tata Diosta yupaychasaj; tukuy kayniywan santo sutinta yupaychasaj. Tukuy sonqoywan Tata Diosta yupaychasaj, manataj qonqasajchu tukuy sumaj ruwasqasninta. Paymin tukuy sajra ruwasqasniymanta perdonawan, tukuy onqoymantapis Pay sanoyachiwan. Payqa, librawan wañuyma yaykunaymanta, Payqa, pilluwan jina pilluchiwan munakuyninwan khuyakuyninwan ima. Tata Diosmin tukuy allin imaswan junt’achiwan, kallpayqa anka jina mosojyanampaj.” (Salmo 103:1-5)

Chay tukuy imaqa, llojsimun kusiqa sonqomanta. Kay Salmota qhelqajqa, ancha kusiqtataj kasharqa, manataj sayk’unchu Diosta yupaychaspa, nitaj graciasta qospapis. Nin: “Tukuy sonqoywan Tata Diosta yupaychasaj,” nispa. “Tukuy yuyayniywan, tukuy almaywan, tukuy kayniywan, tukuy kallpaywan, tukuy imaychus kapuwasqanwan,” nispataj nillampuni: “Tukuy sonqoywan Tata Diosta yupaychasaj; tukuy kayniywan santo sutinta yupaychasaj,” nispa. (Salmos 103:1).

Chay imasta niytawantaj Angelesta wajyarín paykunaman ninampaj: Qankuna, Diosta sirvejkunapis, yupaychaychej kay imachus kaj chhikata ruwasqanmanta. Tukuchintaj imaynatachus qallarérqa, ajinallatataj Diosta yupaychaspa: “Almáy, yupaychay Señorniykita,” nispa.

Señorpa kawsaqen rey David, yachachiwanchej imaynatachus kusiqa kanata, wiñay kusikuyniyojtaj kanata ima; chay kusiyqa tarikun Diosllapi, paywan misk’ita kawsakuspa, imaraykuchus paypuni rikuchiwanchej, imaynatachus munakuwasqanchejta Churin Jesucristonejta.

Janaj Pachapi kashaj Dios Tatayku, kay pacha kawsayniykupipis bendeciwaykupuni ari. Junt’achiwayku sonqo tiyaykusqa kaywan. Jesucristoj sutimpi. Amén.

Mayo 9

“... Almay bendeciy (yupaychay) Señorniykita.” (Salmo 103:1)

Rey Davidqa, imaraykutaj, chayrí, imamantataj chay jina kusijsqa kasharqari? Payqa qallarín: “Almáý bendeciy Señorniykita,” nispá. “Davidpa kusiynenqa, kikin Diospuni karqa.”

Salmospi, kikin Bibliapi rikukun, imayna runachus David kasqantaqa. Rikukun imaymana llakiykuna payman chayasqanta. Pantasqasnín, juchaman urmasqasnín, wañuchínaku maqanakupi atipasqasnín, atipachikusqasnimpis payqa Diosmanpuni kutirikorqa. Diospi sonqonta churasqanraykutaj, chay tukuy imaspi atipajpuni karqa. Astawampis, Diospa Simi Nisqanqa Davidpa sonqon chawpipi karqa. Ajinamanta Davidpajqa, Diospa pusaykachasqan kawsakorqa. Paytaj, ni jayk’aj qonqajchu Diosman graciasta qoytaqa.

Ujpi pay nerqa: “Qan, Tata Dios, kallpay kanki; noqa munakuyki, qan pakakunay chhanka kanki, jark’akuwaj, kacharichiwaj Diosniytaj. Qan kanki pakakunay chhanka, jark’akuna escudotaj, atiyniyoj Salvawajniy, kallpay, patapi sumaj pakakunaytaj,” nispá nerqa. (Salmos 18:2)

Imaynapitaj chay jina misk’i kawsaypi Dioswan karqa? Davidpajqa Diospa qayllitampi kawsakunan, tukuy imamanta aswan munasqa kasqanrayku. Paypa simimpi uyarikojpuni kay jinata nispá: “Tukuy sonqoywan Tata Diosta yupaychasaj, manataj qonqasajchu tokuy sumaj ruwasqasninta. Paymin tukuy sajra ruwasqasniymanta perdonawan, tukuy onqoymantapis pay sanuyachiwan,” nispá. (Salmos 103:2-3). Ajina k’acha imasta, Davidqa niyta yachaj Diosmantaqa. Nillarqataj: “Tata Diosqa k’acha khuyaj sonqo, mana usqhayta phiñakoj, jatun khuyakuyniyojtaj,” nispá. (Salmos 103:8).

Chay jina runa Davidqa karqa. Davidpa kusikuynenqa, **juchasninmanta Diospa perdonasqan karqa**. Arí, juchanmanta pipis arrepientekojqa, tukuy sonqo jap’ikun perdonta reparakuntaj Jesucristorayku perdonasqa kasqanta. Chaychu mana kusikunapaj jina kanman? Chayrayku nerqa: “Almáý bendeciy (yupaychay) Señorniykita, nispáqa.”

Dios Tatayku, kamachejniykuta waqaychay pipis contrampi jamojtin. Noqaykutapis maychus kamachinata jina kamachinawaykupaj. Ajinamanta tukuy allin kawsaypi kanaykupaj. Jesucristoj sutimpi. Amén.

“... Kay warmeĵ ashkha juchasnin pampachasqa kanku, imaraykuchus anchata munakun; pisita perdonasqarí, pisillata munakun...” (Lucas 7:47)

Runataqa juchamanta perdonasqa kasqan, Diospa misk'i munakuynin, chiriyasqa sonqonman yaykuspa waj jinaman tukuchisqan, kusiya churan.

Runaqa, may chhika kutita Diospa Simi Nisqanta uyarinman chaypis, jinallataj Bibliatapis tukuyninta ñawinman chaypis, manarajpuni sonqo junt'asqachu kanman; juchasapa kasqanta reparakunman chaypis, payllamantaqa manapuni Diospajqa munakuynin kanmanrajchu.

Kallanmantaj pipis juchasapa kasqanta reparakoj, nitaj pay yachanmanchu perdonasqachus manachus kasqanta chayqa, wañusqa jinallaraj kashanman, chiri sonqollaraj kashanman. Yanqhallata kallpakunman Diosta munakuyta munaspaqa, sonqompi kusijsqa kanampajqa Jesucristota wajyakunan tiyan sonqonman.

Diospa Simi Nisqanqa parlawanchej arrepientekunamanta, femantawan. Imaraykuchus juchaqa, may chhika kasqanta niwanchej; Diospa Qhasilla K'acha Yanapanintaj rikuchiwanchej astawanraj munakuynintaqa, Diospa munakuyninqa aswan jatumpuni kashan noqanchejpajqa, chaytaj ashkhata kusichiwanchej. Diosqa nin: “Sonqochakuy, waway. Juchasniykeqa pampachasqaña,” nispa. (Mateo 9:2-8).

Juchasniykimanta listata oqhariwaj chayqa, may chhika kanantataj yuyanki? Chay tukuymanta chhika khuyakoj Diosqa perdonasunki. Kunan qanrí may chhikatataj Diosta munakunki?

Perdonasqa kasqanmanta mana iskayrayajqa, mana qonqallamanchu Diosta tukuy sonqo yupaychaytaqa, payqa jatunchayta munanqa.

Janaj Pachapi kashaj Tatayku, kamachiwajniykuta yuyaychay, maychus kamachinata jina kamachinawaykupaj. Justiciatapis cheqanta ruwanankupaj yachayta qoy. Jesucristoj sutimpi. Amén.

Mayo 11

“May sumajpuni munakuyniykeqa, Tata Dios. Runasqa lijrasniyki urapi pakakuyta mask’anku.” (Salmo 36:7)

“Tukuy ch’akichikojkuna, jamuychej yakuta ujjaj. Mana qolqeyojkuna, jamullaychej,” nispá nin Diosqa. (Isaías 55:1). ¡Rikuychej! Jesús kawsaj yaku, juturitaj wiñaypaj kasqanta.

Ashkhas Diostaqa kusişqas yupaychanku, imaraykuchus wañuchej puñuymanta jina rijch’arinku; imaraykuchus paykunaqa reparakunku wañuy patapi kashasqankuta, Diospa munakuynin Jesucristopi paykunaman sut’inchasqanrayku. Chayta tukuy sonqo creesqankupi kunanqa sinch’ita sayayta munanku, Jesuspi manaraj creejkunamampis willaraj churakunku.

Wakintaj juchasninkumanta llakisqas, chay juchankuta ni piman willayta atispa kashanku. Jesucritomanchus tukuy sonqo chimpankuman chayqa, kawsayninku paykunapajpis allinman tukunman.

Kallankutaj runas laqhapi kawsakojkuna, imaraykuchus mana salvacionta rikuspa ñak’ariypi kashanku. Almasninkoqa qawishan mana qarpasqa chajra jina. Diospa Simi Nisqantapis mana jap’ikuyta munankuchu, chayraykutaj paykunapajqa ni ima sonqochaypis kanchu. Diosmanta mañakunapis paykunapajqa mana kanñachu, manapis Dios uyarinmanchu jina paykunaqa kashanku. Ajinapi rikukuspataj yuyanku Diospa saqerpayasqan kasqankuta. Ninku: “Manaña wawayki kanaypaj jinachu kani,” nsipa. (Lucas 15:19)

Diosqa, tukuyta Cristopi salvayta munawanchej. Diospa Qhasilla K’acha Yanapaynenqa, tukuytaj qhasilla kashan. Chayqa tarikun Diospa Churin Jesucristollapi. Diospa Simi Nisqan Bibliapi rikunchej, Diosqa mana llakiynillanchejmantachu salvayta munawanchej, manachayqa nina larwashaj infiernoman rinamanta, astawampis supaypa makinmanta ima.

Kaymin kashan chay wiñay kawsayqa, Jesucristota rejsiy. Arí, chimpay Cristoman, Payta rejsinaykipaj. Payqa rejsichikusuyta munampuni. Payqa, qampa qayllaykipi kashan, mana karupichu.

Munasqa Dios Tatayku, pikunachus munajkunawan rejsichikuy ari. Mana munajkunatataj rijch’arichiy chay sajra puñuyninkumanta Qanta rejsisunankupaj. Jesucristoj sutimpi. Amén

“Tukuy sonqoywan Tata Diosta yupaychasaj. ... Paymin tukuy sajra ruwasqasniymanta perdonawan, tukuy onqoymantapis Pay sanoyachiwan.” (Salmo 103:1,3)

Tatayki yumasorqa, mamayki nacechikusorqa chaypis, kawsaytaqa Dios qosorqa. Dios munajtin kay pachapi kashanki. Mana chayllachu, watejmanta Dios nacechisunki Payman chimpakujtiyki, kunanqa mosoj runa kanki. Tukuy juchasniykimanta Pay perdonasunki, allin kawsayman churasunki. Salvajniyki creesqaykipis Diospa qosusqan.

Ujta sumajta yuyayninchejpi sonqonchejpi ima, jap'inanchej tiyan. Imatachus Dios noqanchejmanta leynimpi mañawasqanchejta mana junt'ayta atisunmanchu, chayrayku Diospa ñawpaqempeqa mana cheqan runapaj qhawasqa kayta atisunmanchu, imaraykuchus Leyqa juchasapa kasqanchejta reparachinallawanchejpaj kashan. Reparakuspari, cuentata qokunchej chay juchasninchejpa castigonta Jesucristo ñak'arisqanta, Chantá Davidwan khuska atinchej niyta: “Tukuy sonqoywan Tata Diosta yupaychasaj. ... Paymin tukuy sajra ruwasqasniymanta perdonawan,” nispa. (Salmos 103:2-3).

Arí, chay tukuyta ruwaspataj Diosqa rikuchiwanchej munakuyninta. Chayraykutaj munan Payta munakunanchejta, uyarinanchejta, yupaychananchejta ima. Diosqa, chay tukuyta munan noqanchejmantaqa. Noqanchejri sapa kuti juchaj atipasqan rikhuriqanchejraykuqa, necesitanchej Diospa perdonninta.

Chay jina juchasapa kashajtinchej Jesucristoqa noqanchejman jamospa Qhasilla K'acha Yanapayninwan kallpachawanchej. Kutin kutinta juchallisqanchejta perdonawanchej, tukuy nanaykunasninchejta jampiykuwanchej.

Munasqa Tatayku, tukuy runakunata, campomanta kajkunata, llajtamanta kajkunatapis yanapaykuy Qampi allin kawsayta tarinankupaj. Chantá paykunapura yanapanakuyta yachanankupaj. Jesucristoj sutimpi. Amén.

Mayo 13

“Manataj niykumanchu atinallaykuta, imatapis yuyanaykupaj noqallaykumanta jamusqanta; astawanqa chay ateyqa Diosmanta jamun.” (2 Corintios 3:5)

Dioswan imaynachus kasqanchej, noqallaykumantaqa mana cheqanta unanchajkunachu kasunman, nillataj yuyayninchejpis munasqanchejman jinaqa, cheqanta yuyayta atisunmanchu. Ajina kajtenqa, imatataj ruwasunman?

Ajina kashan, noqallanchejmantaqa mana atinchejchu imatapis ruwayta Dioswan allimpi kananchejpajqa. Kayqa umanchejpa yuyaynimpis sut'i kachun sonqo tiyaykusqa kananchejpajqa. Diospa ruwasqallampi atienekuna, imaraykuchus Paylla noqanchijpeqa chaytaqa ruwan.

Juchaman urmanapaj tanqasqa kashaspapis noqallanchijmanta mana misk'ayta atinchejchu, mashkhas noqanchej kikinchejpaj phiñakuyta qallarincej: Sichus allinta kaykunata qhawakuymán karqa chayqa, Diosmatapis mana karunchakuymánchu karqa, nispa. Jinallataj ninchej: mana urmaymánchu karqa, ancha wampupuni kani nispa, noqanchejpaj phiñakoj churakunchej, phutiywantaj atipachikunchej. Imaraykutaj ajina kanirí?, nispa.

Allinta qhawakuna kachun, noqallanchejpi atienekuspaqa ni jayk'aj sonqo tiyaykuytaqa tarisunchu. Astawampis mana qonqananchejchu tiyan juchasapa kasqanchejtaqa. Chayraykutaj chaytaqa, Dioslla uj k'ata Churin Jesucristonejta atin allinchayta noqanchejpeqa.

Juchaman urmasqa kasqanchej, mana saqewanchejchu imatapis allinta ruwajtaqa, juchaj wata runanman tukusqanchejrayku, chayraykutaj mana maychus cheqa kananchej jinañachu kanchej. Alamanchejpa k'acha kaynenqa mana kanñachu, mana allin imasman tanqasqallaña rikhurincej. Runaj tukuy munaynin, yuyaynin sajraman qosqa, juchaj venenasqan. Kallpallawanqa manapuni atikunqachu ni imaynamanta allinyachiyaqa.

Usqhayllata reparakuy qanllapi atienikuyqa mana allin ñanman pusasusqanta. Ajinamanta qanqa yuyay, Diosllamanta tukuy allin imas qanman jamosqanta; chantá tarinki chay sonqo tiyaykuytaqa.

Munasqa Dios Tatayku, kunan p'unchayqa allimpuni kachun noqaykupaj, kay p'unchaypaj t'antaykutapis qowaykupuni. Jesucristoj sutimpi. Amén.

“Almay, Tata Diosta yupaychay ... Paymin tukuy juchasniykita perdonan.”
(Salmos 103:1,3)

Sichus qan niwaj: “Creeyman Dios perdonawasqanta manachus chay chhikanta juchalliyman karqa chayqa, nispa chayqa.” Chayqa niyta munan, qampi ichus kashanraj pakasqa juchayki, ajinata yuyachisunampaj, llakichisunampaj imaqa.

Yuyarinapuni Davidpa nisqanta: “Paymin tukuy sajra ruwasqasniymanta, perdonawan,” nispa nin. (Salmos 103:3). Diosqa nin, uj juchallata mana perdonasqanta, chay juchaqa kashan: “Espíritu Santoj parlaykusqanta mana kasuta ruway.” (Marcos 3:29-30). Chay juchaman urmajkunaqa, mana munankuchu uyariyta Espíritu Santo Jesucristoman pusasqanta. Cristo nin chay juchaqa ni jayk’aj perdonasqachu kanqa, nispa. Dios Tataj contranta ima juchata pipis ruwajtin, may chhikan juchapis kachun iperdonasqapuni kanqa! Kikin Dios Tata, nin: “Juchasniykichejqa mayjina pukapis kachunku, rit’i jina yuraj kanqanku; may jina kullipis kachunku, yuraj millma jina kanqanku,” nispa. (Isaías 1:18).

Manachu atiwaj creeyta, Diosqa chay jina khuyayniyoj kasqanta; Diospa qhasilla K’acha Yanapaynin sonqoykita tiyaykuchinanta ima?

Qanqa nishankichu: Uj kutipiña juchaymanta perdonawarqa, jinapis ujtawan juchallillanitaj, nispa. Diosqa perdonallasunqapuni mashkha kutipis kachun, qan perdonta tukuy sonqo mañakojtiykeqa. Sichus uj kutillata perdonawasunman chayqa, ni pi salvasqa kanmanchu, imaraykuchus tukuy kawsayninchejpi, munaspa mana munaspa juchallishallanchejpuni.

Lutero nerqa: “Juchaqa noqanchejpi mach’asqa kashan. Diosqa chayta yachan, chayraykutaj Payqa, munan kutirikunanchejta perdonninta mañakuspa.”

Diosqa noqanchejwan uj tratota ruwan, Payman rejtinchejqa mana saqenawanchejta juchanchej chinkayman apanawanchejpaj.

Diosniyku, aylluykuta makisniykiman churayku: casarakusqaykuta, wawasniykuta, ima. Qanmanta yachachiyta yanapaykuwayku. Jesucristoj sutimpi. Amén.

Mayo 15

“Aychaman jina kawsajkunaqa aychaj imasnillampi yuyanku, Espirituman jina kawsajkunari Espiritoj imasnillampi yuyanku... Sichus uj runapi Cristoj Espiritun mana kashan chayqa, chay runaqa mana Cristojtachu.”
(Romanos 8:5,9)

Juchamanta perdonasqa kananchejpaj, juchaj atiyinta kawsayninchejmanta karunchayta atinapaj imaqa, necesitanchej Diospa Qhasilla K’acha Yanapaynin sonqonchejman yaykunanta, chaytataj Dioslla qowasunchej.

Sichus creenchej Jesucristo Salvawajninchej kasqanta, noqanchejrayku wañusqanta ima chayqa, noqanchejpi junt’akun imatachus Pay noqanchejpaj ruwarqachay. Chayraykutaj, Dios Tataqa perdonawanchej Jesucristonejllata tukuy juchasninchejmantaqa.

Ajina kajtenqa, munankichu Espíritu Santoj yanapayninwan, Salvasojniykimanta ni jayk’aj t’aqakuyta? Arí, niwanki chayqa, munallaytaj t’aqakuyta, chanta saqeyta ima, ñawpa kawsayniyki saja imasta ruwayman yachasqa karqanki chaykunamanta. Yachankiña juchallispaga tuta p’unchay khishka patapi jina kawsakusqaykita; chaytaqa amaña munaychu, icharí?

Noqanchijpeqa, Cristoj Espiritun saja imaswan khuska mana kawsankumanchu. Imarayku? Imaraykuchus Jesucristowan saja imaswanqa mana khuskachakuyta atinmanchu. Apóstol Pablo nin: “Sonqoypeqa Diospa leyninmpi kusikuni. Chanta waj leyta ukhuypi rikuni, chaytaj sonqoypa contrampi kashan; presochasqata jucha ruwayman pusawan, mayqenchus noqapi kashan, chayman,” nispa. (Romanos 7:22-23).

Sonqonchejpi tiyakun Espíritu Santo. Jinallataj saja munaynimpis aychanchijpi kashan, chaymanta rikhurin imaymana mana allin yuyaykuna. Sonqonchejpi Espíritu Santo tiyakun chaypitaj allin ruwaykunas junt’ay kashan, chaykunas noqanchejpeqa maqanakun. Chayrayku, mashkha kutis mana yachanchejchu imatachus, imaynatachus ruwayta; ujin munan ujta, ujnintaj wajta, jatun churanaku ukhunchejpi rikhurin. Chaypeqa Espíritu Santoj pusaykachasqan kawsakuna allin kashan, Diospa wawan jina. Ajina kajtinqa, mayqentataj atipananta munawaj?

Tukuy atiyiniyoj Diosniyku, ama saqeychu saja aychaypa munaynin atipanawanta. Kallpachaway Qanpi salyasqa kanaypaj. Jesucristoj sutimpi. Amén.

“... Tukuy onqoymantapis Pay sanoyachiwan.” (Salmo 103:3)

Ashkhas munanchej “chay nanaykunaqa,” ujkama noqanchejmanta chinkapunanta, Cristopi kaspapa yuyanchej manaña onqona kasqanta, imaynachus Cristo Janaj pachapi kashan ajinataña kawsana kawsana kasqanta yuyanchej. Ajina yuyayqa mana cheqachu kashan.

Bibliapi chay ñawisqanchejman jina, mana ajinatachu nishan: “sanoyachisorqa manaña ujtawan onqonaykipaj,” nispapa. “Sanoyachiwan” nispapa, nishan: Sapa kuti onqojtiyki Pay qanwan kanka yanapasunampaj, sonqo tiyaykuya qosunampaj ima. Jinallataj Paypa munaynin kajtenqa sanoyachisunqa.

Umanchejpi sut’i kachun: Juchallisqanchejqa alqoj khanisqan, aycha llik’isqa jina, chay astawan nanaytaqa apamun. Sapa kuti juchallispa nanachikusqanchejqa ajinata almanchejqa ñak’arin, Chaymanta Tata Diosqa sanoyachiwanchej chay nanaymanta, ajinamanta sonqochasqa rikhurinchej, watejmanta Señorninchejqa kallpachawanchej cheqan ñampi ñawpajman rinallanchejpajpuni. Aswan yuyayniyojman tukunchej, sumajta qhawakuspa Jesucristowan khuska purinapaj.

Diosqa ch’uwa sonqo kananchejpaj, wakin kuteqa, saqewanchej pruebasta pasananchejta, chay juchamanta reparakuspa Jesucristoj perdonninman rinapaj. Ajinamanta Diosqa watijmanta sayarichiwanchej, sonqochawanchej, kallapachawanchej, ñawpajman thaskinallanchejpajpuni. Ajinamanta chay allin ñanman churawanchej. Pay niwanchej: “Noqalla kawsayta qoni, chanta qhechunitaj. Noqalla nanachini, thañichinitaj,” nispapa. (Deuteronomio 32:39)

Ajina kasqanta rikunchej Davidpa kawsayninta qhawarispapa. Sapa kuti pantarqa Davidqa, yachanchej millay juchasman urmarqa: Wajpa warminta jap’ikaporqa, qosantataj wañuchicherqa. Payqa chay tukuy juchasninta pakayta munarqa. Uj profeta chayta uyanchajtintaj Davidqa Diosmanta perdonta mañakorqa, chantá munakoj Diosqa, chay nanasqasnintajampiyojkorqa, sanoyachirqataj. Uj kutipitaj Davidqa, mana ruwanata ruwaspa Tata Diosta phiñacherqa. Diosrí ujtawan sinch’ita payta castigarqa. Tumpamantawantaj David Diosmanta perdonta mañakorqa, Diosllataj chay nanachisqa sonqonta jampiyojkorqa.

¡Ay Dios Tatayku, sapa p’unchaylla juchallikuyko, perdonawayku. Astawampis yuyarikuy Churiyki Jesús noqaykoj cuentaykupi ñak’arisqanta; khuyawayku ari! Jesucristoj sutimpi. Amén.

Mayo 17

“Payqa, librawan wañuyman yaykunaymanta; Payqa, pilluwan jina pilluchiwan munakuyninwan, khuyakuyninwan ima.” (Salmo 103:4)

Pitapis Dios perdonan chayqa, nanasqasintapis jampiykullantaj; sanoyachin chayqa, mana infiernoman rinan kasharqa chayllamantachu orqhon, machayqa may jina jatun munakuywan Diosqa waqaychan, chay salvasqan kajtaqa.

Diosqamunakun Payman rejkunataqa, imaynatachus Churintamunakun, ajinata munakuwanchej; imaynatachus uj qosa misk'i munakuywan munakun warmisitanta, ajinata. Diospa Simi Nisqanqa, imaymanamanta nispa entiendechiwanchej, Dios munakuwasqanchejtaqa. Jesucristo nin: “Nillaykichejtaj ajina kusiy kasqanta Diospa angelesnimpa ñawpaqempi, juchasapa runaqa Diosman kutirikojtin,” nispa. (Lucas 15:10). Isafas 62:5 nishan: “Imaynachus qhariwarmi kusikunku, ajinallatataj Diosniyki qanwan kusikonqa,” nispa.

Diosqa llimphu munakuywan munakun, pikunachus Payman chimpanku salvasqa kayta munaspa chaykunata, may jina millay juchasapapis kachun, perdonanqapuni. Chaytaqa Cristo rikuchiwanchej sut'ita. Chaytaj qhelqasqa kashan Mateo 9:13-pi. Willawanchej maypachachus runas rimasharqanku Jesuspa contrampi, juchasapasta, impuestota cobrajkunata ima salvasqanmanta. Jesusqa nerqa: Yachaqakuychej imaniytachus munan, khuyakuyniyoj kananykichejta munani uywa wañuchisqata noqapaj q'olachinaykichejmanta nisqaqa. Mana Noqaqa jamunichu mana juchayoj kasqankuta yuyakojkunata juchachajchu, manachayqa juchasapasta salvaj. (Juan 14:21). Chaywanqa nisharqa Paypa nisqanta creejkuna Diospa munakusqan kasqanta, may jina millay juchasapapis kachunku.

Cristopi creej runaqa, Sumajta Michejpa marq'aynimpi apasqa kanku tukuy kawsayninkupi. Juchamanta kacharichisqaj almanqa wiñay infiernopi chinkaymanta orqhosqa rikhurinku. Imaraykuchus Jesucristoj yawarninwan rantisqa kasqankurayku; sumaj waqaychasqataj kanku. “Payqa librawan wañuyman yaykunaymanta; Payqa pilluwan jina pilluchiwan munakuyninwan, khuyakuyninwan ima,” nispa nin.

Diosniyku, graciasta qoyki chay jina munakuywan munakuwasqaykimanta. Jesucristoj sutimpi. Amén.

“Tata Diosmin tukuy allin imaswan junt’achiwan, kallpayqa anka jina mosojyanampaj.” (Salmo 103:5)

Ankaqa (aguilaqa) mosojyan, mosoj phurus llojsimun, mosoj chhuru (pico), chakisnimpi mosoj sillus ima. Jinallataj Jesucristopi kajkunaqa mosoj kallpata jap’inku. Noqanchejqa mosojyanchej, Dios qowanchej chay kallpata noqanchejmanqa.

Ichus pipis mana kajmanta juchachaspa cha’ataykuwanchej chaypis, Señorninchejqa paypi atienikojtinchejqa justiciata ruwawanchej. Chay ñawisqanchej Salmopi nin: “Tata Diosqa cheqan justiciata ruwan ñak’arichisqa kajkunapaj,” nispa. Chayrayku Diospa wawasnenqa, ajinapi rikhurispaqa ch’inlla kakunchej, Dios justiciata ruwanankama. Chayrayku Diosninchejqa mana qhawakullawanchejchu, manachayqa Pay yanapawanchej, chay llullakojkunata p’enqaypi rikhurichispa, imaynachus kasqanta sut’inchaspa.

Kay pachapi tukuy imas pasajqa, Diospa makimpi kashan. Chayraykutaj Paypi atienikunanchej tiyan. Señorqa cheqa justiciata wawasnimpajqa ruwanqapuni. Chayta yachaspataj ch’inllamanta uyarispa kallpachakunchej. Mashkhatachus uyarinchejpis: Chay hermanos, chay jina, jaqay jina kashanku nejkunataqa. Chaywampis Diosqa, tukuy imata yachan rikushantaj, noqanchejman kutisqapuni kashan. Manaraj imapitaj uyanchasqa rikhuringqa.

Noqanchejqa, Dios noqanchejrayku imastachus ruwasqampi yuyaspaqa, kusikunchej. Tukuy imamanta astawanqa, Dios Tata munakuwasqanchejrayku uj k’ata munsqa Churinneja. Arí, Dios Tataqa, Jesucristoneja parlaykuwanchej, chayraykutaj noqanchejqa rikunchej, Diospa Simi Nisqampi Salvawajninchej Jesusqa chay jinatapuni munakuwasqanchejrayku, Dios Tataj wakichisqanta junt’asqanta.

Dios Tatayku, pikunachus contraykupi kajkunatapis perdonay ari. Noqaykutapis tukuy sonqo perdonajkunata ruwawayku. Jesucristoj sutimpi. Amén.

Mayo 19

“Tata Diosqa k’acha, khuyaj sonqo, mana usqhayta phiñakoj, jatun khuyakuyniyojtaj. Mana tukuy kutichu k’amiwanchej, phiñakuynintaj mana wiñaypajchu.” (Salmo 103:8-9)

Diosqa mana unaytachu phiñasqallapuni kanqa juchallijtinchejq. Payqa, ichapis uyanta pakasonqa juchallisqanchejrayku ashkha p’unchaykunata. Chaywampis Payman rejtiykeqa, chay phiñakuynenqa mana wiñaypajchu.

Diospa Simi Nisqan Bibliapi willawanchej, israelitaspa kawsayninkumanta. Qallariymanta tukukuykama Diosqa paykunawampuni karqa, mana qonqaporqaporqachu, Paypi atienekojkunata tukuy munakuywan yanaparqa. Israelitakunapis wakin kuteqa jasut’isqa karqanku: “Llakikuyninkupi Tata Diosman qhaparikorqanku, Paytaj chay ñak’ariyninkumanta paykunata librarqa,” nispa nin. (Salmos 107:28).

Uyarinachej, Diospuni nerqa chayta: “Ajinata nin patapi kaj Diosqa, wiñaypaj tiyakojqa, Santo kaj sutiyojqa: Noqaqa patapi tiyakuni, may santo cheqapi. Jinallataj llamp’u sonqoyojkunawan, k’umuykukojwan kashani. K’umuykukoj sonqoyojkunata, sonqo p’akisqatapis kusichinaypaj. Mana wiñaypajchu juchachasaj, nitaj wiñaypajchu phiñakusaj, imaraykuchus ajina kajteyqa ruwasqay runas ñawpaqeypi q’enaqakunman. Runaqa munapayasqanrayku noqa phiñakorqani, chayrayku payta sinch’ita jasut’erqani, phiñakuyniyipitaj uyayta pakarqani. Jinapis payqa mana kasuwaspa sonqompa munasqanta ruwallarqapuni. Imaynatachus kawsasqanta rikuni; chaywampis noqaqa payta sanoyachisaj, michisaj, sonqochasaj, kusichisaj ima.” Nispa nin Tata Diosqa (Isaías 57:15-19).

iUj chhikanta t’ukuriy! Chaytaqa Diospunichu nin? Arí. Ajina chayqa, creey. Ama llullapaj qhawaychu Diostaqa. Wakin kuti Diosqa manapis uyariwasunmanchu jina kanqa Payta wasanchasqanchejrayku, manataj wiñaypajchu saqerpariwasun. Chay Canaan llajtayoj warmitaqa manapis uyarinmanchu jina kasharqa; ajinamanta chay warmeqa alqetu jina kasqanta nerqa. Ajinapis chay warmeqa, creellarqapuni Jesucristoj munakuynimpeqa. Chanta Jesús nerqa: “Warmi, creesqaykeqa may jatun. Munasqaykiman jina ruwasqa kachun,” nispa. (Mateo 15:28).

Wiñaypaj Dios Tatayku, Qampi mana creejkunaj sonqonkuta llap’uyachiy. Jesucristoj sutimpi. Amén.

“Mana sajrata ruwasqanchejman jinachu kutichiwanchej, nitaj sajra kayninchejman jinachu pagawanchej.” (Salmo 103:10)

Tukuynin Evangelioipi Diosninchejqqa parlashan: Mana sajrata ruwasqanchejman jinachu kutichiwanchej, nitaj sajra kayninchejman jinachu pagawanchej, manachayqa uj k’ata Churin Jesucristonejta perdonawanchej, Jatun khuyakuynimpi, nispa niwanchej.

Uj kutipi Diosqa, uj Runallata juchasninchejman jina castigarqa: “Cristoqa mana ima juchatapis ruwarqachu. Diosrí noqanchejrayku Cristota castigarqa kikin juchapis kanman jinata, noqanchej Cristopi kaspas, Diospa cheqan kaynin ruwasqa kananchejpaj.” (2 Corintios 5:21). Cheqamanta Cristoqa onqoyninchejta aparqa, nanayninchejtataj ñak’arerqa. “Dios Tata cheqamanta Cristonejta kay pacha runaswan Pay kikinwan allinyachikorqa, tukuy runakunaj juchasninkuta Jesucristoj ruwasqanrayku qonqayman churarqa.

Ajinata ari, Jatun Juezqa ruwarqa: “Juchanchejrayku tukuy cuerpon t’unasqa karqa. Jinapis Pay castigasqa kasqanrayku sonqo tiyaykuyta apamowarqanchej, aychan chay jina khallasqa kasqanraykutaj sanuyachisqa kanchej,” nispa. (Isaías 53:5). “llank’achejqqa pichus llank’ajmanqa mana khuyaspachu pagontaqa jaywapun, manachayqa manuta jina,” nispa nin (Romanos 4:4).

Chayrayku Evangelioqa, juchasapata churan Diospa Qhasilla K’acha Yanapayninman. “Noqaykupis Cristopi creerqayku, paypi creesqaykurayku cheqan ruaspaj qhawasqa kanaykupaj, manataj leypa ruwanasninraykuchu,” (Gálatas 2:16). Diosqa mana sajrata ruwasqanchejman jinachu kutichiwanchej, nitaj sajra kayninchejman jinachu pagawanchej. Manachayqa Cristoj qhasilla K’acha Yanapayninraykulla perdonawanchej, salvawanchejtaj.

Mana runaj yuyasqanman jinachu salvacionninchejqqa, manachayqa Diospa wakichisqanman jina; runaqa yuyan pisillata juchallikusqanta, ashkahta juchallikujkunalla phutisqa kanankuta. Diospa ñawpaqempeqa tukuy juchasapas kanchej, Diospa qhasilla k’acha yanapayninrí, tukuy paj kashan.

Munasqa Dios Tatayku, yanawayku allinta sirvisunaykuta. Jesucristoj sutimpi. Amén.

Mayo 21

“Ciegosta pusasaj mana rikusqanku ñanta, mana rejsisqanku chaki ñankunata purichisaj. Ñawpaqenkupi laqhayayta k’anchayman tukuchisaj, mana puriy atina kajtapis pampaman tukuchisaj. Chay imasta noqamin ruwasaj, manataj paykunata saqerpayasajchu.” (Isaías 42:16)

Imamantataj Dios kaypi parlashan? Sion nisqa runaspa llakikuyninkumanta parlashan. Paykunaqa Dios saqerparisqanta yuyaspa karunchakuyta munasharqanku, chaymanta parlashan. Imanintaj Dios yanapasqa kanankupaj? Señorqa kay jinata nin: “Jerusalenwan khuska mayta kusikuychej, payta munakojkuna. Tukuy payrayku llakiywan waqajkuna kusijsqa kaychej,” nispa. (Isaías 66:10).

Ajinata nin Diospa simi nisqan qhelqasqapi, Diospa atiyninga mosojman tukuchispa kusiya qoyta atin. Dios Tataj atiy nin jatun, imaynachus Diospa Churinpa atiy nin, Esp’iritu Santoj atiy nin ima, jatumpuni. Mana saqewasunchu pachampi llakisqalla kananchejta, chay ujkunata jinaqa, imaraykuchus: “Pillapis Señorpa sutinta oqharispa Diosnimpa rejsikapojqa salvasqa kanqa.” (Romanos 10:13-15).

Ari, noqaqa cheqapipuni juchasapa kani, chaywampis Salvawajney Jesucristoqa cheqamantapuni khuyakuwan. Cheqapipuni noqaqa ch’ichi songo kani, chaywampis cheqapuni Cristoqa llimphu khuyakuyninwan noqapi kashan. Noqaqa pisi kallpa kani; Cristoqa atiy niyoj kallpasapa noqapeqa.

Maypachachus sapay kasqayta yuyakuni, ajinamanta munani Dios noqawan kananta chayqa, yuyarikuni, Dios niwasqanta: “Noqa qankunawan tuta p’unchay kasqayta, kay pacha tukukunan kama,” nispa. (Mateo 28:20). Pisi kallpa kasqaywan amichikuniña, Diosmanta mañakuytapis mana atiniñachu, nitaj munaspa jinanichu. Ajinapi rikhurejtiykipis, “Esp’iritu Santo qanrayku parlarin khuyayta ayqospa.” (Romanos 8:26). Infierno yuyayniyman jamojtin kharkatini chaypis, wañuytaqa nisaj: “Wañuyqa atipasqaña, chinkachisqataj. Kunanqa wañuyta atiy nin atipanawanchejpaj manaña kanchu,” nispa. (1 Corintios 14-15).

Chay imaspi creespa, chayllapipuni yuyasunman chayqa, kusi kanman kay pachapeqa; kawsakusunman Janaj pachapi yuyaspa. Jatunmanta Diosta yupaychasunman Janaj Pachapiñapis kashasunman jina. Pablowan khuskataj nisunman: “Sichus Dios noqanchijman kutisqa kashan chayqa, pitaj contranchejpi sayayta atinmanrí?,” nispa. (Romanos 8:31).

Diosniyku, ama saqeychu qhellasman tukunaykuta sajrayaspa. Chayta mañakuyki Jesucristoj sutimpi. Amén.

“Imaynatachus jucha atiyuniyoj karqa runasta wañuyman apanampaj, ajinallataj Diospa qhasilla K’acha Yanapynininqa atiyuniyoj pusanampaj Diospa cheqan kayninnejta, wiñay kawsayman pusanawanchejpaj Señorninchej Jesucristonejta.” (Romanos 5:21)

Chay ñawirisqanchejpi rikunchej imaynachus Diospa khuyaynin Reinompi kasqanta, Cristopi sut’inchasqa juchamanta libranawanchejpaj kashan. Apóstol Pabloqa, nin: “Uj runaj juchanraykulla tukuy runas juchachachasqa kanku. Ajinallataj Jesucristoj cheqan ruwasqanqa tukuy runasta juchachasqa kaymanta kacharichin, kawsaytataj qon,” nispá. Ajina kashan chay Reinoqa. (Romanos 5:18).

Uj Reino kashan chayqa, chaypeqa kallantaj atiyuniyoj Rey, chay Reinompi kajkunata enemigosnimanta waqaychanampaj. Ajina kashan khuyakuyniyoj Reyninchejqa, waqaychawanchej juchamanta, wiñay wañuymanta ima.

Diosqa juchamanta librawanchej, uj k’ata Churinta noqanchejman qospa, juchanchejrayku cruzpichakatasqa wañunampaj. Chay wañuspa tarerqa Diospa ñawpaqempi cheqampaj qhawasqa kayninchejta. Chay tukuyta Dios ruwarqa, noqanchej ni imata ruwaspalla salvasqa kananchejpajqa.

David jantuncharqa Diospa Qhasilla K’acha yanapaynintaqa, kayta nispá: “Imaynachus cieloqa kay pachamanta aswan jatun, ajinallataj khuyakuynenqa may jatun Payta manchachikojkunapaj.” (Salmos 103:11). Ajina kashan Diospa Reinonqa.

Ichapis wakin runasqa Diospa palabranta ñawirerqanku, chayri ichus tumpallatapis uyarerqanku. Chantapis rikorqanku cristianospa kawsaynimpi sinch’i maqanaku rikhurisqanta, chayta rikuspataj mancharinku. Yachanaykipaj, chay maqanakupeqa iskay atiyuniyojkuna maqanakushanku: Juchawan Diospa yanapayninwan. Juchachaywan khuyakuynwan. Mayqentaj chaykunamanta aswan kallpayoy, aswan atiyuniyoj? Mayqentaj atipanqa? Chayta atipanapajqa, mayqenpitaj atienikunchej, chaypi kashan kallpanchej. Ajinamanta Diospa Simi Nisqan sonqonchejpi kallpachawanchej, Jesucristo noqanchejpi atipanampajqa.

Arí, uj runa (Adán) juchallisqanrayku wañuy chayamorqa, Ajinallataj uj RUNA (Jesucristo) cheqan kasqanrayku Diospa cheqan kaynin chayamun noqanchejpajqa.

Janaj Pachapi kashaj Diosniyku, supaymanta librawayku. Jesucristoj sutimpi. Amén.

Mayo 23

“Kusiywan Tata Diosta yupaychaychej, manchachikuspataj, Payman k’umuykukuychej.” (Salmos 2:11)

Diospa Simi Nisqampi creejkunaqa Diospi kusikunku, Señortataj sirvinku, Diosta manchachikuypis chayllapitaj kashan paykunapeqa. Diosqa cheqapipuni mana pitapis saqenchu pay kikinwan sonqo junt’asqalla kajtaqa; manachayqa munan Diospaj t’aqasqa kawsakuyman chayanankuta: “Diospa Espiritun qankunaman qosqa karqa, Diospa wawasnin kanaykichejpaj. Chayrayku Diosmanta mañakunchej: Tatay, Tatay, nispa.” (Romanos 8:15).

Imapajtaj kayri? Ajinata nispa kusikuyta tarinchej, llakiyppis Dios Tatanchejwan parlarikuspaqa sonqonchejpi kusikuyta tarintaj. Juchallispa harkatitinchej chaypis, jatunmanta Santo Diospa kusiyninqa noqanchejman jamun.

Chayqa, mana kanchu pikunachus paykunaj yuyasqankuman jinalla sonqo junt’asqa kawsakuyta munajkunapeqa. Juchaqa kharkatitinapaj jinapuni, imaraykuchus jatun mayo ashkha yakuyoq jina, taripasqanta chayashkha yakuqa apakapun. Chaywampis chayjuchapi kawsajkunaqa yuyanku allillampi kashasqankuta. ilmaynapichus yuyayninkuman churakunkumanpis, pantasqapi kasqankuta reparakunankupajqa!

Diosta manchachikuspa kawsakojkunari reparakunku ni imapis kawsayninkupi allinchu kasqanta; Diospa Qhasilla K’acha Yanapaynillan, paykunapaj kasqanta yachaspaqa kusikunku, kusijsa kaspas llakisqa kaspapis, Dioswampuni kawsakunku.

Chaykunata ajinapuni kasqanta entiendenapajqa, yuyarisun Jesucristo yachachisqasnimpa chakisninta mayllasqanta. Payqa, chaywan yachachisharqa llamp’u sonqo kanankuta. Yachachisqasninri chay ñawpajsitullapi churanakusharqanku, mayqenninkuchus aswan jatumpaj qhawasqa kanankupi. Chayta reparaspa Jesucristoqa, chakisninkuta mayllararqa. Jinaytawantaj sinch’ita k’amerqa jatunchasqa kaypi yuyasqankurayku. Chaywampis nerqa, imaynachus Janaj Pachapi kanankumanta.

Janaj Pachapi kashaj Diosniyku, yachayta qowayku Espirituykinejta yuyayniykuman atiyta qowayku, supayta atipayta atinaykupaj. Jesucristoj sutimpi. Amén.

“Imaynachus inti llojsimuynejqa inti yaykuynejmanta karupi kashan, ajinata Payqa juchasnincejta noqanchejmanta karunchan.” (Salmo 103:12)

Kay rjch'anachiyqa may k'achitupuni kashan, sut'itaj kashan. Inti llojsimuywan inti yaykuywan tinkunakunkumanchu? Ni jayk'aj, ichari? T'aqanasqapuni kanqanku wiñaypaj. Ajinallataj juchasnincejpis, Diosman gracias kachun perdonawasqanchejmanta. Juchasnincejtaqa Dios apan karuman. Juchasneyqa ni jayk'aj ujtawan taripawanqachu.

Cristoqa, sut'ita yachachin Diospa khuyanenqa may jina t'ukuna kasqanta. “Sichus pipis parlasqayta allinta uyarispa, kachamuway Tataytapis creen chayqa, payqa wiñay kawsayniyoj, manataj juicio p'unchaypi juchachasqachu kanqa, astawanqa wañuymanta kawsayman yaykun” nispa nerqa Jesusqa. (Juan 5:24). Cristopi creesqanchejrayku Diospa wawan kanchej, Diostaj Tatanchej. Paytaj wiñaypaj k'acha, nitaj noqanchejmanta qonqaponqachu. “Imaynatachus uj tata wawanmanta khuyan, ajinallatataj Tata Diospis Payta manchachikojkunata khuyan.” (Salmos 103:13).

Unanchanachej kay pachapi kaj tataspi. Paykunaj wawasninkoqa, sapa kutilla tatasninkoj kamachisqanta mana kasuyta munankuchu. Chayraykutaj, chay wawasninkoqa jasut'ichikunku; chaywampis wasinkumantaqa mana wijch'usqachu kanku. Chay tatasqa mikhuchinku, p'achallichinku, imankuchus mana kashanchu chaytapis jaywanku. “wawasninku juchallinku chayqa paykunata varawan seq'onanta.” Chaywampis nin: “khuyakuyneyqa paykunapaj kallanqapuni,” nispa. (Proverbios 23:13).

Señorninchej Jesucristoqa parlallarqataj chinkaj waynamanta, chay waynaqa herencia qolqenta tukumorqa sajra imaspi. Wasinman kutimpojtintaj tatanqa khuyaspa munakuywan jap'ikaporqa, chay mana allin ruwaj churintaqa munaykakaporqa. Astawampis, kususqa jatun mikhuytapis wakichiporqa chinkaj churinta munakusqanrayku.

Munasqa Dios Tatayku, kay pacha kawsayniykupeqa, imaymana llakiykuna chayamwayku. Wakin kuteqa, ni imanakuyta atispa wañuyta mañakuyku. Ama saqewaykuchu sapayku ñak'arejtaqa. Jesucristoj sutimpi. Amén.

Mayo 25

“Tata Diospa khuyakuynintajrí wiñay wiñaypaj, Payta manchachikojkunapaj, justiciantaj tukuy tiempo runaspaj, Dioswan trato ruwasqankuta junt’ajkunapaj kamachisqasninta waqaychaspa ruwajkunapajwan.” (Salmo 103:17-18)

Diospa t’aqasqa Santo kanamanta parlayqa uj mosqoy jinalla kashan, manachus ñawpajta Dioswan pipis allinyakunraj chayqa. Mana atisunchu Diospaj t’aqasqa santo kayta, manachus ñawpajta Jesucristonejta cheqan runapaj Dios qhawawasun chayqa. Arí, ñawpajtaqa, perdonasqaraj kananchej tiyan, Salvawajninchej Jesucristopi creespa. Cristopi Diosqa khuyakuyninta qowanchej, chantaraj Paytaqa jatunchanchej, munakunchej, servinchej ima. Sonqonchejpis, tukuy kayninchejpis munanqapuni Diospaj kawsakuytaqa.

Diospaj t’aqasqa santo kaypiña kaspaga, mana sayk’usunchu nitaj ithirikusunchu, ni lloq’eman ni pañaman, Jesucristopi creesqanchejraykulla kallpaqa kanqa. Sinch’ita sayaspa, Diospa Qhasilla K’acha Yanapaynimpis kasunchej. Amaña mask’anachu noqallanchejmanta ruwasqanchejrayku cheqan runapaj qhawasqa kaytaqa, Diospaj t’aqasqa santo kasqanchejqa, Jesucristollapi kashan.

Diospa Leynenqa churasqa kashan, juchasapa kasqanchejta reparachinawanchejpaj, perdonta necesitasqanchejta rikuchinawanchejpaj. Salvasqa kananchejpajtaj Mosoj tratotaman pusanawanchejpaj, Chaytaj Churin Jesucristopi tukuy runakunawan Diosqa allinyakun. Chay tratoqa kashan, Diospa Qhasilla K’acha Yanapaynin pikunachus Jesucristo Salvajpi creejkunapaj, juchasapa kasqankuta reparakojkunapaj ima.

Arí, ajina; chaymanta ñawpajmantaj Salvajnimpa makillampiña perdonasqa kawsakunampaj, ajinamanta kuisqa kanampaj. Chayrayku Diospaj t’aqasqa santo kaypi, sapa p’unchay wiñana tiyan, ni pañaman nitaj lloq’eman wist’uykuspa.

Janaj Pachapi kashaj Tatayku, yanapawayku mana kharkatitiyta wañuy patapi kashaspaqa; astawampis yanapawayku salvasqa kayniykupi sinch’ita sayayta. Jesucristoj sutimpi. Amén.

“Ama puñuychejchu, rijch’arisqa kaychej; jinataj Diosmanta mañakuychej, ama juchaman urmanaykichejpaj. Cheqatapuni espiritoqa, wakichisqa kashan kasunapaj, aycha cuerpotajrí pisi kallpayoj...” (Mateo 26:41)

Cristianoj espiritonqa tukuy imapaj wakichisqa, manataj nesecitanchu pipis ninanta kayta ruway jaqayta ruway, nispaqa. Aycha cuerponrí, pisi kallpa; espirituwan churanakun. Sajra aychanchejtaqa k’amina, cruzman chakatana. Chaytataj noqanchejpi ruwan Diospa Simi Nisqan. Chayraykumari Diospa Simi Nisqan Bibliapeqa tukuynejpi parlashan “Diospa wawasnin uyarinankupaj, kasunankupaj ima.”

Apóstol Juan, kaymanta parlaspa, nin: “Sichus Diospa kamachisqasninta kasunchej chayqa, yachanchej Payta sumajta rejsisqanchejta. Sichus pipis ninman: Diosta rejsini nispa, kamachisqasnintataj mana kasunchu chayqa, chay runaqa llullamin, cheqa kajtaj paypi mana kanchu,” nispa. (1 Juan 2:3-4). Apóstol Pablopis nin: “Qankunaqa hermanos, kacharisqa kanaykichejpaj wajyasqa kankichej; chaywampis ama aychaj munayninta ruwanaykichejpajchu kachun, manachayqa ujkuna ujkuna yanapanakuychej munakuywan,” nispa. (Gálata 5:13).

Diospa nisqasnintaqa respetowan kasuychej, cristianos jina creeyninchej yachakuchun Diospaj t’aqasqa santo kasqanchej. Cristoj Bibliapi yachachisqasnintapis tukuy imamanta astawan munakuna, ajinamanta Diospa munayninta ruwanapaj. “Kusikuyniyojmin kanku cheqan kawsaymanta yarqhachikojkunaqa, ch’akichikojkunapis, imaraykuchus paykuna sajsachisqas kanqanku... Imaraykuchus paykunaqa khuyakuyta taringanku,” nispa nin. (Mateo 5:6-7). Anchatataj Diosmanta mañakun ajina kawsayta qonanta, astawan astawan allin kaytapuni Diospa munayninta ruwayta munan.

Wiñaypaj Diosniyku, yachani munakuwasqaykita. Yanapaway qampi atienekuyta tukuy imapi. Jesucristoj sutimpi. Amén.

Mayo 27

“... Atiyneyqa pisi kallpayojkunapi astawan rikuchikun... pisi kallpayoj kasqaymanta jatunchakusaj Cristoj atiynin noqapi kakunampaj... aswan kallpayojpuni kani.” (2 Corintios 12:9-10)

Cristopi creespa juchasniymantaqa perdonasqa karganki, jinallataj kunampis atienikullasajpuni Paypa munayninta ruwaspa.

Unay watas pasajpi, Agustín sutiyoj yachachej runa, Diosmanta mañakoj kasqa kay jinata: “Señorníy imallatapis ruwanaypajqa, Qampuni kamachiway. Chaywampis atiyta qoway chay kamachisqaykita ruwayta atinaypaj; imaraykuchus, Qanqa yachallanki noqallaqa mana atisqayta,” nispa. Noqanchejpis manallataj noqallanchejmanta atinchejchu Diospa kamachisqanta junt’aytaqa. Junt’aytapuni munaspaqa, Jesucristollapi samarikuna, Pay noqanchejrayku tukuy kamachisqata junt’arqa. Ajinamanta llamp’u sonqos kawsakusunchej.

Pisi kallpa kasqanchejta reparakunchej chayqa, mana niyta munanchu llamp’u sonqo kani nispaqa. Ajinata yuyaspaqa qhella kayman yachakapusunman; manataj Diospa munayninta, kallpanta imaqa mask’asunmanchu.

Noqallanchejpi yuyanchej chayqa, kanqapuni pisi kallpa kasqanchejqa. Señorninchejpa kallpallan noqanchejpeqa atiyta qowanchej. Wakin kutiqa, Diosmanta mañakuytapis mana maychus mañakunata jinachu mañakunchej. Ujta nisqayki: Chayraykuchu manaña imatapis mañakusun Diosmanta? Ajina kajtinqa, astawanraj Diosmanta mañakunanchej tiyan. Diospa tukuy wawasnin mana llamp’u sonqo kasunchu chaypis, mañakunanchejpuni tiyan kawsayninchejpi Dios qonawanchejta kallpata, sonqo tiyaykuy kanampaj. Filipenses 4:8, nin: “Kayta niykichej: kay imapipuni **yuyaychej**: Tukuy cheqa kajpi, tukuy allin kajpi, tukuy ima llimphu kajpi, tukuy k’acha kajpi, tukuy allimpaj qhawasqa kajpi ima. Sichus sumaj kanman, chayrí jatunchanapaj jina kanman chayqa, chay imaspipuni **yuyaychej**,” nispa.

Mañakunallanchejpuni tiyan Diosmantaqa, Jesucristolla kallpata qonawanchejpaj, Paypa munayninta ruwayta atinanchejpajqa.

Tukuy atiyniyoj Diosniyku, Qanqa munankipuni wawayki kanaykutaqa. Yanapawayku ari, wawayki jinapuni kanaykupaj tukuy kawsayniykupi. Jesucristoj sutimpí. Amén.

“Efeso iglesiaij angelninman qhelqay: Paña makimpi qanchis ch’askasta jap’ej, pichus chay qanchis qori k’anchachinas chawpipi purejqa kayta nin: Ruwasqaykita, sinch’i trabajasqaykita, mana sayk’uspa sayasqaykitawan rikuni. Yachanitaj sajra runastapis mana rikuyta atisqaykita. Apostoles kayku, nispa nejkunatapis pruebaman churaspa, llullas kasqankuta sut’iman rikhurichimorqanki. Mana sayk’uspa sayarqanki, noqarayku ñak’arerqanki, manataj llawch’iyarqankichu. Chaywampis, kayta contraykipi nini: Qanqa manaña ñawpajta jinañachu munakuwanki, nispa.” (Apocalipsis 2:1-4)

Kaypeqa, Jesucristo Señorninchej, ashkha sumaj imasta nin, Éfeso llajtapi kaj iglesiamanqa. “Ruwasqaykita rikuni,” nispa nin. Paykunaqa mana Diospa Simi Nisqallantachu yachasqanku; manachayqa, allin imastapis (buenas obrastapis) ruwasqankupuni. Chantapis chay ruwasqankupeqa mana juch’uysitusllatachu ruwasqanku, manachayqa jatuchej ruway mana atinasta ruwasqanku. Cristorayku qhatiykachasqa ima kasqanku, may jinata ñak’arisqa ima kasqanku.

Señorpajqa, imatachus ruwanankutapis ruwasqankupuni. Pikunachus allinta yachajkunatapis sumajta kallpachasqanku, wist’uta yachachejkunatapis qhesachasqanku, mana ch’inchu kakusqanku uyankupi nisqanku mana allin kasqanta chay yachachisqankuqa.

Chay jawa nillantaj: “Nicolaitaspa ruwasqasninkuta chejninki, noqapis chejnillanitaj,” nispa. (Apocalipsis 2:6). Cristo chay chhika imasta nin chayqa, chay iglesiaqa allimpuni kaspaj jinasharqa. Icharí? Chaywampis mana pipis rikusharqachu Diospa rikusqantaqa, Pay yacharqa runaj mana rikusqantaqa. Chayrayku Jesucristoqa nin: Kayta nini contraykipi: “Mana ñawpajta jinañachu munakuwanki,” nispa. Mancharinapaj jinapuni kay nisqanqa, Diosqa munampuni munakunanchejta tukuy imamanta astawan. Qanrí imaynatataj Diosta munakunki?

Khuyayniyoj Dios Tatayku, yachachiwayku Qampi atienekuyta, chanta Qanta tukuy sonqo munakuyta, amataj qhapaj imasniyku kasqampeqa. Jesucristoj sutimpi. Amén.

Mayo 29

“Kunan ima nisuntaj? Juchallillasumpunichu, Diospa qhasilla k’acha yanapaynin astawan ashkxayanampaj? Ni imarayku. Juchapajqa wañorqanchejña. Imaynatataj juchallapipuni kawsasunri? Chayri manachu yachankichej, Cristo Jesuspi tukuy bautizasqa kajkunaqa wañuynimpi bautizasqa kasqanchejta?” (Romanos 6:1-3)

“Cristoj wañuynimpi bautizasqa kanchej,” nin. Imaniytataj munan chay nisqan? Imayna wañuytataj wañorqa Cristo?

Romanos 6:10 nin: “Juchapaj wañuspaqa, uj kutillata wañorqa wiñaypaj, kawsaspataj Diosllapaj kawsan,” nispá. Chayrayku bautizasqa kanchej juchapaj wañunallapajpuni, kawsaspataj kawsasun Diospajpuni. “Yachanchej mawk’a runanchej, Paywan khuska chakatasqa kasqanta, juchallikoj aychanchej amaña atiyniyoj kanampaj, amaña astawan juchata kasunanchejpaj.” (v.6) Paywan khuska bautismopeqa wañuspa p’ampasqa karqanchej. Imaynatachus Cristo kawsarimporqa wañusqa ukhumanta, Dios Tata jatunchasqa kanampaj; ajinallatataj noqanchejpis bautismopi kawsarimunchej mosoj kawsaypi kawsanapaj.

“Mawk’a runanchej,” sajra aychanchej ima, juchaman qosqa kashanku, sapa p’unchay wañuchisqa kanan tiyan. Cristowan khuska bautismonchejpi chakataspa wañucherqanchej, jinapis kawsarimuytaraj munan, chay sajra aychanchejpa atiyenenqa.

Pichus yuyan cristiano kasqanta iglesiaman risqanrayku, allin ruwanasta ruwasqanrayku chayqa, chay sajra aychampa munayninman khuschakun, Cristomantataj t’aqakun. Jesuspi creesqampis yankhalla, sichus ninchej Dioswan uj sonqolla kasqanchejta chaypis, lakhapi kawsashasunman. Critopi kaspalla kawsayninchejqa, sonqo tiyaykuyta tarinqa.

Dios Tatayku, graciasta qoyki, noqawan mana sayk’upusqaykimanta. Píkunachus noqa jina kajkunatapis Perdonaypuni, salvaypuni ari. Jesucristoj sutimpi. Amén.

“Aychaj munayninman jinachus kawsankichej chayqa, wañunkichej. Sitajchus Espiritunejta aychaj munaynimpa ruwanasninta wañuchinkichej chayrí, kawsankichej.” (Romanos 8:13)

Apóstol Pablo nishawanchej sut'ita, kawsayta munanchej manataj chinkayta chayqa, sajra aychanchejpa munayninta sapa p'unchay wañuchina kasqanta. Chaytaqa mana ajllakunachu kashan, manachayqa Diospa wawasnin jinaqa, sajra aychanchejpa munayninta wañuchinanchej tiyan.

Cristopi creespa Diosman kutirikusqanchej ratomantapacha, perdonasqa, salvasqataj kanchej. Ñawpa kawsayninchejpi, imachus mana ruwanasta ruwaykunata saqepunchej, mosoj kawsaypi Dioswan khuska kawsakunapaj, Jesucristoj ruwasqampi atienikuspa, manaña ujtawan juchata servinanchejpaj.

Yachanchej jina, ni pi cristianopis Leyman jinañachu kawsakun, Jesucristoj ruwasqanraykulla salvasqas kanchej, chaytaj sonqo tiyaykuyta qowanchej. Chayrayku, sonqonchejpeqa kanan tiyan, kay: Noqaqa allinta qhawakusaj, juchaman urmanasmanta karunchakuspa. Diosqa chay chhika unayta suyawarqa Payman kutirikunaypaj, kunanmantaqa manaña karunchakusajchu sajra aychaypa munayninta ruwayta munaspaqa, manachayqa Jesucristoj kallpanwan Diospa munaynintapuni ruwasaj, nispa.

Evangeliota uyarisqayki, mosoj kawsayta jap'isqaykipis qampajqa pisipaj qhawasqa kanman, sichus sajra aychaykej munayninta Jesucristoj atiyinwan thasnuyman churakunki chayqa. Salvasqaña kanki chaypis, maw'k'a runaykiqa kashanraj, chaytaj juchaman tanqayta munasonqa.

Chaypitaj supayqa, ujllata phinkiykamuwanchej, chay sajra aychanchejpa munayninta moq'echispa juchaman urmachinawanchejpaj. Chaykunamanta reparakunchej chayrí, Diosman qhaparikunchej yanapayninta mañakuspa; Salvawajninchejtaj khuyakuyninwan watejmanta sayarichiwanchej. Ajinata ari tukuy kawsayninchejpis Diospa qhesilla K'acha Yanapaynimpi kawsakuspa ñawpajman rinallapuni.

Diosniyku, mana yanapanawaykipaj jina kashani chaypis, Qanqa oqharikapullawankipuni. Ajinapis waqaychallawaypuni. Gracias Jesucristoj sutimpi. Amén.

Mayo 31

“Cheqamanta kay creesqanchej sut’inchasqa, cheqa kajqa may t’ukuna, jatuntaj...” (1 Timoteo 3:16)

May chhika runakuna yuyanku, cristiano kayqa imaynachus kawsayninchej kashan, chayman jinalla kawsakuna kasqanta. Sonqonkupi nishanku salvaciontaqa tariyta atinchej Diospa kamachisqasninta junt’aspa, yachachisqasninta kasuspa ima, nispa. Jinallataj Jesusmantapis yuyanku jatun Yachachej jinalla kasqanta. Ajinata yuyayqa pantasqa kashan. Diospa Simi Nisqanqa nin, ajinata yuyajqa ciego kaywan ninakusqanta. Chayraykutaj Cristo nerqa: “Punkoqa k’ullkumin, k’ullkullataj kawsayman pusaj ñampis. Chayta tarijkunaqa pisi kanku,” nispa. (Mateo 7:14).

Mana noqallanchejmantachu kashan salvasqa kanaqa. Ninchej jina: Juchasapa kasqanchejta reparakuywan qallarín, chanta, Espíritu Santo Diospa Simi Nisqannejta rikuchiwanchej Diospa Churin Jesucritollapi kasqanta perdonasqa kananchejpis.

Diosqa munan tukuy kay pachapi runakuna salvasqa kananchejta, yachananchejtataj cheqa kajta. Ajinapi chay sajra supaypis chaypi rikhurin runakunata ch’awkiyaspa, Evangekiota mana uyarinankupaj. Chaytaqa rikunchej Edén huertapi, Adanta Evatawan imaynatachus ch’awkiyaspa urmachisqanta. Kikillantataj kunampis ruwashan tukuy runakunawanqa.

Supayqa, mana munajtaqa mana kallpallawan imatapis ruwachingachu, Payqa munakuynimpi Evangelionejta wajyakushawanchej Payman rinapaj. Ichus runaqa imachus astawan moq’echin, chayman sajra aychanqa aysan, chaytataj ruwanpacha. Diospa Simi Nisqampi, nin: “Supaypa pagonqa wañuy”, nispa. Charaykumari, Tata Diosqa, mana saqenchu runaj munaynillan kananta salvasqa kanapajqa. Salvasqa kananchejqqa Cristollapi tarikun. Creenachej “Ferí”, kashan Diospa qowasqanchej, Diospa Simi Nisqata ñawirisqanchejrayku.

“Kay pachapi pisi kallpayojpaj qhawasqa kajta DIOS ajllakorqa kallpasapasta p’eqachinampaj; kay pachamanta mana walej kajta, qhesachasqata, qhasi manakajpaj qhawasqata ima ajllakorqa kajtapis chinkachinampaj, ama pipis Diospa ñawpaqempi jatunchakunampaj,” nin. (1 Corintios 3:28-29).

Dios Tatayku, noqayku rejsikuyku, Qanmanta karupi kaspaqa wajchas, ciegos kayku. Amapuni kachariwaykuchu qayllaykimanta. Jesucristoj sutimpi. Amén.



Junio

*"Almay, Diosllapi ch'inllamanta suyakuy.
Suyakuyneyqa Paymanta jamun. Payllapuni
pakakunay chhanka, salvawajniytaj..." (Salmos
62:5-6).*

Junio 1

“... Wajyasqa karqankichej, imaynachus purina kasqanman jina purinaykichejta.” (Efesios 4:1)

Tukuy ima wajyakuymanta aswan jatun wajyakoyqa kashan, Diospa wajyakuwasqanchej Churimpa casarakuynin raymiman, chay wajyakuyqa wiñay kawsayman wajyakuwasqanchej kashan. Wajyakuwanchej Jesucristonejta wawampa rejsikapuspa, wiñay kawsay herenciata jap'inanchejpaj, chaypajtaj kay pachapi ruana masinchejman Evangeliomanta willaspa, paykunapis salvasqa kanankupaj.

Diosqa, tukuy imata churapuwanchej kay pachapeqa allin imasta ruwanapajpuni. Sapa ujman qowanchej atiyta, chaytaj yanapawanchej allinta kawsakuyta ujkuna ujkunawan. Wakintaj wajyasqa kanku, tukuy nin nacionta kamachinankupaj. Wakinninchejtataj maypichus tiyakunchej chaypi maychus kajta kawsakuspa tatas jina, wawas jinapis Diospa munayninman jina allinta kawsaspa. Wakin kanku patrones, wakintaj llank'ajkuna. Diosqa tukuyta kay pachaman churan, Paypa qosqan ruwanata allinta junt'anankupaj; qhapajpis wajchapis kachun, Diospa ñawpaqempiqa allinta ruwaspa junt'anampaj.

Imayna allin kawsaychus kanman kay pachapeqa, sapa uj chay ruwanampi allinta ruwasunman chayqa. Chayrayku Diospa wawasninqa imaynachus kasqankoqa rikukun k'acha kawsayninkupi. Diosqa, munampuni wawasnin ajinata kawsakunanchejta, Payta munakuspa tukuy imapi; chaymin kusichin Diostaqa. Chay imas ajina kanampajqa tukuy sonqo ñawirikuna Diospa Simi Nisqantaqa. Ñawirinataj mana ñawisnillanchejwanchu manachayqa tukuy sonqonchejwan, Jesucristo yanapaynimpiti atienikuspa. Ajinamanta imatapis allinta ruwanapaj.

Sichus Salvawajninchej Jesucristo kaypi kashanman, ñawisninchejpa rikusqan chayqa, imata ruwaytataj munasunman Paypa rikunanta?

Lutero, uj kuti nerqa: “Dios janaj pachamanta urayk'amuspa nisunkiman patiota pichanaykita chayqa, kusiyan chayta ruwawaj; manataj yuyashawajrajchu chay ruwanaqa mana chhika valorniyojchu kasqantaraj, icharí? Ajinata Diosqa munan allintapuni ruwanaykitaqa.

Dios Tatayku, kay pacha kawsayniypi mashkha kutis p'enqakorqani wakin ruwanasmanta. Chay jina kasqaywan phiñacherqayki, perdonaway chaymanta. Jesucristoj sutimpi. Amén.

“Sardis iglesiasaj angelninman qhelqay: Pichus Diospa qanchis espiritusninta, qanchis ch’askastawan jap’in, chayqa kayta nin: Ruwasqasniykita rikuni, yachallanitaj kawsashasqaykita tukuy nisqankuta. Chaywampis wañusqa kashanki.” (Apocalipsis 3:1)

“yachallanitaj kawsashasqaykita,” nin. Chayta nispa Jesusqa nisharqa: Chay nisqaykiman jinaqa, rijch’akuyta munanki critiano jina respetasqa kayta, paykuna chawpipi munasqa kayta ima. Mana mundanochu kanki, Diospa wawasnin chawpipi kashanki. Chaywampis espirituman jinaqa kawsayniyki wañusqa kashanki, nispa nisharqa.

Jesusqa ajina yachachiyman parlaspa, chay chunka sipaskunamanta parlasharqa. Phishqa kasqanku yuyayniyokuna, phishqataj pisi yuyayniyokuna. Qhawarisqallaqa tukuyninku uj rejlla kaspaj jenarqa: Chunkantin sipaskuna kasqanku mana qosayoj sipaskuna. Chunkantin k’anchanasniyoj, tukuyninku suyasharqanku casarakoj waynata. Chaywampis chaykunamanta phishqa apakusqanku astawan aceiteta, chay wakintaj mana. Ajinapeqa, mana uj rejllachu kasharqanku. Chayrayku chay phishqa jawapi rikhurerqanku aceitinku tukukapusqanrayku.

Noqanchejwampis ajinallataj kanman kunan p’unchaykunapipis. Kankuman cristianos Diospa Qhasilla K’acha Yanapayninta pisipaj qhawajkuna. Jinallataj paykunawan khuska kallanmantaj Diosta munakojkuna, Diospa Qhasilla K’acha Yanapaynimpi kawsakojkuna.

Ajinata kawsajkuna wakin kuteqa ninku, wañuy patapi kaspallaña Diosman qhaparikusaj nispa, manataj wakichisqa kanataqa yuyallankupischu. Wakinkunataj imaynachus kasqanku jinallawanña, sonqo jut’asqa fariseo jina kayta munankuman, Diospa sutimpi imatapis paykunallamanta parlaspa, Janaj pachaman yaykuyta yuyaspa qhepakapunkuman.

Chayraykutaj, apóstol Pablo k’amiwanchej: Qhawarikuychej Jesuspi cresqaykichejpichus kashankichej manachus chaytaqa. Chayrí manachu yachankichej qankunapi Jesucristo kashasqanta?, nispa.

Señor Diosniyku, yanapawayku chay imasta entiendeyta, ñawpaj kaj kamachisqaykitataj kasuyta yanapawayku. Sonqoyman, graciasta qonayqa amapuni chinkachunchu. Jinallataj imata munaspapis Qanllamanta mañakuyta yanapawayku. Jesucristoj sutimpi. Amén.

Junio 3

“Sonqochajjamonqa, pitachus Tataymanta noqa kachamusaj, chay cheqa Espiritoqa. Maypachachus payqa Dios Tatamanta jamonqa chaypacha, paymin noqamanta willanqa.” (Juan 15:26)

Salvawajninchejqqa, ripunanpachapi yachachisqasninman, Espiritu Santo paykunaman jamunanmanta parlarqa. Jamunanta: Sonqochanawanchejpaj, juchamanta reparachinawanchejpaj, chanta noqanchejmanta kutikunawanchejpaj ima. Imaraykuchus Payqa Cheqa kaj Dios Espiritu: “Sonqochaj Espiritu Santotaj, pitachus sutiypi Dios Tata kachamonqa, paymin tukuy imata yachachisunqachej, yuyarichisunqachejtaj tukuy ima nisqayta,” nispa nin. (Juan 14:26).

Espíritu Santoj aswan jatun ruwananqa kashan, juchanchejta reparachispa Cristoman pusanawanchejpaj, Payllapi atienikuspataj salvasqa kananchejpaj, chanta tukuy imata Diosmanta yachachinawanchejpaj ima. “Pay noqamanta parlanqa,” nispa nerqa. Apostol Pablopis, nin: “Mana pipis Diospa Espiritumpa atiyinwan parlaspaga, ninmanchu: Jesusqa maldecisqa kachun kachun, nispa; nillataj pipis niyta atinchu: Jesusqa Señormin, nispa, mana Espiritu Santoj atiyinwan parlaspaga,” nispa. (1 Corintios 12:3). Espiritu Santoj ujnin ruwanantaj kashan noqanchejta llakiyninchejpi “Sonqochay”, kallpanchej pisiyajtín kallpachanawanchejpaj, “ayqospa noqanchejrayku mañakuspa”

“Cheqa kaj Espíritu” niyta munan: Diospuni Espiritu Santo Sonqochawajninchejqqa. Ajinamanta sayachisqanqa “Cheqa kajpi” wiñaypajtaj kashan. Espiritu Santoqa ñawisninchejta kicharin, ninrisninchejta kicharin. Pakasqa imasta Diospa Simi Nisqampi sut’iman orqhon, Cristonejta Diosta rejsinanchejpaj: “Rejsinchej cheqa ñanta, cheqa kaj kawsayta ima”. Chayraykutaj, Espiritu Santoqa mana saqenchu Diosmanta kaj imasta, pipis wist’uta (llullata) yachachinantaqa. “Cheqa kaj Espiritoqa” parlallantaj tukuy Cristianosman ch’uwa sonqos kanankuta, sonqonchejpa creesqanchejta, siminchewan willananchejpaj; jinallataj kawsayninchejpipis, Paypuni cheqan ñampi purichiwanchej.

Diospa Espiritullan, sonqonchejmanta orqhoyta atin iskay parlayniyoj kasqanchejtapis, uj parlayniyojlla kayman tukuchin. Jinallataj sonqonchejman churan llimphu kawsayniyoj kayta, cheqan sonqo kayta ima. Yachachiwanchej imaynatachus Diospa wawan jina kawsakuna kasqanta, Diospa Simi Nisqanman jina kawsakuyta atinanchejpaj.

Munasqa Señorniyku, qowayku Qampa atinyikita, graciasta qosunaykupaj jinapuni. Llimphu kawasaypi purichipayku. Jesucristoj sutimpi. Amén.

“Cheqamanta kay creesqanchej sut’inchasqa, cheqa kajqa may t’ukuna jatuntaj: Cristoqa aychallikuspa runaswan rikuchikorqa...” (1 Timoteo 3:16)

Ashkha runakuna, paykunallamanta may chhika unayta mask’aspapis mana tariyta atinkuchu “Cheqa kajtaqa”; chayraykutaj paykunaqa kawsakunku Diosta mana rejsispa, nitaj cheqa kaj Fetapis rejsinkuchu.

Kallankutaj kusiypi kawsaj runakuna, Paykunaqa Diospa Simi Nisqanta allinta ñawirinku. Dioswan k’askasqa kawsakunku juchata Jesucristoj kallpanwan atipaspa; yuyayninku sonqonkupis mosojyachisqa kashan, Diospa wawan jina maychus kajta kawsakunku. Mana paykunallamanta kallpasapa kasqanku yuyakunkuchu. Paykunaqa Juchallispapis llakikunku: “Mayk’ajtaj mana juchayoj kaymanrí?, nispa. Mayk’ajtaj Diosta manaña wasanchaymanchu? ninku ima juchallispaqa. Diosman jaywakunku tukuy kawsayninkuta, Diostajajina runastaqa yanapampuni, chaypaj jamorqa Salvadorninchej Jesucristoqa.

Chayrayku; “Payqa munan tukuy runas salvasqa kanankuta, cheqa kajtataj rejsinankuta,” nispa nin. (1 Timoteo 2:4). Señorqa mana munanchu ni ujllapis chinkananta, manachayqa munan tukuy Payman kutirikunankuta. Chantá, imaraykutaj mana tukuychu salvasqa kanku? Imaraykuchus paykunallamanta salvakuyta munasqankurayku, manataj Jesucristo Salavajpichu sonqonkuta churanku.

Jatun pantay kashan, imaraykuchus ashkhas yuyanku ñawpajtaqa k’acha runamanraj tukuna kasqanta. Ajinata yuyasqankuraykutaj Evangeliota uyarisqankupis qhasi manakaj. Chayrayku noqanchejqa, imaynachus kasqanchej jinalla Cristoman chimpakuna kashan. Arí, noqallanchejmanta yuyasqanchejqa, chinkayllamampuni apawasunman. Mana chay pantasqata yuyasqanchejchu perdonawanchej juchanchejmantaqa, manachayqa Cristoj ruwasqallan salvawasun. Paypi tukuy sonqo ceespalla “cheqan runapaj qhawasqa” kayta atinchej.

Munasqa Dios Tatayku, kay tukuy uyarisqayta yanapaway sonqoymanta mana llojsinampaj, Qampitaj kusikunaypaj. Jesucristoj sutimpi. Amén.

Junio 5

“Tata Diostajri tukuyninchejpa juchasninchejta Payman q’epiricherqa (Isaías 53:6). Kaymá Diospa Corderon, runaspa juchanta apaspa pichajqa.” (Juan 1:29). “Cristoqa mana ima juchatapis ruwarqachu. Diosrí noqanchejrayku Cristota castigarqa kikin juchapis kanman jinata, noqanchej Cristopi kaspera, Diospa cheqan kaynin ruwasqa kananchejpaj.” (2 Corintios 5:21). “Cristo preciowan kacharichiwarqanchej Leypa maldicionninmanta, imaraykuchus Payqa maldecisqa karqa noqanchejrayku.” (Gálatas 3:13). “... Dios Tata cheqamanta Cristonejta kay pacha runasta Pay kikinwan allinyacherqa, runaspa juchasninkuta qonqayman churaspa...” (2 Corintios 5:19).

Sichus chay nisqaspi mana creenchejchu, chayqa uj velo jina yuyayninchejmanta pakawanchej, Dios ruwasqanta mana rikunanchejpaj. Yuyariypuni kayta: Dioswan allinyachisqa kanchej, Diostaj may khuyakuyniyoj k’achataj noqanchejpajqa, nisqanta.

Tukuy runaspa juchasninkuqa: Cristopi creejkunajta, mana crejkunajtapis, Diosqa Jesucristoman q’epiricherqa; noqanchejrayku Pay wañuchisqa karqa, juchasninchejta pampachanampaj. Chay tukuytataj mana atinchejchu entiendeyta.

Chay tukuytataj Diosqa, Ñawpa Testamentopi unay nerqaña Danielpa nisqanman jina, chaytaj junt’akorqa (Daniel 9:24). Chayrayku kunanqa khuyakuyninwan Diosqa qhawana tukuy runakunata, juchasninkumanta perdonayta munaspa.

Chay tukuyman, Jesucristoqa ajinapuni kasqanta rikuchiwanchej, chinkaj waynamanta parlasqampi. Nin: “Jatariytawan tatampaman kutiporqa. Tatantaj karullapiraj churinta rikuspa payta khuyarqa. Usqhayta rispa ojllaykuytawan much’aykorqa”. Chay parlasqanwan Señorninchej Jesucristoqa rikuchiwanchej, may jinatachus Dios munakuwasqanchejta, noqanchej juchasapastaqa. Kunanqa imaynataj sonqoyki kashan? Juchasapa kasqaykimantachu llakisqa, phutisqa kashanki? Jesucristoman chimpaykorqankiña chayqa, Payqa perdonasunkiña. Ama llakikuychu.

Dios Tatayku, tukuy juchasnimanta perdonaway. Chay khuyayniykimanta graciasta qoyki. Jesucristoj sutimpi. Amén.

“Sichus mana juchayoj kasqanchejta ninchej chayqa, noqallanchejtaj ch’awkiyakunchej, cheqa kajtaj mana noqanchejpichu kashan... Juchallikojqa kuraj supaymantamin... Diospa wawan kasqanraykutaj mana juchapi kawsanmanchu.” (1 Juan 1:8; 3:8-9)

Juchasapa nispaga, niyta munan: juchaqa noqanchej aychanchejpi kashasqanta, chay juchatataj Jesucristolla atin atipayta noqanchejpeqa, mana ajina kajtenqa juchaqa atipawasunman. Diospa wawan jinaqa munasumpuni juchamanta karunchakuytaqa, chaypajtaj Jesucristoman rinanchej tiyan, imaraykuchus Payqa atipanña; Paypitaj atipaj kanchej.

“Juchallapipuni kawsakun,” nispa nishan chayqa, parlashan pikunachus mana munankuchu chay juchankuta saqeyta, paykunaqa misk’iykuchikapunku chay juchawan, chaykunamanta parlashan. Chay jina runas wakin kuteqa, ninku juchallisqankuta, chaywampis simillankuwan ninku, nishaspapis mana munankuchu saqeyta chay juchankuta; ajinata kawsajkunaqa churanakuyta qallarinku pichus payta k’amejwapis.

Juchallikuy ujtaj, juchallapipuni kawsakuyta munajtaj, waj. Cheqamanta Diospa wawanqa, mashkha millayta juchallikuspapis arrepientekunku, urmaspapis sayarikuspa usqayta rinku Jesucristoj chakisninman perdonta mañakoj. Juchallapipuni purejrí mana dakunchu sayarikunanmantaqa, imaraykuchus misk’ichikapun khuchichakuywan, lanti raymisman riyta. Chay jina kawsayniyoj runaqa mana llimphu sonqo kanmanchu. Nitaj Diospa wawan kanmanchu, chay jina kawsayniyoj kaspaqa.

Diospa Qhasilla K’acha Yanapayninmanta urman chayqa. Chaymanta sayarikunampajqa arrepientekunampuni tiyan chay millay juschas ruwasqanmanta, usqayllata Jesucristoman rinan tiyan perdonasqa kanampaj, ajinata ruwaspataj watejmanta Dioswan allimpi kayta atinampaj.

Puraj uya kajkunari ima juchaman urmaspapis pakaykun, mana arrepientekunchu, nitaj dakunchu Dioswan allimpi kaymantaqa. Chay jina kawsayniyojqa supaypata; chay kashan sajra aychampa munaynimpi kawsakuyqa. Apostol Pablo nin: “Aychaj munayninman jinachus kawsankichej chayqa, wañunkichej,” nispa. (Romanos 8:13).

Diosnáy Tatáy, yanapaway, kallpachaway, kunanmanta ñawpajman kamachisqasniykita kasunaypaj, amaña sutiyykitapis yanqhajpaj oqharinaypaj. Jesucristoj sutimpi. Amén.

Junio 7

“Noqapipuni kaychej, imaynatachus noqapis qankunapi kani, ajinata. Imaynatachus ramaqa sapallanmanta mana poqoyta atinchu mana uva sach’api kaspaqa, ajinallataj qankunapis mana atinkichejchu manachus noqapi kankichej chayqa. Noqa kani uva sach’a, qankunataj ramas kankichej. Pillapis Noqapi kajqa, Noqataj Paypi, chaymá askhata poqonqa. Mana noqawanqa mana imatapis ruwayta atinkichejchu.” (Juan 15:4-5)

Espíritu wakisqa imapajpis kashan, Diosmanta atiyqa Jesucristopi juchata atipanapaj kashan; chay kashan Espíritu Santoj ujnin poqoynin Diospa wawampa kawsaynimpeqa. Chaytaj jamun Diosmanta, chay “medios de Gracia” nisqanejta.

Imaynachus Diosman kutirikuypis kashan, chay watejmanta nacey (paqarikuy) nisqa, Espíritu Santoj ruwasqan; sapa p’unchay arripietekuypis Espíritu Santoj ruwasqallantaj kashan, Jesucristoman pusawanchej perdonta jap’ikunapaj. Ajinamanta chay Espíritu Santoj yanapaynintaqa jap’inchej, Diospa Simi Nisqanta uyarispa, tukuy sonqo creenapajpis, Pay yanapawanchej. (Gálatas 3:2).

Allin imaspi yuyashajtiyki, sajra yuyayqa ujllata yuyayniykiman rikhurichin pantay juchaman tanqaspa urmachiyta munaspa; chaypitaj Espiritu Santo sonqoykikipi reparachisunki mana allin kasqanta. Diosmanta mañakuspataj, Diospa Simi Nisqampi mask’anki, chaypi imanishanchus chayta. Diospa nisusqanta tarispataj kutirikunki Jesucristomanta perdonta mañakuspa; ajinaqa atipasqa rikhurin sajra supayqa. Imarayku? Imaraykuchus tarinki imanishanchus Diospa Simi nisqan, chaypi creesqaykirayku, ajina kashan.

Chayta atipanaykipajqa Jesucristoj ruwasqallampi atienikuy, Diosllapi atienekuy; chay qampi mana chinkananchu tiyan yuyayniykimanta sonqoykimanta imaqa. Chay pantasqa yuyayniykita qonqayman churayta Espíritu Santoqa yanapasonqa. Diosman astawan k’askaykuy, sonqo tiyaykuyta tarinaykipaj. Pay qosonqa kusiya, munakuyta, atiyta ima.

Chayrayku ama t’aqakunachu, nitaj karunchakunachu Salvawajninchej Jesucristomantaqa, imaraykuchus ashkhata munakuwanchej. Chay kashan, chay pantay juchaman urmaymanta, atipasqata atipanapajqa.

iAy Dios Tatayku! Yanapaway ari, Qanta allinta rejsisuyta. Yachachiway imaynatachus Qanta munakuywan servisuyta. Jesucristoj sutimpi. Amén.

“Paykunaj ñawisninkutaj chharpuyasqa jina kasharqa, Payta ama rejsinankupaj.” (Lucas 24:16)

Apostolkunapajqa ima sumajchus kargapis, Diospa Churinta uyanmanta rejseyqa. Paykunaqa, rikorqanku Yachachejninkoj: “Jatun kaynimpa k’achayninta rikorqayku, Dios Tatajpa uj k’ata Churimpa jatun kaynimpa k’anchayninta jina. Payqa junt’a karka k’acha kaywan, cheqa kajwantaj,” nispá nin. (Juan 1:14). Juanqa, kusiywan Salvajnimpa ojllayninman siriyorqa. Tukuyninkutaj paywan parlarikuyta aterqanku, imatapis tapurikuyta aterqaku. Tukuyninku uyariyta aterqanku Diospa siminmanta llojsimoj, parlaytaqa.

Chaywampis Señorninchejqqa, nerqa: “Satanasqa munan trigota jina qankunata thalayta,” nispá. (Lucas 22:31). Ajinamanta apostolkunaqa waqarqanku chay pruebas jamojtinqa. Wakin kutitaj Yachachejninkuta ñawisninkuwan qhawashaspapis, parlasqanta uyarishaspapis, mana rejsinichu nerqanku. Wañusqamanta kawsarimpusqanta creenankupajpis rejsikapunankupaj imaqa, makisnimpi clavospa jusk’usqantaraj rikuchinanta mañarqanku. Chaywampis Evangelioqa nin: “Ñawisninkoqa chharpuyasqa jina kashasqanta, chayrayku mana rejsikapusqankuta.”

Kunampis ajinallataj kashan, chayta sumajta reparana tiyan. Parlashan Jesupis creejkunamanta, noqanchejmanta, manari mana creejkunamantachu. Mana Diospa Simi Nisqanta mana creejkunamantachu parlashan. Parlashanqa Diospa wawasninmanta.

Arí, supayqa Cristopi creejkunata urmachinampaj sumaj wakichisqa kashan, venenasqa flechasninwan wach’iykunampajpacha, cheqa kajta mana creeyta atinankupaj. Tukuy cristianos munanchejpuni Diospa Simi Nisqampa nisqasninta creeytaqa, chaymantataj supayqa misk’achiyta munan mana creenankupaj. Ajina kajtenqa imatataj ruwasunman? Ujllata atinchej ruwayta: Jesucristoj makinman usqayllata k’umuykuspa, Paypa yanapayninman rina, munayninta ruwanapajqa.

Manaraj chayta reparashankichu chayqa, qhawariy pikunachus bibliata ñawirishaspa, ajinapi rikhurisqankuta. Cuentata qokuspataj, Jesucristoj atiyiwan nisun: “Supay karunchakuy noqamanta, Jesucristo noqapi tiyakun,” nispá.

Munakoj Diosniyku, kallpachawayku kay p’unchay kawsayniykupi, Qanta honrasunaykupaj. Jesucristoj sutimpi. Amén.

Junio 9

“Qankunaqa kay pachapaj kachi kankichej. Kachichus laq’ayanman chayqa, imawantaj kachichakunqari? Mana imapaj valejñachu, manachayqa jawaman wijch’unallapajña, runa sarunampajtaj.” (Mateo 5:13)

Jesucristoj salvasqan kajkuna, runa masinta kusichiyta munaspa mana allin imasta ruwanman, Jesucristopitaj creeni ninman chayqa, payqa mana uyarinapaj jina kanman. Parlasqantapis mana pipis uyariyta munanmanchu, manachayqa “runaj sarunampaj jinallaña”, rikhurinman.

Sichus kachi laq’ayan, k’anchapis chharpuyan chayqa, manaña imapajpis servinmanchu. Ari, ajinata chinkachinchej noqanchejpi Diospa jatun kaynimpa k’anchaynintaqa; ajina kajtenqa manaña ima jucha ruwasqanchejtapis reparakunchejñachu, chayraykutaj Salvawajninchejwanqa mana allimpichu kanchej.

Ajina kajtinga, “qankunapis kachinchasqa jina kaychej, ujkuna ujkunawantaj allinta kawsakuychej,” nispa niwanchej Salvawajninchejq. (Marcos 9:50). Chayrayku, Diospa wawan imaynachus kananqa, mana kay pachapi runaspa yuyasqankuman jinachu, manachayqa Espíritu Santoj pusayqachasqampi k’acha kawsayninga.

Qanqa piwan parlashaspapis k’acha kay, khuyakoj, llamp’u sonqo, k’acha parlayniyojta. Chayrayku, imachus mana allin kasqanta runa masiykipi reparaspaqa, ama niychu chay imapis allillan kashasqanta, manapis dakusunkimanchu jinaqa. Ama qanqa saqeychu pitapis infiernoman rejta, mana reparachispaqa. Imata nisqaykipis ama simillawanchu kachun, manachayqa kawsayniyki sut’i rikukuchun (1 Juan 3:18). Chayrayku, Diospa wawan jinaqa, tukuy parlasqayki creenapaj jinapuni kachun. (Proverbios 3:32).

Jesucristo nin: “iAy, tukuy runas qankunamanta allinta parlactinku. Jinallatataj ñawpa runas ruwaj kanku llulla profetaswan,” nispa. (Lucas 6:26). Jina kashan chayqa, tumpata t’ukuriy, qan imaynataj kashanki Diospa qhawaynimpi, chayta.

Munakuj Dios Tatayku, parlasqay, tukuy kawsayniypis llimphu kawsaypi kachun, chayta kunan mañakuyki. Jesucristoj sutimpi. Amén.

“... Ley jamujtinrí, juchaqa kallpayoj jatarimorqa, noqañataj wañusqa jina karqani.” (Romanos 7:9).

Noqaqa anchatataj kallpakorqani, imatapis astawan astawampuni munapayasqaypa contrampi maqanakuspa, mana atipayta atispa llakisqa karqani. Yanapata mañakuspataj mayta qhaparikorqani. Ajinapis kay sajra sonqoyqa munashallarqapuni.

Ni imanakuyta atispataj, manaña astawan kallpakorqanichu, jina wañusajpis nispa nerqani.

Ajinamanta rikhurerqani, supaypa maqasqan uj ch'in ñampipis yawar pukalla wañuy patapi jina yuyakorqani. Jinallapi, uj Samaritano (Jesucristo) chaypi rikhuriwarqa, Paytaj caballonmanta urayk'uspa jampiykuwaytawan apawan allintapuni jampiykunawanpaj. Imachus necesitakojta pay rantipumarqa sanuyanaykama jampinawankupaj.

Chay willasusqayqa, cheqamanta kashan Cristoj Evangelion. Payqa, wañuyman jaywasqa karqa, qanrayku noqarayku juchanchejmanta kacharichinawanchejpaj. Ajinamanta jap'erqanchej kawsayta, wiñaypaj wañunanchej kashajtin.

Chaytapuni nishan Apóstol Pablopis: “Ajinallatataj qankunapis, hermanosniy, leypaj wañurqankichej Cristoj wañuyninnejta... pichus wañusqakunamanta kawsarichisqa karqa, chaypata, Diospajtaj allin imasta ruwanaykichejpaj,” nispa. (Vr. 4).

Manaraj Jesucristoj salvasqan kashaspaqa, runaqa kallpakusqallanwan Diosman chimpayta yuyarqa. Imatachus sonqon munan chayllata ruwaspa Diosman chimpakuyta munarqa. Kunantajrí yuyayninpeqa ruwasqasninqa mana salvayta atisqanta kashan; kunantaj Jesuspa ruwasqanpi wañusqampi ima, sonqonta churan, chayllapitaj coonfiakun.

Runaj ñawpa kawsayninpeqa, tukuy ruwasqampi, chanta kapuynimpi ima kusikoj; kunantajrí, kusikuyninqa Cristollapiña. Tukuy kawsaynin chawpipitaj Cristolla tiyakun.

Wiñaypaj Tatayku, yanapawayku samarikuna p'unchayta jatunchayta palabraykipi unanchanaykupaj, ajinamanta noqayku agradecikoj sonqo kanaykupaj. Chayta mañakuyki Jesucristoj sutimpi. Amén.

Junio 11

“Kunanrí, Leymanta kacharichisqaña kanchej. Chay leyqa kamachiynimpi jap’iwarqanchej; chaypajqa wañunchejña. Chayrayku Espiritunejta Diospa mosoj kamachisqanta kasuna, amaña chay ñawpa Leypa nisqantaqa.” (Romanos 7:6)

Cristianos kajkunaqa, juchamanta kacharichisqaña kanchej, Diospa reinonpitaj kawsashanchej, chay leyqa kamachisqasninta mana junt’ay atispa, sayk’uchiwasqanchejmanta kacharichisqa kanchej. Chaymanta parlaspa Lutero nerqa: “Mana nishanichu, Cristianosqa mana juchallinkuñachu, chayraykutaj Diosqa mana imamantapis juchachanqañachu”, nispaga.

Mana Diospa leyninman jinachu juchachasqa kasunchej. Leyman jinachus juchachasqa kasunman chayqa, ni pipis atinmanchu salvasqa kaytaqa. Ajina kanman chayqa Evangelioqa qhasi manakaj kanman. Jesuspi creesqanchejpis qhasillapaj kanman, juchasninchejwan chinkasqallaraj kashasunman. Chaywampis gracias Diosman mana jinachu. Diospa Simi Nisqan Biblia nin: “Cristo preciowan kacharichiwarqanchej Leypa maldicionninmanta,” nispa. (Gálatas 3:13).

Leymantaqa, mana kacharichillawanchejchu, astawanqa Diosqa manaña ni imamantapis juchachawanchejñachu, uj k’ata Churimpa ruwasqanraykulla Paypa cheqan kayninta (justicianta) qowanchej, chaytaj junt’asqa kashan wiñaypaj. Chayta qowanchej mana noqanchej ima allinta ruwasqanchejraykuchu, manachayqa Jesucristo noqanchejrayku ruwasqanraykulla. Biblia nin: “Leyqa Cristopi junt’akun, Paypi tukuy creejkuna Diospa ñawisnimpi cheqan runapaj qhawasqa kanankupaj,” nispa. (Romanos 10:4).

Ajinamanta cheqan runapaj qhawasqa kanchej, imaraykuchus munasqa Churin Jesucristoqa jap’ikapuwanchejña (2 Corintios 5:21).

Diosqa, tukuy sonqo munakuwanchej Jesucristopi kasqanchejrayku. Diosqa, mana lenteswanrajchu qhawaykuwanchej, manachayqa tukuy imata rikoj ñawisninwan, uj k’ata Churimpa ruwasqanta noqanchejpi rikun. Luteropis nin: “Creesqanchejraykulla Cristomanta jap’inchej tukuy imata, Dios Tataj munakuyninta, Jesucristowan kawsakusqanchejrayku; Tata Diosqa noqanchejta allin ñawiwana qhawawanchej, noqanchejpis juchanchejrayku ñak’arishasunman jinata.”

Munasqa Diosný, graciasta qoyki Evangelioykimanta. Jesucristoj sutimpi. Amén.

“Diospa wawan kajqa mana juchapi kawsanchu, imaraykuchus paypeqa Diospa kawsaynin kashan. Diospa wawan kasqanraykutaj, manaña juchapi kawsanmanchu.” (1 Juan 3:9)

Leypajqa wañusqas kanchej. Cristoj Evangelionejtataj kawsarichisqas kanchej, sumaj llimphu justicia p’achawan, wiñaypaj. Ajinata ari, librasqa kanchej juchamanta, jinallataj leymantapis. Sajra aychanchejpa munaynin noqanchejpi kashanraj chaypis, Diosqa manaña chaykunamantaqa cuentata mañawasunñachu. Diospa Qhasilla K’acha Yanapaynin khuyaynimpi kashanchej. Mana leyman jinañachu kawsashanchej, manachayqa Diospa Qhasilla K’acha Yanapayninman jina kawsashanchej. Arí, chay kashan Leypaj wañusqanchejqa, Cristopi kawasarimusqanchejrayku.

Chantapis, Leypaj wañusqa kanchej chayqa, wañusqallataj kanchej juchapajpis. Uj wañusqaqa mana ruwanñachu ni allin kajta, ni mana allin kajtapis. Pipisjuchaman urmaykuspaqa, ninamampis urmaykushanman jina kashan, usqhayllata llojsimun Jesucristoj kallpampi.

Cristopi kasqanchejrayku Paypa ruwasqallan noqanchijpeqa junt’asqa Diospajqa. Ajinamanta juchamantaqa kacharichisqaña kanchej. Chantapis Diospa t’aqasqa santos kanchej.

iChaymá kuseyqa! Chay jina jatun kawsaypi kasqanchejqa ancha kusiypuni. Chantapis, chay kawsaypi Leypa atiyenqa manaña atinchu Cristopi kajkunata juchachaytaqa. Imarayku? Imaraykuchus, cheqan runapaj qhawasqaña kanchej Diospa qhawaynimpi; chaytaj ajina, Diospa Churin Jesucristo cuentanchejpi castigasqa kasqanrayku.

iChaymá noqanchejpajqa jatun bendicion! Mosoj sonqota Cristopi cheqan espiritutawan jap’ikunchej. Ajina kajtenqa, imaraykutaj munasunman juchaj wata runan kaytarí? Juchataqa qhawananchej tiyan uj millay onqoyta jina. Astawan misk’i noqanchejpajqa kanqa Diospa t’aqasqa santo, cheqa sonqo, cheqampaj qhawasqa kaywan imaqa.

Dios Tatayku, maypichus Qampa munakuyniykej K’anchaynin mana kanchu, chaypeqa laqhayaylla, supaypa ñak’arichiynillan rikukun. Yanapawayku chaymanta K’anchaykiman llojsimuyta. Jesucristoj sutimpi. Amén.

Junio 13

“Chayrayku wañuchiychej ari qankunapi kaj kay pachaj sajra munayninta: Khuchichakuyta, millay ruwayta, sajra imasta munapayayta, sajra kajta moq’eyta, anchata qolqeta munapayayta ima; chayqa lantita yupaychaywan ninakun. Chay imasrayku Diospa k’ajaj phiñakuynin urmamonqa mana kasojkunaj patanman. Qankunapis, ñawpajta chay imasta ruwaspa kawsaj kankichej. Kunanrí, saqeychej kay tukuy imasta: Phiñakuyta, rabiakuyta, wajkunamanta sajra yuyayta, p’enqaypi rikhurichispa rimayta, millay parlaykunata ima. Amallataj purajmanta llullanakuychejchu...” (Colosenses 3:5-9)

Apóstol Pabloqa, k’amin: “Cristowan khuska kawsajkunata”, “Diospa ajllakusqasninta, Diospaj t’aqasqa santos kajkunata, ima.” Chay patapi nishan chay juchasta, kawsaynikumanta wijch’unankuta. Apóstol Pabloqa parlaykun imaynatachus Diospa t’aqasqa santo kaypi, Jesucristonijllata atinankupaj kawsayta. Nin, chay mana allin imasta paykunamanta wijch’unankuta.

iT’ukuna! Chaywampis cheqamanta Diospa wawsninqa, chay imasta mana ruwanankupaj k’aminarajchu kankuman? Yuyayninchejpi kanan tiyan Diospa wawasnin jinaqa mana ajinata kawsanapaj. Pantasunman chaypis, usqayllata Jesucristoman rina, perdonta jap’ikuspa mana juchaman urmanapajqa.

Kaypi rikushanki, cristianospa sajra aychankupi kashanraj tukuy laya pantaykuna. Noqanchejpi, chay mayqen juchamampis urmanapaj jinallataj kanchej. Arí, Luteropis Salmo 51 imanishanchus, chaymanta parlashaspa nerqa: “Wampu jina runaj yuyasqan kanman, pipis payllamanta llimphuman tukunanta, santoman tukunanta yuyaspaqa.... Chay yuyaykunawanqa ni pipis, mana pantaspaqa kayta atinchu,” nispa.

Dios Tatayku, willakuyki pisipaj qhawasqayta samarikuna p’unchaytaqa. Ajinallataj Qampa parlaykuwasqaykitapis manallataj jatumpaj qhawaspa jinanichu. Chaykunamanta llakisqa kashani. Mañakuyki perdonniykita. Jesucristoj sutimpi. Amén.

“Chayrayku wañuchiychej ari qankunapi kaj kay pacha sajra munayninta: Khuchichakuyta, millay ruwayta, sajra imasta munapayayta, sajra kajta moq’eyta; anchata qolqeta munapayayta ima, chayqa lantita yupaychaywan ninakun.” (Colosenses 3:5)

Kay juchasqa ancha uyarisqataj kashanku: Khuchichakuy, mich’a kay, imatapis mana sajsakuyta munapayaywan ima. Chay juchasqa, uj millay wayq’osta jina ruwan, Diosmanta karunchaspa; Señor Jesucristopi creeshaspa chay juchasmanta ayqespañaqa, watejmanta urmaykullankutaj, chaykunataj Diosmanta karuncha.

T’ukuna llakiy kashan, pikunachus chay: Khuchichakuy jucha, mayqentachus uj qhariwan uj warmiwan, manaraj casarashaspa puñuykakapunku. Chaytaj, chay runataqa, sonqo nanay llakiyman tanqaykun. Mich’a imatapis mana sajsakuyta munay juchatapis mana juchapaj jina qhawanku. Khuchichakuy juchatarí, tukuy juchasmanta aswan jatunta jina qhawanku. Tapujtimpis uya p’akipacha parlarinku kamachejkunaj qayllampeqa. Wakin kuterí pakaykunku ayllunku mana p’eqaypi rikhurinanrayku. Mich’as, imatapis mana sajsakuyta munay juchamantari, ninku: “Imatapis tantakunapuni noqallanchejpaj, chaywampuni kawsanchej”, nispa k’achanchaykunku.

Supayqa ajinata juchataqa k’achanchaykun. Ajinamanta runaj sonqonta thaluyachin, mana juchachu kasqanta yuyachispa. Ajinamanta khuchichakuy manapis juchachu kanman jina, runaj yuyaynimpi qhepakun, ajinamanta manapis millaychu kanman jina kasqampi kawsakapunku. Diospa wawasniqa sinch’itataj chay imasman tanqasqa rikhurinku, supay chaypiqa llank’arishan, imaynamanta chay juchaman tanqaykunampaj.

Manaraj urmashajtinrí, jucha kasqampi yachaspa mancharej kanku. Llamiykuspañarí, pisimanta pisi sonqoqa thaluyapun. Chayrayku allintapuni qhawakuy ajina juchaman mana urmanaykipaj. Ayqey Jesucristoj yanapayninman chay millay juchamanta kacharichikunaykipaj. Dios Taj Palabran, nin: “Paña ñawiyki juchaman urmachinayasojtenqa, sik’ispa wijchuy, imaraykuchus aswan allin kanqa uj ñawillayki chinkanan, tukuy cuerpoyki nina larway infiernoman wijch’usqa kananmantaqa...” (Mateo 5:29).

Tukuy imapis Señorninchej Jesucristowanqa allimpuni kanqa; chaywampis sichus ujchhikanta Paymanta karunchakunchej chayqa, jatun tentación jamuspa juchaman urmachiwasunpacha. Amapuni karunchakuychu Salvawajninchejmantaqa.

Dios Tatayku, waqaychaway chay juchasman urmaj jina kashajtiy, Qanllaman pusaway. Jesucristoj sutimpi. Amén.

Junio 15

“Manachu yachankichej cuerpoykichejqa, Espíritu Santoj Templon kasqanta? Payqa qankunapi kashan. Payta Dios qosonkichej, cuerpoykichejmantataj manaña dueñoschu kankichej. Diosqa preciowan rantikusorqachej. Chayrayku Diosta jatunchaychej cuerpoykichejwan.” (1 Corintios 6:19-20)

iYuyarikuy puni kay qhelqasqamantaqa! “Diosqa preciowan rantikusorqachej, nispa nin.” Chay precioqa, Jesucristoj yawarnin. “Manaña dueñoschu kankichej, nin” Chaytaj niyta munan, cuerponchejwanqa mana atinchejñachu munasqanchejta imatapis ruwaytaqa, nitaj yuyayninchejwan nillataj sonqonchejwampis ch’ichichakuytaqa. Jesuspi creespa salvasqa kasqanchejmantapacha, cuerponchejqa Espíritu Santoj Templon. Dios tiyakun noqanchejpi.

Kaykuna, amapis mana creena jinachu kashanman chaypis, Espíritu Santo qampi kawsashan chayqa, Pay songoykipi sut’inchana. Dios kasqampi creenki chayqa, chaytaqa Espíritu Santo, kawsayniyki rikuchishasunki. “Manachu yachankichej cuerpoykichejqa Espíritu Santoj Templon kasqanta? Payqa qankunapi kashan, nin.” Nishallantaj, pipis kay cuerpota thuñin chayqa, payta Dios thuñillanqataj, imaraykuchus cuerpoykichejqa Diospa Templon, nispa.

Diosqa sapa kuti juchasninchejmanta perdonawanchej ujtawampis juchallillanchejtaj, chaymantapis perdonallawanchejtaj, chaymá noqanchejpajqa mana creena jina. Ajina kajtenqa, ichus nishanki: “Kunanqa mana perdonawanqachu, kay juchay patapi saqerpariwanqa”, nispa. Chayqa mana jinachu. Diosman kutirikullay Pay khuyasonqa, perdonasonqa, chantá watejmanta Dioswan allimpi kawsakunaykipaj.

Maypachachus yuyayniykiman jucha jamun chayqa, qhaparikuy Jesucristo yanapasunanta, creellay puni Pay perdonasusqampi. Amataj mana allin imasta qanllamanta ruwaychu, Diosqa perdonallawanqa nispaqa.

Ujta nisqayki: Sichus tukuy laya juchawan muyurisqa kashanki chaypis, atinki qhawariyta Jesucristo supayta atipasqampi, Payman qhaparikuy khuyayninman ayqhekuspa, tukuy chay juchasmanta Salvasojniyki kallpanwan kacharichisunampaj.

Munasqa Dios Tatayku, tukuy wawasniykita perdonawayku, kallpachawaykutaj atipayta atinakupaj yuyayniykupi kaj juchasta. Jesucristoj sutimpi. Amén.

“Qankunaqa... p’achallikuychej: Khuyakuywan, k’acha kaywan, llamp’u sonqo kaywan, mana phiñakoj kaywan, pacienciawan ima.” (Colosenses 3:12)

iApóstol Pabloqa, may munakuywan yuyaychawanchej! Chay jina moq’enata jina nin, imaschus noqanchej kawsayninchejpi kanan, chayta.

Ichapis niwaj: “Tukuy chay imasqa apostolkunallapaj, Jesuspa maman Mariapaj karqa, mana tukuypajchu”, nispá. Ajinata rijch’awanchej chaypis Pabloj chay nisqanqa, iglesiapi kajkunapaj karqa. Chay Iglesia Colosaspi kajkuna ukhupi kasharqa chay khuchichakuykuna, paykunallapaj imatapis munajkuna imaqa. Sichus yuyasunman, paykunalla llimphu kawasniyoj santos kasqankuta chayqa, mana qhelqasta saqewasunmanchu karqa tukuy noqanchejpajqa, icharí? Chay k’amisqanqa noqanchejpi yachayta qowanchej, chay tukuy laya juchapi pejtusqa kashasqanchejmanta reparakunapaj.

Umanchejpi kanan tiyan: Evangelio yachachiwasqanchejman jinaqa, salvasqa kananchejpajqa mana noqanchejpa ganakusqanchejchu kasqanta. Cheqan runapaj Dios qhawawasqanchejqa Diospa ruwasqan, uj k’ata Churin Jesucristoraykulla chay Cheqan kayninta qowanchej noqanchejmanqa.

Kunan p’unchaykunapi, runaqa uyanman churakun uj mascarata jina, cristiano kani nispá. Paypa cheqa kaj uyanta wajkuna mana rikunankuta munaspa, imaynachus kasqankuta mana yachanankupaj; ajinallataj, wakin runakunaqa mayta runaykachanku, noqaqa llamp’u sonqo kani, nispá. Chayqa llakiy, cristiano kani nispá runaj rikunallankuta ruwayqa.

Yuyayninchejpi manapuni sumajta jap’inchejchu Jesucristo preciowan rantiwasqanchejtaqa, Paypa Simi Nisqampipis mana atienekunchejchu. Ajina kajtintaj, patamantaj uramantaj mana ñanta tarispa musphaykachanchej. Manallataj entiendeyta atinchejchu, Cristopi atienikuspalla Diosqa cheqan runapaj qhawawasqanchejtapis. Ajina kajtenqa, qallarínchej noqallanchejmanta jatuchej ruwaykunata (Obrasta) ruwayta, salvasqa kayta munaspa.

Diosqa niwanchej tukuy juchasapas kasqanchejta, mana kanchu ni ujpis allin imasta ruwajqa; chayrayku, cheqan runapaj qhawasqa kanapajqa, Jesucristolla salvawajninchejqa.

Dios Tatayku, waqaychawayku mana allinta yachachejkunamanta. Cheqanta yachachejkunatataj kachamuwayku. Chayta mañakuyku Jesucristoj sutimpi. Amén.

Junio 17

“... Payqa (Cristoqa), uj kuti jaywasqallanwan Diospaj t’aqasqa kajkunata cheqan runasta ruwan...” (Hebreos 10:14)

Cruzpi chakatasqa wañusqanwan Jesucristoqa Diospaj t’aqawanchej: “Uj kutillata wiñaypaj kawsayninta jucharayku jaywaytawan, Diospa pañanman tiyaykukorqa,” nispa nin. (Hebreos 10:12). Chaymantapachataj Diospaj t’aqasqa santo kayninchejqqa Jesucristollapi tarikun. Espíritu Santotaj, noqanchejpeqa ruwashallampuni kunankamapis, kay pachamanta ripunanchejkama.

“Manaraj kay pacha ruwasqa kashantin, Diosqa ajllakuwarqanchej Cristopi,” nispa nin. (Efesios 1:4). Chayraykumari, tukuy chimpanchej Cristomanqa perdonninta mañakuspa, chanta salvanawanchejta ima mañakuspaqa; Tata Diostaj mana qhesachawanchejchu uj k’ata Churinta munakusqanrayku, may jina juchasniyoj kasunman chaypis Payqa perdonawasumpuni.

Diosqa jap’ikapuwanchej munakuwanchej ima, mana imata ruwasqanchejraykuchu, manachayqa Jesucristo noqanchejpaj ruwasqanraykulla. Chayraykutaj noqanchejqqa ruwananchej imachus Tata Diospa nisqanta. Imataj chay kashan? Paypa Churimpa ruwasqampi atienikusqanchej.

Yachanchej jina, Señorninchej Jesucristoqa ruwananchejta junt’an; chay ruwasqannejtataj Diosqa t’aqawanchej Payllapaj santos kananchejpaj. Uj kutillata cruzpi wañusqanwan noqanchejpajqa jatun perdonta tarin, salvasqa kananchejpajqa. Chayta mana creenchejchu, nitaj chayta parlarinchejchu chayqa, Paypa sonqonta nanachinchej. Chaypi tukuy sonqo creenanchejta munan Chhika munakoj Diosninchejqqa.

Uj kutipi Martin Lutero, nerqa: “Pichus juchasninta willakuspa creene nin, ajinata nishaspataj juchasninta qhawarispas, reparanman jatuchej mana perdonanapaj jina kasqanta. Nillanmantaj: Noqaqa mana creenichu Cristo noqarayku wañusqampi, ni juchasniymanta pagasqantapis, Evangelipipis mana creenichu, nispa ninman chayqa. Chay runaqa Diosmanta karupi juchasnin q’eperisqa kakushan, mana kachariyta munaspa.” Qanrí imaninkitaj?

Janajpachapi kashaj Diosniyku, tukuyniykuman qowayku Qhasilla K’acha Yanapayniykita. Tukuy sonqo niyku: Gracias Señor, chay jinatapuni munakuwasqaykumanta, Jesucristoj sutimpi. Amén.

“... Kay imaswan p’achawan jina p’achallikuychej: Khuyakuywan, k’acha kaywan, llamp’u sonqo kaywan, mana phiñakoj kaywan, pacienciawan ima.” (Colosenses 3:12)

Diospa chajrampeqa (Iglesiapeqa), tukuy laya yuyaykuna tiyan. Wakinkunaqa ninku: Diospa reinonqa, espirtual kawsaylla kasqanta, jinaqa runaj soqollampi imapis ruwasqa kashan, mana imananchu cuerponchejwan imatapis ruwasqanchejqa, nispa ninku; mana imananchu imaynatapis kawsakusqanchejqa, nispa. Ajina yuyayqa iancha pantasqataj kashani Salvawajninchejtaj kay jinata nin: “K’anchayniykichejqa k’anchachun runaspa ñawpaqempi, paykuna allin ruwasqasniykichejta rikuspa, janaj pachapi kashaj Tataykichejta jatunchanankupaj,” nispa. (Mateo 5:16).

Kay pachapeqa, imaymana tentaciones jamun, Cristoj k’anchayninta pakaypi jap’inapajqa. Cristoqa nin: “Pillapis k’anchata jap’ichispaqa, pataman churan wasipi tukuy kajkunata k’anchanampaj,” nin. (Mateo 5:15). Chayraykumari munan Paywan p’achallisqa kananchejta, imaraykuchus Cristo qowasqanchej munakuy p’achawan k’anchananchejpajqa.

Apóstol Pabloqa, waj qhelqasqampi nillantaj: “Wajyasqa karaqankichej, imaynachus purina kasqanman jina purinaykichejta. Llamp’u sonqo kaywan, k’umuykukuywantaj purajmanta paciencianakuspa, munakuypi kawsakuychej,” nispa (Efesios 4:1-2). “imaynachus purina kasqanman jina purinaykichejta,” nispa nin.

Mana salvasqa kajkunapajqa imapis allillan, Salvasqa kajpajtaj chejnikuypi kawsanaqa mana allinchu; chayrayku noqanchejqa mana kay pacha mana allin kawsayman jina kawsanachu kashan. (kay pachapeqa mana “paykuna jina kawsanapajchu” kanan tiyan).

Tukuy tatas munanchejpuni, wawasninchejqa sumaj p’achallisqa kanankutaqa. Janaj pachapi kashaj Tatanchejpis, kikillantataj munan allin p’achallisqa kananchejta. Mana imapis kachunta kawsanapaj, nitaj mundo runas jina kawsanapajchu.

¡Ay Señor! Jatunmanta graciasta qoyki, cuerpoyta almayta munasqaykiman jina kawsachiwasqaykimanta. Supayqa munashan t’ustiwayta. Chaywampis qanllapaj kawsakuyta yachachiway. Jesucristoj sutimpi. Amén.

Junio 19

“... Munakuywan p’achawan jina p’achallikuychej, imaraykuchus munakoyqa chay tukuyinta ujllaman sumajta tukuchin.” (Colosenses 3:14)

Kaykamaqa, ichus ashkha kutitaña ninchej kikillantapuni. Kunampiri nishan: “Munakuywan p’achawan jina p’achallikuychej,” nispa. Ajinata nispaqa nishan, Espíritu Santo uj poqoyta jina noqanchejman qowanchej munakuywan kawasayninchejpi kawsanapaj.

Apóstol Pabloqa, nillantaj: “Imaraykuchus runa masinta munakojqa, ñapis leyta junt’anña,” nispa. (Romanos 13:8). “Munakuyniyoj runaqa mana ruwanchu mana allin kajtaqa, nitayllapajchu imatapis mask’an,” nin. (1 Corintios 13:5-6). Cheqa munakoyqa runa masipurata sumajta ujchan. Munakoyqa allimpi kawasachin runa masipurata, mana karunchanachinchu.

Munakuyniyoj runaqa pacienciayoj, k’acha, mana envidiakunchu, nitaj may kasqanta yuyakunchu, nillataj jatunchakunchu. Munakuyniyoj runaqa, mana allin kajtaqa mana ruwanqachu, nitaj payllapajchu imatapis mask’anqachu, nitaj usqhayllata phiñakunqachu. Chaytaqa rijch’anachisunman perlasman collarwan k’achanchasqata jina; chay collarqa karuman llhipipirin, astawanqa k’achanchan Jesucristoj qosqan p’acha. Arí, munakoyqa k’acha runasman tukuchiwanchej. Imayna Diospa wawantaj qan kanki? K’acha sonqoyojchu?

Casarakujpaj Cristoj qosqan p’achaqa, “mana k’usuyoj (mana ch’uñuyasqa), mana ch’ichiyoj.” Diospa rikuynimpi cheqan runapaj qhawawasqanchejqa, ajina kashan chay p’achaqa. Chay p’achari sumaj rit’isito Diospa Corderompa yawarnimpi t’ajsasqa: “Cristopi tukuy bautisasqa kajkunaqa, Cristomanta p’achallisqa kankichej,” nispa nin Pabloqa. (Gálatas 3:27)

Jatunchasqa kay Dios Tatayku, kawsayta qowarqanki tataynejta mamaynejta paqarichispa. Paykuna uywakuwarqanku mikhuchiwaspa, p’achallichiwaspas, tukuy imata yachachiwaspa ima. Chaymanta graciasta qoyki. Jesucristoj sutimpi. Amén.

“Ujkuna ujkunawan pacienakuspa purajmanta perdonanakuychej, sichus pipis wajpa contrampi imatapis ruwan chayqa, imaynatachus Cristoqa juchasninkichejta perdonarqa, ajinallataj qankunapis ujkunata perdonaychej.” (Colosenses 3:13)

iChayman jinachus kawsakusunman chayqa, kay pachaqa uj k’acha Paraiso jina kanman! Tukuy ayllu uj sonqolla, wasimasinchejqa tukuywan uj yuyaylla kawsakusunman. Chaychu mana Paraiso jina kanman?

Dios Tatanchejpi yuyanчей chayqa, aswan t’ukuna kashan. Payqa chay jina jatun sonqoyoj noqanchejpajqa. Payqa, munakuynimpi khuyakuynimpi, kutin kutinta juchasninchejta perdonawanchej. Paypa sonqonta nanachinchej mana kasukoj kasqanchejwan, jinallataj Paypaj q’aymalla kanchej, mana munakuyniyoj kaspaqa; ajina kashaspa perdonninta mañakunchej chayqa perdonawanchejpuni. Ajinallataj noqanchejpis juchallikuwajninchejtaqa perdonanapunі, chaypi Tata Diosman rijch’akuyta atisunchej.

Chayrayku Señorninchej Jesucristoqa, Diosmanta mañakuyta yachachiwanchej, kay jinata nispа: “Janaj Pachapi kashaj Tatayku, ... juchasniykuta pampachapuguayku, imaynatachus noqaykupis contraykupi juchallikojkunata perdonayku, ajinata,” nispа. (Mateo 6:9-13). Diosqa Palabrampi tukuynejpi parlan Dios perdonawasqanchejtaqa. Paypis munan noqanchejpis ajinallataj perdonananchejta. Manachus perdonasun chayqa, manallataj perdonawasunchu juchasninchejmantaqa.

Cheqamanta mancharikunanchej mana perdonayta atisqanchejmantaqa; imaraykuchus, may chhika juchasninchejmanta Diosqa perdonawanchej. Jinallataj kusikunanchej Diosqa noqanchejta perdonawasqanchejmanta.

Perdonayta mana atina jinallachu, pikunachus noqanchejwan sajrata ruwajkunataqa. Chaypi rikunchej, Diosqa may jina munakuyniyoj kasqampi. Mana noqanchej jinachu, phiñakullan mana perdonayta atispaqa. Imayna laya perdontaj kanman k’achas kajkunallata perdonayri? Noqanchejta Dios perdonawanchej k’achas kasqanchejraykullachu? Mana. Icharí?

Dios Tatayku, graciasta qoyki tataymanta mamaymanta, paykuna makisniykiman churani, kallpachay Tatay kawsayninkupi. Jesucristoj sutimpi. Amén.

Junio 21

**“Pichus pisi imaspi maychus kajta ruwan, chay runaqa ashkha imaspi
maychus kajta ruwallanqataj...”** (Lucas 16:10)

Imata kunan ruwanayki kashan chayqa, ruwaypuni mayk'ajchus ruwanayki karqa chaypacha. Ama q'ayapaj jalch'akuychu, nitaj pitapis ch'awkiyaychu q'aya ruwarqollasaj nispaga, ichus ajinata nispaga ni jayk'aj ruwankichu; ajina kanaqa mana allinchu. Sichus kunan ruwanayki karqa chayta kunanpacha ruwanki chayqa, sumaj runa kayman chayanki.

Ashkha ruwanayoj kani, nispalla kanki manataj ujkama ruwaj wakinkichu chayqa, q'ayaqa mana atinkichu. Ajina kaspaqa, piwampis parlasqallayki rikukunman, manataj nisqaykita junt'ajchu kawaj. Apostol Pablo, nin: “Tiempo kashajtillanraj, allin katja ruwaychej, imaraykuchus kunan p'unchaykunaqa mana allinchu,” nispá. (Efesios 5:16).

Diosqa, makinchejman churan Evangeliota unanchaspa kallpachanawanchejpaj; jinallataj qowanchej “atiyta ruwanapaj.” Sapa p'unchay ima ruwanachus rikhuriwanchej chayta ruwaypaj. Kunampis ichus ima ruwanayki kashan, ruway, Dios yanapasonqa. Pikunachus tiempunkuta usuchejkunaqa, ni jayk'aj atinqankuchu tiempompi allinta ruwaytaqa.

Qhella kaywan atipachikuspaqa manapuni junt'ayta atisunmanchu ni ima yuyasqanchejtapis. Astawampis puriykachakuyllaman qokusunman.

Ajina runaqa, imachus munasqanta mana tariyta atej, ni imayoj kanqa. Imarayku? Imachus kunan ruwananta mana ruwasqanrayku.

*Dios Tatayku, yuyayta qoway, imapajchus kay pachaman churawarqanki
chayta ruwanaypaj. Jesucristoj sutimpi. Amén.*

“Cristomanta jamoj sonqo tiyaykoyqa, sonqoykichejpi nichun imatachus ruwanaykichejta...” (Colosenses 3:15)

Ancha sumajtaj Dioswan alliyakusqa kayqa; jinallataj, tukuy tiempopi Salvawajninchejpi atienikuypis k'achapuni. Chantapis, juchachakusqanchejta manaña k'ullukuspa perdonasqa kayqa, sonqonchejman churan wiñay kawsayniyoj kasqanchejta.

Sonqo tiyaykuyqa, Diospa qosqan kashan, chaytaj cristianopeqa ujnin poqoy kashan. Kawsayninchejpi mana sonqo tiyaykuy kajtenqa, sonqonchej yuyayninchej imapis, leypa mat'iykusqallan rikhurinman; imatapis ruwasqallanchejwan (buenas obras) Diosman chimpakuyta munasunman, chay ruwayqa yanqhalla kanman, astawan phutiyman urmasunman.

Cheqamanta Diospaj t'aqasqa santo kaypis Diosmanta Jesucristonejta, ajinamanta sonqonchejta tiyaykuchiwanchej; Pay sonqonchejpi kawsakun chayqa, kawsayninchejpiqa kusikuy tiyan, ajinamanta kay pachapeqa k'acha kawsayman churawanchej. Maypichus kashan waqay, Dios yanapaspa kusichiwanchej: “Diospa reinonmanta parlaspaga, mana mikhunamantachu nitaj uyanamantachu parlashanchej, manachayqa cheqan kaymanta, sonqo tiyaykuymanta, Espíriyu Santopi kusiymantawan,” nispa nin. (Romanos 14:17).

Ajina kajtenqa, imaraykutaj chay sonqo tiyaykusqa kayqa, ancha maylla rikhurin noqanchej ukhupirí? Kaytaqa parlashani salvasqa kajkunaman, Evangeliopí creejkunaman, sonto tiyaykusqa kajkunaman. Imarayku? Imaraykuchus Diospa wawan kashaspa karunchakusqankurayku.

Arí, Diospa salvasqasnin kajkunapis chay jinaman chayaytaqa atinchej. Sitajchus Cristo qhawarisqallapuni kashanchej, payllapipuni sonqonchejta churasun chayqa, jinallataj Paypa Simi Nisqallampipuni atienekushanchej chayqa, mana mancharishasunchu imamantapis. Nisuntaj: “Qanwan kaspaga, kay pachapi mana imatawampis munaniñachu,” nispa. (Salmos 73:25-26). Ajinamanta sonqoyqa tiyaykullanqa.

Gracias Dios Tatayku munakuyniykimanta, yanapawayku yachachiwaykutaj wawasniyki jinapuni kanaykupaj. Jesucristoj sutimpi. Amén.

Junio 23

“Ajinaqa uyarisqannejta runaman chay creeyqa jamun, uyarisqantaj Cristoj parlabrannejta jamun.” (Romanos 10:17)

Diospa qosqan sonqo tiyaykuy, uj cristianoj kawsaynimpi mana kashanchu chayqa, tukuy imapis mana ruway atina jina kanqa. Ajina kajtenqa kayman jaqayman ni imanayta atispa thamaykachachiwanchej. Ajina kajtenqa, Diosmanta mañakuy kallpata feneykiman (creeyniykiman) yapasunanta. Chaytaqa qowanchej Paypa Simi Nisqannejta, Evangelionejta, Diospa munakuynintaqa.

Ñawisninchej kicharikuspa jinan, cheqamantapuni atinchej rikuyta Diospa munakuynintaqa. Evangelioj nisqanta uyarispa entiendespataj jap'inchej sonqo tiyakuytaqa. Chaytari, runa jinaqa mana atinchejchu junt'asqata entiendiytaqa.

Pikunachus mana segurochu kanku Salvasqa kasqankupi, cheqamantapunichus Diosman kutirikorqanku manachus chayta, chayrí ichus iskayrayashankuraj imaraj faltasqanta yuyaspa chayqa, uyarichunku imaninchus Dios, chayta: “Diospa contrampi kashasparaj, noqanchejqa Churimpa wañuyninnejta Dioswan allinyachisqa karqanchej,” nispa. (Romanos 5:10). Arí; Dios allinyakorqa noqanchejwanqa, mana juchanchejmanta sonqonchejta nanachikusqanchejraykullachu, nitaj Payman kutirikusqanchejraykullachu, manachayqa munasqa Churin noqanchejrayku wañusqanrayku.

Sichus creenki tukuy sonqo Cristo qanrayku wañusqampi, chayraykutaj Diosqa manaña phiñasqa kasqanta chayqa, may jina juchasapapis kay, perdonasqapuni kanki; ajinamantataj Diosmanta jap'ikunki chay sonqo tiyaykusqa kaytaqa.

“Uj runaj (Adánrayku) juchanraykulla tukuy runas juchasapas kanku. Ajinallataj Jesucristoj cheqan ruwasqanqa tukuy runasta juchachasqa kaymanta kacharichin, kawsaytataj qon,” nispa nin. (Romanos 5:18). Chayrayku Diosqa chay sonqo tiyaykuta qowanchej. Cristo qowanchej paypa **cheqan** kayninta, manari noqanchej cheqan runa kasqanchejraykuchu.

Janaj Pachapi kashaj Tatayku, gracias juchaykuta perdonawasqaykumanta. Jesucristoj sutimpi. Amén.

“Jucharí, leymana valekuspa, tukuy imaymana munapayayta noqapi rijch’aricherqa, imaraykuchus ley mana kajtenqa, juchaqa wañusqa jina.”
(Romanos 7:8)

“Nisqaña, pichus cheqan runa kayta munaj, Diosman k’askasqa kayta munajqa, ñawpajta juchasapa, mana cheqan runa kasqantaraj reparakunan tiyan,” nispa nerqa Luteroga. Chaytaqa mana niymanchu noqaqa, sonqoy k’uchupi jucha mana imata ruwaspa kashallan nispaqa. Chay k’uchumanta llojsimuspa reparachinawanraj tiyan, millay juachasapa kasqaytaqa.

Diospa Leeynin yuyayninchejpi rikhurispa rikuchiwanchej tiyan, Dios Tataj ñawpaqempeqa juchasapa kasqanchejta, chantaraj atisun niyta Pablo jina: “Nisunmanchu Leyqa jucha kasqanta? Ni imarayku. Noqaqa mana juchata rejsiymanchu karqa mana ley kajtenqa; manallataj yachaymanchu karqa imachus wajpa kapuyninta munapayayqa jucha kasqanta; manachus Ley ninman karqa: Ama wajpa kapuyninta munapayankichu, nispa chayqa. Jucharí Leyman valekuspa, tukuy imaymana munapayayta noqapi rijch’aricherqa, imaraykuchus ley mana kajtenqa, juchaqa wañusqa jina. Uj p’unchaypi kawsaj kani mana leyniyoj; Ley jamojtinrí, juchaqa kallpayoj jatarimorqa, noqataj wañusqa jina karqani. Chay Leyllataj, mayqenchus kawsayta qonawan karqa, noqapajqa wañuyta apamorqa. Juchaqa Leyman valekuspa, umayta muyuchiwarqa juchallinaypaj, chay Leynejtataj jucha wañuchiwarqa.” Nispa nin Apóstol Pabloqa. (Romanos 7:7-11).

Luteropis nillaraqataj: Diosqa munan: “wampusta yachayniyojman tukuchiya; sajra runasta cheqan runaman; juchasapasta santosman; supaypa makinmanta kacharichispa wawasninman tukuchispa,” nin. Umanchejpi jap’inanchej tiyan; uj kuti nin, uj runa, pay kikin supaypa makisninmanta kacharichikuyta munaspa, tukuy imata phirej churakusqa, manataj kacharichikuyta atisqachu. Chaymantaraj qhaparikusqa yanapata mask’aspa, Pichus jamorqa chay supaypa phiriyininta chinkachinamapaj, Jesucristo. Paylla junt’asqa kacharichisqa.

Arí, reparakunanchej tiyan pisi kallpas mana cheqanta ruwajkuna kasqanchejta; chanta yachananchej tiyan, Diosqa imayna kananchejtachus munan chayta. Dios Tataj ñawpaqempi imaynataj kanchej? Runa jinaqa, mana imatapis allinta ruwajkuna kanchej: wampus, llullas, puraj uyas, ima.

Dios Tatayku, gracias kamachisqasniykita qowasqaykumanta, jinallataj nacioniykupi kamachiykunamantapis, manachusqa aswan sajras kaykuman karqa. Jesucristoj sutimpi. Amén.

Junio 25

“Mana chayllachu; astawanqa kusikullanchejtaj llakiykunapi, yachaspa llakiykunaqa pacienciakuyta yachachiwasqanchejta. Pacienciaqa allin kasqanchejta yachachiwanchej, chaytaj atienekuspa suyakuyta yachachillawanchejtaj. Suyakuspaqa mana ch’awkiyasqachu kasunchej, imaraykuchus Diospa munakuynenqa, sonqonchejpi junt’a kashan Espiritu Santonejta, pitachus Dios qowarqanchej, chaynejta.” (Romanos 5:3-5)

iÑak’ariyqa noqanchejpi rikhurichin k’acha imasta! K’achito “perlasta” rejsijkuna ninku, chay sumach’aj perlasqa mana sano “ostras” nisqapichu ruwakun, manachayqa t’irisniyoj ostraspi ruwankun nin. Ajinallataj Espiritual kawsayninchejpipis, chay k’acha poqoykuna: pacienciayoj kay, suyakuy imaqa, nanaypi, ñak’ariypi ima rikhurin. Chay poqoyqa noqanchejpi mana ruwakunmanchu noqanchej parlasqanchejraykullaqa, ichapis nisunman ayunasqanchejraykulla nisunmanchu; manachayqa rikhurin llakiypi, nanaypi, waqaypi ima.

Mayqen cristianotaj mana munanmanchu pacienciayoj kayta? Suyakuyta yachayta ima? Tukuy munanchej chaytaqa. Diostaj uyariwanchej imatachus mañakusqanchejtaqa; Mana pacienciayoj kasqanchejta yachaspataj, Diosqa wakin kutiqa saqewanchej chay llakiykunasta pasananchejta, Payman chimpakuspa sonqo tiyaykuyta tarinanchejpajqa. Arí, llakiypuni yachachiwanchej pacienciakuytaqa, pruebas jamuwajtinchej yachanchej suyakuytaqa.

Wakin kuteqa, llakiykuna ancha jatun kaspera, atipaspa jinawanchej, jinapis yanapaqa chayamumpuni noqanchejmanqa. Wakin kuteqa, mañakusqanchejta jap’ispañapis mana atinchejchu sonqochakuyta. Chayta Hebreos 12:11, nin: “Mana mayqen castigopis chay ratoqa kusikunapajjinachu, manachayqa llakikunapajjina. Qhepamantajrí chay castigasqa kajkuna chaywan yachaqakuspa, allin kawsayta, cheqan kawsayta ima sumaj poqoyta jina oqharinku,” nispa.

Mayta ñak’arisqanchejpis mana imachu kashan, Janaj Pachapi Salvawajninchejwan wiñaypaj kusiypi kawsakamunamanta nisqaqa.

Dios Tatyku, P’enqakuni mana kasukoj kasqaymanta. Tatasniytapis mashkha kutis p’enqaypi rikhuricherqani. Tukuy juchasniymanta perdonaway. Jesucristoj sutimpi. Amén.

“... K’uchis kaychej tukuy sonqotaj Señorta sirvikuychej.” (Romanos 12:11)

Imataj kashan Señorta sirviy? Imata ruwasqanchejwantaj Payta kusichinchej? Paytaqakusichinujk’ata Churinmanrispa Paypanisqasninta kasuspa. Chaytaj niyta munan: Mana noqanchej munasqanchejta ruwaspachu servinchej, nitaj noqanchej ajllakusqanchijwanchu. Payta sirvinanchejpajqa, imatachus imaynatatajchus munan ruwananchejta, chayta ruwaspa.

Ichus ñawej rikusqanqa juch’uy imasta ruwaspa jinanchej, ima ruwasqapis allin ruwasqa chayqa, Dios Tataj ñawpaqempeqa jatuchej ruwasqa, imaraykuchus Paypa munasqanman ruwasqanchejrayku. Sichus yuyanchej may jina jatuchej imasta ruwasqanchejta yuyakunchej chayqa, Dios Tataj ñawpaqempeqa, juch’uysituman tukun. Imaraykuchus Payqa sonqonchejta qhawan.

Diosqa mana necesitanchu noqallanchejmanta imatapis ruwananchejtaqa, Payqa munan niwasqanchejta ruwananchejta Paypa yanapayninwan. Jatuchej imasta ruwasqanchej, juch’uy imasta ruwasqanchejpis Diospaj ruwanchej. Sichus Diospa munasqanta ruwanchej chayqa, Pay kikin yachachiwanchej yanapawanchej ima, aychaj munayninta atipaytapis. Chayrayku, maypichus, chanta imapichus sirvishanki Señorninchejta chayqa, ruwallaypuni, imaraykuchus Señorninchej chayman churasunki. Ajina ari, uj fabricapeqa mana necesitakunchu ashkha patroneslla kanankutaqa, chaypeqa kanallankutaj tiyan ashkha llank’ajkuna, chay juch’uypaj qhawasqapis kachun, chaypi churasqa kashanku sumajta ruwanankupaj.

Diospajqa, tukuy imamanta astawanqa, munan imatapis Paypaj jina junt’ananchejta aswan jatumpaj qhawan. Paypajqa, jatun imasta ruwasqanchej, juch’uy imasta ruwasqanchejpis kikillanpúni, imaraykuchus Paypaj jina ruwasqanchejrayku. Arí, ajinapuni, ima sonqowanchus imatapis ruwanchej, chay kashan ashkha valorniyojqa. Diospa Simi Nisqampi Jesús Nin: “Sichus pipis kay juch’uykunamanta ujninman, yachachisqay kasqanrayku uj vaso yakullatapis jaywarin chayqa, cheqatapuni niykichej t’inkayojpuni kananta,” nispa. (Mateo 10:42). Arí, jinaqa, uj vaso yakuta pimampis jaywarisqanchej, uj wasi ruwaypi yanapasqanchejpis, Diospaj jina ruwasqanchej valen.

Dios Tatayku, yachachiwayku kasukoj kayta. Astawampuneqa, uj k’ata Churiykej ruwasqampi samarikuyta yanapawaku. Jesucristoj sutimpi. Amén.

Junio 27

“Manachus castigasqa kawajchej chayqa, imaynatachus tukuypis castigasqa kanku, ajinata, uywasqaslla kawajchej, manataj wawasniypunichu.” (Hebreos 12:8)

Ima llakiy jamuwanchej, chaypi Dios yapawajtinchejqqa kusiy jamuwanchej, chayqa allimpuni noqanchejpajqa. Tukuy ima allillan mana ni ima llakiypis kajtinqa, Diostaqa manapis necesitasumanchu jina qhawanchej. Llakiy jamujtirí Diosmantaqa qhaparinkunchej. Chayrayku allinninchejpaj kashan, noqanchejman ima llakiy jamun chaypis; chay pruebasqa Diosman astawan k'askachiwanchej.

Chayamuwanchej imaymana uma nanay, ajina kajtinqa mana yachanchejchu imatachus ruwananchejta, chaymanta llojsiytapis mana atinchejchu. Ajinapi Diospa palabranqa, niwanchej: “Diosta munakojkunataqa tukuy ima allinninkupaj yanapasqanta, pikunatachus Dios wajyarqa pay wakichisqanman jina, chaykunata,” nispa. (Romanos 8:28). Chay tukuy imata yachaspaqa, Diospa wawan jinaqa Payllapi atienekunanchej tiyan.

Noqanchej kallpallanchejwan atisuman imatapis allinchayta chayqa, mana necesitasunmanchu Diostaqa. Ajina kajtinqa, imaynataj kanman Diosta yupaychayninchej? Kallpallanchejwanqa sayk'upusunman, kallpallanchejqqa astawan karunchakusunman Diosmanta. Mana ni ima allin riwajtinchejpis Diospajqa phiñasqalla kasunman. Ajina kajtinqa, mana valenmanchu Diospa Qhasilla K'acha Yanapayninga, nitaj perdonninpis. Chayraku Diosqa munakuynimpi jasut'in nanachin wawasnintaqa, Payman kutirichinampajqa. Chayrayku “allinninchejpaj” kashan ima nanay jamuwajtinchejpis, ima waqaypis. Kutirikujtinchejtaj Dioslataj sonqochawanchej.

Chayrayku nishan: Manachus castigasqa kawajchej chayqa, imaynatachus tukuypis castigasqa kanku ajinata uywasqaslla kawajchej, manataj wawasniypunichu, nispa nin. Chayrayku mana maynejpipis nishanchu, Paypa wawasnenqa jasut'ita mana necesitasqankutaqa. Wawan kasqanrayku Diosqa allin ñanman kutichiyta munan.

Apóstol Pedro, nillantaj: “Chayrayku, qankunaqa mayta kusikuychej, kunanqa yukuy imaymana llakiykunawan pisi tiempopaj ñak'arinaykichej kajtimpis,” nispa. (1 Pedro 1:6).

Dios Tatayku, aylluykuta allin kawsaypi pusariyta yanapawayku. Sonqo tiyaykusqa kawsakuyta yachachiwayku. Sutiyki jatunchasqa kanampaj. Jesucristoj sutimpi. Amén.

“Kusikuychejpuni Señorpi. Ujtawampis nillaykichejtaj: Kusikuychej, nispa.” (Filipenses 4:4)

Wiñaypaj salvasqa kayqa, jatun kusiya apamun Diospa salvasqan kajkunapajqa. May jina phutiypi kashaspapis, sonqonkupi kusiyninkuqa mana chinkanchu. Diostataj jatunchanku, yupaychanku ima.

Cheqamanta llakiykunaqa: nanayta, waqayta, ñak'ariyta, apamun. Diospa Palabrantaj chaykunamanta parlaspa kallpachawanchej yuyarichispa, unaypis ajinallataj Cristopi creejkuna ñak'arisqankuta. Chaywampis, chay ñak'arisqankoqa mana imachu karqa, Janaj Pachapi may kusiypi Salvajninchejwan kuska wiñaypaj kanamanta nisqaqa. (Romanos 8:18). Chayraykumari, may jina phutiypi kashaspapis, kusiqallapuni kananchej tiyan.

Maypachachus Dios samarichisunki chay llakiyniykimanta chayqa, graciasta qoypuni. Ima llakiypis nanaypis chayamusojtenqa, ama q'enaqakuspa sinch'ita sayay. Arí, ajina kay pacha kawsaypeqa mana uj runallapis mana ñak'ariyniyojqa kanchu.

Bibliapi rikunchej, Diospa wawasnenqa pasanchejpumi imaymana llakiytaqa. Mana munasunmanchu ima nanaypis, waqaypis chayamunawanchejtaqa, kay pachaman jucha yaykusqanraykuqa tukuypi imaymana phutiykuna tiyan. Mashkha kutistaj noqanchejqa chay llakiykunaman mana chayanapajqa, munanchej ashkha ruwaykunata noqallanchejmanta junt'ayta, ajinapis llakiyqa chayamuwanchejpuni. Chayta rikuspa, ninchejraj: Imaraykutaj Payta sirvishajtiy Diosqa mana jark'awanchu kay llakiykunamantari? Nispa.

Reparakuna ari, Atiyniyoj Diospa ñawpaqempi, pitaj kanchej noqanchejri chhika munakoj Diospaj rimanapajrí? Imaraykutaj mana munanchejchu, Dios jasut'ispa allin ñanman kutirichiyta munashawajtinchej?

Diosqa munakuynimpi ima pantasqaykimantapis seq'osunki wawan kasqaykirayku, Payman kutichisuyta munaspa; ajinata Jesucristoj khuyakuyninman rispa kusikuypuni. Chayta nishasunki Apóstol Pabloj siminnejta, jinallataj noqajniptapis.

Dios Tatayku, qanqa wawaykipaj rejsikapuwankiña. Chayrayku qanllataj sonqoyman churay munakuwasqaykita, chayta mañakuyki, Jesucristoj sutimpi. Amén.

Junio 29

“... Noqa tukuyta kamachej Tata Diosqa kawsayniyrayku juraspa nini: Mana munanichu juchasapa runa wañunanta, astawanqa munani sajra ruwanasninmanta kutirikamuspa kawsananta...” (Ezequiel 33:11)

Nínive llajta jinapis millay juchaswan p’ampasqa jina kashawaj, Dios juzgasunanpachapi. iQhawariy imachus pasarqa Nínive llajtawan! chayta. Dios willacherqa profeta Jonaswan chay llajta castigasqa kananta, sichus Diosman mana kutirikujtinkoqa. Chay llajtapi tiyakojkunari malayakorqanku juchallisqankumanta, Diosmantaj kutirikorqanku. Nerqanku: “Ichapis Dios jinamanta juchasninchejta pampachanman, k’ajaj phiñakuynintaj tiyaykunman, jinamanta mana wañusunchu,” nispa. (Jonas 3:9).

Diosqa, pichus juchachakojta castigan, arrepientekunanta munaspa. K’umuykuspa Payman kutirikojtintaj, perdonan.

Layqa runa Simónpis, Pedroj parlasqanta uyarerqa. Pedro payta nerqa: “Qolqeyki qanwan khuska ukhu pacha infiernoman richun, Diospa qhasi qosqanta qolqewan rantiyta munasqaykirayku... Chay juchaykimanta Diosman kutirikuy, Señormanta mañakuspa; ichapis sonqoykipi sajra yuyayniykimanta perdonasonqa. Noqa rikuyki envidiawan junt’a kasqaykita, juchaj jarap’asqanraj,” nispa.” (Hechos 8:20,22-23). Arí, Diospa Qhasilla K’acha Yanapayninnejtaj paypajpis kallarqataj perdón.

Laodicea llajtapi kaj iglesiaman Cristo sinch’i parlaykunawan nerqa: “Q’oñiyasqalla kanki, mana chirichu, nitaj ruphachu. Chayrayku simiyanta ajtumusqayki,” nispa. (Apocalipsis 3:16). “Noqaqa tukuy munakusqasniyta k’amini, wanachinaypajtaj castigani. Tukuy sonqo kasuway, juchasniykimanatataj noqaman kutirikamuway,” nispa. (Apocalipsis 3:19).

Chay ñawirisqanchejqa yachachiwanchej Dios munakuwasqanchejta, chayraykutaj Payqa munampuni Paywan khuska kawsakunanchejta. Chayrayku mask’anachejpuni Diosninchejpaj perdonninta. Payman rejtinchajqa perdonawasun sonqochawasuntaj, munasqa Churin Jesucristonejta.

Diosniyku, kamachiwajniykuman rikuchiy imaynatachus allinta kamachinawayku kasqanta. Ama saqeychu, mana sonqoyoj kanankutaqa. Jesucristoj sutimpi. Amén.

“Sajra runaqa sajrata ruwallachunrajpuni; ch’ichi kawsayniyojqa ch’ichichakullachunraj. Cheqan runari, cheqan imasta ruwallachunraj, juchamanta t’aqasqataj juchamanta t’aqasqallapuni kachun. Ari, usqhayta jamushani t’inka aparisqa, sapa ujman maychus ruwasqanman jina qopunaypaj. Noqa tukuy imaspa qallariynin tukukuynintaj; ñawpaj kaj, qhepa kajtaj kani.” (Apocalipsis 22:11-13)

Mana cheqan runa kayta munajqa, jinallataj pichus Diospa Simi Nisqanta mana kasojqqa, nitaj juchanmantapis arrepientekuyta munajqa, juchan patapi kakuyta munajqa kakullachun. Ch’ichichasqa mana munanchu llimphuchasqa kayta, munasqanman jina kawsachun. Jesucristopi creespa salvasqa kajrî, cheqan kayta astawan mask’achun. Cristoj yawarninrayku Diospa t’aqasqa santo kajpis, santollapuni kachun. Tukuy wiñananku tiyan imachus munasqankupi: sajra kaypi, manachayrî allin kaypi. iSalvasqa kajqa wiñanampuni tiyan, allin kaypii

Qanqa Jesucristopi creespa Diosman kutirikusqaykirayku kusisqa kanki; laqhayaymanta, supaypa reinonmanta, Dios Tataj Reynunman apasqa kanki Churin Jesucristonejta. Juchasniykimantapis perdonasqa kanki. Janajpachapi Casarakupaj Jesucristoj qosqan p’achawan wakichisqa kanki. Cristoqa wawqeyki, paywan khuskataj Diospa herederon kanki. Espíritu Santoj Templon kanki, kay pachapiqa kachi kanki, chanta k’anchaytaj kanki. “Chay kapususqanta, allinta jap’iy, ama pipis pilluykita qhechusunampaj,” nispa nin. (Apocalipsis 3:11).

Diosman k’askasqa kajkunaqa, anchatataj kawsayninkuta Jesucristoman jaywakorqanku, atiyinwan mana juchaman urmanankupajqa. Bibliapi nin: “Maqanakupi sumajta tinkuni,” nispa. (2 Timoteo 4:7) Nishallantaj: “Ñawpajman rishallanipuni, maymanchus chayanay kashan, chayman chayanaykama,” nispa. (Filipenses 3:14) “K’ullku punkunejta yaykunaykichejpaj kallpakuychej,” nispa ima nin (Lucas 13:22-30); ashkhas chayninta yaykuyta munaqanku nitaj aterqankuchu.

“Munasqa hermanosnîy, sinch’ita sayaychej mana sayk’uspa, wiñaspapuni Serñorpa ruwaynimpî, imaraykuchus yachankichej Señorpa sutimpi ruwasqaykichejqa mana qhasipajchu kasqanta,” nispa nin. (1 Corintios 15:58).

Dios Tatayku, yachayta qowayku imatapis allinta ruwanaykupaj. Jesucristoj sutimpi. Amén.



Julio

*"Ama imamantapis phutikuychejchu, astawanqa
Diosmanta mañakuspaqa, imatachus
munasqaykichejta mañakuychej, tukuy imamanta
graciasta qospallapuni."* (Filipenses 4:6).

Julio 1

“... Wiñaychej Diospa Qhasilla K’acha Yanapaynimpi, jinallataj Salvawajninchej Señor Jesucristota rejsiypiwan...” (2 Pedro 3:18)

Reparanchej, rikunchejtaj wiñanapuni kasqanta niwasqanchejtaqa, chaywampis ichus unayña kikillampuni kashanchej, astawampis kasqanchejmantapis astawan uraman uraykuspa jinashanchej.

Uyariy apóstol Juan imatachus niwanchej chayta. Payqa nin: “Wiñaychej Diospa Qhasilla K’acha Yanapaynimpi, jinallataj Salvawajninchej Jesucristota rejsiypiwan,” nispa. Diospa Qhasilla K’acha Yanapaynin, Cristota rejsiypis sonqonchejpi kashan; chayraykutaj kallpanchej pisiyajtinqa Cristota rejsiyninchejpi yapakun. Paymanta kallpa noqanchejmanqa jamun.

Apóstol Pablopis, nillantaj: “... tukuy imapi wiñananchej tiyan Cristopi, imaraykuchus Paymin cuerpoq umanqa. Paymanta tukuy cuerpoqa allin wiñachisqa kashan. ... Ajinamanta imachus ruwananta junt’ajtin tukuy cuerpoqa, munakuypi wiñan tukuy yanapanakuspa” nispa nin. (Efesios 4:15-16). Allinta reparay, ajinamanta sapa uj imachus ruwananta junt’ajtin tukuy cuerpoqa munakuypi wiñan, purajmanta yanapanakuspa. Diospa Qhasilla K’acha yanapayninrayku sonqonchejpi wiñan munakuyqa, jinallataj kusikuypis.

Jinallataj Pabloqa nerqa kallasqankutataj pantasqata yachachejkunaqa. Paykunaqa ninku, santo kaypi wiñanapajqa creesqanchej femanta aswan sumajraj tiyan, nispa. Paykunaqa munanku waj sach’aspa ramasnimpa poqoyninkuta jap’ikuna nispa. Chay waj sach’aspa poqoyninta munapayaspa mikhuyqa, pantay ñanman tanqaykuwasunman. Chayrayku, chay yachachiynata uyarispa jap’ikoyqa iskayrayachillawanchej cheqan kaj yachachiymanta karunchaspa.

Chay cheqan yachachiypi kayta munaspaqa, Diosman kutirikuy Jesucristopi creespa, nisqanta uyarispataj, salvasqa kanaykipajqa. Ajinamantaraj recien munakuypi atinki cheqan yachachiya jap’ikuyta, ajinamanta wiñanaykipaj.

Munasqa Diosñiy, aylluykupi kajkunata cheqan kaj yachachiyllata jap’ikunaykupaj yanapawayku. Jesucristoj sutimpi. Amén.

“... Imaynatachus ramaqa sapallanmanta mana poqoyta atinchu, mana uva sach’api kaspaqa; ajinallatataj qankunapis mana atinkichejchu, manachus noqapi kawajchej chayqa. Noqa kani uva sach’aqa, qankunataj ramas kankichej. Pillapis noqapi kajqa, Noqataj paypi, chaymá ashkhata poqonqa...” (Juan 15:4-5)

Señorninchej Jesucristoqa, Pay kikin niwanchej: Wiñananchejqa Payllapipuni kasqanta. Chaypi yachakun Diospaj t’aqasqa santo kasqanchejqa, mana noqanchej munayninchejman jina ruwasqanchejraykuchu, manachayqa wiñanchejpuni Cristopi kasqanchejraykulla. Chayta ninchej: “Espiritoj poqoynin,” nispaga. (Galatas 5:22-23) Chaytaj ruwakun creesqanchejraykulla.

Diospa kamachisqanta kasunaponi tiyan, chay noqanchejtaqa kawsachiwasun allin poqoyniyojtaqa. Imaraykuchus Jesucristolla Dios Tataj ñawpaqempi junt’an wiñaypaj, paywan khuska kajtinchejqa, poqoyninchejqa k’achito rikukonqa. Imaraykuchus Diosqa astawan munan Uj k’ata Churimpi creesqanchejraykulla, sonqo junt’asqa kawsananchejta.

Diospaj t’aqasqa santo kaytaqa, cheqamanta Cristolla ruwan noqanchejpeqa. Chaytaj Paypi k’askasqa kasqanchejraykulla, ajinamanta parlawasqanta kosisqa uyarinchej, nisqasnintataj kasuspa. Ari, ajina kajtinga Pay kikin tukuy imapi wiñachiwanchej, manataj noqanchejpa yuyasqanchejman jinachu. Maypachachus sonqo tiyaykusqa, kusikuy, munakuytaj sonqonchejpi junt’a kashan chayqa, chaypi chay tukuy ima ruwakun.

Señorqa munan almanchej Paywan parlarikuyta yupaychayta ima, chaymantaraj allin imasta atisun ruwaytaqa, “chay buenas obras nisqataqa, Jesucristoj yanapaynillanwan junt’asunman.” Ima ñak’ariypis almanchijman jamun chayqa, chaypi Diosqa wiñachisun: llamp’u sonqo kaypi, allin yachaypi ima. Diosmantapuni jamun chay allin imasqa, mana noqanchejmantachu.

Wakin kutisqa, noqanchejpi Diospa ruwasqanqa mancharichiwanchej, manataj sut’ita reparanchejchu imapajchus chay imas noqanchejpi kasqantaqa. Chawampis Diosqa qowanchej allin imas kajtapuni noqanchej allinninchejpaj, uj k’ata Churinn Jesucristonejlata.

Munasqa Dios Tatayku, yachayta qoway, kallpata qoway; wasiypi, aylluy ukhupi allin kawsay kanampaj. Jesucristoj sutimpi. Amén.

Julio 3

“Payqa astawan, astawan kurajpaj qhawasqa kachun, noqatajri pisillapajña, nispa.” (Juan 3:30)

Simillawan jatunchakuspa nisqanchejqa, k’achitu uyarikuspa jinan; kawsayninchejpitaq mana jinachu kajtenqa, k’allku jina rikukun. “Noqa pisiyanay” nispaqa, niyta munan, Jesucristo noqanchejneyta jatunchasqa kanan tiyan. Jesucristo wiñanan noqanchejpi, noqanchejtaj pisiyananchej tiyan. Chaypi rikukun Jesucristo jatunchasqa kasqanqa.

Chayta wakin kuteqa mana entiendeyta atinchejchu: Diospa Simi Nisqanqa, niwanchej k’acha runa kananchejta Jesucristopi kawsakuspaqa. Noqanchejpi rikukunan tiyan Jesucristoj atiyin. Kunanqa yachashanchej astawan astawan llamp’u sonqo kayta; chaywampis Jesucristolla chay tukuy imataqa ruwanqa, noqallanchejmantaqa mana atina jina.

Imaynatataj k’acha imaspi wiñayta atisunman? Maypachachus noqanchejpi mana allin imas kashasqantaraj reparakuspa, chayta reparakuspataj atinchej rikuyta Jesucristoj yanapaynillanta. Ajinamanta Cristoqa rikukonqa aswan jatumpaj qhawaqa kawsayninchejpeqa. Ajinamanta, Diosqa makimpi jap’iwasun may munasqata, juchasninchejmanta kacharichispa.

Cristo wiñanampajqa kawsayninchejpi mana jatunchakunanchejchu tiyan, Jesucristolla jatun atiyniyoj qhawasqa kanan tiyan. Diospa Simi Nisqannejta ñawirispa atisun Cristota rejsiytaqa, chaymanta yachasun Señorninchej Jesucristolla atiyniyoj kasqantaqa. Ajinamanta yachasunchej noqanchej mana Cristowanqa mana imapis ruwayta atisqanchejta. Diospa Qhasilla K’acha Yanapaynin Salvawajninchej Jesucristopi kasqan sut’i rikukonqa.

Noqanchejpi ancha pisi kashan, Cristota rejsisqanchejqa. Maypachatajchus astawan astawan rejsisun, chaymantaraj jatunmanta munakuyta atisun.

Janaj Pachapi kashaj Tatayku, tukuy aylluy llamp’u sonqos kachunku. K’uchis kachunku qampa Simi Nisqayki Bibliata ñawinankupaj; ajinamanta Evangelioj nisqanta creenankupaj, kamachisqasniyta pisi kasunankupaj. Jesucristoj sutimpi. Amén.

“Payqa (Cristoqa) kikin Janaj Pachamampuni yaykorqa. Diospa ñawpaqempi rikhurispa noqanchejrayku.” (Hebreos 9:24)

Cristo manunchejta, ruwananchejtapis junt’arqa. Pikunachus chaykunata junt’ananchej karqa, chaykunata junt’aspa preciowan kacharichiwarqanchej. Paypa ruwasqanqa, noqanchejpis ruwashasunman jina kashan; ñak’arerqa noqanchejpis ñak’arisunman jina. Apóstol Pablopis nin: “Chantá chay chayamunan p’unchay junt’akujtin, Dios kachamorqa Churinta... leyta kasuspataj kawsanampaj,” nispa. (Gálatas 4:4).

Leypi, Diospa Justician imachus juchasapawan kananta nerqa, chay tukuyta junt’aspa Jesucristoqa Dios Tataman kutiporqa. Kunantaj, Janaj Pachapi imtataj ruwashan? Apostolqa nin, Salvawajninchej Dios Tataman jaywan imatachus noqanchejrayku ruwasqanta, ashkha preciowan rantiwasqanchejta rikuchispa. Chayrayku Dios Tataqa, sonqo junt’asqa kahan Cristowan.

Sumajta reparay Cristoqa noqanchejmanta kutikuspa kashan Janaj Pachapeqa. Allinta uyariy iNoqanchejrayku! nin. Noqanchejta ruwaj Diosqa rikun yachan Adanpa juchallisqanqa tukuyninchejpi kashasqanta; jinallatataj rikun yachan Cristo rantiwasqanchejta, preciowan (yawarninwan) rantiwasqanchejta. Dios Tataqa t’aqawanchej Jesucristo k’ata Churinnejlata. Chayrayku Salvawajninchejqqa, nin: “Paykunarayku noqa kikiyta qampaj t’aqakuni, paykunapis cheqa kajpi qampaj t’aqasqa kanankupaj,” nispa. (Juan 17:19-21).

Ajinata ari Kuraj kaj Sacerdotinchej (Jesucristo), Janaj Pachapi kashan. Chayraykutaj niyta atinchej: Jesucristoqa Janaj Pachapi kashan, imayna kasqanqa, ajinallataj noqanchejpis kananchejpaj. Lutero nerqa: “Noqanchej imaynachus kasqanchejqqa, Janaj pachapi kashan Cristowan,” nispa.

Dios Tatayku, ama saqeychu aylluykupi sajra kawsay kananta. Kay pacha kawsayniykupeqa Qampuni pusaykachawayku, Qampa Simi Nisqayki Bibliapi nisqaykiman jina. Jesucristoj sutimpi. Amén.

Julio 5

“Unaymantapacha creesqaykichejrayku, yachachejkunaña kanaykichej karqa. Kunantajrí watejmanta yachachinaraj kankichej, Diospa Palabranmanta qallariy yachachinasta. Qankunaqa wawas jinaman kutispa, lechellapajraj kankichej, mana khamuna mikhunapajrajchu. Pichus lechellawanraj kawsajqa wawallaraj kasqanrayku, mana yachanchu imachus Diospa cheqan kaj yachachiynin kasqanta.” (Hebreos 5:12-13)

Chayta qhelqaj apóstol, “leche” nispaqa, “khamuna mikhuy” nisqan imaqa, mana facilta entiendina jinachu kashan. Chayraykutaj chaytaqa, atisun entiendeyta, aswan jaqaynejkama ñawirispá.

Chay “leche” nispaqa, parlashan “Evangelio qallariypi uyarisqanchejmanta.” Señorman kawsayninchejta jaywaspa qallariypi “Diospa Palabranta leche ujyanata jinallaraj, pisimanta pisi jap’erqanchej” Chaykunataj kashan, “Señorninchej Jesucristoj yachachiykunasninta rejsiy.

“Khamuna mikhuy,” nisparí nishan. Aswan kallpitayojña noqanchejta wiñananchejpaj kasqanta, chayqa Evangeliopi imaschus pakasqa jinalla kasharqanku chaykuna noqanchejpíqa sut’inchakun. Mosoj cristianopajrí chaykunaqa mana entiendey atina jinaraj kanman. Imaynatachus Melquisedecmanta parlaspa, Kuraj kaj sacerdote jina Cristoj ruwanasninmanta pakasqa jinalla karqa ajinata nin. Chaypi nishan: “Diestaj payta kuraj kaj sacerdoteta suticharqa, Melquisedecpa t’aqanman jina,” nispa nin. Chayqa sumajta khamusparaj entiendinapaj jina kashan. Icharí?

Chay Hebreos nisqa runakunaqa mana entiendenankupaj jinallaraj karqanku. Chayraykutaj nerqa: “Qankunatajrí mana usqhayllata entiendeyta atinkichejchu. Unaymantapacha creesqaykichejrayku, yachachejkunaña kanaykichej karqa. kunantajrí watejmanta yachachinaraj kankichej, Diospa Palabranmanta qallariy yachachinasta. Qankunaqa wawas jinaman kutispa, lechellapajraj kankichej, mana khamuna mikhunapajrajchu,” nispa. (Hebreos 5:11-12).

“Leche” jina nispaqa, nishan qallariy yachachiyman. “juchasapasta Cristo wajyan, kusiyanaj pachapi uj juchasapa Diosman kutirikojtin,” Chaymanta parlashan. Chay yachachiykunaqa kashan wawapaj “leche” jinallaraj.

Noqanchejqa yachachinanchej tiyan kayta: “Chaywampis yachay imasmantapuni parlayku wiñasqa kajkuna ukhupi, mana kay pachaj yachayninmantachu nitaj kay pachapi kamachejkunaj yachayninmantachu,” nispa. (1 Corintios 2:6). Chaypi tukuy creyentes sumaj sayasqa kanankupaj.

Dios Tatayku, yachayta qoway ari, Palabraykej tukuy nisqanta entiendeyta atinaypaj. Jesucristoj sutimpi. Amén.

“Llakiy p’unchaypi wajyakuway; noqa librasqayki, qantaj jatunchawanki... Tukuy imata sutiypi mañakojtiykichejqa, Dios Tata qosonqachej.” (Salmo 50:15; Juan 16:23)

Chay jina munakuywan Señor wajyakushawajtinchejqqa, pipis kanmanchu Dios Tataman mana qhaparikoj, imachus allin kajta qonawanchejpaj?

Imamanta llakisqa kashaspapis mana atisunmanchu kuisqa kaytaqa. Chayrayku ama qonqanachu, Diosqa khuyakuyniyojpuni kasqampeqa, Payqa noqanchejwampuni kanqa sonqochanawanchejpaj, kallpachanawanchejpaj imaqa. Chayrayrayku, ajina llakiyninchejpi, Payman kayta nisunchej: “Qanqa niwanki: Llakiy p’unchaypi wajyakuway noqa librasqayki,” nispa. “Kunanqa allin llakisqa kashani. Qanman k’umuykamuni; yanapaway ari,” nispa.

Mashkha kutis chayamuwanchej jatuchej phutiylkuna. Ajinapi kashaspa, mana imanakuyta atishaspa, yuyarina ama qonqanachu chay “tukuy” imasta noqanchejman Dios niwasqanchejta: “Tukuy imata sutiypi mañakojtiykichejqa, Dios Tata qosonqachej,” nispa niwasqanchejta.

Sapa kuti llakiyninchejpi, atinchej ajinata Diosman chimpakuyta. Atillanchejtaj kay jinata niyta: “Khuyakuyta yachaj Tatayku, juchaman urmani; qanta phiñachiyki. Chaywampis, perdonaway munasqa Churiyki Jesuspa sutimpi, Qampa nisqaykiman jina,” nispa. Manachayqa atillawajtaj niyta: “Tatayku, ancha k’ullu wamputaj kani. Wañunaypaj, infiernopi q’olamunaypaj jina kani. Munasqa Churiyki Jesusucristoj sutimpi mañakuyki khuyayniykita; kay sajra sonqoyta qanman kutirichiy. Mana yachashanichu imaynatachus mañakusuytapis. Qan niwarqanki, imata mañakusojtiypis, uyarinawaykita,” nispa.

Chantapis, tukuy llakiyninchejpi atinchej niyta: “Tatáy, mana mañakusunaykupaj jinapischu kayku. Chaywampis khuyawayku ari Jesucristoj sutimpi, imaraykuchus qampuni niwayku: Llakiy p’unchaypi wajyakuway, noqa librasqayki, qantaj jatunchawanki, nispa. Tukuy imata sutiypi mañakojtiykichejqa, Dios Tata qosonqachej, nispa ima. Chayrayku kunan mañakuyku chay niwasqaykuta junt’anaykita,” nispa.

iAy Dios Tatayku! Yanapaway atipayta chay vengakuyta yuyasqayta. *Libraway envidiakuymanta. K’acha sonqota ruwaway. Jesucristoj sutimpi. Amén.*

Julio 7

“... Janaj Pachapi kashaj Tatayku...” (Mateo 6:9)

Chayqa kashan Diosmanta mañakuyta qallarinpaj; ajina mañakoyqa, ajinapuni mana ujwan kanchu. Chaytaqa kikin Señor Jesupuni yachachiwanchej, ajinata nispa mañakunataqa.

Ajinata mañakunaqa may jinata kusichiwanchej, songochawanchej, kallpachawanchej ima. Diosninchejmanrí astawampunichari kusichin, ajinata pipis mañakujtenqa. Cristoj yachachisqanta jina noqa mañakojtiyqa, Janaj Pachapi Dios Tatanchejqakusikuywan uyariwanchej, noqanchejwan khuskachakun. Ajinata mañakusaj chayqa, mana ni jayk’aj iskayrayasunchu, mañakusqayta munasqa Tatayqa, uyariwanqapuni.

Señortaqa, niyta atinchej: “Qampuni yachachiwanki ajinata mañakusunayta,” nispa. Mañakususpa kay jinata qallarispa: “Tatayku” nisapuni. Wawan kasqay mana creena jinapis kachun, nisajpuni: “Qan Tatayku kanki. Qanqa tukuy atinyioy Dios kanki, uj k’ata Churiykinejta chimpakamuni,” nispa.

Wakin kutiqa, juchasniy mana saqewanchu Diospa wawan kasqaypi yuyayta. Chaywampis, Paypuni yachachiwanchej ajinata mañakunanchejta, kay jinata nispa: “Qanman manu kasqaykuta perdonawayku Jesucristo Churiykinejta,” nispa. Chantapis, kay pachapeqa, mana noqallanchejchu juchamanta kacharichisqa kasqanchejpi yuyaspa songochakunchej. Jinallataj pipis juchallejtin Diosqa perdonaytapuni munan, chayraykutaj Payqa niwanchej ajinatapuni mañakunataqa.

Ajina kajtinga Dios Tatayku, chay niwasqayku noqaykupi junt’akuchun: “Janaj pachapi kashaj Tatayku, sutyki jatunchasqa kachun. Reinoyki jamuchun, munayniykitaj ruwasqa kachun, imaynatachus janaj pachapi, ajinallatataj kay pachapipis. Sapa p’unchay kunan t’antaykuta qowayku. Juchasniykuta pampachapuwayku, imaynatachus noqaykupis contraykupi juchallikojkunata perdonapuyku ajinata. Amataj saqeychu juchaman urmanaykuta, astawampis, jark’awayku sajramanta, imaraykuchus qampatamin reino, atiy, jatunchasqa kay ima, wiñaypa wiñayninkama. Ajina kachun,” nispa (Mateo 6:9-13).

Munasqa Dios Tatayku, qanqa munanki runa masiyta yanapanayta. Yananapawayari wasiyipi kajkunawan allimpi kawsakuyta. Jesucristoj sutimpi. Amén.

“Cheqamanta Tata Diospa makinqa, mana juch’uyyapunchu mana salvasuyta atinampaj, manataj ninrimpis joq’ariyapunchu mana uyarisuyta atinampajqa.” (Isaías 59:1)

May chhika runas, tukuy kawsayninkupi Diospa wawampuni kasqankuta tukuyman rikuchiyta munanku. Ajinapis wakinqa, iskay sonqolla imankupis nanashanman jinalla kanku; ichapis yuyanku ni jayk’aj kusiyaqa tarinankuta, manapis Diosqa allinchayta atinmanchu jina. Jesuspi chay creesqanku Fe, chinkaripushampis jina. Chay imaspi yuyasqankurayku llawch’iyanku manapis Diosniyojchu kankuman jina, manapis Salvajniyojchu kankuman jina. Ajinapi rikukuspa pantanku Dios saqerpayasqanta yuyaspa.

Diosqa nin: “Chaymanta libranaypaj makeyqa juch’uychu karqa?” nispa. (Isaías 50:2). Diospa wawan ajinapi rikhurinman chaypis, mana wiñaypajchu ajinallapipuni kanqa. Chaywampis mana yuyanachu Diospa wawanqa llakisqalla kanantaqa, chaypajqa mañakuna feninchejman Dios yapanawanchejpaj, ajinamanta creeninchej yapakunqa. Ajinamanta sut’ita qawasun uj maki pojtu y t’io jinalla imamanta llakiypis kay pacha kawsayninchejpi kasqanta, Janaj Pachapi jatun kusi y wiñaypaj kasqanmanta nisqaqa.

Chaywampis “Diospajqa mana imapis kanchu, allinchay mana atinaqa.” Diosqa, uj ñawich’irmiypi, tukuy chay llakiyta chinkachiyta atin. Sitajchus Diosqa mana munanchu chayta aallinchayta chayqa, noqanchej allinninchejpaj kanqa. Diosqa nin apóstol Pabloj siminneja: “Yachanchej, Diosta munakojkunataqa tukuy ima allinninkupaj yanapasqanta,” nispa. (Romanos 8:28).

Chaywampis, yuyarikunapuni ujta: Llakiykuna, phutiykunapis uj yanapa jina Diosta munakojkunapaj kashan.

iAy Diosniyku! Gracias kawsayniyta waqaychasqaykimanta. jinallataj ashkha runa masikunata kachamuwasqaykimanta noqata yanapanawankupaj; paykunatapis yanapallaytaj. Jesucristoj sutimpi. Amén.

Julio 9

“Pitaj Cristoj munakuyninmanta t’aqawasunrí? Ñak’ariychu, llakiychu, qhatiykachasqa kaychu, yaraqhaychu, p’achamanta pisi kaychu, wañuy patapi kaychu, chayrí wañuchisqa kaychu?... Ni wañuy, ni kawsaypis; ni ángeles, ni kurajkuna, nitaj atiyniyojkunapis; ni kaypi kaj, ni jamoj kajpis ...nitaj ima waj ruwasqa kajpis t’aqayta atiwusunmanchu Diospa munakuyninmanta mayqenchus Cristo Jesús Señorninchejpi kashan, chaymantaqa.” (Romanos 8:35,38-39)

Chay tukuyta apóstol Pabloqa kusiyan parlarin, ni uj chhikanta iskayrayaspa. Chaytataj yachanchej chay ñawpajsitullata, kay jinata nisqampi: “... Sichus Dios noqanchejman kutisqa kashan chayqa, pitaj contranchejpi sayayta atinmanrí?” nispa. (Romanos 8:31-34). Noqanchejman Dios kutisqa kashan chayqa, ni pí atipawasunchu imamantapis juchachaytaqa. Dios niwanchej juchamanta llimphuña kasqanchejta chayqa, ni supaypis atenqachu imamantapis ch’ataykuytaqa. Cristo cuentanchejpi wañurqa, Paytaj kunanqa kutikuwajninchejqa.

Chay yachachisqanta tukuychanampajtaj apóstol Pabloqa nerqa: Cristoqa tukuy paypa ruwasqan patapi atiyniyoj kasqanta. Jinallataj, Cristoqa noqanchejpaj Dios Tatamanta Janaj Pachapi mañapushawanchej.

Janaj Pachapi kashaj Dios Tatanchejqa, atin ima llakiyninchejtapis kusiyan tukuchiya. Ajina kajtinqa, ni ima, ni pi, mashkha atiniyoj kaspapis, Cristoj munakuyninmanta t’aqayta atiwusunchu. Diospa mayqen wawampis t’aqakuyta munan chayqa, pay munasqanrayku atinqa t’aqakuyta Cristomantaqa; imaynatachus Adánwan Evawan ruwarqanku ajinata.

Cheqamanta, mana ujpis, Diospa wawasnin kajkunamanta chinkanqachu Diospi kashanku chayqa, Paypa Simi Nisqanta kasuspa kawsakushanku chayqa, allimpi sonqo tiyaykuypi kawsakunqanku.

Munasqa Dios Tatayku, sajra kayniyta willakusqayki. Perdonaway munasqa Churiykej ruwasqanraykulla. Salvawajniyku Jesuspi creesqaykuta sinch’ichay, kamachisqasniykitapis kasuyta yachachiwayku. Jesucristoj sutimpi. Amén.

“Llakiy p’unchaypi wajyakuway; noqa librasqayki, qantaj jatunchawanki.”
(Salmos 50:15)

Diospa qowasqanchej chay fe pisiyapun chayqa, Dios niwanchej: Llakiy p’unchaypi wajyakuway noqa librasqayki, qantaj jatunchawanki nispa. Chayta Dios niwanchej jayk’ajchus llakiy iskayrayay kajpis chayamunawanchejta yachaspa.

Mashkha kuti rekunchej, Diosqa tukuy atiyniyojpuni kasqanta, yanapasqayki niwanchej chayqa yanapawanchejpuni. Ichus wakin kuteqa, mana chaypaj jinachu kasqanchejta yuyakuspa, pawisqa jina kashanchejpi tarikunchej. Ajina kajtenqa tapurikuna: Diosninchej imatataj nishawan? iTukuy ima noqaj allinniypaj niwanchej! Ajina kajtenqa imatataj munashan noqamanta? Nispa.

“Ajina kashan chaypis, jinapunichari kashampis. Noqaj juchayqa ancha jatun qhasillataña Diosmampis chimpayman,” nispa nishanki chayqa, uyariy Diospa nisasqanta: “Jamuychej kay imasmanta parlarisunchej. Juchasniykichejqa may jina pukapis kachunku, rit’i jina yuraj kanqanku; may jina kullipis kachunku, yuraj millma jina kanqanku,” nispa nishan, tukuy atiyniyoj Diosqa. (Isaías 1:18). Astawampis nin: “Noqa sajra ruwasqankuta pampachasaj, manañataj jayk’ajpis juchasninkumanta yuyarikusajchu,” nispa ima.

Mana paykunallachu ajina yuyaywan jap’ichikunku. Manachayqa, wajkunapis nillankutaj: “Noqaqa anchañapunitaj kani, juchaymanta mana castigasqa kanayllapichu llakikuni, astawampis kay juchay watasqata jina jap’inawanmanta, mancharisqa kashani,” nispa. Ari, Ajina kashanki chayqa, uyariy kayta: “Salvasojniyki Jesucristoqa, qan jina runaman tukorqa”. Yachan imaynachus kashanki chayta. kallpachasunampaj nisunki: “Noqa sajra ruwasqankuta pampachasaj, manañataj jayk’ajpis juchasninkumanta yuyarikusajchu,” nispa. (Jeremías 31:34).

Qanqa yuyay, chay nisqanqa qampaj nisqaykimanta astawan jatun kasqanta. Chayrayku niy kayjinata: Señorniy, yanapawaypuni nisqaykiman jina, nispa.

Dios Tatayku, yanapaway allin sonqo kayta, imatapis allinta ruwaj kanaypaj. Jesucristoj sutimpi. Amén.

Julio 11

“Kayqa tratomanta yawarniy, chaytaj jich’asqa kanqa ashkha runaspa juchasninku pampachasqa kanampaj.” (Mateo 26:28)

Chayqa Diospa Nisqampuni, chaytaj Bibliapi qhelqasqa kashan; chaytaj Medios de gracia nisqa kajkunamanta ujnin kaj kashan. Qheshwapeqa nisunmanchari “Chaynejta noqanchej runakunaqa imallapis qhasilla jap’ikunchej Jesucristoj ruwasqanraykulla”...

Diospa Simi Nisqan Bibliataqa ñawirinapuni tiyan, mana imata Diosman qonapajchu, nillataj allin runa kasqanchejta yuyakunapajchu. Manachayqa, sumaj imasta paymanta jap’inapaj. Chaykunaqa kashanku: Jesucristopi creesqanchej FE sinch’i kanampaj, pisi “kallpa” kajtinchej “Yanapa” kanampaj. Diosmanta mañakunapajpis sumaj “yuyaychay” kashan; jinallataj aswan allinta kawsakunapaj “yuyaychay” ima kashan.

Diospa wawan jina kawsakuyniykipi, tukuy imapis allillan kashanman chayqa, ajina kajtinga chay sumaj imasta Paymanta mana necesitanichu ni mayqen Medios de gracia tapis nispa niwaj. Yuyariypuni, Salvawajninchej Jesucristo, Dios Tataj rikuynimpi, Paylla noqanchej cuentanchejpi ruwarqa, Paylla cheqan runapaj rikhurichiwanchej. Jesucristopuni nerqa: “Sano kajkunaqa mana jampejta wajyanankuchu tiyan, manachayqa onqosqa kajkunalla,” nispa. (Mateo 9:12).

Pipis onqosqata rikuspa ninman, Doctor jampijta wajyamuna nispa. Chay onqosqataj ninman: “Amaraj kunanqa, mana allinchu kashani; tumpata kutirasajraj, chanta jampej medicojman risaj nispa.” Chayta uyarispataj, tukuy ninkuman uj kunkalla: “Mana allin kaspapuni, doctortaqa pipis wajyan ari,” nispa. Kikisitunta ruwayta munanku wakin creyentes cristianos kajkunapis: Santa Cenaman mana riymanchu. Juchallerqani, chayrayku ch’ichi kasqayta yuyakuni, nispa.

Jesusqa, chayrayku Sumaj Michejninchej jinaqa, astawampis qowanchej yanapanawanchejpaj, Santa Cenata, chay jina yuyaykuna chayamunawanchejta yachaspa, chaypi perdonanawanchejpaj.

DiosnÍy, yanapaway ari, munayniykitapuni imatapis ruwanaypaj. Jesucristoj sutimpi. Amén.

“... Kallpachakuychej Señorpi, jatun atiyinmpitaj.” (Efesios 6:10)

“Kallpachakuychej Señorpi, jatun atiyinmpitaj,” nispaga yachachiwanchej iskay imasta: Mana kallpanchejpichu atienekuna kasqanta, Diospi suyakuyninchejpis, mana qonqayman churasqa kananta ima.

Sichus ninki: “Tanqasqa kashani kayta, jaqayta ruwanaman. ... pisi kallpa kani. ... sajra imaspi yuyay noqapi aswan kallpayoj,” nispa. Faltashasunki qan kikiykita rejsikunayki qanllamanta mana kallpayoj kasqaykita; chaymantaraj yachanki kallpakusqaykeqa yanqhalla kasqanta. Chaymantaraj qhawarinki Diospa khuyaynillan qampaj atiyiniyoj kasqampi, ajinamanta Jesucristonejta atipayniykeqa kanqa.

Sitajchus nishanki: Noqallamanta kashan chay tentacionesta atipanaqa, nispa; ajinata qanllapi atienekunki chayqa, astawanraj ñak’ariyman tanqaykusqa kawaj. Qanllamantaqa mana chaykama kallpayoj kanki sinch’i tentacionesta atipanaykipajqa. Juchaman urmanamanta llusp’inaykipajqa Jesucristolla kallpanwan yanapasonqa. Chayrayku tentación, chayri ñak’ariy jamojtenqa, Diosman qhaparikuy yanapasunampaj. Diostaj uj k’ata Churinnejta cheqamanta qowasun chay jatun atiyinta, chaypacharaj atipasun chay tentacionestaqa.

Arí, Chay kallpaqa Diosllamanta jamun mana runamantachu. Juch’uy wawaqa, mamampa marq’ampi kaspera mana urmanchu, ajinallataj Diospa yanapaynimpis kashan. T’uruman jina urmaykuyqa ancha llakiypuni kashan, yanqhallata pipis kallparakunman kacharichikuyta munaspaqa; manachus usqhallata Diosman qhaparikusunman chayqa, chaypi wañusunman. Jesucristoman qhaparikunchej yanapata mañakuspa chayqa, Payqa munakuynimpi yanapawasun. Juchaman tanqajqa mana runallachu, mana reparaylla supay muyuykachashawanchej oqoykunawanchejpaj.

“Tata Diosqa cuentaykichejmanta maqanakonqa, qankunataj pachampi kakullaychej, nispa nerqa Moisesqa.” (Éxodo 14:14).

Janaj Pachapi kashaj Tatayku, feniykuta yapaspa sinch’ichay, jinallataj imaynachus allin kawsayniyoj kayta yachachiwayku. Jesucristoj sutimpi. Amén.

Julio 13

“Diospa qosqan maqanakuna p’achawan p’achallikuychej; kuraj supay urmachiyta munasojtiykichej, chaykunawan sinch’ita sayanaykichejpaj. Noqanchejqqa mana runaswanchu maqanakushanchej, manachayqa patapi kamachejkunaj contrampi, patapi atiyniyojkunaj contrampi, kay pachapi laqhayayta kamachejkunaj contrampi, patapi kaj sajra espírituspa contrampi ima.” (Efesios 6:11-12)

May sumajchus kanman, kay ñawirejkuna sumajta unancharinanku, jatuchaj enemigos muyuyninkupi kashasqanta yachanankupaj. Chaykunamantapis aswan yuyanaqa kashan, mashkha atiyniyoj jatuchaj enemigos qayllanchejpi kashanku. Jesucristowan kajtiykeqa mana ateqankuchu imanasuyta, Señorpata kasqaykirayku, ajina kanqa wiñaypaj.

Yachanayki tiyan, chay enemigoqa yachañña wiñay kawsayman rishasqaykita, chayraykutaj muyuykachashasunku ima ratopis phinkiykuspa misk’achisunampajpacha. Chaykunamanta aswan atiyniyoj enemigoqa sajra supay kashan. Atiyniyojpis kachun, mana ateqachu urmachisuyta, Sumaj Michejniykej qayllitampi kashanki chayqa.

Ichapis, tumpa tumpasta laq’aykachasonqa Dios saqejenqa. Ajinapi tarikuspaga yuyariypuni kay nisqanta: “Diosta manchachikojkunataqa tukuy ima allinninkupaj yanapasqanta,” nisqanta. (Romanos 8:28). Jinaqa, imapis kachun, Diosta sonqoykipi jatunchaspallapuni kawsakuy. Diosqa, ichus ajinamanta k’amiykusonga pantajtiykiqa; mana kasukunki chayqa, Diosqa ichus saquesunkiman ajinapi ñak’arinaykita, mana Payman usqayta kutirikunki chayqa. (Romanos 1:21; 2 Tesalonisenses 2:10-11).

Ajinata Diosqa kay pachapi pusaykachakuwanchej, waqaychawanchej, parlaykuwanchej, rijch’arichiwanchej, tukuy sajra kajmanta jark’awanchej, Sonqochaj Espiritunejta. Chaypajmari Diospa Simi Nisqanqa, mana sajk’uyta yachachiwanchej Dioswampuni kawsakunata, Paymanta mañakunata ima.

Chay tukuy qhawarisqanchejqqa, rikuchiwanchej kallpaqa Diosllamanta noqanchejman jamusqanta, manataj yuyanachu imapis noqallanchejmanta kasqantaqa.

Dios Tatayku, graciasta qoyki, juchallikojtiykama mana sapayta seqepuwasqaykimanta. Jesucristoj sutimpi. Amén.

“Chayrayku, Diospa qosqan maqanakuna tukuy p’achasta churakuychej, sajra p’unchaypi sinch’ita sayanaykichejpaj, mana ithirispa. Chantá kay tukuyta ruwaytawan. Sinch’i sayasqallapuni kankichej.” (Efesio 6:13)

Apostolpa nisqanta jap’ikuy. Payqa niwanchej: “Diospa qosqan p’achawan p’achallikuychej,” nispa. Tukuy cristianospata tiyan uj enemigon, chay enemigontaj mana ñawej rikusqallan atiyuniyoj, ch’awka, sajratay. Chaypajqa, “Diospa qosqan maqanaku p’achawan pa’allikuychej.” Arí, chayta nin apóstol Pabloqa; imaraykuchus Jesucristoj salvasqan runaqa, warmipis qharipis sinch’i maqanakupi kashanchej. Piwan? Chay supaywan. Chay p’achaqa mana mayqen p’achallachu, manachayqa “Diospa qosqan maqanakuna p’acha,” kashan.

Nin: “sajra p’unchaypi,” nispa. Kawsayninchejpeqa mana kkillampunichu sapa p’unchaypis. Uj p’unchay rikhurinchej may jina kusisqa, uj p’unchaytaj may jina llakisqa, may jina mancharisqa. Chay jinapi kashajtinchej, chay enemigoqa yuyayninchejpi qallarín ruwayta juchaman urmachinawanchejpaj.

Kunampi sonqoyki tiyaykusqa kashan chayqa, ama anchata umaykita oqharyichu, manachayqa allinta qhawakuy mana misk’anaykipaj, imaraykuchus sajra p’unchaykunaqa Janajpachaman ripunanchejkamaqa qhatiykachawasun. Mana yanqhallatachu nisunki: Chay p’unchay maqanakupaj, Diospa qosusqanwan sumaj p’achallisqa chay p’unchayta suyay nispapa. “Cheqan runachus ñak’ayllata salvakun chayqa, Diosta mana manchachikoj runas, juchasapaspis, imapitaj rikhurenqankurí?” nispa nin Apóstol Pedroqa. (1 Pedro 4:18). Pikunachus iskay sonqolla, puraj uya jina kajkunapaj, mana awantay atina jina jasut’i jamushan.

Señorniyku, llimphu sonqo kawsaypi purichiway ari. Jesucristoj sutimpi. Amén.

Julio 15

“Sumajta sayaychej ari, ñaño wasaykichejta cheqa kajwan, chumpiwan jina mat’ita chumpikuspa...” (Efesios 6:14)

Jaqay tiempopi maqanakuman yaykunankupaj soldadosqa “capasninkuta” cinturankuman wak’ikoj kanku. Jinallataj p’alta chumpis fierroswan chhitasqa kajwan chumpisqa, chanta uj fierromanta ruwasqa chalecowan ima, flechas ukhunkuman mana yaykunampaj. Chayta rikuspa, yachaspataj, Pabloqa yachachin: Sinch’ita sayanapajqa, ñawpajta “cheqa kajwan chumpiwan jina mat’ikuna”, nispaqa.

Noqanchejpajrí imataj kashan chay mat’ikunari? Apostolqa nin, chayqa kasqa “cheqakaj” (verdad), chumpiwan jina mat’ikunapajqa. Imajtinchus, yachanayki tiyan, enemigoqa jatun llulla kashan. Chayraykutaj, Diospa wawanqa mana llullakunanchu tiyan ni imapi.

Diospa Simi Nisqampi, chay “cheqa kaj” nispaqa, parlan: Diospa Simi Nisqan kasqanta chay “Cheqa kajqa,” chaypi atienikunapaj. Chaywanqa nishawanchej Paypeqa mana kanchu ni ima pantay, nitaj ni ima llullakuypis. Chayrayku chay nisqasnimpi atienikunapaj, tukuy imata sut’ita yachaspa; ajinamanta mana ima llulla yachachiytapis jap’ikunallapaj pimantapis.

Qhepantataj, “cheqa kajqa,” kawsayninchejpi ch’uwa sonqota ruwawasun, maychus kajta imamantapis parlanapajqa. Jesucristoj salvasqan kajkunapajqa, aswan munasqa kanan tiyan imallapipis Diospa munaynintapuni ruwanaqa.

Chaymanta jawaqa, mana waj imas kanchu, enemigo sajra supaymanta jark’akunapaj, aswan sumaj armaqa, Diospa qowasqanchej cheqa kaj kallpachawasun. Diospa niwasqanchejpipuni tukuy kawsayninchejpi atienikusunchej. Ajina kajtinqa, supay ima llullakuywampis jamuchun ch’awkiyanawanchejpaj, noqanchejqa Dios Tataj cheqa palabranwan kutichisun. Imaynatachus Cristo kuticherqa Payta tentashajtin: “Biblia nin,” nispa. Pantasqata pipis yachachishawasunman chaypis atisun niyta: “Bibliaqa kay jinata nin,” nispa.

Arí, chaymin kashan chumpiwan jina cheqa kajwan mat’ikoyqa. Diosman gracias, Simi Nisqan Bibliata qowasqanchejmanta.

Munasqa Diosniyku, sapa p’unchay yachachiwayku Bibliapi nisqasniykita cheqata yachakunaykupaj. Jesucristoj sutimpi. Amén.

“... Cheqan kaytataj pecherata jina churakuychej.” (Efesios 6:14)

Pecheraqa karqa, p’alta fierros chhitasqa, uj chaleco jina; kunkankumanta cinturankukama, flechas ukhunkuman mana yaykunampaj. Jesuspa salvasqan kajkunapajqa, imataj kashanman chay pecherarí? Chayqa kashan, cheqan yuyay, cheqan sonqo kay. Pabloqa nin: “P’achallikuychej cheqan kajwan,” nispa. Kaypeqa cheqan kaj nishan, mana cheqa kaj nishanchu.

Kay Cheqan kaj nisqamanta, Biblia yachachishan iskay imasmanta: Ñawpajtaqa, yachachishan Cristoj cheqan kaynin noqanchejpi kasqanta, chay mayqentachus Diosmanta jap’inchej Paypi creesqanchejraykulla: Romanos 5:19 nishawanchej: “Uj runa mana kasukusqanrayku tukuy runas juchayoj rikhurerqanku. Ajinallatataj uj runa kasukusqanrayku ashkhas cheqan runapaj qhawasqa kanqanku,” nin. Ajinamanta ari, Jesucristoj cheqan kayninta jap’inchej, Paypi creesqanchejrayku; Paytaj kunanqa Salvawajninchej, chay cheqan kaynin noqanchijpi kasqan Dios Tatapajqa valen, uj k’ata Churinwan herederon kananchejpajqa.

Uj profeta jatun willayta runakunaman uyaricherqa: “Chaypacha, kay jina sutiwan sutichasqa kanqa: Tata Diosmin cheqan kayninchejqa,” nispa. (Jeremías 33:16)

Apóstol Pablopis nerqa, “Paypi tarisqa kayta munani. Manaña leyta junt’aspa cheqan runapaj qhawasqa kaytachu mask’ashani; astawanqa Cristopi creesqayrayku cheqan runapaj qhawasqa kani, chaytaj Diosmanta jamun creeynejta,” nispa. (Filipenses 3:9).

Chay ujtaj kashan, “Cheqan runapaj qhawasqa kay” (justicia). Chayqa, jamun Jesucristo noqanchejpi tiyakusqanrayku; Ajinamanta Espíritu Santo sonqonchejman churan cheqan ñanta purinanchejpaj, chaytaj rikukun kawsayninchejpi. Diospa t’aqasqa santo kayqa, qallarikun kay pacha kawsaninchejpi sonqonchejpi Jesucristo tiyakusqanrayku.

Santo Diosniyku, mana Qanwanqa manapuni atiykumanchu noqallaykumanta santo kaytaqa. Chayrayku, mañakuyku llimphu kawsaypi jap’inawaykuta. Jesucristoj sutimpi. Amén.

Julio 17

“Dioswan allinyachej Evangeliota willanapaj, wakichisqa kayta; juk’utata jina churakuychej.” (Efesios 6:15)

Iglesiamanta tukuy cristianos kajkuna, wajyasqa kanchej, Señorpa Obrampi Allin Willaykuna (Evangeliota) willaranapaj. Ajinamanta Diospa Reinon kay pachapi wiñanampaj. Chaypajtaj llank’ananchej tiyan ashkha runamasis salvasqa kanankupaj.

Tukuy sonqo Salvajninchejmanta parlayqa misk’ipuni kashan, ichus ajina parlashajtinchejpuni rikhurimun imaymana jark’aykuna. Sajra supayqa ajinata willarashajtinchejpuni, tukuynin sajra reinonmanta kajkunata ñawpaqenchiyman rikhurichimun, mana ruwananchejpaj. Supayqa, runa masinchejman valekuspa iskayrayachiwanchej; evangelizaj churakojtinchejpuni mana allin imas jamun. Ajinamanta iskayrayay yuyayninchejpi, sonqonchejpi rikhurin.

Cristiano jina kawsayninchejpeqa, rikhurin sach’arara monte chawpitapis khishkachikun khishkachun rishasunman jina; rikhurispa jinan ukhu wayq’os, filo rumis, chakista q’alluranampaj jina, imaymana khurus venenosniyojpis kankuman jina. Chaypajqa sumaj botasniyoj, manachayrí sumaj juk’utasniyoj kananchej tiyan.

Ashkha Cristianos, unayña nisqa karqa Evangeliomanta tukuyman willanat; chaywampis mana pipis usqayllata kuyurikorqankuchu willaramunankupajqa. Diosman kasukuspa rejtinchej Jesucristonejta Qhasilla K’acha Yanapayninwan kallpata qowasun, k’uchi kayta soqonchejman churanqa.

Sonqonchej chirilla kashan chayqa, Cristomanta pisimanta pisi karunchakushasunman. Ajina kajtinqa ni imapis k’uchiman tukuchiya atiwasunchu. Diospa munakuynin Jesucristonejta noqanchejpi kajtillan, k’uchiyayqa rikhurenqa. Diosqa munakun juchasapa runata, chayraku Cristoj Evangelionta chay juchasapaman Paymanta willaramuna kashan.

Chantá David jina nisunchej: “Usqhay usqhayta kamachisqasniykita junt’aj churakusaj, imaraykuchus qanmin sonqoyta jatunyachinki,” nispa. (Salmos 119:32).

Dios Tatayku, willakuyki tukuy kawsayniypi mana kasukoj kasqayta. Qampa chajraykipi ima ruwanata ruwajpis ñak’ayllata ruwaj churakuni, qhella runa jina. Kallpachaway usqhay usqhayta ruwanaypaj. Jesucristoj sutimpi. Amén.

“Astawanqa tukuy sonqo creeychej, imaraykuchus chay creesqaykichejqa uj jark’akuna escudo jina. Kuraj supaypa tukuynin larwashaj flechasninta thasnonqa.” (Efesios 6:16)

Chay maqanakuman rinapaj p’achanmanta parllaspallapuni, ujnin kaj, kashan: “jark’akuna escudo” Mana chaywanqa, yanqhalla kanqa imapis, enemigoj larwashaj flechasninmanta jark’akunapajqa.

Chay creesqanchej kashan “jark’akuna escudoqa,” Cristopi atienikuy kashan. Ajinamanta Paypa Simi nisqanta jatunchananchejpaj. Arí, chay may chhika, mashkha kuti juchaman tanqasqa kaspa, llakiyninchejpi chay creesqanchej Diospa Churin Jesusta qhawachiwanchej. Pay kashan noqanchejmanta parlarej abogadonchej, waqaychawajninchej imaqa.

Juchallikojtinchejpi, chay ceesqanchejqa kallpachawanchej Señorninchej Jesucristollapi; ajinamanta Dios perdonawanchej, uj k’ata Churimpi atienikusqanchejrayku. Kay, ceesqanchejqa, escudo jina; mana mayqen kaj maqanakunapaj waj p’achapis sumajta yanapawasunmanchu.

Reparay kayta: vacunas tiyan tukuy imapaj. Resfriopaj vacunaqa mana yanapanchu COVID onqoymanta jark’anampajqa. Icharí? Ajinallataj, espirituman jina kawsayninchejpi chay maqanakunapaj p’achaswampis, umata jark’akunapaj montera jinaqa mana yanapawasunchu chalinata umanchejman churakojtinchejqa. Bibliaqa rikuchiwanchej junt’asqa p’achata, sapa uj p’acha allinnichejpajpuni kashan. Ujnin chay p’achasmanta mana churasqa kashanchu chayqa, chayman atin supayqa larwashaj flechasninta kachaykamuyta.

Ichus chay tukuyninmanta, “ujnin kaj p’achata” mana churakushawajchu chayqa, mana sumaj waqaychasqachu kashanki. Supayqa sumajta qhawashasunki, imaynatachus atipasunampaj.

Ajinapuni “Jark’akuna escudotaqa,” churakunapuni kachun, Salvawajninchej Jesucristoj chay kallpachawasqanchejwan supayta atipanapaj. Chayrayku, chay Diospa qosqan p’achastaqa tukuyrintapuni churakuna tiyan.

Janaj Pachapi kashaj Tatayku, Qanqa ashkha sumaj imasta qowanki. Kallpata qoway ari chay niwasqaykiman jina kawsakunaypaj. Jesucristoj sutimpi. Amén.

Julio 19

“Salvacionta monterata jina umaykichejman churakuychej.” (Efesios 6:17)

1 Tesalonisenses 5:8 nin, imachus chay waqaychaj montera kasqanta. Chaypi nishan: “Salvasqa kayta suyakuytataj monterata jina churakuna,” nispa. Chayqa maqanakupaj umanchejman churakunapaj montera kashan. Salvasqa kanata suyakushanchej. Chaytaj sonqonchejpi kashan: iWiñay kawsay herenciata Janaj Pachapi jap'inanchejpaj!

Fierromanta ruwasqa monteraqa umata waqaychanampaj. Chay monteraqa maqanakupaj junt'asqa p'achamanta ujnin kashan. Espadataj karqa uj arma mayqenwanchus enemigonkuta wañuchinankupaj, uj jatun cuchillo jina. Chay armawan umampi wajtajtiku, chay monteraqa uman ch'ejtasqa kanamanta jark'aj. Pichus monterayojrí espadawan enemigo wajtajtinqa, mana wañuspa maqanakullajpuni kanku.

Ajinallataj “Salvasqa kayta suyakuy monteraqa,” waqaychawanchej supaymanta, jinallataj kay pachapi sinch'i sayasqa kananchejpajima. Kay pachapi juchawan, sajra imaswan, supaywan ima maqanakuyninchej uj p'unchay tukukunqa. Janaj Pachapi jatun raymi suyashawanchej. Ajina kajtinqa, tukuy sonqo, tukuy fewan ñawpajman rinallanchejpuni tiyan.

Tukuy chay Diospa qowasqanchejqa kashan, kay pachapi yanapanawanchejpaj: Llakiykuna, nanaykuna, juchaman urmanas, noqanchejman chayamujtin, chayri sonqonchej nanasqa kajtinchej: “Chantá pacienciawan ñawpajllamampuni t'ijunachej, Dios churapuwarqanchej, chay ñanta,” nispa nin. (Hebreos 12:1).

Churakuypuni chay “Salvasqa kanapaj suyakuy monterataqa.” Sonqoykita tapuriy cheqamanta Cristopipunichus sonqoykita churashanki manachus, chayta. Diosmanta mañakuy, Pay kikin sonqoykiman qhelqachun, sumaj wakichisqa soldado jina kay maqanakupi Jesucristonejta atipajpuni kanaykipaj.

Dios Tatayku, yanapawayku tukuy wawasniykita atinaykupaj kallpachayta, imaynatachus Qan munanki, ajinata. Jesucristoj sutimpi. Amén.

“... Espíritoj espadantapis jap’iychej; chayqa Diospa Palabran.” (Efesios 6:17)

“Espada” nin, Diospa Simi Nisqasnin Bibliata. Hebreos 4:12 nin: “Puraj filoyoj espadamanta aswan filo,” nispa.

Diospa Simi Nisqanta espadatawan rijch’anacheyqa, ancha sumajpuni. Espadaqa sinch’i chuki; Diospa Simi Nisqampis may jina chuki, mana p’akikoj. Diospa Simi Nisqampa nisqanqa, ni jayk’aj chinkarenqachu, astawampis tukuy nisqasnin junt’akonqapuni. Chay nisqasnintaj, runaj sonqonman yaykonqa, chay puraj filoyoj espada jina. Hebreos 4:12 nin: “Diospa Palabranqa kawsayniyoj atiyiniyojtaj, puraj filoyoj espadamanta aswan filo. Chay Palabraqa runaj sonqon ukhukamapuni chayan. Jinallataj yuyasqanta, sonqompi imatachus munasqantapis sut’ita rikuchin allinchus, manachus kasqanta,” nispa.

Kaypeqa, apóstol sutichan “Espíritoj espadan” nispa, mana Diospa yuyaychasqan qhelqasqa kasqallanmantachu nishan, manachayqa nishan uj espada jina kasqanta. Chay espada jap’irisqa juchawan enemigowan maqanakunapaj kasqanta yachachiwanchej. Wajnejpi nishallantaj: “Maqanakunayku armasqa, mana kay pachaj armasnin jinallachu kanku; astawanqa Diospa atiyinwan sinch’i kanku, jark’achasqa wasista thuñinaykupaj jinapuni,” nispa. (2 Corintios 10:4).

Janaj pachapi kawsakamunaypi suyakushasqayta, sonqoymanta chinkachiyta supay munashan chayqa, Diospa tukuy niwasqampi sonqoyta churaspa sinch’ita sayani. Sichus supay ch’awkiyawayta munaspa llulla yachachiymán pusayta munawan chaypis, Diospa qowasqan espadawan wajtayta atini supaytaqa. Jinallataj nisaj: “Pichus juchanwan kawsakapojqa, supaypata” nispa. Sitajchus yuyayniyman churallanqapuni, mana perdonasqa kayta atinayta chayqa, nisaj: “Juchasninchajtachus Diosman willakunchej chayrí, juchasninchajta pampachanqa, nisqanta junt’aj, cheqantaj kasqanrayku,” nispa. (1 Juan 1:9).

Bibliaqa jatun atiyiniyoj, tukuy sajra imasta atipan. Imaraykuchus chaypi kashan Dios Tataj parlaynin, uyarinapaj.

Diosnítu qanqa palabraykita yachachiway runa masiymán yachachinaypaj. Mana wist’uta yachachinaypaj kallpata qoway. Jesucristoj sutimpi. Amén.

Julio 21

“Chay tukuytaqa, ruwaychej sapa p’unchay, Diosmanta mañakuspa. Espiritupi tukuy laya mañakuywan, mana saquespa nitaj sayk’uspa...”
(Efesios 6:18)

“Diosmanta mañakuspa,” nin. Espíritu Santo, Panbloj siminneja parlarqa Iglesia Efesomanta kajkunaman. Chaywanqa yachachisharqa sut’ita “maqanakupaj Diospa qowasqanchej armaswan” maqanakunapaj, niwanchej Diosmanta mañakunapuni kasqanta, ajinamanta Pay yanapanawanchejpaj.

Chay tukuy maqanakuyninchejqqa mana noqanchejpa kallpanchejwanchu, Diosmanta mañakusqanchejwan khuska kashan, imaraykuchus noqanchejpajqa Jesucristo kallpanchejqqa. Imaynachus sumajta samaquespapuni tukuy kallpawan maqanakusun, chay kallpataj Diosmanta jamun. Chay maqanakunamanta parlaspa, apóstol Pabloqa qallarintaj tukuychantaj parlaynimpeqa Diospi yuyaspapuni, Paypi atienekuspataj. Kunampis, qallarin nispa: “Kallpachakuychej Señorpi, jatun atiyinpitaj,” nispa. (Efesios 6:10).

Mashkha sumaj maqanakuna p’achapis, yanqhalla kanman, Dios mana noqanchejwan kanman chayqa. Cheqa kajwan sumajta wak’ikusun chayqa, Espiritu Santoman k’umuykukusun, Pay cheqa kajwan yuyaychanawanchejpaj; manachus ajina kanman chayqa, mana atisunchu noqanchej kallpallanchejwan maqanakuytaqa.

Si munanki Cheqan kaj pecherata churakuyta chayqa, Dios Tatamanta mañakuy qosunanta. Paylla atin chay munayta sonqoykiman churayta; jinallataj, ruwanaykipaj atiytapis. Sichus munanki usqhaysituta purichej, sonqo tiyaykuchej Evangelio juk’utata churakuyta chayqa, chaytapis ajinallapitaj tarinki. Sichus munanki creesqayki pecherata churakuyta, chay larwashaj flechasmanta jark’akunaykipaj chaypis, chay tukuytajqa “Diosmanta mañakuspa... Mañapullaychejtaj Diospata kajkunapajpis,” nispa nin. (Efesios 6:18).

Ajina kajtenqa, mana manchachikusunchu supayqa muyuykachashawasumpis urmachiyta munaspa, Jesucristo noqanchejwan kashan chayqa, supayqa ayqhenqa, mana imanawasunchu. Chayta Jesús niwanchej: “Ama puñuspa Diosmanta mañakuychej,” nispa.

Dios Tatayku, imachus ruwanayta allintapuni ruwanaypaj yanapaway. Imatapis mana allinta ruwaspalla qolqe jap’inamanta jark’away. Jesucristoj sutimpi. Amén.

“... Mana noqawanqa, mana imatapis ruwayta atinkichejchu.” (Juan 15:5)

Pikunachus kawsayninkupi, tukuy imapi kay pacha imaspi allinman tukuspa kusişqas kanku; chayraykutaj munanku astawan allimpi kayta, chayraykutaj manaña allinta puñukunkuchu astawan qolqeta mask’aspa. Ajina kasqankuwanqa, yuyanku sonqochasqa kayta, manataj chay kusiş kanchu. Sonqonchejpi kusişqa kayqa Jesucristollamanta jamun, ajinamanta sonqo junt’asqa kanchej. Cristoqa, munan sonqochasqa kusişqataj kananchejta salvasqa kasqanchejmanta, chay kashan jatun kusiş noqanchejpajqa.

Pikunachus Diospaj t’aqasqa santos kajkuna, kusişqas kashaspapis llakiykunaqa manapuni faltanchu. Paykunaj kusişninkuqa, mana sapankupi kasqankuchu, Jesucristo paykunajtaqa sonqochajnin, kallpachajnin imaqa. Paykunaqa Espíritoş pusaykachasqan kawsakunku. Chay llakiyman mana chayanapaj, mana pawisqa jinalla kanapajqa, ama t’aqakunachu Señornincheş Jesucristomanta. Ari, Payllapi pipis tarenqa sonqo tişaykusqa kaytaqa. Juchasnin pampachasqaña kasqanrayku.

Manachus sapa p’unchay, Cristoş qayllitampi kasun chayqa, juchaman facilituta urmasunman. Sichus Jesucristoş perdonnimpi mana kawsasun chaypis, manaraj imapi ujtawan Leypa makimpi rikhurillasunmantaj; ajina kajtenqa llakikuypis oqharişansun, mana asirikuştapis atişunmanñachu. Manañataş Diospaj t’aqasqa santo kaymantapis dakusunmanñachu.

Jesucristowan allimpi kasun chayqa, sapa p’unchay perdonasqa kasun. Señor Jesucristo nin: “Noqapipuni kaycheş, imaynatachus noqapis qankunapi kani, ajinata. Imaynatachus ramaqa sapallanmanta mana poşoyta atinchu mana uva sach’api kaspaqa, ajinallatataş qankunapis mana atinkicheşchu, manachus noqapi kawajcheş chayqa,” nispa. (Juan 15:4).

Dios Tatayku, graciasta qoyki qampata kasqaymanta, waqaychaway qayllitaykipi kanaypaj; jinallataş qampi kajkunawampis ujlla sinch’i kanaykupaj. Jesucristoş şutimpi. Amén.

Julio 23

“... Cristopi kaj runaqa, mosoj runañamin; ñawpa kawsayqa tukukapun, mosoj kawsaytaj chayamun.” (2 Corintios 5:17)

Chayqa kashan mosojmanta nacekuy, mosoj ruwasqataj kay. Chayqa mosoj sonqo kay, mosoj yuyayniyoj kay ima kashan. Sichus munanki yachayta, cheqamantapunichus Diosman kutirikusqayki kashan, chayri iglesiaman rishasqaykiraykuchu Diospa wawanñapuni kasqaykita yuyakushanki chaypis; Señorpa ñawpaqempi tapukuy qan kikiykita: “Dios Tataj Simi Nisqaman jina, Diospa atiyinwan kawsayniy uj jinañachu kashan manachu?” nispa.

Diospa Simi Nisqampi atinki rikuyta imaynata kawsakanaykita, Chayri ichus qampa kawsayniyki fariseokunaj kawsaynin jinalla kashanki, qampa ruwasqallaykipi atienikuspa, salvakuyta munaspa. Ajina kajtenqa, qhawarisqalla cristiano jina kashawaj, sonqoykipitaj mana.

Diospa wawasnin chawpipi, mashkhasta rikunchej sumajta yachapayajkunata. Imaynatachus cristianos jinallataj kawsajkunata; ichus paykunaqa mana Espíritu Santuman jina mosojmanta nacesqachu kashanku. Juchasapa kasqankutapis paykunaqa mana reparakullankupischu, nitaj sapa p’unchay perdonasqa kaymantapis dakunkuchu.

Jesús sut’ita niwanchej, Payqa rejsiwanchej imaynachus kawsayninchej kasqantaqa. Chayraykutaj Salvawajninchejqa nin Dioswan tukuy sonqo Paynejta allinyakunapuni kasqanta wiñay kawsayniyoj kanapajqa. Kutin kutinta nin “Manachus Runaj Churimpa aychanta mikhunkichej, nitaj yawarnintapis ujyankichej chayqa, mana qankunapis kawsayniyojchu kankichej,” nispa. (Juan 6:53). Santa Cenapi, Paymanta perdonta jap’ispa kallpachakunchej kawsayninchejpeqa.

Jesucristopi creesqallanchej salvayta atiwanchej, mana kanchu waj ñan. Sapa p’unchay allinyakuna kashan Dioswanqa, Jesucristopi khuskachasqa kaspalla. Imaraykuchus Pay yawarninta jich’arqa mosoj runata ruwanawanchejpaj. Ajina kajtenqa, “mosoj runa kanchej”.

Janaj Pachapi kashaj Tatayku, Churiyki jina munakuypi mosoj runata jina kawsachiwayku.. Jesucristoj sutimpi. Amén.

“Yuyarikuychej Abrahammanta. Payqa Diospi creerqa, Diostaj cheqan kayninta churaykaporqa, cheqan runapaj qhawasqa kanampaj. Charayku yachaychej: Cheqamanta pikunachus creenku chaykunaqa Abrahampa wawasnin kanku.” (Gálatas 3:6-7)

Imapitaj creerqa Abraham? Creerqa Cristopi, uj p’unchay jamunampi suyakorqa. Chayrayku Apóstol Pablo nin: “Diosqa Abrahamman, mirayninmanwan nerqa imatachus qonanta... chaytaj Cristo,” nispa. (Gálatas 3:16). Apóstol Pabloqa sut’inchallantaj: “Mana Abrahamllapajchu qhelqasqa karqa: Diospa cheqan runapaj qhawanqa, nispa. Noqanchejpajpis qhelqasqallataj karqa creesqanchejrayku Diosqa cheqan runapaj qhawanawanchejta,” nispa. (Romanos 4:24).

Qallariymanta tukukuykama, Diospa Simi Nisqan Bibliaqa, willashan salvasqa kanapaj ñanqa ujlla kasqan, chaytaj Cristo. Arí, ajinapuni kashan. Cristopi creespalla tukuy Diospa khuyakuynintaqa rikonqanku. Chaytataj nillasumpuni mana sayk’uspa; wiñaypaj salvasqa kayninchejqa, Dios wawampaj rejsikapuwasqanchej uj k’ata churin Jsucristopi creesqanchejkulla.

“Tukuy profetas Cristomanta Jesusmanta willarqanku, Paypi tukuy creejkunaj juchasninku sutinnejta pampachasqa kanankupaj,” nispa nin. (Hechos 10:43), Salvaciónqa Jesucristollapipuni tarikun. “Kay pachapi mana waj suti runasman qosqa kanchu, salvasqa kananchejpajqa,” nispa. (Hechos 4:12). Diospa Churinta sonqompi jap’ikojqa wiñay kawsayniyoj. Diospa Churinta mana sonqompi jap’ikojrí mana wiñay kawsayniyojchu.

Diosqa ujllata parlan, chayraykutaj Churin Jesucristollapi salvasqaykichej niwarqanchej, chaytaqa junt’an. Pikunachus paykunaj ruwasqasnillankuwan salvasqa kayta munajkunata, Diosqa qhesachan. Imaraykutaj qhesachan? Imaraykuchus paykunaqa Jesuspa wakichipusqanta qhesachasqankurayku, mana Paypi atienekusqankurayku. Arí, Diosqa uj k’ata churin Jesucristollapi ajllakuwarqanchej manaraj kay pacha ruwasqa kashajtinña, salvasqa kananchejpajqa.

Mana judío kashaspa, cheqampaj qhawasqa kayta tarerqanchej mana imata ruwaspalla. Arí, Jesucristopi creesqanchejraykulla salvasqa kanchej.

¡Ay Dios Tatayku! Yanapawaych’uwa sonqo kayta. Noqa salvasqa kanaypajqa, Churiyki Jesús wakichipuwasqallampi sonqoyta churayta yanapaway. Jesucristoj sutimpi. Amén.

Julio 25

“Noqamin Janaj Pachamanta urayk’amoj t’antaqa kani. Pillapis kay t’antamanta mikhojqqa, wiñaypaj kawsanqa. Noqa qosaj chay t’antaqa aychay; chayta qoni kay pacha runas kawsanankupaj... Cheqatapuni niykichej: Manachus Runaj Churimpa aychanta mikhunkichej, nitaj yawarnintapis ujyankichej chayqa, mana qankunapis kawsayniyojchu kankichej...” (Juan 6:51,53-55)

Aychayta mikhusqaykichej wiñay kawsaytaqa qosonqachej, nisqanrayku judiokunaqa Cristoj contranta thutorqanku. Chayraykutaj Jesucristo, nerqa: “Espiritoqa kawsachin; aychatajri yanghalla. Noqa parlaykichej, chay nisqasneyqa espiritumin, kawsaytaj,” nispa. (Juan 6:63).

Chayta nispaqa nisharqa: Cruzpi wañunanmanta, yawarninta jich’ananmanta, kay pachapi runakuna salvasqa kaspera kawsanankupaj. Espíritu Santo parlaykusojta saqenki chayqa, chay parlaykusqsanta creejtiyki, wiñay kawsaytaqa jap’inki. Jesuspa chay nisqasninqa, mana creenapaj jinapuni kaspera jinarqa, chayraykutaj chay pacha runasqa manajap’ikuyta aterqankuchu. Creejkunapajri, sapa p’unchay Jesuswan kajkunapajri ancha sumajtaj kashan.

Tukuy sonqo Señorpi creejkunapajqa, chay nisqasqa sut’ipuni kashan; chayraykutaj atinchej niyta: Jesuspa aychan mikhuyninchej kasqanqa, Diospa Simi Nisqan Evangelion sumaj mikhuyninchej noqanchejpajqa. Ajinamanta Diospa wawasnimuni kajkunataqa atinchej rejsiyta, paykunaqa ñawirinku Dios Tataj palabrantaqa, imaraykuchus paykuna sut’inchanku kawsayninkupi, sapa p’unchay sonqonkoqa Jesucristoj yawarnimpi tukuy juchasninku mayllasqa kasqampi.

Jesucritopi kajkuna, mana atinkuchu paykunaj munayninman jina, nillataj paykunaj yuyasqankuman jina kawsakuytaqa. Paykunaqa mana sayk’uspa kawsakunku sapa p’unchay Jesucristoj yanapayninwan, ajinamanta k’acha runasman tukunku. Paykunaj yuyaynimpeqa Cristollawampuni allenqa imapis kasqan kashan.

Diosniyku, qanlla atinki noqaykupi ruwayta sumaj imastaqa. Chayrayku mañakuyku sumaj yuyayta qonawaykuta Qanta jatunchasunaykupaj. Jesucristoj sutimpi. Amén.

“Manataj pipis waj cimientota churayta atinchu churasqamantaqa; chay cimientota Jesucristo... Mayqempatachus chay cimientopatapi, ruwasqan mana ruphanqa chayqa, chayman jina t’inkanta jap’ikaponqa. Pejpatachus ruwasqan ruphaykunqa chayqa, mana t’inkanta jap’enqachu. Chaywampis payqa salvasqa kanqa, nina ukhumanta ayqekoj runa jina.”
(1 Corintios 3:11,14-15)

Reparay imatachus apóstol nishan chayta. Pejpa ruwasqanchus “ruphanqa” “Diospa juiciompa tukukuynin p’unchayman chayanampajqa, payllamanta imatapis ruwaspa jatunchakusqasninta chinkachinan tiyan, ajinamanta salvasqa kanampaj.” Ari, ajinamanta salvasqa kanqa. Imarayku? Imaraykuchus Cristopi atienekuspa kawsakusqanrayku, chay cimientopi sayasqa kasqanrayku. Kaypeqa, ujtawampis rikullanchejtaj salvasqa kanapajqa, mana noqanchej imatapis ruwasqanchejraykuchu kasqanta; manachayqa, creesqanchejraykulla. “Pejpa kawsaynimpichus Cristo kawsakushan chayqa, salvasqa kanqa.”

Diospa wawasnimpa kawsaynimpeqa, sut’i rikukun cheqapipuni Cristopi creesqankuqa. Yuyayninkupeqa Diospaj t’aqasqa kasqanku kashan, chayraykutaj Señorpa kamachisqasnenqa jatumpaj qhawasqa kashan paykunapeqa, paykunaqa tukuy imapi Jesucristoman rinku. Chaymari kashan chay “kamachisqasninta kasusqanchejpi yachakun Diosta rejsisqanchej, kamachisqantataj kasusqanchejqa.

Kallantaj waj imapi yachakusqan, Diospa wawasnimpuni kasqanchejqa; Jesús, chantá Juan, jinallataj Pedropis k’iskimanta nerqanku: Diospa wawasninta munakusqankupi kasqanta, kay jinata nispa.: “Sichus ujnin ima nanasqa kanman chayqa, tukuy ninku nanachikunku chay ujwan khusha. Sitajchus ujnin iman allimpaj qhawasqa kanman chayqa, tukuy ninku chay ujwan kusikullankutaj,” nispa nin. (1 Corintios 12:26).

Chayjinamunakuymanta, Jesusqanin: “Qankunachusmunanakunkichej chayqa, tukuy runas yachankunku yachachisqasniy kasqaykichejta,” nispa. (Juan 13:35).

Janaj Pachapi kashaj Tatayku, yanapawayku kamachisqasniykita kasuyta, runa masiykuta munakusqaykupi. Jesucristoj sutimpi. Amén.

Julio 27

“Ruwanapaj imaymana atiykuna tiyan, chayta qoj Espiritutajrí ujllapuni.”
(1 Corintios 12:4)

Apóstol Pabloqa sut’ita yachachin cartata qhelqasqampi, imaymana atiykuna kasqanta ruwanapajqa; chaytataj junt’anapuni kashan Cristoj cuerpon Iglesiapeqa. 1 Corintios 12:4-6 nin: “Ruwanampaj imaymana atiykuna tiyan, chayta qoj Espiritutajrí ujllapuni. Evangeliopeqa imaymana sirviykuna tiyan; chaywampis uj Señorllata sirvinchej. Jinallataj Diospaj imaymana ruwaykuna tiyan, chaywampis uj k’ata Dioslla tukuy imata ruwan tukuypi,” nispa.

Cuerponchejpeqa ashkha imasnin tiyan, manataj tukuyninkuchu uj rejllata ruwanku. Ajinallataj noqanchejpis ashkha kaspapis, Cristopi uj cuerpolla kanchej, sapa ujtaj ujkuna ujkunawan cuerpomanta kanchej.

Ajina ari, sut’i kashan Iglesiamanta kajkunapeqa, mana tukuychu uj rejlla kanchej. Diosajinatachuran. “Diosqa, sapa ujta churan Iglesiapi; ñawpajta apostolesta, qhepanta profetasta, chaymantá yachachejkunata, chaymantataj milagrosta ruwajkunata, sanoyachejkunata, yanapajkunata, kamachejkunata, waj paralaypi parlajkunata ima,” nispa nin. (1 Corintios 12:28).

Kayqa k’acha yachachiy kashan, imaraykuchus wakin kuteqa, pisipaj qhawanchej pikunachus mana noqanchej jina ruwajkunataqa, k’acha kawsayniyoj Cristopi kashanku chaypis, mana paykunawan kusikunchejchu.

Ama qonqasunchu ni jayk’aj, mana uj rejllachu kasqanchejtaqa; chay atiykunata Dios qowanchej Paypa munayninman jina Iglesiampi llank’anapaj. Kunanmanta ujkama umanchejpi kachun, sapa ujman qowanchej atiyta imatapis sumajta ruwanapajpuni.

Dios Tatayku, sut’ita rikuchiwayku ari, ima atiytachus sapa ujman qowayku chayta. Ajinamanta, sumajta imatapis Iglesiaykipi llank’anaykupaj, Qanta jatunchaspa. Jesucristoj sutimpi. Amén.

“Espíritu Santoqa wakinman yachay palabrasta qon, parlayta atinampaj, wakinmnataj kikin Espiritullataj qon jatun yachaykunata... wakinmantaj atiyta qon onqosqasta sanoyachinampaj.” (1 Corintios 12:8-9)

Diospa qosqan yachayniyoj kaywan, kay pacha jatun yachayniyoj kaywanqa mana kikin kikinchu. Diospa qosqan **Yachayniyoj** runaqa, Dios imatachus nisqanta kasun, Paymanta pakasqa imasnintapis, sut'ita entienden. Kay pachamanta **yachayniyoj** runarí, Diospa Simi Nisqantaqa mana allin sut'iman orqhonchu, maychus kajta sumajta wajkunaman entiendechinampajqa.

“Diospa yachayninwan” pichus parlajqa, Diospa Simi Nisqanta maychus kajta runakunaman yachachin. Llamp'u simillawan manachayrí sinch'i simiwanpis, sonqochanampaj jinapuni... Imaynachus Diospa nisqan kashan, chayman jinapuni parlan.

Jatun yachaywan parlajqa, Diospa atiyta qosqanwan Bibliamantaqa yachachin, sumaj sumajta yachakusqanwan, Diosmanta pakasqa imastapis sut'iman orqhon.

Chay tukuyman parlaspa apóstol Pabloqa, nerqa: “Ujmantaj, Creey atiyta qon, wajmantaj atiyta qon, onqosqata sanoyachinampaj chay Espiritullataj,” nispá. Kaypeqa yachachin jatun creeymanta, mayqenwanchus t'ukuna imasta ruwayta atisqanmanta. 1 Corintios 13:2 nin: “... sitajchus sinch'ita creeyta atiyman orqosta ithirichinaypaj jina, manataj munakuyniyoj kayman chayqa, mana imachu kayman.” nispá.

Manaujrejllachu Diospa wawasnimparuwanasninqa, nispá nisqanchejta allin yuyaywan jap'ina, imaraykuchus Espíritu Santo tukuy cristianospi ruwanankupi yanapan, chaytaj tukuypi sumaj k'achitu, santotaj.

Chay imasmanta Pabloqa astawan sut'inchashan: “Jinallataj uj Espiritulla tukuyta bautizawarqachej, uj cuerpolla kananchejpaj... qankunaqa Cristoj cuerpon kankichej, sapa ujtaj chay cuerpoj imasnin kankichej,” nispá. (1 Corintios 12:13,27).

Munasqa Tatayku, qampa yachayniykimanta wajchas kayku. Yachayniykita qowaykupuni ari. Qampa yachayniykiwan junt'a kanaypaj, imatapis allintapuni ruwanaykupaj, mana tiempota usuchispa. Jesucristoj sutimpi. Amén.

Julio 29

“Chakichus ninman: Mana maki kasqayrayku, mana cuerpojtachu kani, nispa chayqa, chayraykuchu mana cuerpojta kanman? Ninrichus nillanmantaj: Mana ñawi kasqayrayku, mana cuerpojtachu kani, nispa chayqa, chayraykuchu mana cuerpojta kanman? Sichus tukuy cuerpo ñawilla kanman chayqa, maypitaj ninri kanmanarí? Chayrí tukuychus ninri kanman chayqa, maypitaj senqa kanmanrí? Chayrayku Diosqa cuerpoj imasninta churarqa cuerpoman sapa ujninta maypichus kananman, munasqanman jinataj.” (1 Corintios 12:15-18)

“Qankunaqa, aswan sumaj ruwana atiykunata mask’aychej,” nispa nin. (1 Corintios 12:31). Mana sayk’uspa mañakuy Diospa Qhasilla K’acha Yanapayninta, kallpatawan ujkunata sirvinaykipaj; chaywampis, ama chayta ruwasqaykipi atienekuychu, chayta ruwaspa Janaj Pachaman chay ruwasqaywan yaykusaj nispaqa.

Diospa wawasnimpaj may k’achapuni kashan, chay atiykunash kapuwanchej. Icharí? Chaytaqa ruwasun sonqo tiyaykuywan, llamp’u sonqotaj, tukuy runakuna mana uj latinta jina qhawanawanchejpaj.

Imaraykuchus, chay Diospa qosqan atiywan ruwaspa runaqa atinman jatunchakuyta, paypaj ruwasqan kasqanta yuyaspa. Jatunchasqa kachun Dios, chay Jatun Yachayta qowasqanchejmanta. Apostol Pabloqa nin: “Diosqa sapa ujman qon atiyta imatapis ruwanapaj,” nispa. (1 Corintios 7:7). Chayrayku, Diosqa nin: “Ama qonqapuychu ruwanapaj atiy qanman qosqa karqa,” nispa. (1 Timoteo 4:14).

Diospa qhawaynimpeqa tukuy valorniyoj kanchej. Ajina kajtinga, ama yuyaychu qampa ruwashasqaykeqa mana valesqanta; ruwasqayki sumaj ruwasqalla kachun, Diosninchejqqa k’acha ñawiwana qhawasunki.

Iglesiaipi ashkha imas ruwanas kashan chayqa. Jesuspi tukuy creejkunataj kikin ruwanallapi munankuman chayqa, pitaj ruwanman chay waj ruwanas kajkunatarí? (Romanos 12:6-8).

Dios Tatayku, graciasta qoyki imatapis allinta ruwanaypaj atiyta qowasqaykimanta. Sumajta junt’anaypaj kallpata qoway. Jesucristoj sutimpi. Amén.

“Imatachus Moisespa Leynin mana ruwayta aterqachu, runaj aychan pisi kallpayoj kasqanrayku, chaytaqa Diosmin ruwarqa. Diosqa Churinta kachamorqa juchallikoj runaman rijch’akoja, jucharayku wañunampaj.”
(Romanos 8:3)

Profeta Isaías nillaraqataj: “Tukuy kusikonqanku, cosechapi runas kusikunku, ajinata; maytapuni kusikunqanku, imaynatachus wañuchinaku maqanakupi qhechusqaku qhapaj imasta rak’inakuspa runas kusikunku, ajinata,” nispa. (Isaías 9:3).

Chay llasa yugoqa kashan Ley, chaytajri karqa chay llasa juchasninchey, Diospa kamachisqanta mana junt’ayta atisqanchej. Jinallataj chay vara, chay ñak’arichejpa kamachinan tojnun, kashan. Chay Leyqa mana samarispas ñak’arichiwarqanchej, chaymantaqa Jesucristo kachariwarqanchej. (Gálatas 5:1).

Wakin cristianos kajkunaqa, yuyayninkupi pawichikunkuraj mana sut’ita yachaspa. Chayrayku sutita umanchejman, sonqonchejman ima churana: “Chantá chay chayamunan p’unchay junt’akojtin, Dios kachamorqa Churinta uj warmimanta nacekunampaj, leyta kasuspataj kawsanampaj,” nispa nin. (Gálatas 4:4). Jinallataj nin: “Cristoqa kacharisqata kacharichiwanchej. Chayrayku kacharisqa kaypeqa sinch’ita sayaychej,” nispa. (Gálatas 5:1).

Wakinrí, yuyayninkupeqa ninku: “Chayqa ajinapuni kashan chaypis, noqapajri, ima allintaj kashanri?, nispa. Noqaqa yachallani mana Diospa munasqanman jina kawsasqaytaqa, imaynatataj Dioswan allinyachisqa rikhuriymanri, Diospa munayninta mana ruwashajtiyri?, nispa. Astawampis Leypa qhatatisqan ñak’arichisqallampunitaj kashani, nispa ima ninku.”

Ajina ñak’ariyman mana urmanaykipajqa, sumajta yuyarikuy apóstol Pabloj nisqanta. Payqa nin: “Leypa nisqanman jina kawsakuspallaqa, mana tarisunchu juchasnincheymanta perdonasqa kaytaqa, nillataj sonqochasqa kaytapis tarisunchu. Manachayqa, kikin Dios wakichin chaytaqa, Churin Jesucristonejllata, mana noqanchej kallpakusqanchejmantachu,” nispa.

Ay Dios Tatayku, perdonaway mana kajta parlasqaymanta... Graciasta qoyki munakuyniykimanta. Jesucristoj sutimpi. Amén.

Julio 31

“Hermanos, mana ninichu, noqa chay t’inkata taripasqaytaña; astawanrí kayta ruwani: Imachus kawsayniypi ñawpajta karqa, chayta qonqayman churaspa, atisqayta kallpakuni ñawpajpi kajta taripanaypaj.” (Filipenses 3:13-14)

Ajinata nerqa apóstol Pabloqa; chantapis nillaraqataj: “Manañataj noqañachu kawsani, manachayqa Cristo kawsashan noqapi,” nispa. (Gálatas 2:20). Chay jina jatun creenyioj Apostolqa chaypacha jatunmanta parlarerqa: “Pitaj Cristoj munakuyninmanta t’aqawasunrí?,” nispa. (Romanos 8:35). Chay tukuyta nispaqa, tukuyman yachayta qosharqa, manaraj tarirqachu imatachus maymanchus rishasqantaqa; chaywampis payqa nin yachaqakuspallapuni kawsakushasqanta.

Chayta nispaqa, mana nisharqachu imaynachus pay kashasqanta Diospa ñawpaqempi, imaraykuchus chayqa sumaj sut’iña karqa, imaraykuchus Cristopikaspaga Diospaqhawaynimpeqacheqan runapaj qhawasqa karqa, imaraykuchus nerqaña, tukuy juchasninchejmanta perdonasqaña kasqanchejta.

Diospa rikuynimpeqa, cheqan runapaj qhawasqa kasqanchejmanta parlaspaqa, Biblia nin: “Pitaj ch’ataykuwasun?” Pitaj “juchachawasun?” “Creesqanchejnehta, cheqan runapaj qhawasqa kanchej, Dioswanpis allinyachisqaña kanchej Señorninchej Jesucristonejllata.” Biblia nin: “Uj kuti jaywasqallawan Diospaj t’aqasqa kajkunata cheqan runasta ruwan,” nispa. (Hebreos 10:14).

Ichapis mayqen tapukunman: Pitaj chaykama santoña kashanmanrí?, nispa. Enemigoqa, Cristopi creesqanta mana chinkachiyta atispañaqa, iskayrayaytañataj yuyayninman churan. Chayta ruwaspaqa, yuyayninchejtañataj musphachej churakun, kawsaynichejpi Espirituman jina mana wiñananchejpaj, jinallataj Salvawajninchejta rejsiytapis mana saqewanchejchu. (Hebreos 12:1-2)

Dios Tatayku, willakuyki may chhika kutis llullakusqayta. Chaymanta perdonaway. Allin sonqo kayta qoway cheqatapuni parlanaypaj. Jesucristoj sutimpi. Amén.



Agosto

*"Tata Diospa makisninman kawsayniykita churay.
Paypi atienikuy, Paytaj yanapasonqa."*

(Salmos 37:5).

Agosto 1

“... Allin kanman chiri, chayrí rupha kanayki. Q’oñiyasqalla kanki, mana chirichu, nitaj ruphachu. Chayrayku simiyanta ajtumusqayki.”
(Apocalipsis 3:15-16)

Imaniytataj munan “chiri”? Chayta yachanapajqa qhawarina kachun kay pacha kawsayta. Runaqa sonqonkuta kay pacha imaspi yuyaspalla kawsanku, Diosmanta karupi, manataj dakunkuchu Diospa nisqasninmantapis. “Rupha” kaytaj, niyta munan Diospa Simi Nisqan imaninchus chaypi yuyayninkuta churaspa kawsakunku. Runa masinchejta yanapaspa, sirviypi ima, yuyayninchejqqa Salvawajninchej Jesucristopi kashan.

“Rupha” kajkunarí, Diosman k’askasqa kawsakunku; Jesucristota, Evangelionta ima, tukuy imamanta astawan munakuspa. Paykunaj munayninkoqa, Diospa Qhasilla k’acha Yanapaynin, Diospa Simi nisqan ima; Salvajnin Jesucristopis paykunapajqa manchay importante kawsayninkupeqa.

Kunanqa sut’inchana kashan, pikunachus “q’oñiyasqalla” kanku chaykunamanta. chayqa mancharina jinapuni kashan.

Jesucristoj salvasqan kajkunaman imaymana llakiykuna rikhuriytin, pisimanta pisi yuyayninkuman jamun Señor saqerpayasqanta; Ajinamanta yuyayninkuta kasuspa chiriyapunku, llakisqalla rikhurinku. Paykuna kikinwan mana sonqo junt’asqachu kanku; Diostapis, manaña chhikata munakuspa jinankuchu. Mana ñawpajta jinañachu Diosmantapis mañakuyninkuqa. Sajra yuyaykunallaña umankupi, sonqonkumampis jamun. Jinapis iglesiaman reshankupuni, chayraykutaj mana chaykama ruphaschu, nitaj chirischu kanku.

Ajinapi tarikuspa, paykunaqa yuyanku Diosqa manapis parlaykushanmanchu, nitaj paykunapi yuyashanmanñachu jinata. Chaymanta aswan ñawpajsitupi parlashan: “Qanqa nishanki: Qhapaj kani, tukuy imayoj, manataj imamantapis pisinichu, nispa. Jinapis mana reparakunkichu khuyana, mana imayoj, wajcha, ciego, q’alallataj kasqaykita,” nispa nin. (Apocalipsis 3:17).

Kay jina kajkunata, Diosqa millachikun, siminmanta ajtumuyta munan; chaytaqa kikin Señorpuni nishan.

Munasqa Dios Tatayku, kaymanta ñawpajman kamachisqasniykita kasuyta yanapawayku. Ama imatapis mana kajtaqa parlanaykupaj. Jesucristoj sutimpi. Amén.

“... Allin kanman chiri, chayri rupha kanayki.” (Apocalipsis 3:15)

iAllin kanman ujkama chiri kanayki! Ichus runa masiypikaj aswan allin kawaj, paykunawan khuskachakapuspaga. Ajinata kawsaspa Diospa wawan jinallataj kayta munaspaqa, Diospa wawanman rijch'akojllaqa mana allinchu kanman.

Chayri, iglesiapi kamachejchu kashanki? Ajina kajtenqa, tukuy qanta qhawashasunku. Runaj rikunanta sumajta parlarinki chaypis, kawsayniykita runaqa qhawashasunku. Ajina kajtenqa, iglesiallapi allinta parlariwaj, semanantintaj imapis kachunta kawsanki, may kasqaykita yuyakuspa, runaykachaspa ima. Ajina kasqaykiraykutaj, iglesiamanta kajkunaqa Diosmanta karunchakunku.

Uyariy, imatachus Señor nin chayta. “Imaraykutaj qan kamachisqasniymanta parlanayki tiyanrí? Imaraykutaj trato ruwasqaypa sutintapis oqharinki? K'amisqayta qanqa mana jap'ikunkichu, nitaj parlasqaymantapis dakunkichu,” nispa. (Salmos 50:16-17).

Pipis k'achitusta parlarichunku, kawsayninkupitaj ujina chayqa, paykunaqa puraj uyas kanku, chay puraj uya kaytaj millachin Señorta, chayraykutaj nin: “Simiyanta ajtumusqayki,” nispaga.

Arí, rikunchejña q'oñiyasqalla kajkunaqa, yuyakunku allillan kashasqankuta. Ajinataj paykunaqa “Ruphas” kasqankuta yuyakunku, jinallataj paykunaqa ni ima juchayoj kasqankuta ima yuyakunku. Arí, chaywampis mana tukuychu ajina kanku, imaraykuchus wakenqa sonqochasqallaña kakunankutaqa, paykunallamanta kallpakunku allin kawsayta mask'aspa. Chayraykutaj chiris, manachayrí wañusqas jina kashanku; ajinamanta Salvajninkupi munakuyninkuqa, creeyninkupis qhasimanakajlla.

Q'oñiyasqalla kajkunapajqa, ajinallapuni kanqanku chayqa, mana remedio kanqachu, wijch'usqa kanallankupajña allin kanqanku. Paykunapaj tiyan k'acha willay, Cristoman chimpakunqanku chayrí, atinku salvasqa kayta. Paykunaman, Señorqa nin: “Qanta yuyaychayki noqamanta rantikunaykita ninapi ch'uwanhasqa qorita, cheqamanta qhapaj kanaykipaj... Yuraj p'achata p'achallikunaykipaj, ama q'alalla kasqaykej p'enqaynin rikukunampaj. Yuyaychallaykitaj rantikunaykita ñawisniykipaj ñawi jampinata, rikuyta atinaykipaj,” nispa. (Apocalipsis 3:18). Ari, Diosqa munan paykunapis Payman kutirikunankuta.

Munasqa Dios Tatayku, llimphu sonqoyoj kayman tukuchiwayku ari. Uj k'ata Churiykej yawarninwan mayllawayku sonqoykuta. Jesucristo Salvajniykoj sutimpi. Amén.

Agosto 3

“Qanta yuyaychayki, noqamanta rantikunaykita ninapi ch’uwayasqa qorita, cheqamanta qhapaj kanaykipaj...” (Apocalipsis 3:18)

Señorpa salvasqan runaqa, “q’oñiyasqalla” kashanman chaypis, Diospa k’amisqanta uyarispaqa kutirikun, Diospa perdonninta mask’aj; ajinamanta Diospa Qhasilla K’acha Yanayninta uyarispa jap’ikun. Ajina kajtenta, Diospa siminmanta mana “ajtusqachu” kanqa. Cristoman chimpaspa perdonninta tarisqanrayku, tukuy imatataj Diosmantaqa jap’ikunqa.

Chaywampis mana paykunallachu salvaciontaqa taringanku; manachayqa, pikunachus Diospa Leyninman jinalla kawsajkunapis, atinku chimpakuyta munasqa Señorninchejmanqa. Jinallataj, pikunachus kutin kutinta juchaman urmaspa llakiyman urmarqanku, chaykunapis atinqanku Jesucristopi perdonta tariyta. Chay tukuytaj kashan Diospa qhasilla yanapayninqa, mana chaypajjina kashajtinkupis, Diosqa munakuynimpi salvanqa. Chayrayku khuyakoj Diosqa nin: “yuyaychayki noqamanta rantikunaykita ninapi ch’uwachasqa qorita,” nispa.

Q’oñiyasqalla kajpis, Leypa wata runan kajpis, chiri sonqo kajpis atinku ruphaman tukuyta, Jesucristoj ruwasqannijllata, paykunaqa perdonasqa kanqanku, Diosmanta jap’inqanku Qhasilla k’acha Yanapayninta, jinallataj sonqochaynintawan ima.

Rupha kayta munaspa, imatapis qanllamanta ruwasqaykeqa mana valenchu. Diospis mana ajinata ruwasqaykiwan chimpajtiyki perdonasunqachu. Ñawpajtaqa, Jesucristoj ruwasqallampi atienekunayki tiyan. Diosqa, Jesucristopi qanwan munan alliyakuyta wawampaj rejsikapususpa. Arí, ajina; chayrayku kaypiqa mana ninchu qanllamanta allin ruwasqasniykiwan salvakunki nispaqa; manachayqa, munan jap’ikunallaykita Paypa Churinneja imatachus qosusqanta.

Imaynatataj Paymantarantikusunman? Paynin: “Tukuych’akichikojkuna, jamuychej yakuta ujjaj. Mana qolqeyojkuna, jamullaychej, mikhullankichejtaj. Mana qolqellawan jamuspa,” nispa. (Isaías 55:1; Apocalipsis 22:7).

Tatayku Dios, sumajtapuni yachachiwayku imatachus yachanaykuta munanki chaytaqa. Amataj pantasqa yachiytaqa. Jesucristoj sutimpi. Amén.

“Tukuy tiempo Tata Diosta bendecisaj, simiytaj Payta yupaychallanqapuni.” (Salmo 34:1)

Davidqa, jatun llakiypi tarikuspa chayta nerqa. Uj cristianopis ajinallataj atin niyta Diospa qhapaj kayninwan kawsakuspaqa. Ajinamanta Diospi kusiyninchej kallpanchej kanqa, chayrayku graciasta qonapuni Diosninchejmanqa. Apóstol Pablopis nillantaj: “Kusikullaychejpuni. Mana sayk’uspa, Diosmanta mañakullaychejpuni. Imapis kachun, Diosman graciasta qollaychejpuni, imaraykuchus chaymin qankunapaj Cristo Jesuspi Diospa munayninqa,” nispa. (1Tesalonisenses 5:16-18).

Espirituman jina kawsay qallarisqanmantapacha, Diospa wawanqa munakuywan kusiwantaj Tata Diosta jatunchanchej; tukuy imata noqanchejpaj ruwasqanmanta, kunan ruwashan chaymantapis, jinallataj khuyayninmanta ima, Diostaqa jatunchanapuni.

Ashka bendicionesta Dios noqanchejman qowasqanchejqqa, Diosta jatunchanapaj jinapuni kashan. Ajina kajtenqa, ama qonqanachu Diosman graciasta qoytaqa. Malagradecido kayqa jatun jucha kashan. Pichus Diospa Qhasilla K’acha Yanapayninta jap’ejqa, tukuy tiempo graciasta Diosman qonan kashan, jatunchanantaj kashan.

Diosmanta tukuy imata ruwasqanta rikusqanchejqqa, tukuy sonqo Diosta yupaychay munayman apawanchej. Tukuy kay pacha junt’a kashan Diospa k’acha kayninwan; jinallataj Janaj Pacha, kay pachapis Diospajatun k’anchayninwan junt’a kashan.

Diospa wawan, ashkha llakiyniyoj kashaspapis, Diosmanqa graciasta qonpuni chay Qhasilla k’acha Yanapayninta qowasqanchejrayku. Runaqa, nacesqanmantapachajuchasapa kasqanraykuqa, infiernoman wiñaypaj rinampaj kashajtin Salvajnin Jesusta rejsispa Diospa wawanman tukun, Ajinamanta jap’inampaj Diosmanta Janaj Pacha herenciata, Cristo ruwasqanraykulla.

Jinallataj, kay pachapipis uj cristianoqa, sapa p’unchay may chhika allin imasta jap’ikun. Sapa p’unchay Diospa Simi Nisqantapis jap’ikun, almanchejpaj uj mikhunata jina. May chhika imasta jap’ikunchej Diosmantaqa, chaykunamanta Diosmanqa graciasta qonapuni. Mana ajinata ruwasunman chayqa imallapajñataj kasunman? Ajina malagradecido kajtinchajqa, Diosninchejqqa mana kusijsqachu kanman noqanchejwanqa. Icharí?

Munasqa Dios Tatayku, sonqoy nanashawan mana wawayki jinachu kawsakusqaymanta. Perdonaway, yanapaway Qanwampuni kawsakuyta. Jesucristoj sutimpi. Amén.

Agosto 5

“Tukuy tiempo Tata Diosta bendecisaj, simiytaj Payta yupaychallanqapuni.” (Salmo 34:1)

Sichus qan kusiasqa kashaspa tapukunki: Imaynatataj Diosman chay kusiyniyta rikuchiyman? nispa chayqa; yuyariypuni chay kusiyyqa Diosmanta jamun. Ajinamanta Tata Diospi kusiyniykiqa cheqa kusi. Chay kusikuyniykipitaj graciasta qoypuni.

Diosqa, munan yuyarikunaykita, Paypa k'acha kayninmanta, paywan allinyakusqaykimanta; ajinamanta, ima llakiy chayamusojtimpis mana iskayrayaspa, nitaj israelitas jina thutuspa, kusiasqa ñawpajman kusiasqa rinki.

Dios rikuchisunki sut'ita, tukuy sonqo pay munakususqanta. Qampis Paypi atienekuy, ni ima sajrapis chayamusunampaj. Chay jina kaywan qallarikun Diosman graciasta qoyqa. Diospa wakichisqanwan sonqo junt'asqa kana.

Chaymanta jawataj, Diosmanta mañakuyninchejqqa, graciasta qoywan khusakachun. Tukuyimamanta astawanqa, Diosman graciasta qoypuni noqanchejpaj kusiyninchejqqa kashan: Diosninchejta jatunchana, Tata jina ashkhata munakuwasqanchejmanta, Munasqa Churinta qowasqanchejmanta ima. Jesucristo uj k'ata Churin jatun preciowan rantikuwarqanchej, Espíritu Santotaj kunanqa waqaychawanchej, sonqochawanchej ima. Qanqa, parlaykuy Diosninchejmanqa uj juch'uy wawa tatanman parlapayan, ajinata. “Janaj Pachapi kashaj Tatayku, graciasta qoyki, k'ata Churiykita qowasqaykumanta, supaypa makinmanta kacharichiwassqaykumanta, wiñay kawsaytataj qowasqaykumanta ima,” nispa.

Diosman graciasta qospaqa, runa masiykita yanapay, amapis chaypaj jinachu kashan chaypis. Wajchakunamanpis kapususqanta jaywarispa. Kay k'acha Evangeliota runa masinchejman willaspa, qolqesituwan gastopi yanapaspa ima. Amataj qonqaychu ima sajrata ruwasojkunata perdonaytapis; imaynachus Diosqa qantapis perdonasunki, ajinata.

Imatawantaj niykiman? Jesucristoj salvasqan kajkuna, Diosta munakusqanrayku allin imasta runa masisnimpaj ruwaspa, Diosta kusichin. Pichus chayta ruwajtaqa kikin Jesucristo chay creesqan Feta sinch'ichan.

Janaj Pachapi kashaj Tatayku, noqallaqa mana imachu kani. Qampa ruwasqayki kani. Tukuy sonqo jatunmanta graciasta qoyki. Jesucristoj sutimpi. Amén.

“Imatachus Moisespa leynin mana ruwayta aterqachu, runaj aychan pisi kallpayoj kasqanrayku. Chaytaqa Diosmin ruwarqa. Diosqa Churinta kachamorqa juchallikoj runaman rijch’akoja, jucharayku wañunampaj.”
(Romanos 8:3)

Maypachachus Dios Tata wakicherqa chay wiñaypaj kaynimpí, runawan Paywan allinyakunampaj, Pay kikin imaynachus kayninta tantaykorqa Jesucristo Churimpí. Ajinamanta Diosqa runaman tukorqa, chaytaj qhepa kaj Adán nisqa sutichasqa kashan, runakunawan tiyakunampaj preciowan kacharichispa.

Ñawpaj kaj qhari Adánqa, juchaman urmarqa Diospa kamachisqanta mana kasuspa; paypa kawsaynintaj tukuy mirajkunaman chimparpa. Chay juchaqa, imaymana phutiyta apamorqa runakunapaj. Chayrayku Diospa Churenqa Diospa tukuy kamachisqanta junt’arqa, tukuy runakunaj cuentanmanta. Diospa uj k’ata Churenqa, tukuy runakunaj juchanmanta castigonta Pay ñak’arerqa, “Paytaj kasukoj kaspera, wañuykama chayarqa. Jinataj cruzpi chakatasqa wañorqa.” (Filipenses 2:8).

Cristo kashan runakunaj Salvajnenqa. Paypi creespalla Dioswan allinyasqa rikhurinchej, chaytaj qallarin kay pachapi, Janaj Pachapi wiñaypaj salvasqa kananchejpaj, Janajpachaman ripusparaj junt’asqa kasun.

Cristowan Dios mosoj tratota ruwasqanqa wiñaypaj: Sonqota tiyaykuchej Diosqa, Señor Jesucristota wañusqamanta kawsarichimorqa, ovejaspa Jatun Michejnin kanampaj. (Hebreos 13:20). Payllamantataj Ñawpa Testamento willasqaña karqa. Mosoj Testamentopitaj junt’akun, Jesucristopi, Diospa khuyayninqa Payllataj noqanchijpi kashan. Paymanta parlarqa ñawpa Testamentopi, warmimanta nacej (Jesusqa) chay katarita (supayta) saruspa umanta p’altanqa, nispa. (Génesis 3:15).

Diospa Simi Nisqampi kutin kutinta nin, Abraham imaynatachus salvasqa karqa chaymanta parlaspa: “Abrahamqa Diospi (Cristopi) creerqa, chay creesqanraykutaj Diosqa cheqan runapaj Abrahanta qhawarqa,” nerqa. (Romanos 4:3). Nillarqataj: “Davidtapis... pitachus Diosqa (Cristoqa) cheqan runapaj kasqanta qhawan, chay runa ni imata ruwasqanraykulla,” nispa. (Romanos 4:6-7).

Noqanchejpis, chay Salvajllapitaj creesqanchejrayku, cheqan runapaj qhawasqa kanchej, kay pachapeqa.

¡Ay Dios Tatayku, graciasta qoyki chay jina k’acha kasqaykimanta! Qampa qayllaykipi kawsachikuwasqaykimantapis. Jesucristoj sutimpí. Amén.

Agosto 7

“Kawsayniykichejtaj Diospi pakasqa kashan Cristowan khuska.”
(Colosenses 3:3)

Uj juch'uy mayupi yaku allisitullamanta rishan chayqa, as mana yachakunchu may ladomachus rishasqanqa, icharí? Chay mayuman rumista atajota jina churaykojtinchajtaj yaku tantaykukun, junt'aykuspa wasaykojtintaj yakoqa imata jina risqan rikukun.

Chayman rijch'akun runaj kawsaynenqa. Mana salvasqa kajkunata, juchaqa allillamanta apashan wiñay chinkayman, sitajchus kawsayniman churasun Diospa kamachisqasninta chayqa, ujllata reparakunku mayman rishasqankuta, ni imanayta atispataj, munanku paykunallamanta allin ruwaykunasninkuwan salvakuyta, ajinamnta patanta phinkispa jark'aj churakunku, sajra juchankuta ñit'iykuyta munaspa, Diospa kamachisqanta junt'ayta munaspa. Apostol Pablo nin: “Leyqa churasqa karqa jucha astawan ashkhasanampaj. Jucha astawan ashkhayajtinrí, Diospa qhasilla k'acha yanapaynin astawanrajpuni ashkhasarqa,” nispa. (Romanos 5:20).

Qhawarinallataj cristianos kajkunata. Ujkunaj qhawaynimpi kawsayninchejqqa pakasqa kashan. Jinataj kawsayninchejpi chay juch'uy mayoj yakusnimpeqa, imachus mana saqeshanchu maychus rinanta jark'ashan. Chayqa kashanman jucha, chantapis juchaman tanqasqa kay ima. Ajinallapi, ujllata rijch'arin, qallarikuntaj sinch'i maqanaku noqanchej ukhupi allin kajwan mana allin kajwan.

Mana salvasqa kajkunaman, Evangeliomanta parlaykujiykiqa, sonqonta t'impurichin, maypachachus Jesucristoman kawsayninkuta jaywajtinkurrísonqonku tiyaykun, kusiytataj tarinku. Ajinamanta Jesuspa salvasqan kajkunapajqa, ima juchapis mana atenqachu imanayta, imaraykuchus kawsayninkoqa Diospa makimpiña kasqanrayku.

Wiñay wiñaypaj Dios Tatáyku, Ilimphu kawsaypi jap'íwayku, Qampa honraykipaj. Imachus kusichisunki Qanta, chaytapuni atinaykupaj ruwayta. Jesucristoj sutimpi. Amén.

“Yachanchej leyra nisqanqa leypi kajkunapaj churasqa kasqanta, kay pachapi kaj chhika runas ch’inyachisqa kanankupaj, tukuy runas Diospa ñawpaqempi juchachasqa rikhurinankupaj.” (Romanos 3:19)

Cristianos ukhupi, ashkhas kanku Diospa leyninta kasuspa salvasqa kayta mask’ajkunaqa. Chaypajtaj, anchatataj kallpakunku cheqan runa kayta munaspa, paykunaj kallpallankuwan allin imasta ruwaspa, cheqan runa kayman chayayta yuyaspa.

Chaykunamin kanku, mana manchachikuspa Diospa leyninta t’ustejkunaqa. Ajina ruwayninkoqa iskay laya runasman rikhurichin: Ujnin qotupi kajkunaqa, chay fariseokunaman jina tukunku; paykunaqa k’acha runas jina kanku, cheqanpaj qhawasqa kasqankuta yuyakunku. Chay ujnin qotupi kajkunataj, mana kusiyniyojkuna llakisqallapuni, juchasninkuman sayaykunku, paykunallamanta atipayta yuyaspa, Diosmanta mañakusqankuwan ruwasqankuwan ima. Jesucristopi Qhasilla K’acha Yanapayninta jap’inankupajqa, ñawpajta cheqan runamanraj tukuyta munanku.

Chay iskay laya qotu runasmanta, kankupunitaj ch’uwa sonqo runakunaqa; paykunaqa reparakunku Diospa Leyninta mana junt’ayta atispa llakikojkuna. Paykunaqa Diospaj t’aqasqa santo kanankupajqa, Jesucristoj ruwasqallampi atienikunku. Imaraykuchus, Jesucristopi cresqankurayku Leymanta, juiciosninmanta, juchaj atipasqan kaymanta imaqa, librasqa kanku.

Chaymanta jawataj jap’inchej sonqo tiyaykuyta, allinyakuyta, juchanchejmanta perdonta ima; chaypacharaj kosisqa Leytaqa kasunchej Jesucristopi. Ajinata ari, munasqanchejrayku, ni pejpa tanqasqan, ni juchaj atipasqan kaspachu; manachayqa, Diosta munakusqanchejraykulla imapis allenqa kayta atenqa.

Astawampis chay tukuyta Cristo ruwan, noqanchejpi Pay tiyakusqanrayku. Cristo noqanchejpi Diospaj t’aqasqa santota, cheqampaj qhawasqa kayta ruwan. Leyqa mana atinmanchu karqa chayta ruwayta noqanchejpeqa.

Munasqa Dios Tatayku, llakikuni mana sumaj creeta yachajchu kasqaymanta; nitaj maychus creenata jinaqa creesqaymantapis. Chay jina kasqaymanta perdonaway. Jesucristoj sutimpi. Amén.

Agosto 9

“... Leypaj wañorqankichej Cristoj wañusqannejta, wajpataña kanaykichejpaj, pichus wañusqakunamanta kawsarichisqa karqa, chaypata...” (Romanos 7:4)

“Noqaqa leynejta leypaj wañusqa kani, Diosllapajña kawsanaypaj,” nin. (Gálatas 2:19). Chay niyta munan, juchaqa noqanchejpí manaña atinyiyojchu. Imajtinchus mana leypa makimpichu kanchej. “Chayrayku juchataqa amaña saqeychejchu qankunapi munayninta ruwajta, imaraykuchus manaña leypa kamachiynimpichu kankichej, astawanqa Diospa qhasilla k’acha yanapaynimpí kankichej,” nispa nin Apostol Pabloqa. (Romanos 6:14).

Ashkhas mana yuyankuchu ajina kasqankutaqa. Astawampis paykunaqa, ninku: Sichus kallpakusaj, cheqamantapuni munasaj leypa nisqanta junt’ayta chayqa, Diospaj kawsayta atisaj nispa. Apóstol Pabloqa nin: “Cristo preciowan kacharichiwarqanchej leypa maldicionninmanta,” nispa. (Gálatas 3:13). Chayrayku manachus Diospa Qhasilla K’acha Yanapaynimpí makimpí kanchej chayqa; jinallataj, Leypa makillampiraj kakushanchej chayqa, juchanchejqa astawan jatunyanqa.

Ajina kashan chayqa, ichus Leypa kamachisqanman jinallaraj, noqallanchejmanta allin ruwaykunasninchejwan Diosta kusichiyta munashanchej chayqa, Diosqa chay ruwasqanchejwanqa mana sonqo junt’asqachu noqanchejwan kanqa; imaraykuchus Leypa tanqasqallan imatapis ruwayta munashasunman, manataj Jesucristoj ruwasqanwanchu.

Cheqamanta, noqallanchejmanta ima ruwasqanchejpis mana noqanchejpatachu, manachayqa Ley mat’iykuwasqanchejrayku kallpallawan ruwasqa kashan. (Gálatas 3:10). Arí, Chayqa mana Diospaj t’aqasqa santo kaychu kashan. Cristopi cresqanchej ferí, tukuy imamanta kacharichiwanchej, sut’itataj rikuchiwanchej perdonasqa kasqanchejtaqa.

Cristo niwanchej: “Noqapipuni kaychej, imaynatachus noqapis qankunapi kani, ajinata. Imaynatachus ramaqa, sapallanmanta mana poqoyta atinchu, mana uva sach’api kaspaqa, ajinallatataj qankunapis mana atinkichejchu, manachus noqapi kankichej chayqa...pillapis Noqapi kajqa, noqataj paypi, chaymá askhata poqonqa, mana noqawanqa mana imatapis ruwayta atinkichejchu,” nin Jesucristoqa. (Juan 15:4-5).

Señor, sinch’ita sayaj Feyta qoway, qanllapipuni sich’i kanaypaj. Jesucristoj sutimpi. Amén.

“Mana pipis Churinta rejserqachu; Dios Tatalla rejserqa. Dios Tatatapis nillataj pipis rejsirqachu; Churillan Paytaqa rejsirqa, pikunamantajchus Chureqa resichiyta munan, chaykunapis.” (Mateo 11:27)

Manachus Dios Churi, Dios Tatata rejsichiyta munawasunman chayqa, yanqhalla imapis kanman. Mateo 11:25, Nin: “kay imasta pakaykorqanki yachayniyojkunamanta, yuyayniyojkunamantawan, wawasmantaj sut’incharqanki,” nispa. Chaywanqa nisharqa: Chay pikunachus yuyakunku wajchas kasqankuta, wawas jina kasqankuta ima, paykunaman chay yuyaychayqa jamorqa, aswan ñawpajpi kanankupaj, pisimanta pisi astawan yachanankupaj Dios imaynachus kasqanta rejsispa. Evangeliotaqa ashkhas yuyanku runakunaj yachachisqallan kasqanta, chayraykutaj mana llamp’u soqowanchu, nitaj Diospa Simi Nisqanta jinachu jap’ikunku. Ajinata yuyajkunapaj, Evangelioqa pakaykusqa jinalla kashan.

Apóstol Pablomanqa, kikin Dios qorqa yachayta Evangeliomanta yachachinampaj. Chayrayku runaqa mana uyarinallanchu, Pabloj nisqampi jinalla yuyaspaqa, manachayqa entiendena tiyan, imatachus paykunanejta Dios nisqanta. Chayraykutaj Apostolesqa, Diosmanta mañakorqanku paykunaj yuyayninkuman Espiritu Santoj yachaynin k’anchaykunanta. Efesios 1:16-17 nin: “Manasayk’uspa Diosman graciasta qonipuni. Paymanta mañakushaspaqa, qankunamanta yuyarikunipuni. Qankunapaj mañapuykichej... qankunaman atiyta qonanta, yachayniyoj kanaykichejpaj, jinataj sut’inchayta atinaykichejpaj, chaywan Diosta aswan allinta rejsinaykichejpaj,” nispa.

Kanku ashkha runakuna, ni pita necesitasqankuta yuyakojkuna. Paykunaqa yuyanku Diosmanta mana mañakunata, Diospa Simi Nisqantapis mana necesitasqankuta; paykunaqa yuyakunku tukuy imatapis yachasqankuta. Chay jina runasqa, Diospa sut’inchayninta pisipaj qhawaspa, supaypa makimpi kashanku. Ciegos kanku wañusqas jinataj. May allinchus kanman tiempo kashajtin chayta reparakuspa Jesucristoman chimpakunankuqa.

Dios Tatayku, chay k’acha kayniyki, chay jatun yachayniyki, Salvawajniyku Churikiipi rikukun. Chaymanta graciasta qoyku. Jesucristoj sutimpi. Amén.

Agosto 11

“Chay tukuy imaqa Diosmanta jamun, pichus Cristonejta allinyachiwarqayku Paywan allinyasqa kanaykupaj. Kamachiwarqaykutaj Paywan allinyakuna kasqanta parlanaykupaj Paymanta. Kaytaj chay willay: Dios Tata cheqamanta Cristonejta kay pacha runasta Pay kikinwan allinyacherqa, runaspa juchasninkuta qonqayman churaspa. Noqaykumantaj kamachiwarqayku chay allinyakuymanta willanaykupaj.”
(2 Corintios 5:18-19)

iKaymin chay Evangelio kallpachajqa! Cristoqa kamachiwanchej, tukuy runakunaman Evangelionta willarana kasqanta (Marcos 16:15); imaraykuchus Dios Tataqa noqanchejwan Pay kikin allinyakorqa, Jasucristonejllata.

Chay “Evangelio” nispa. Griego parlaypi, niyta munan: “Allin willaykuna,” nispa. Chayta Apostolesqa Diosmanta jap’ikurqanku, chaytataj yachacherqanku. Paykunaj ceeninkoqa jatun karqa, Espíritu Santopis paykunapi junt’a karqa, imaynachus qhelqasqa kashan Hechos libropi ajina. Apóstol Pablo, nerqa: “Wawqekuna kayta yachaychej: Kunan willashayku Jesusnejta juchas pampachasqa kasqanta. Jesuspi tukuy creejkunaqa Payrayku cheqan runapaj qhawasqa kanku, imamantachus Moisespa Leyninrayku, mana aterqankichejchu cheqan runapaj qhawasqa kayta,” nispa. (Hechos 13:38-39).

Evangeliomanta imanishanchus kay 2 Corintios 5:21-pi: “Cristoqa mana ima juchatapis ruwarqachu. Diosrí noqanchejrayku Cristota castigarqa, kikin juchapis kanman jinata; noqanchej Cristopi kaspas Diospa cheqan kaynin ruwasqa kananchejpaj,” nispa nin. Romanos 5:18-19-pi, nishallantaj: “Uj runaj juchanraykulla tukuy runas juchachasqa kanku. Ajinallatataj Jesucristoj cheqan ruwasqanqa tukuy runasta juchachasqa kaymanta kacharichin, kawsaytataj qon. Uj runa mana kasusqanrayku tukuy runas juchayoj rikhurerqanku. Ajinallatataj uj runa kasukusqanrayku ashkhas cheqan runapaj qhawasqa kanqanku,” nispa.

Diosqa runata ruwasqa Payman rijch’akojta. Juchaman urmasqankumantataj sonqonta nanachikuspa, Cristopi salvasqa kaspas, watejmanta wawasnin kayta atinankupaj.

Munasqa Dios Tatayku, Graciasta qoyku Churiyki Jesucristota noqaykurayku kachamusqaykimanta; Paynejta salvasqa kanaykupaj. Jesucristoj sutimpi. Amén.

“... Dios Tata cheqamanta Cristonejta kay pacha runasta, Pay kikinwan allinyacherqa, runaspa juchasninkuta qonqayman churaspa. Noqaykumantaj kamachiwarqayku chay allinyakuymanta willanaykupaj. Ajina chayqa Cristoj sutimpi willajkuna kachamusqas kayku, Diospis noqaykunejta parlashanman jina. Chayrayku mañakuyku Cristoj sutimpi: Dioswan allinyakuychej, nispa.” (2 Corintios 5:19-20)

Chayqa sut'ipacha, Diosqa noqanchejwan allinyakun uj k'ata Churinnejta; kunantaj wajyashawanchej Dioswan allinyakunanchejta Jesucristonejllata.

iChinkaj runas kutimuychej wasiman! May chhika unaytaña Diosqa ojllaykunawanchejpaj suyashawanchej. Diosqa, Tatanchej kasqanrayku junt'asqa mosoj sumaj p'achawan suyashawanchej. Chaypajqa, mana imatapis ruwananchejchu kashan; imaraykuchus Cristopi creenki chayqa, qankunawan Diosqa allinyakunña. Evangelioqa mana nisqallarajchu, manchayqa Diospa ñawpa nisqasnimpaj junt'akuynin kaypiña kashan. Evangelioqa mana willakuyllarajchu, manachayqa Luteru nin jina: “T'ukuna jatuchaj imas Diospa nisqasninpaj junt'akuynin. Noqanchej creesumpis amapis Dios nin chayqa, junt'akumpuni. Salvasqa kananchejqa mana noqanchej imayna kananchejmantachu, Paypa munakuyninraykulla,” nispa

May chhika runakuna, mana rikushankuchu Evangeliopipi Dios salvacionta wakichisqantaqa, nillataj Paywan allinyakuna kasqantapis reparashankuchu. Paykunaqa, suyashallankupuni, jayk'ajchus perdonasqa kanankutaqa. Mana reparankuchu Diosqa Jesucristonejta runawan allinyakusqantaña, juchasninkupis pampachasqaña kasqanta. Mana ajina kanman chayqa, Evangelioqa, mana sumaj willaychu kanman. Diospis manallataj ajinata ninmanchu karqa. Evangelioqa yachayta qowanchej, chay sumaj willay ruwasqaña kasqanta, Jerusalén llajtamanta jawapi junt'akusqanta, chay jatun cruzpi wañuspa.

Kay pachapi tukuy juchas pampachasqaña, qonqayman churasqaña, Jesucristoj wañuyninrayku. Chay kashan Evangelioqa. Payman chimpanallaykiña faltan.

Janaj pachapi kashan Tatayku, yanapaway chayta creeyta tukuy sonqo; jinallataj Qan salvawarqanki, Churiyki Jesusnejta. Amén.

Agosto 13

“Diospa contrampi kashasparaj, noqanchejqqa Churimpa wañuyninnejta Dioswan allinyachisqa karqanchej...” (Romanos 5:10)

Ashkha runakuna manapuni creeyta munankuchu ajina kasqanta salvasqa kanankupajqa; nillataj creenkuchu, Diosqa ajinata Cristonejta runawan allinyakunatapis. Paykunaqa, yuyanku chay tukoyqa k'acha runasllapaj, cheqan sonqo runallawan Diosqa allinyakusqanta, ajinata yuyanku.

Cristoqa, Evangelionejta wajyashan jatun casarakuy raymiman, kay jinata nispa: “Jamuychej sumaj wakichisqaña kashan”, nispa. Chayta mana creejkunataj, chayman kutichinku: “Noqaqa juicio p'unchaytaraj suyakunay tiyan, kunanqa mana yuyanichu chay raymiman riytaqa. Chaykamataj wakichikunayraj tiyan, imaymana allin ruwaykunasniywan, Diosta kusichinaypaj,” nispa.

Diospa Qhasilla K'acha Yanapaynin Evangeliopipi creejkunapis, chay imaspi yuyaspa wakin kuteqa pantankuraj. Chayqa ajina, imaraykuchus yuyanku ñawpajtaqa noqallamanta allin ruwasqaywan wakichikunaraj tiyan nispa: arrepientekuspa, allin runamanraj tukuspa, chaymantaraj Cristomanqa chimpana kasqanta yuyasqankurayku. Diospa Simi Nisqan Biblia, Evangelio ima, imatataj nin?: “Ch'akichikojqa jamuchun, munajtaj, kawsay yakumanta qhasilla ujjachun,” nispa nin. (Apocalipsis 22:17).

Sichus ninki: “Casaraku raymimanqa mana riymanrajchu mana wakichikuspallaqa,” nispa chayqa. Ajinata nispaqa, ichus niyta munanki: Paran parantaraj waqanay tiyan, arrepientekunaypaj, ajinamanta salvasqa kanapajqa nispa? Kunanpacha pipis munajpajqa, “kawsaj yakuta atin ujjayta qhasilla, ni imata ruwaspalla.” Sichus yuyayniyki nishanki: “ojalá noqapis jap'ikuyma qhasilla munakuyta, chanta creeman.” nispa. Ajina kajtinga, kunan pacha saqey chay qanllamanta allin imasta ruwayta, riy Diospa sonqo tiyaykuynimpi kusikamuy, imaraykuchus qampaj Jesucristoqa tukuy imata ruwanña.

“Jamuychej noqaman”, nin Señorqa. Nillantaj: “Riy usqayta kay llajtaj plazasninta, callesninta ima, pusaramuytaj tukuy wajchasta, ñuk'usta, ciegosta, cojosta ima,” nispa nin Señorqa (Lucas 14:21). iTukuy imapis wakichisqaña, riychej kunanpacha!

¡Oh! Dios Tatayku, tukuy sonqoykuwan agradecikuyku, mana noqaykupaj jina kashajtin, munakuyniyki Jesucristo Churiykinejta noqaykuman jamuchun. *Jesucristoj sutimpi. Amén*

“... Mana ninichu noqa chay t’inkata taripasqaytaña...” (Filipenses 3:13)

Diospa Espiritunnejta runasqa watejmanta nacekunko. Pay chay sajra mosqoymanta jina rijch’arichin, reparakunankupaj Dioswan allinyakuna kasqanta, ajinamanta kusiyniyoj kanankupaj; jinallataj reparachin Diosmanta t’aqasqa llakiymantapis. Evangelionejtataj ñawisninku kicharikun, ajinamanta rikuyta atinankupaj chay k’acha pakasqa imasta. Chanta runaswan kikin Dios allinyasqa kasqanmanta Esp’iritu Santoqa reparachin. Chaypi qallarikun cheqamanta runaj wiñay kawsaynenqa, imaraykuchus chaypi yachakun Diospa perdonasqanqa.

Ajinamanta Jesucristoj salvasqampa espiritonqa, cheqamanta llamp’u sonqo, ch’akisqa, sayk’usqataj kaspasqa Diospa kallpanta mask’aspa, chaypi sonqo tiyaykuyta kusiya ima tarin, Jesucristoj kallpampi, Payllapitaj kawsayninqa kashan.

Chayqa ajina, imaraykuchus Diospa Qhasilla K’acha Yanapayninrayku, Diospa wawasnenqa Paymanta kallpachakunku, Janaj Pachapi kashaj Diospa munakuynimpi kawsaspa. Paykunaqa Esp’iritu Santo pusaykachasqan kanku, paykunapi imaynachus karqa qallariypi Diospa ruwasqan, ajinata kawsanankupaj. Ajinata kawsaspataj, munankupuni Salvajninku Jesucristota astawan munakunku; chaytaj aswan llamp’u sonqo kayman tukuchin. Tata Diosta yupaychayninkupipis kusikuywan yupaychanku; wakin kutis kusiyninku pisiyan chaypis Cristoman astawan astawan chimpakunku, kusiyninku yapasqa kanampaj.

Paykunaqa, mana Cristowanqa mana kayta atinkuñachu, imaraykuchus paykunamanqa Diospa Simi Nisqan astawan qon yachayta. Ajinamanta sapa kuti aswan yachayniyojman tukunku. Pikunachus qallarishaspa, yuyarqanku wawas jina kasqankuta, paykunataqa kikin Espiritu Santo yachachin imaynata wiñanankuta.

Chay llamp’u sonqo kayqa, espiritualmente wajcha kaypis, Jesucristopi kusiyniyoj kayta yachachiwanchej. Wakinrí, chaypi atin tukukapuyta maypachachus sumaj runañña kani nispa yuyasqankupi pantasqankurayku. Imaraykuchus chay pantayqa jamun, payllamanta imapis kasqanta yuyasqankurayku; mana Diosman kutirikojtinkoqa, chaypi tukukapunman.

Munasqa Dios Tatayku, perdonaway mana ancha creej runa kasqaymanta. Mashkha kuti creesqay fetapis mana jatumpajchu qhawarqani, chay tukuymanta perdonaway. Jesucristoj sutimpi. Amén.

Agosto 15

“... Chay chayamunan p’unchay junt’akojin, Dios kachamorqa Churinta uj warmimanta nacekunampaj, Leyta kasuspataj kawsanampaj. Jinaspataj Leypa kamachimpi kajkunata preciowan kacharicherqa tukuyinchej Paypa wawsnin jina rejsisqa kananchejpaj.” (Gálatas 4:4-5)

Diospa Churenqa, nacenan karqa uj runa jina, kawsanantaj karqa Leypa nisqanta kasuspa, ajinamanta junt’ayta atinampaj, noqanchejta Diosqa wawampaj rejsikapuyta atinawanchejpaj. Diospa Churenqa, noqanchej jina runaj Churinman tukorqa; noqanchej runakunaj wawasnenqa Diospa wawsnin kayta atinanchejpaj.

Isaías profetanejta, Diospa Espiritonqa nerqaña, chay wawaj nacekuyninmanta, jinallataj chay wawaqa preciota pagaspa runasta juchankumanta kacharichinanta, kay jinata nispa: “Qanqa paykunata phaskaranki yogunkumanta, Ijrasninkupi k’aspismanta, sinch’i llakiypi jarap’asqa kasqankumanta ima... uj wawa nacepuwanchejña; Dios uj wawata qowanchej,” nispa. (Isaías 9:4,6).

Chay llasa yugoqa karqa chay Ley: “Cristoqa kacharichisqata kacharichiwarqanchej. Chayrayku kacharisqa kaypeqa sinch’ita sayaychej, amataj ujtawanqa kamachi yuguman watakuychejchu,” nispa nin. (Gálatas 5:1). Chay ñak’arichejpa kamachinan tojnupis Leyllataj sonqonchejpa yuyayninta wajtaj tojnu karqa, ch’ataykunawanchejpaj juchachanawanchejpaj ima.

Diospa Churin runaman tukuspa aychallikusqanqa, may t’ukuna kashan. Chaymanta parlashan Bibliapi: “... Mana munarqankichu jaywanasta, ofrendasta, uywa wañuchisqa q’olachinasta, jucharayku jaywanasta ima, nispa. Chaykunaqa leyman jina jaywasqa kananku karqa. Chantá nillargataj: Kaypi kashani, Diosniy, munayniykita ruwanaypay, nispa. Ajinamanta ñawpaj kajta tukuchin qhepan kajta cuentanmanta churanampaj,” nispa. (Hebreos 10:8-9). Chayta nispa Diospa Churenqa nisharqa: “Diosniy Tatáy, manaraj jamushajteyqa, ashkha uywata wañuchispa q’olachej kanku, chaytataj qampuni ajina kananta kamacherqanki. Chayllawanqa mana Qanwan allinyakuyta aterqankichu. Noqaj cuerpoy chay uywaspaj cuentanmanta jaywasqa karqa Qampaj q’olachinata jina. Tataj munasqanta ruwaspa, juchata kay pachamanta chinkachinaypay,” nispa.

Munasqa Dios Tatayku, munarqanki Iglesiapi kajkunawan ujlla kanaykupaj. Chaymanta graciasta qoyki, mana sapaychu kashani. Jesucristoj sutimpi. Amén.

“Noqa sumaj michej kani...” (Juan 10:11)

iJuchasapa runapajqa, kay nisqasqa jatun sonqochay kashan! Ajinamanta pisi kallpa kasqankuta yuyakojkunapis sumaj sonqochasqas rikhurinku, Cristoj ovejasnin kasqankurayku. Sumaj Michejqa jatun munakuyniyoj, chay munakuywantaj ovejasnintaqa michin. Chay ovejasninraykotaj tukuy imata allimpajpuni ruwan, mana chinkanankupajtaj kikin Jesucristo kawsayninta qon. Jesusqa manaraj cruspi wañushaspa, nerqa: “Sumaj michejqa ovejasniyrayku kawsayninta churan,” nispa. (Juan 10:10).

May jina kallpachasqa rikhurinchej, Jesucristo tukuy atiyiniyojpi atienikusqanchejrayku; Janaj Pachapi, jinallataj kay pachapipis jatun atiyiniyoj kasqampi atienikuspa. Tukuy imamanta astawanqa ujchhikan pisi tropa kashaspapis, Jesuspi creesqanchejrayku wañuchisqa kananchejpaj qhawasqa kashajtinchejpis, Pay waqaychawanchej munakuynimpi.

Chayrayku noqanchejqa wajcha juchasapastaj kashaspapis kusikunanchej tiyan, Dios munakuynimpi pusaykachakuwasqanchejrayku. Payqa niwanchej, munasqa ovejasninta jinapuni michiwasqanchejta. Imaraykuchus Payqa yachan noqanchej kikinchejqa, atojkunamantaqa mana jark’akuyta atisqanchejta. Arí, Salvawajninchej michiwajtinchejqa, ni pi imanayta atiwasunchu. “Imaraykuchus Diosqa qankunaman churan munanaykichejta, ruwanaykichejtataj Paypa k’acha munayninrayku,” nispa nin. (Filipenses 2:13).

Señorpa chay nisqanman jinaqa, nishawanchej noqallanchejmanta imapis kasqanta yuyasqanchejqa yanqhalla... imaraykuchus, “Janaj pachamantapacha Tata Diosqa runasta qhawamun, ujllatapis sumaj yuyayniyoj, Diosta mask’aj runata rikuyta munaspa. Tukuytaj sajra ñanta jap’irinku, tukuy runas sajra kawsayman qokunku; mana pipis allinta ruwaj kanchu, ni ujsitullapis,” nispa nin. (Salmos 14:2-3).

“Kunitan allinta unanchariy.” Kallpayki, tukuy qanllamanta ruwasqayki salvakuyta munaspa, mana salvasuyta atinqachu. David jina qonqoriykukuspa Diosman kunanpacha, niy: “Chinkasqa oveja jina purerqani; jamuy, noqa kamachiykita mask’away, ari, imaraykuchus kamachisqasniykitaqa mana qonqapunichu,” nispa. (Salmos 119:176). Mana ruway atisqayki yuyayniyki kachun, mañakuy Paypa khuyakuynillanta. Mana Dios qosunkiman chayqa, tukuy imapis yanqhalla kanman, imaraykuchus qanqa uj oveja jinaqa, Michejnillaykipi allin kanki; sapaykiqa chinkapuwaj.

Munasqa Dios Tatayku, mana cree atisqaykuta qanman jaypuyku, yapawayku fenyikuman ajinamanta creenaykupaj, chay cheqa feta qowayku. Jesucristoj sutimpi. Amén.

Agosto 17

“Noqaqa kamachiy Davidta kutirichimusaj, paytataj ovejasniyta michinampaj churasaj. Pay ovejasniymanqa sumaj q’achuta mikhuchipuwana, sumajtataj paykunata michenqa.” (Ezequiel 34:23)

Señor Jesucristoqa, nin: “Noqa sumaj michejkani,” nispá. (Juan 10:11). “Noqamanta ñawpajta jamorqanku, chaykunaqa suwas karqanku.” (Juan 10:8). Kaypeqa aswan jatun nisqaqa kashan: “Sumaj Michej,” nispán.

Qhepampitaj sut’inchashan: Cristolla “Sumaj Michej kasqanta.” Pay k’atalla kashan chay Michejqa, paymanta jawaqa, mana kanchu waj.

Ajinata nispaqa, noqanchejta ashkhata kallpachawanchej, jinallataj imachus yachana kashan, chaytapis ch’uwata yachachiwanchej. Chayrayku iglesiapeqa, mana mayqen runatapis ancha jatumpaj qhasunchu, diospis kanman jina atienikuspaqa. Ajinata qhawasunman chayqa, pay maymampis ripojtin, manachayqa wañupojtin imaqa, mana piniyoj jina rikhurusunman. Chaypis chaylla kanman, sichus chay jatumpaj qhawasqayki runa Diosmanta karunchakunman chayqa, qampis yuyallawajtaj karunchakapuyta paywan khuska. Icharí?

Pimanchus k’umuykunayki, atienekunayki imaqa Señorninchej Jesucristollapi kashan, imaraykuchus Pay noqanchejpajqa Sumaj Michejninchejqa kashan. Kaypi jaqaypi uyarishawaj pitapis predicajta chaypis, almaykeqa kallpachasqa kanqa Jesucristollapi, Biblianejta. Chayraykutaj David jina atiway niyta: “Tata Diosqa michejniy, ni imata pisichiwanachu,” nispá. (Salmos 23:1).

Sichus pipis: Iglesiapi sumajta yachachej, may jina misk’itapis yachachichun, mana Cristoj yachachisqantachu, nitaj apostolespa yachachisqantachu yachachishan chayqa, mana cheqan Evangeliotachu yachachishan. Ajina kajtenqa, paypis Diospa yachachisqanraj kanan tiyan, chaypacharaj paypis niyta atenqa: “Tata Diosmin michejniy...” nispáqa.

“Dios Tatayku, Espíritu Santoyki yachachiwachuyku imatachus mana yachasqaykuta yachakunaykupaj. Sumajta yachakusqaykuwan supaypa llulla tentacionesninman palabraykiway sayaykunaykupaj.”

Munasqa Dios Tatayku, Qan munarqanki Iglesiapi kajkunawan ujlla kanaykupaj. Chaymanta graciasta qoyki, Jesucristoj sutimpi. Amén.

“Noqa Sumaj Michej kani, Sumaj Michejqa ovejasninrayku kawsayninta churan.” (Juan 10:11)

Sonqoykita tiyaykuchiya munawajchu, Diospa qayllitampi mana tukukuyniyojta kawsakuya? Ajina kajtenqa, espiritual ñawisniykiwan qhaway Cristota, uyariytaj Paypa nisqanta: “Noqa Sumaj Michej kani, Sumaj Michejqa ovejasninrayku kawsayniya qoni,” nispa nisqanta. Chay nisqampi creenkipuni chayqa, sonqoyki kusiqa kanqa.

Diosmanta mañakuy khuyasunanta, sonqochasunanta, yuyayniykita kicharinanta ima, espirituykej ñawisninta kicharipa Paypa munakuyninta rikunaykipaj, nisqanta uyarinaykipaj ima. Ama qonqaychu pichus parlashasusqanta. Tukuy mañakusqaykitapis payqa uyarisunqapuni, imaraykuchus payqa Michisujniyki kashan. Pay nisunki: “Noqa Sumaj michej kani, Sumaj Michejqa ovejasninrayku kawsayninta qon,” nispa nishan, munakoj Señorninchejq.

Unanchaypuni chay nisqasnimp. Yuyarikuytaj imaynatachus kawsayninta qorqa ovejasninrayku, chay llaa cruzta calvariokama apasqanta, imaynatachus chay ñak'ariypi sapan rikhuriqanta. Wañuchinankupajpis uj uywata jina qhatatasqankuta, Diospa Churin kashaspa ajinata noqanchejrayku ñak'akarerqa. Uyarishankichu imaynapunichus karqa chay nisqan: “Kawsayniya qoni,” nispa nisqanta?

Chay tukuyti yuyayninchejta churaspaqa, sonqonchej wawayarin, reparakunchej sonqonchejtaj tiyaykun, juchanchejmanta noqanchej ñak'arinanchej kashajtin Pay chay jina phutiya ñak'arerqa. Noqanchejpa makisninchej cruzman clavasqa kananmanta, Paypa mikisnin chakisnin clavasqa karqa. Rikushankichu? Sut'ichu kashan?

Chay sonqoyki manachu ninman: Munasqa Señorniy, chay jinatapuni munakuwasqankiqa, nispa? Arí, Diospa Simi Nisqan Bibliaqa chay tukuya nishawanchej. Qampa sonqoykirí imaynachus kashampis, noqaj sonqoyqa kharkatitin chayta uyarispaqa. Kusikuni salvasqaña kasqaymanta, ajinapis khatatishanjuchasapa kasqaymantapis.

Dios Tatayku, anchatapuni agradeceyki chay chhikan munakuyniykimanta, mana chaypay jina kashajtiypis, noqarayku ñak'arirqanki. Jesucristoj sutimpi. Amén.

Agosto 19

“Chayraykumin Dios Tataqa munakuwan, imaraykuchus kawsayniyta wañuymán jaywani, chaymantataj kawsarillasajtaj. Mana pipis mana munajta wañuchiwanmanchu, astawanqa noqa kikiymanta wañuymán jaywakuni. Atiyniyoj kani kawsayniyta wañuymán jaywanaypaj, jinallataj watejmanta kawsarimunaypajpis. Chay kamachisqataqa, Tataymanta jap’erqani, nispa nerqa Jesusqa.” (Juan 10:17-18)

“Kay kamachisqataqa Tataymanta jap’erqani,” nispaqa, niyta munan: Cristowan supaywan maqanaku tinkoqa, mana kay pacha tinku jinallachu karqa, unaymantapapacha wakichisqaña karqa. Diospa Churenqa kay pachaman jamorqa, Tatan kamachisqanrayku; jamorqa, ñak’aripa wañunampaj, tukuy salvasqa kananchejpaj.

Jesús ajinata sut’incharqa Tatampuni wakichisqanta, chaytaj junt’akusharqa imaynachus wakichisqa kasqanman jina. Ovejaspa cuentamanta Michejninku wañunan kasharqa.

Jesupa chay ñak’aripa wañusqanqa, juchamanta pagasharqa wiñaypaj. Ñawpa Testamentopi, Israelitas uywa wañuchisqanta Diosman jaywasqankocha, sapa kuti ruwaj kanku, manataj junt’asqata junt’arqachu. Diostaj ajinata wakicherqa, chaytataj rejsicherqa: “Diospa Corderon” Jesucristo uj p’unchay jamunanta, chayta junt’anampaj uj kutillata wiñaypaj.

Chay tukuyta sumajta entiendespaqa, qan kikiyki reparanki, manañataj yuyankiñachu Allin runamanraj tukunayki kasqantaqa (chaytaqa ni jayk’aj atinkichu) salvasqa kanaykipajqa. Chaywanqa qan kikiyki reparakunki tukuy kawsayniyki Diospa qhesachasqan castiganapaj jina kasqaykita. Chayrayku, Diospa Churin wañunan karqa, salvasqa kananchejpaj, chay wiñay wañuymantaqa kacharichivasun.

Diospa wakichisqanta junt’aspa Cristoqa, chay allinyakuyta noqanchejpaj tarerqa. Chayrayku Dios Tataqa perdonawarqanchej tukuy juchasniykimantaqa.

Manaraj kaypacha kashajtin, Diosninchejqqa wakicherqaña, Churin kay pachaman jamuspa juchasapaspa cuentamanta wañunanta salvasqa kananchejpajqa, chantá kawsarimpunallantataj.

Chay jina k’acha sonqo Tata Diosqa tukuy noqanchejwanqa; chayraykutaj Paytaqa, tukuy sonqo yupaychanallanchejpuni tiyan.

Dios Tatayku, ni jayk’aj junt’aykimanchu chay jinatapuni munakuwasqaykimantaqa. Jatunchayki, yupaychayki. Jesucristoj sutimpi. Amén.

“Kaymin chay wiñay kawsayqa: Qan k’ata cheqa Diosta rejsisunanku, kachamusqayki Jesucristotapis.” (Juan 17:3)

Jesucristoqa nin, wiñay kawsayqa Diosta rejsiy kayqanta. Chayraykutaj Payqa k’amin pantasqata yuyayninkupi Diosmanta jap’ikujkunata.

Tukukuy Juicio p’unchaypi ashkhas nenqanku: “Señor... sutiypiki sut’incharqayku, sutiypitaj supaykunata qharqorqayku, sutillaykipitaj ashkha milagrostapis ruwarqayku?” nispa. Señortaj kutichenqa: “Ni jayk’aj qankunataqa rejserqaykichejchu. Chinkaychej ñawpaqeymanta, sajrata ruwajkuna,” nispa. (Mateo 7:22-23).

Ajinallataj nerqa chay wampu sipaskunamanta, chay pikunachus creesqanku feninkojpa k’anchayninkuta mana jap’ichispalla, casaraku wasiman yaykuyta munasqankumanta: “Qankunataqa mana resiykichejchu,” nispa nerqa paykunata. “Rejsiy” simi nisqaqa, ancha t’ukuna kashan. Juicio p’unchaypeqa, Cristota wakinkuna nenqanku: “Qanwanqa mikhorqayku ujarqayku, yachachisqasniykita uyarerqayku plazasniykupi,” nispa. Paytaj kutichenqa: “Mana yachanichu maymantachus kasqaykichejta,” nispa. (Lucas 13:26-27).

Chay tukuyta ñawirispaa, kutin kutinta uyarinchej Diosta allinta rejsinamanta Jesucristoj parlasqannejta. Ajinamanta yuyayniyoj runaqa cuentata qokonqapacha, imayna jatunchus Diosta rejsey kasqantaqa.

Tarso llajtayoj Sauloqa, may chhika watasta pantasqa yachachiypi kawsarqa. Jinallapi uj kutipi rijch’arichisqa karqa, reparakorqataj pantasqa kashasqanta; ujllata “ninamanta orqhosqa brasas jina karqankichej,” nispa nin, chay pantayninkumanta Diosman kutirikusqankuqa. (Amós 4:11). Chaymantapachataj Pabloqa, chay chakisnin, makisnin clavasqa “Runata” rejserqa. Chayraykutaj payqa, may jina kusikuywan Paymanta tukuyman parlarqa tukuy kawsayninmpi. Wañunankama Diosta jatuncharqa, chay Qhasilla k’acha Yanapayninta jap’ikusqanrayku, ñawpa kasqantapis q’opata jina qhawarqa.

Cheqamanta Jesusta rejsisqanchejqa, cheqallamantataj rikukun Diosman kutiririkusqanchejqa.

Munasqa Dios Tatayku, noqaykoqa jallp’alla kayku, mana Qanwanqa mana imachu kayku. Graciasta qoyku chaymanta. Jesucristoj sutimpi. Amén.

Agosto 21

“Tukuyninchej ovejas jina chinkaraporqanchej, sapa ujtaj munasqanchej ñanta riporqanchej. Tata Diostajrí tukuyninchejpa juchasninchejta Payman q’epiricherqa.” (Isaías 53:6)

Kaypi qhelqasqa kashan, “tukuyninchej ovejas jina chinkaraporqanchej.” Kay pacha ch’innej kawsaypi, ajinata chinkaraporqanchej sapa uj jap’isqanchej ñanta riraporqanchej.

Diospa Simi Nisqan Bibliaqa willawanchej, Dios imatachus ruwasqanta chinkasqaskunata salvanawanchejpajqa, nin: “Tata Diostajrí tukuyninchejpa juchasninchejta Payman q’epiricherqa,” nispa.

Allintapuni t’ukuriy, Diospa Espiritun imaninchus chayta: “Sapa ujtaj jap’isqanchej ñanta riraporqanchej,” nin. Chayta nispaqa nishan: Diospa nisqampeqa parlashan, noqanchej munasqanchejman nija imatapis ruwasqanchejmanta. Chay ruwayninchejpitaq mana dakurqanchejchu Diospa nisqasninmantaqa. Ajinamanta sapa p’unchay, astawan chinkayman ripusharqanchej.

Paykunaqa yuyarqanku, salvasqa kanapajqa allin kawsaynoyiraj kaspas Diosman chayallasaj nispa; chaywampis juchanchejmanta ñak’arinaraj kashan nispa ima. Wakinkunataj ninku, aswan unayta Diosta yupaychaspas kana tiyan, jinallataj Diosmanta mañakuspapis unaytaraj qonqurikuna tiyan, nispa. Profetari chay tukuymanta parlaspa, nin ajinata ruwajkunaqa: “jap’isqanku ñanta ripuy kasqanta.” Ajina kajtenqa, ni jayk’aj junt’asunmanchu Diospa kamachisqantaqa. Qanqa juchawan p’ampasqa kanki, manataj atiwajchu qanllamanta chayta ruwaytaqa. Juchaykimanta may jinata waqaspapis, manapuni atiwajchu salvasqa kaytaqa.

Imaynatataj salvasqa kawaj? Uyariy Diospa nisqanta: “Señortaj Payman q’epicherqa, tukuyninchejpa juchasninchejta.” Arí, Jesuristo apan tukuy juchasninchejtaqa.

Diosqa rikuwarqanchej, uj ukhu t’uru jina juchanchejpi sik’iykachakojta, juchasninchejmanta kacharichikuyta munaspa. Ajinapi rikuspataj Diosqa khuyawarqanchej, chayraykutaj Churinta kachamorqa. “Paykikin cuerpompis juchasninchejta k’aspi cruzpi aparqa,” nispa nin (1 Pedro 2:24). “Noqanchejrayku Cristota castigarqa kikin juchapis kanman jinata,” nispa ima nishan. (2 Corintios 5:21). Qampa kawsayniykipis kanman jina, Jesusta juchacharqa, qan llimphito kanaykipaj.

Dios Tatayku, Qanqa wajyakunki sonqonkupi wajchas kajkunata perdonanaykipaj. Imachus cheqa kajta rikuchinaykipaj ima. Gracias Señor. Jesucristoj sutimpi. Amén.

“Noqaqa ovejasniyta rejsini, paykunataj parlasqayta uyariwanku, qhepaytataj jamunku.” (Juan 10:27)

Maypachachus uj runa Diosmanta karupi kashaspa, Sumaj Michejpa munakuyninta jap'ikun, Jesucristoj waqaychanampitaj atienekun chayqa, munakuy paypi junt'a rikhurin, chaymantataj pay kikin munakuyta qallarín. Chay kashan Cristota rejsisqanrayku allin poqoykunaj qallariyninqa.

Imaynatataj pitapis munakusunman mana rejsispallari? Manachus sonqoykipi Jesucristo kanman chayqa, mana atisunmanchu munakuytaqa. Jesucristo noqanchejpi kawsajtillan, cheqa munakuyqa noqanchejpi kanqa.

Maypachachus Cristo nin: “Ovejasneyqa uyariwanku, qhepaytataj jamunku,” nispá. Jamoj p'unchaykunapi femanta iskay señales kananta parlan. Ñawpajtaqa, Señorpa ovejasnenqa Michejninkoj parlasqanta uyarispa, espiritunkupi atiyta jap'inku. Qhepantaj kashan, Michejninkoj parlayninta uyarispa, kasuspa qhepanta qhatinku.

Salvajninkoj ikunta uyareyqa niyta munan, Bibliapi Señorpa parlasqanta uyariy kashan, mana wajpaj parlasqantachu. Uyarispataj, Jesuspi creejkunaqa kasukuspa qhepanta rinku, sapa p'unchay Paypa perdonnimpi kawsaspa. Cristoj ovejasnenqa Payta jatunchanku, sapa p'unchay khuska kawsakuspa. Paypa Simi nisqampi tukuy nisqanta uyarispa.

Maypachachus supay, Diospa wawanta tanqaspa juchaman urmachiya munashan chayqa, Diosmanta mañakujtinku kallpata qon, ajinamanta paykunapi Jesucristo atipan kallpata qospa.

Imapis paykunapi mana allin kajtin, nitaj imatapis ruwayta atijtinkupis, Jesucristoman rijtinkoqa kallpata tarinku. (Salmos 51:12). Tukuy sonqo munanku Sumaj Michejninku Jesucristoj parlayninta uyariytaqa, ajinamanta qhepanta qhatikunku.

Dios Tatayku, graciasta qoyku sapa p'unchay, imaraykuchus Qanqa Qhasilla K'acha Yanapayniykita qowayku Jesucristoj Evangelionnejta. Makiykipipuni pusaykachakuwayku ari. Jesucristoj sutimpi. Amén.

Agosto 23

“... Ovejasniyta rejsini, noqajta kajkunataj rejsiwanku. Imaynatachus Dios Tatayqa rejsiwan, ajinallatataj noqapis paykunata rejsini, kawsayniytataj ovejasrayku wañuyman jaywani.” (Juan 10:14-15)

Mayjinak'achituchus kamps Dios Tata, Churinwan kawsakuyninkoqa. Paykunapeqa munakuylla tiyan. Rejsinakuywan munakuywan khuskaqa, mana ujwan ajina kanmanchu. Cristoqa, ajinata ovejasninta allinta rejsin, jinallataj munakun. Arí, chay misk'i munakuy Paykunataqa khuskata jap'in.

Chantapis, imaynatachus Dios Tata munakun Churinta, ajinallatataj noqanchejtapis munakuwanchej. Chayqa may kusiypuni kashan noqanchejpajqa.

Chay k'acha willaykunaqa, ichus wakinpajqa pakasqa jinalla kspa jinashan, imaraykuchus pisi kallpa kasqankurayku mana jap'inkuchu. Wakin kutisqa, jatuchaj juchaman tanqasqa rikhurisqankurayku, llakisqaslla phutisqaslla purinku. Ajina kaspataj Diosmantaqa mana anchata yuyarikunkuchu. Chayraykumá sonqochakuytapis mana atinkuchu.

Ajina kajtenqa, wakin kutis, Señorninchej Jesucristoqa noqanchejmanta pakakuspa jinan, mañakusqanchejta mana usqhayta uyariwasqanchejrayku qonqasqapis kashasunman jina yuyakunchej.

Mashkha kutis, kawsayninchej pisi kallpaman tukujtin supayqa larwashaj flechasninta kachaykamuwanchej. Yuyayninchejman churan juchanchejmanta castigasqapuni kananchej kasqanta, ajinamanta astawan llakiyman churawanchej.

Cheqamanta mana pipis atinchu ajina kasqanchejta yachaytaqa, ovejasta michej Cristolla chaytaqa yachan. Chayrayku Payqa nin: “Noqaqa ovejasniyta rejsini,” nispa. Arí, Paylla, Pay k'atalla atin pitapis sonqochayta. Payqa, noqanchejwampuni kashan, q'omer ch'ikisman pusawanchej, kallpayoj kananchejpaj, allillamanta rej ch'uwa yakusman ujjachinawanchejpaj pusawanchej.

Señor Jesucristo, kallpachawaypuni ari, Janaj Pachapi wiñaypaj kawsanaykupaj. Chaykamataj kay pachapeqa, jatun munakuyniyoj kayta yachachiwayku. Jesucristoj sutimpi. Amén.

“... Kallpasapa wira ovejastataj wañurachisaj...” (Ezequiel 34:16)

Pitaj kashan chay “kallpasapa wirayasqa ovejas”? Chaytaqa qhawarisunchej, aswan qhepitapi ñawiripa... Qankunapajqa pisichu karqa sumach’ej q’achusta mikhusqaykichej? Allinchu karqa chaymanta puchojtataj saruranaykichej? llimphu yakuta ujaykuytawantaj allinchu karqa qonchochaykunaykichej?, nispa nin.

Chay wirayasqa kallpasapa ovejasqa kanku, pikunachus ni imamanta llakiyniyoj kayku nispa nijkuna; paykunaqa yuyakunku cheqan runas kasqankuta, mana llakiyniyoj runas. Evangelioj songochaynintapis mana munajkuna. Evangelioji Diospa Qhasilla K’acha Yanapayninta paykunaqa pisipaj qhawajkuna. Paykunaqa chajrunku: “Diospi creespa cheqan runapaj qhawasqa kayta,” chay “paykunallamanta allin ruwaykunaswan (buenas obras nisqawan) chajrunku.” Ajinamanta, chay ch’uwa llimphu yakusta qonchuchaykunku.

Tukuynin Mosoj Testamentopi, parlan Cristo Diospa kachamusqan kasqanta, chinkasqa juchasapa runasta Salvanampaj. Ajinata nispaqa, Salvaj Jesusqa ni jayk’aj qhesacharqachu pikunachus juchasninkuwan Payman jamojkunataqa, ajinamanta perdonasqa kanankupaj. Jesucristoqa, munan Payman chimpanankuta salvasqa kanankupajqa... Pikunatajchus cheqan runas kasqankuta yuyakojkunari mana atinkuchu chimpakuyta, cheqan runas kasqankuta yuyakuspa.

Sumaj Michej Cristoqa, ajinata ovejasninwan ruwan. Payqa nin: “Uj michej jina, ovejasninta michenqa; corderosta makisninwan marq’arikonqa, chay uñachakojtataj alliyllawan pusanqa,” nispa. (Isaías 40:11).

Bibliapi ni maynejpi ninchu, ovejasqa atillasqankuta paykuna kikin waqaychakuyta? Mana.

Munasqa Dios Tatayku, Qhasilla K’acha Yanapayniykita qowayku Pablo jina, David jina Salvasqa kasqaykuta jatumpaj qhawanaykupaj, Jesucristoj sutimpi. Amén.

Agosto 25

“... Mana reparakorqankichu Diosniyki qanman watukoj jamushasojtin.”
(Lucas 19:44)

Chay kutillatawanña Cristoqa, Jerusalén llajtaman yaykushaspa, Olivos orqomanta rikorqa munakusqan Jerusalén llajtata, chantá waqarqa. Waqan waqantaj nerqa paypa patanman uj juicio chayamunanta.

Imamantachus chay juicio paykunaman jamunanta nerqa: “Mana reparakorqankichu Diosniyki qanman jamushasojtin,” nispa. Chayta munani qan reparanaykita, kaypeqa mana ninchu: Mana juchayojkunaj yawarninta jich’arqanki, chay juchaykimanta kay tukuy ima llakiy jamusonqa, nispaqa. Manachayqa nin: “Diospa Qhasilla K’acha Yanapayninta, pisipaj qhawarqanki,” nispa nin.

Diosqa munarqa perdonayta Jerusalén llajtaj juchasninta. Isaías profetanejta Dios nerqaña: “Wata runa kayninkuqa tukukapusqanta, juchasninkutaj pampachasqaña kasqanta,” nispa. (Isaías 40:2).

Jerusalenchus reparakunman karqa Dios watukushasqanta chayqa, kachamusqan Churintapis jatunchankuman karqa, mana chay ñak’ariy juiciospis paykunaman chayamunmanchu karqa. Diospa Qhasilla K’acha Yanapayninta, pisipaj qhawasqankurayku chay castigoqa, paykunaman chayamorqa.

Aswan qhepamantaj sinch’i karqa. Dios paykunata watukushajtenqa, tukuy sonqo Diosta uyarinanku karqa, icharí? Chaypachaqa, Apóstol Juanllaña kawsakusharqa. Paypa parlasqantapis mana kasorqankuchu, chay Jerusalempi tiyakojkunaqa sonqonkuta rumiyachirqanku. Diospa castigo paykunaman chayamunankama.

Wañusqas jina kasharqanku, chayraykutaj paykuna kikinqa mana kawsayta qokuyta atinkumanchu karqa. Chaypajqa, Diospa Espiritullan noqanchejtaqa atin watejmanta mosoj kawsayman nacechiytaqa. Chayraykutaj, ni jayk’aj noqallanchejmantaqa espirituman jina kawsayniyoj kasunmanchu, mana Diospa Espiritunwanqa.

Chayrayku, sumajta entiendenanchej tiyan, “Diospa watukuyninmantaqa”. Diosqa kunampis munakuynimpi watukushawanchej, chayrayku ujka Diosman kutirikuna kachun. Manachayqa, uj p’unchay mana atikonqañachu, punkoqa wisq’akaponqa.

Munasqa Diosniyku, sonqoykuman churay, Salvasqa kasqaykuta jatumpaj qhawanaykuta. Imaynatachus Pablo, chanta David jatumpaj qhawaj kanku ajinata. Jesucristoj sutimpi. Amén.

“Manaraj chaykunata taripanichu, nitaj mana pantaj cheqan kawsayniyoj kaymampis chayanirajchu; astawanqa sinch’ita kallpakuspa, ñawpajman rishallanipuni t’inkata jap’inaypaj. Chaypajmin Cristo Jesús ñawpajpi noqatapis jap’illawarqataj.” (Filipenses 3:12)

Apostol Pablo, “manaraj chaykunata taripanichu,” nispaqa, imatataj niyta munarqa? Manarajchu tariparqa chay Feta, kacharisqa kayta, kawsayta, kusikuyniyoj kayta ima? Yachanchej jina, chay tukuy imasta Apostol Pabloqa tariparqaña.

Kay cartata qhelqashaspa, payqa Evangeliomantaqa waj suyuspi willarasharqaña. Payqa, kay aycha cuerpoypi kawshaspaqa maqanakushaniraj juchawan nisharqa. Chaywampis payqa nerqa: “Noqaqa leynejta leypaj wañusqa kani, Diosllapajña kawsanaypaj. Cristowan khuska chakatasqa karqani, manañataj noqachu kawsani, manachayqa Cristo kawsashan noqapi. Kunantaj, aycha cuerpoypi kawsashaspapis, Diospa Churimpi creesqayraykulla kawsashani. Paymin munakuwarqa, noqaraykutaj wañuchisqa kanampaj jaywaykukorqa,” nispa. (Gálatas 2:19-20).

Kanku ashkha yachachejkuna, jinallataj sonqochaymanta parlajkuna imaqa. Kay: “Mana ninichu jap’isqaytaña,” nisqanmantaqa, mana allintachu yachachinku. Paykunaqa ninku perdonasqa kanapajqa ruwanayrajpuni tiyan nispa. Ajinata yuyaspaqa mana jap’ikunkuchu, creesqanraykulla Dios wawampaj rejsikapusqantaqa. Kayta nishani, mana chay pisi kallpayoj kasqankuta reparakunku chaykunamantachu, manachayqa pikunachus paykunaj kallpallankuwan imatapis ruwayta munajkunamanta.

Apóstol Pabloqa, sut’ita nin Diospa Qhasilla K’acha Yanapaynintaqa jap’isqantaña. Tukuy kawsaynimpi Diospa Churin Jesucristomanta parlaspaqa, munarqa uyarejkunapis Jesucristopi creespalla perdonta jap’ikunankuta, salvasqa kanankupajqa.

Munakuyniyoj Dios tatayku, yanapawayku tukuy imamanta astawan, Salvawajniyku Jesuspi atienikuyta. Graciasta qoyku tukuy sonqo chay feta sonqoykuman churasqaykimanta. Jesucristoj sutimpi. Amén.

Agosto 27

“... Kaypi kashani Diosný... Chay munayninman jina noqanchejqqa juchamanta llimphuta llimphuchasqa kanchej, Jesucristoj cuerpon wiñaypaj uj kutillata jaywasqa kasqanrayku.” (Hebreos 10:7,10)

Ajinatanispa, Tata Diosqaninujk'ata Churintawañuyman jaywasqanta juchasninchejrayku. Manachu kay pachapi runaspa juchasninku pampachasqa karqa? Chayrí manachu chay corderospa yawarnin chay tukuyta pichayta aterqa? Chayrí, Jesucristoj wañusqanqa, wakin runasllapajchu karqa? Chayrí pisillata juchallikojkunaraykullachu?

Lutero, nerqa: “Cristoqa, yawarninta jich'arqa, mana juchasapa kasqankuta yuyakojkunaraykullachu. Machayqa, juchasapaspuni kajkunarayku; chantapis, mana wakin juchasraykullachu, nillataj ñawpa juchasllamanta paganampajchu; manachayqa, tukuynin juchasasrayku wañorqa,” nispa.

Manachus ajina kanman karqa chayqa, maypitaj tarisunman samariyta? Juchasninchejwan maqanakunapaj, maypitaj tarisunman kallpata? Imaynatataj chay millay juchata, noqallanchejmanta atipayta atisunman? Mana Jesucristuwanqa mana atisunmanchu juchata noqanchejpi wañuchiyaqa. Chay tukuy imataqa, atinchej jap'iyta Señorninchej Jesucristo ruwasqanraykulla. Ari, salvasqa kanapajqa, tukuy ima Diospa wakichisqanqa junt'asqaña. “Tukuy ima wakichisqaña, jamullachunkuña,” nin Diosninchejqa. (Mateo 22:4).

Juchallsqanchejmanta reparakunchej chayqa, llakikuyllaña jamuwanchej, mana sonqo tiyaykuy kanchu. Ajinamanta Dioswan allinyakuyta mask'achiwanchej, Dioswan mana allimpi kasqanchejqqa llakichiwanchej; Jesucristoman rejtinchejtaj Tata Diosqa perdonawanchej Paywan allimpi kananchejpaj.

“Cristoñamin aswan sumajqa, Paytaj tukuyninchejpi kashan” (Colosenses 3:11). “Diospa Churinta sonqompi jap'ikojqa wiñay kawsayniyoj,” nispa nin Tata Diospa Palabranqa. (1 Juan 5:12).

Munasqa Diosniyku, munawaj karqa chayqa, saqerpariwaykuman karqa juchayku patapi. Jatunchasqa kay, noqaykuta khuyawarqayku, wajyawarqaykutaj creenaykupaj. Qowarqayku q'omer pastosta, kawsachej t'antata, kawsachej yakutawan. Jesucristoj sutimpi. Amén.

“Paypa jatun qhapaj k’acha kayninmanta tukuypis jap’inchej qhasilla Diospa K’acha Yanapayninta...” (Juan 1:16)

Tukuy sonqo k’umuykuy Señor jesucristoj ñawpaqempi, mañakuytaj Diospa Qhasilla K’acha Yanapayninta: “Sumajta entiendeyta atinkichej may jinachus Cristoj munakuynin kasqanta: Anchonman, sayt’unman, ukhunman, sayayninman ima,” nispa nin. (Efesios 3:18). Reparankichu, Cristoj munakuynenqa may jina yachayniyoj kanamantapis, aswanraj kasqanta?

Reparankichu munakuynimpi k’acha kaynimpí ima, kay pachaman jamorqa cuentanchejmanta wañunampaj? Chayraykutaj, Paymanta mañakuy yachayta k’achata kawsakunaykipaj.

Jacobpa yaku pujoyun kankupi, munakuyninwan kashajta reparankichu? Yachachisqasninta kacharqa llajtaman mikhunata rantimunankupaj, yachachisqasnin mikhunawan kutimojtinkutaj, “mana yarqhawanchu,” nerqa. Payqa, kuisqa kasharqa, imaraykuchus chay yaku pujoyuman jamosqa uj warmi yakuta orqhonampaj, chay warmeja almantataj juchamanta kacharicherqa. Jinallataj tapusqayki: Yuyarikunkichu, Jerusalén llajtaman chayaykushaspa, jatun llakiyan waqasqanta, chay llajtata qhawarispa?

Reparankichu, chinkasqa waynaj tatampa k’acha kayninta? Maypachachus karullapiraj churinta rikuspa, khuyaynimpí imata jina taripamuspa ojllaykuspataj much’aykusqanta? Chay k’acha tataqa nerqa: “Fiestata ruwaspa, sumajta mikhusunchej. Kay wawayqa wañusqa karqa, kawsarimuntaj; chinkasqa karqa, kunantaj tarisqa,” nispa. (Lucas 15:23-24).

Reparankichu, imaynakhuyakuyniyoj sonqochus kasqanta Señorninchej Jesús tukuy juchasapaspaj? Chaywampis, Diospa munakuyninqa tukuytaj, mana cheqan runas kasqankuta yuyakojkunallapajchu. ichari?

Ichus wakin kutiqa, Diostaqa yuyarqanku mana sonqoyo kasqanta jina. Ajinapis Payqa, paykunawampuni kasharqa, mana saqerparerqachu. Jinallataj noqanchejpis wakin kutisqa ñak’ariypi tarikuspaga ajinata yuyanchej, ajina kashaspapis Diospa khuyaynillanwan sonqo junt’asqa kayta atinchej tukuy kawsayninchejpi.

Munasqa Señor Jesús, jatunchasqa kay wiñaypaj wiñayninkama. Jesucristoj sutimpi. Amén.

Agosto 29

“Ovejasta wañuchispa q’olachinapaj mana apamuwarqankichu, nitaj uywa wañuchisqa q’olachinaswan jatunchawarqankichu. Noqaqa mana sayk’ucheqaykichu ch’aki mikhuy jaywanata mañasuspa, nitaj sayk’ucheqaykichu inciensota mañasuspallapuni. Mana Noqapajqa sumajta q’apaj jawinasta ranterqankichu, nitaj uywa wañuchisqa wirastapis tukuy sonqo apamuwarqankichu. Manachayqa, jucha q’episniykiwan llasaykuchiwarqanki, chay jina millay juchata ruwasqasniykiwantaj sayk’uchiwarqanki. Noqarí, noqa kikiyta munakusqayrayku, chay millay juchaykita pichani. Chay juchasniykitaqa qonqayman churasaj.” (Isaías 43:23-25)

Qampa yuyasqaykiman jina, ichus qanllamanta cheqan runapaj qhawakuspa santo kani nispa Diosman rikuchiya munanki, ajinamanta salvasqa kayta munaspa, ajina kajtingqa manaraj imapi llakiy oqharisonqa.

Uyariy Señorpa nisqanta: “Tukuy ch’akichikojkuna, jamuychej yakuta uyyaj. Mana qolqeyojkuna, jamullaychej,” nispa. (Isaías 55:1). Arí, juchasapas, jinallataj llimphus kasqankuta yuyakojkuna, ¡Uyariychej Señorpa nisqanta! Uyariychej imaynatachus mana ni imata ruwaspalla Jesucristoman chimpakunata, nin.

Imataj kanman, aswan cheqa kasqan, Diospa nisqanmanta astawan?

Señorqa, kaypi aswan sut’ita parlan; ni uywa wañuchispa q’olasqa kajkunapis sonqonta llamp’uyacherqachu, noqanchejta khuyanawanchejpajqa. Chayraykutaj juchasninchejmanta pachallampi llakikusqanchejqa mana sonqo tiyaykuyta qowanchejchu. Noqanchejqa, rinanchej tiyaj Jesucristoman, juchasninchej pampachasqa kanampajqa.

Unaymantapacha juchaqa mana pagasqa, mana perdonanapaj jina karqa, anchatataj sayk’uchiwarqa nispa nerqa Diosqa. Kayjinata nispa: “Jucha q’episniyki pataypi karqa, chay sajra kayniyki sayk’uchiwarqa,” nispa. Chaywampis Diosqa nin: “Noqamin mana kasukoj kayniykita chinkachej kani, noqa kikiyta munakusqayrayku; manataj yuyarikusajchu chay juchasniykimantaqa,” nispa. Uj k’ata Churin Jesuspa ruwasqanraykulla noqanchejqa perdonasqa kanchej.

Munasqa Dios Tatayku, Espíritu Santonejta qowayku yachayta jinallataj sonqochakuytapis, Qampi kusiqa kanaykupaj. Jesucristoj sutimpi. Amén.

“... Jucha q’episniykiwan llasaykuchiwarqanki, chay jina millay juchata ruwasqasniykiwantaj sayk’uchiwarqanki.” (Isaías 43:24)

Kaypeqa, Jesucristo parlan Diospaj t’aqasqa llajtan Israelita kajkunamanta, imaynatachus apóstol Pablo, nin jina: “espiritual chhanka”, paykunata qhatej, Cristo karqa chay chhankaqa, nispa. (1 Corintios 10;4).

Isaías 63-pipis parlashan, uvasta sarojkunamanta. Ujnin kaj yawarwan ch’allpaykuchisqa p’achanta, nin: “Sapallay uvasta sarorqani, ni pi noqawan karqachu chaypi,” nispa. Nillantaj: “Jucha q’episniykiwan llasaykuchiwarqanki, chay jina millay juchata ruwasqasniykiwantaj sayk’uchiwarqanki,” nispa... “Chay mana kasukoj kayniykita, noqa chinkachej kani, noqa kikiyta munakusqayrayku,” nispa ima nin. 53 t’aqapi nishallantaj: “Tata Diostajrí, tukuyninchejpa juchasninchejta, Payman q’epiricherqa. Payqa, t’ojsisqa karqa, Diospa contranta oqharikusqanchejrayku, tukuy cuerpon t’unasqa karqa. Cuerpon chay jina khallasqa kasqanrayku, sanoyachejqa karqanchej,” nispa.

Señorninchej Jesucristoqa, kay pachapi kashaspa chayman rijch’akojsa nerqa: “Mana qankunachu ajllawarqankichej, astawanqa noqa ajllarqaykichej,” nispa. (Juan 15:16). Nillarqataj: “Runaj Churimpis mana sirvichikojchu jamorqa. Astawanqa Payqa jamorqa runasta sirvej, kawsaynintataj qoj, ashkha runas salvasqa kanankupaj,” nispa. (Mateo 20:28). Nillantaj: “Paykunarayku noqa kikiyta qampaj t’aqakuni, paykunapis cheqa kajpi qampaj t’aqasqa kanankupaj,” nispa. (Juan 17:19). Chanta, nillantaj: “Yawarniypis jich’asqa kanqa, juchas pampachasqa kanampaj,” nispa. (Mateo 26:28).

Chay tukuyta parlajqa, Señor kashan. Arí, Jesucristo kashan chay tukuyta yachachejqa.

Noqanchejqa juchallikuspallapuni kawsanchej. Chayraykutaj, Diospa Qhasilla K’acha Yanapayninqa kawsayta qowanchej Jesucristoj perdonninta jap’ikujtinchej.

Wiñaymanta wiñaykama Dios, sonqoykuman qhelqaykuy palabraykita, chayman jina kawsakunaykupaj, ajinamanta tukuyman k’anchanaykupaj. Jesucristoj sutimpi. Amén.

Agosto 31

“... Jucha q’episniykiwan llasaykuchiwarqanki, chay jina millay juchata ruwasqasniykiwantaj sayk’uchiwarqanki.” (Isaías 43:24)

Kayqa ajinapuni, mana llullachu: Juchasninchejmantaqa Dioslla uj k’ata Churimpa ruwasqanrayku perdonawanchej. Chay juchasninchejta, noqallanchijmantaqa ni jayk’aj kacharichikuyta atisunmanchu; nillataj allin runa jina runaykachasqanchejpis Diospa perdonintaqa tarinmanchu. K’acha runa kasqanchej, jinallataj allin imasta ruwasqasninchejpis, mana imachu kashan.

Dios Tataqa, juchasninchejrayku Churinta wañunampaj jaywasqan p’unchaymantapacha, celoswan k’ajarin. Imarayku? Churimpa jatun kaynillampi, salvacion kasqanrayku. Arí, Churinta qanrayku, noqarayku, chay jinata cruzpi ñak’aricherqa; chayrayku, Diosqa mana munanchu juchasapa runasqa paykunata jatunchakuspalla Churinman rinankutaqa. Jesucristoj ruwasqallan jatumpaj qhawasqa kanan tiyan.

Yuyariypuni, Diospa nisqanta: “Juchasniykichejta q’epirichiwaspa, sajra kawsayniykichejwan sayk’uchiwarqankichej,” nispa. Jesucristoqa, mana awantay atina nanaypi ñak’arerqa; Tatanman mañakushaspapis yawarta ima jump’erqa; rikuy, uyariy yawarnimpa noqanchejrayku ruwasqanta.

Diospa Leynenqa, mana pisipaj qhawana jinachu. Leyman jinaqa tukuy juchasapasqa, wañunanku karqa; Dios ajinata nerqa Edén huertapi. Kunanqa tapurisqayki: Chay tukuyta yachashaspa juchasapa runaqa pay kikin salvakuyta munananqa allillanchu? ¡Mana! Ichari? Kay pachapi runaqa kawsakun imapis kasqallanta, yuyasqankuman jinalla. Chay tukuymantataj, Cristo cargollikorqa tukuyin juchasninchejmanta. Mana waj kargachu juchasapaj cuentanmanta wañunampajqa.

Diospa Espiritunchus ñawisniykita kicharinman, rikunaykipaj jina, ninrisniykitataj kicharinman uyarinaykipaj jina chayqa, Salvasoyniykej ñak’arisqantaqa sut’ita reparawaj, qanrayku chay tukuy imata ruwasqanta rikuspa waqaspa tukukuwaj. Chay jinatapuni, Dios munakususpa, chay tukuy imata ruwarqa, qan jatun kusiyniyoj kanaykipaj.

Munakuwaj Diosniyku, kallpata munakuytawan sonqoyman churay. Chayta mañakuyki uj k’ata munasqayki Churiykej sutimpi. Amén.



Septiembre

*"Qanqa wajchaj pakakunan kanki, llakisqa
pisichikojpa jark'akojnin, para wayramanta
waqaychaj, ruphaymanta llanthojtaj." (Isaías
25:4).*

Septiembre 1

“... Kay pacha imaspi yuyaykuna, qhapajyay munapayay ima, Diospa Palabranta p’ampaykuspa, mana poqojta saqenchu.” (Mateo 13:22)

Mana reparayllata sonqoyki chay jinaman tukuyta atin, kay pacha imasllapiña yuyanaykipaj, Diospa Qhasilla K’acha Yanapayninta qhepallaman churanaykipaj.

Kay pacha imasllawanchus sonqonchejta suwachiyta munasun chayqa, Diospa Simi Nisqanqa, mana imatapis ruwayta ateqachu sonqonchejpiqa. Juchapis qampajqa, mana chaykama millaychu kanqa, juchachakujtiykipis mana llakikunapaj jinañachu kanqa. Diospa Simi Nisqantatapis maynin kutillaña ñawiriwaj. Ajinamanta Diospa Leynimpa nisqasninqa qampi ruwananqa lluphasqa jina kanqa; ajinamanta sonqoykiqa rumiyaponqa.

Diospa Leynin noqanchejpi mana atiyniyojñachu juachamanta reparachinawanchejpaj chayqa, juchallisqanchejpis mana llakichiwasunñachu. Ajina kajtenqa, Cristo, Fe, Evangelio imaqa, manaña ancha yuyanapaj jinachu kanman; astawampis, chaykunaqa, ñawpa cuento jinallaña yuyayninchejpi rikhurenqa. Sichus Diospa Leynin manaña rikuchiwasunchu juchanchejta chayqa, ni imapis kanqañachu sonqonchejta Diosman kutichiyta ateqqa.

Chayrayku, pikunachus qhapajyayllapiña yuyajkuna, jinallataj kay pacha imasllata mask’ajkunaqa, chinkay ñanta thaskishanku. Diosman mana k’umuykusqankurayku mana dakunqankuñachu salvasqa kaymantapis. Ajina kashaspataj Evangeliomanta parlashallampuni chayqa, puraj uya jinallaña kashan. Astawampis, kawsaynenqa mana chay parlasqanman jinachu kanqa. Ajinallapipuni kawsayta munanqa chay creyente chayqa, ni ujchhikallampis kallpan kanqañachu Diosman kutiripunampajqa.

Chay runa, uj kuti Diosman kutirikuspa may kususqa Diosta yupaycharqa chaypis, Espirituman jina kawasayniqa wañusqa kashanman; imaraykuchus, chay Janaj pachamanta qosqa mujuqa, kay pacha ruwaykunawan wiñashajta p’ampaykusqanrayku.

Munasqa Señor Jesús, Qan k’anchaykuway cheqa kajwan sonqoyman. Espíritu Santoykita qoway atiyta qonawampaj, munayniykiman jina kawsakunaypaj. Jesucristoj sutimpi. Amén.

“... Kuraj Supay urmachiyta munasojtiykichej ...” (Efesios 6:11)

Diospa contrampi pipis juchallin chayqa, ajinamanta supay gustonwan llojsishan; ajina kajtinqa, chay wajcha runataqa mana imapis sonqochayta atenqañachu. Almampis mancharisqallaña ni imanakuyta atispa kanqa. Chay runaqa, Diospa phiñakuynillampiña yuyanqa. Ichus, astawampis jatun phutiynimpi yuyarinqa, Biblia kay jinata nisqanta: “Dioswanqa mana pujllakuy kanchu,” nispa. (Gálatas 6:7). Jinallataj: “Sichus cheqa kajta yachaspaña juchalliylatapuni munasunman chayqa, manaña jucharayku waj jaywanaqa kanchu... Kawsaj Diospa makisninman urmayqa manchariywan kharkatitinapaj,” nispa nin. (Hebreos 10:26,31).

Chaytaqa, atinchej rikuyta Judas Iscariotepi. Judaspa sonqonman supayqa unayña churasqa Jesusta wasanchay yuyayta. Judasrí, chay wasanchasqanmanta jap'isqan qolqeta jap'irisqa, imastachus ruwanampichari yuyarikorqa ni imata ruwayta atispa.

Supayqa, Judaspa umanman sat'isharqa iskay imasta: Ñawpajtaqa, chay kinsa chunka phisusta jap'inanwan misk'ichikuyta, chay chhika qolqeta jap'ispa ñawisnin llijurisharqa. Qhepantataj, Judasta yuyachisharqa, Jesusmanqa mana ima sajrapis chayananta. Bibliarí nin: “Judasqa Jesústa wañunampaj juchachasqata rikuspa, sonqonta nanachikorqa. Kinsa chunka qolqetataj kutichiporqa kuraj kaj sacerdoteman,” nispa. (Mateo 27:3). Sonqompa nanayninta thasnuspa chay phutiy waqayta ch'in'yachiyta yuyaspa.

Supayqa, ichapis Judastaqa ninman karqa: Mana imapis pasanqachu, chantapis Jesusqa mana ima sajratapis ruwarqachu, kamachejkunapis mana imanayta atenqankuchunispa. Chay jawataj, ichus nishallarqapuni Judastaqa: Jesusqa atinyioj, llusp'iyta atillanqa, nispa. Judasqa ruwayninta pisipaj jinalla qhawasharqa, imaraykuchus soldadosmanqa rikuykuchinallan karqa, mayqenchus Jesús kasqanta yachanankupaj; chayllata Judasqa ruwanan karqa.

Kaywanqa yachachiwanchej, supayqa may jina ch'awka kasqanta. Chay enemigonchejqqa, juchataqa qhawachiwanchis juch'uy pantayta jinalla, pakaykullan mana reparananchejpaj jina. Imachus noqanchejman misk'iriwanchej, chayta supayqa yachan; chayllata rikurichiwanchej.

Dios Tatayku, k'acha kayniyki allin imasta noqaykuwan ruwanki. Kunampis jatun unanchayta qowayku, mana pipis ch'awkiyanawaykupaj, gracias Salvawajniykoj sutimpi. Amén.

Septiembre 3

(Qaynamanta qhawallasumpuni)

“... Kuraj Supay urmachiyta munasojtiykichej...” (Efesios 6:11)

Judasqa, juchaman tanqasqa kaspa urmarqa, supaypa nisqanta kasuspa ruwarqa. Imatachus supay nisharqa chayta uyarispa ruwarqa. Paypajqa ajinata ruwasqanrayku, mana karqañachu sonqochakuy Diospi, nitaj runasnimpipis.

Judíokunamanta sacerdotesqa, Judasta nisqanku tukuy ima paypaj allin kananta; ajinata nishaspapis paytaqa ni imapi yanaparqankuchu. Jesusta traicionasqanmanta, chay pasaytaqa mayta malayakusqa, ajinamanta paykunaman rispa nerqa: “Juchallini mana juchayojta wañuyman jaywaspa,” nejtintaj chay sacerdotekunaqa, nerqanku: “Ima dakuwayku chaymantari,” nispa saqerparisqanku. (Mateo 27:4).

Ajinata Supayqa uj creyenteta urmachiytawankama, saqerparin ñak'ariynimpi ni uj simillatapis sonqochanchu. Imaraykuchus payqa tarinña imatachus mask'asharqa chaytaqa. Supayqa Judas sipikamunallantaña suyasharqa. Supayqa mana rejsinchu munakuyta, paypiqa tiyan chejnikuy, vengakuy ima. Chayta ama qonqaychu ni jayk'aj supayqa yanapayta yachanchu, payqa t'ustiyman yachasqa kashan. Qallarín ima juchapis misk'ichikuna jina kasqanta, chaymantaraj rikuchin millay kasqantaqa.

Ama qonqankichu, watejmanta nisqayki: Sajra supayqa, juchata rikuchin manapis juchachu kanman jina; manachayqa, may k'achitupis kanman jinata rikuchin. Sichus paypa nisusqanta ruwanki chayqa, chay ruwasqallaykiwantaj mayta ñak'arichisonqa. Sonqoykimantaj churanqa kay jinata nispa: Kay ruwasqaykeqa ancha jatun jucha, manataj atinkiñachu perdonasqa kayta, nispa nisunqa.

Juchaman tanqayta qallarishawajtincej reparakusun chayqa, ni ima kajtin saquesunmanchu sajra supay ch'awkiyanawanchejtaqa, may jina sumajman rijch'ashawasunman chaypis chay tentacionmantaqa, imata jina ayqerikapusunman. Icharí?

Chayrayku Diospa munakuynimpi kawsakuna, Pay noqanchejta khuyanawanchejpaj uj k'ata Churin qayllanchejpi kashan, Pay munakuwasqanchejrayku, ajinamanta Espiritunneja sinch'i kallpayojta ruwawasun.

Munasqa Tatayku, Salvawajniykupi creesqaykoqa, amapuni pisiyachunchu; wañusqakuna chawpimanta kawsarichimusqaykipi kallpayku kachun. Jesucristoj sutimpi. Amén.

(Qaynamanta parlallasumpuni)

“... Sajra supay urmachiyta munasojtiykichej ...” (Efesios 6:11)

Chay sajra supayqa mana sayk’uspa runakunataqa juchaman tanqayllatapuni munan; Diospa kamachisqasninta mana kasunankupaj, nitaj palabrantapis ñawirinankupaj. Payqa, runakunaj yuyayninkuman sat’in ima pantaytapis, cheqamanta manapis juchapunichu kanman jinata rikuchispa: “Kay pantasqaykiqa mana imachu kashan, mana imamantapis qhawakunaykichu tiyan,” nispa.

Maypachachus runa uyarin sonqompa nisqallanta, ajinapitaj Diosta mask’aj churakujtinkama, supayqa uskhayllata yuyachin payllapi atienikunanta. Ajinamanta iskarayayta churaspa puraj uya kayman tanqaykun. Ajinamantataj creechiyta qallarinpacha waj iglesiaspi paykunallamanta kallpakuspa salvakuyta atisqankupi atienikuyta, chay buenas obras nisqawan. Ajinata chay sajra supayqa umanman chay imasta sat’in. Diospa wakichisqanta ujladoman tanqarparispa.

Ajinata Jesucristo Evangeliomanta yachachishajtin, fariseokunaqa paywan churanakuyta qallarirqanku. Señorninchej Jesucristota Juchacharqanku sábadó p’unchayta mana waqaychanchu, sajra kawsayniyojkunawan mikhun, nispa. Jesustaj paykunaman kuticherqa, nispa: “Qankunaqa tataykichej kuraj supaymanta kankichej”, nispa, (Juan 8:44).

Jesusqa yachachisqasnimpis supaywan ch’awkiyachikullajtaj kanku. Chayrayku supay ch’awkiyashasqanta rikuspa, Jesusqa Pedrotá k’amerqa: “Riy kaymanta sataná. Qanqa misk’achiyta munawanki,” nispa. (Mateo 16:23). Waj kutipipis yachachisqasnenqa, Jesuspaj thutorqanku ima. (Mateo 26:13).

Diosqa munakuy, Paypeqa mana ima chejnikuy juchapis kanchu. Paypajqa allimpuni nisqasninta uyarispa kasunaqa; Paypa nisqasninta mana uyarispa kawsakunchej chayqa, munakuynimpa contrampi kashasunman.

Sajra supayqa sajra jatunchakuj kaspaqa, Diospa wawasnintaqa tukuy imamanta tumpaspa pisipaj qhawachiyta munan.

Khuyakoj Tatayku, yanapawayku Salvawajniyku Jesusta astawan rejsiyta. Creesqaykupi sinch’ita sayachiwayku. Jesucristoj sutimpi. Amén.

Septiembre 5

“Ruwanapaj imaymana atiykuna tiyan...” (1 Corintios 12:4)

Diospa wawasnin ukhupeqa mana uj ruwayniyojllachu kanku. Diospa Qhasilla K’acha Yanapaynenqa mana yanghayachinchu imaynachus kayninkutaqa. Tukuyninku Iglesiapeqa k’acha ruwayniyojpuni kanku.

Tarso llajtayoj Sauloqa, manchayta chhoqonakoj Jesuspi creejkunawan, jap’iraspa carcelman wisq’arachej; wakin kutistaj, wañuchichej mana sonqoyoj runaswan. Diosman kutirikuspataj, ni imata, ni pita manchachikuspa Evangeliomanta tukuyman willaj churakorqa: “Qankunaqa uyarerqankichejña noqamanta, imaynatachus ñawpajta judiospa yachachiynimpi kashaspa, Diospa iglesianta anchatapuni qhatiykachasqayta, chinkarparichiyta munaspa”, nispa. (Gálatas 1:13). Apóstol Pabloqa, nillarqataj: “Noqa tukuyninkumanta aswan sinch’ita trabajarqani”, nispa. (1 Corintios 15:10).

Uj kutipi Jesuspa yachachisqasninqa, rikorqanku Jesusta yaku patata purishajta, ajinamanta yacharqanku Pay atiyiniyoj kasqanta. Chaypacha Padroqa, Jesús kasqanta yachaytawankama, imata jina yakuman phinkiykuspa Jesusta taripamoj churakorqa. Juantaj barcopi qhepakurqa, mana imatapis usqayllata ruwajchu Pedrojinaqa. Padrotaj, mana unancharispalla imatapis usqhayta ruwarparej, ajinata ruwaspaqa k’iskimanta pantaykoj.

Sumaj yuyayniyoj cristianoqa, imapi pantaspapis llakikun, mana ujkuna jinaqa saqenchu ashkha p’unchaykuna mana allinchaspaqa; Diosmanta osqayllata perdonta mañakun yanapata tarinampaj. Allin yuyayniyoj cristianoqa mana imatapis usqhayllata ruwarparinchu, imata ruwanampajpis unancharinraj.

Arí, ajinapuni kashan, pimanta imata yachashaspapis, mana usqayllata pimampis parlarparinchu, manataj usqayllata imatapis ruwarparinaqa. Manachayqa, imata ruwanampajpis sumajtaraj unancharin. Chantapis, mana yuyanachu mana pantajkuna kasqankutaqa.

Allimpuni umanchejpi kanan, runaqa mana uj rejllachu kanchej. Wakinqa usqayllata phiñarparikunku, chayri imatapis usqhayllata ruwarpariyta munanku; kallankutaj mana usqayllata phiñakujkuna, allintaraj unancharinku allinta imapipis ruwanankupajqa. Chayrayku, mayqempis imapi pantajpajqa, mana usqayllata sajrata yuyanachu, chayrí mana jinachu kanman nispapis yuyanapachachu.

Dios Tatayku, yachayta qowayku wawasniykipura allinta yanapanakuspa kay pachapi kawsakunaykupaj. Jesucristoj sutimpi. Amén.

Septiembre 6

“Ñawpajman rishallanipuni, maymanchus chayana kashan chayman chayanaykama, t’inkata jap’inaypaj patamanta Dios wajyawarqa Cristo Jesuspi, chayman.” (Filipenses 3:14)

Maymantaj chayana kashan, imamantachus apóltol Pablo parlashan chay? Pay nin: “Cheqamanta tukuy imata qhasi manakajpaj qhawani Señorniy Jesucristota rejsinaqa may sumaj kasqanrayku. Chayrayku chay tukuy ñawpa imasta saqepuni, q’opata jina qhawaspa, Cristojta kanaypaj. Paypi tarisqa kayta munani. Manaña leyta junt’aspa cheqan runapaj qhawasqa kaytachu mask’ashani; astawanqa Cristopi creesqayrayku cheqan runapaj qhawasqa kani, chaytaj Diosmanta jamun creeynejta,” nispa. (Filipenses 3:8-9).

Cheqan runapaj qhawasqa kayqa, Jesucristomanta jamun, tukuy imamanta aswan sumaj imata jap’inamanta nisqaqa, Pay noqapi kasqan. Chantapis, mana cristiano nisqa sutichasqalla kaychu, manachayqa tukuy kawsayninchejpi Jesucristo noqanchejpi kawsakusqan. Ajina kajtenqa, mana noqallamanta cheqan runapaj qhawakusqallaypichu kashan.

Sapa p’unchay mask’anachej juchallisqanchejmanta Cristopi perdonasqa kayta. Dios Tataqa, Cristo Jesuspi cheqan runata qhawawanchej. Diospaj qhawaynimpeqa santos, llimphustaj kanchej. Chayrayku, Diospa munakuynin noqanchejpeqa Cristopi kashan. Chayrayku, noqanchejqa mana k’uchi- k’uchilla, mask’anachejchu tiyan, ruwasqasnillanchejwan Diosman chimpakuytaqa; manachayqa, Jesucristonejllata sapa p’unchay Dioswan ujchasqa kawsayta mask’ana. Paypa ruwasqallampi sinch’ita sayana salvacionta tarinapajqa.

Maymanchus chayayta munashanchej, chaypi yuyayninchej kanan tiyan; salvasqa kananchejpi mana iskayrayaspa.

Sonqo tiyaykuyninchejqqa, kanan tiyan Jesucristopi creesqanchejpi, sonqo junt’asqa cheqamanta kawsakunanchejpajqa.

Munasqa Dios Tatayku, ama saqeychu manchalis kanaykuta; manachayqa, atiyta qowayku Jesucristo noqaykupi, supayta, chanta juchata ima atipanampaj. Jesucristoj sutimpi. Amén.

Septiembre 7

“... Imachus kawsayniypi ñawpajta karqa, chayta qonqayman churaspa, atisqayta kallpakuni, ñawpajpi kajta taripanaypaj...” (Filipenses 3:13-14)

Apóstol Pabloqa, ñawpa kawasaynimpi imastachus ruwarqa chaykunata mana munarqachu ni yuyariyllatapis; imaraykuchus chaykunataqa ruwarqa allin kasqanta yuyaspa, ajinamanta salvasqa kanampaj ima. Chayrayku payqa, kay jinata nin: “Noqaqa atiyman aychapi ruwasqa imaspi atienekuyta. Sichus pillapis aychapi ruwasqa imaspi atienekuyta yuyanman chayqa, noqaqa astawanraj atienekuyta atiyman. Nacekusqaymanta pusaj p’unchayninman circuncidasqa karqani. Israelita kani Benjamin ayllumanta. Ñawpa tatasniypuni hebreos karqanku. Judiospa leyninta junt’anamanta parlaspa, fariseo karqani,” nispa nerqa Pabloqa. (Filipenses 3:4-5).

Astawampis, Pabloqa nillarqataj: “Cheqamanta chay tukuy imasta manakajpaj qhawani. Señorniy Jesucristota rejsinaqa may sumaj kasqanrayku. Chayrayku chay tukuy ñawpa imasta saqepuni, q’opata jina qhawaspa, Cristojta kanaypaj. Paypi tarisqa kayta munani. Manaña leyta junt’aspa cheqan runapaj qhawasqa kaytachu mask’ashani; astawanqa, Cristopi creesqayrayku cheqan runapaj qhawasqa kani, chaytaj Diosmanta jamun creeynejta,” nispa. (Filipenses 3:8-9). Arí. Apóstol Pabloqa mayta manchachikorqa, Cristoj justicianta pay kikiampa justicianwan chajruytaqa. Chayraykutaj nin: “chay imasqa, yanqha manakaj q’opa jinalla kasqanta.”

Pabloqa, sonqochasqa kayta munarqa Jesucristollapi atienekuspa. Pablopajqa, Cristopi creeyqa paypaj kawsay kasqanta nerqa. Noqanchejpis ajina yuyayniyoj kananchej tiyan.

Wakin kutisqa, iCristopi creenincejqa as chinkarej jinalla kaspera jinan! Ajina kanman chayqa, Cristollaman qayllakuna Paypi sonqonchejta churana kachun sonqochasqa kananchejpajqa. Mana noqanchejpa ruwasqanchejtachu, nillataj mashkha sumaj runa kasqanchijtachu yuyayninchejman churasun; manachayqa Jesucristolla tukuy imapi noqanchejpajqa kasqampi.

Tatayku Dios, sonqoykuman churay, Cristopi kaspera, ima ñak’ariypis noqaykupajqa mana imachu kasqanta; Janaj Pachapi wiñay kawsayta jap’inayku sonqoykupi kachun. Jesucristoj sutimpi. Amén.

Septiembre 8

“Mana wata runa kay sonqochu qankunaman qosqa karqa, ujtawan manchasqalla kanaykichejpaj; astawanqa, Diospa espiritun qankunaman qosqa karqa, Diospa wawasnin kanaykichejpaj... Chayrayku, Diosmanta mañakunchej: Tatáy, Tatáy, nispa. Chay kikin Espiritullataj espiritunchejwan khuska testigo jina sut’inchan Diospa wawasnin kasqanchejta.” (Romanos 8:15-16)

iChaymá k’acha willayqa! iDiospa wawasnin kanchej, chayta yachayqa ancha sumajpuni! Ichari? Apóstol Pabloqa, Bibliapi tukuynejpi parlan, kay jinata nispa: “Chay kikin Espiritullataj, espiritunchejwan khuska testigo jina sut’inchan, Diospa wawasnin kasqanchejta,” nispa.

“Diospa Espiritun, nisunki Diospa wawan kasqaykita.” Dioswan parlashajtiyki Espiritu Santoqa nichisunki: “Janaj Pachapi kashaj munasqa Dios Tatáy,” nispa. Chaymin kashan cheqapipuni Cristopi creesqarayku Diospa wawasnin kasqanchejqqa. Ajinamanta munakuyniyoj Tatanchejwanqa, cheqamanta qayllamanta kawsakunanchejpaj.

Wawampaj Dios Tata rejsikapuwasqanchejqqa, tukuy imapi rikukun. Chayta rikunchej, Dioswan parlarikuyninchejpi, imaynatachus uj wawa tatanwan parlarikun, ajinata. Ajina karqa Edén huertapi Diospa wawasnenqa, manaraj juchallispa qharqochikamushajtinkoqa.

Chayrayku, allimpuni kashan reparana, Espiri Santuchus nishawanchej Diospa wawan kasqanchejta, chayri yuyashallanchejchus Diospa wawan kasqanchejta, chayta.

Chay ñawpa katari supayqa ashkhaspa yuyayninkuman churan paykunaj ruwasqallankuwan Diospa wawanman tukunankuta. Jinallataj paykunaqa yuyanku Dioswan parlanapajpis sinch’ita qhaparispapuni chimpananku kasqanta, Diosqa lojt’upis kanman jina. Chaykunamanta Martín Lutero nerqa: Chay “astawan qhaparispa, “Cristoqa wawqey” “Cristoqa Salvawajniy” nispa nejkunaqa, mashkhas mana Diospa wawasnimpunichu kanku. Cheqa cristianoswanqa mana jinachu kashan. Cheqamanta Diospa wawasninkunaqa Juchawan maqanakuspa sapa p’unchay Diosmanqa chimpanku llamp’u sonqolla, allillamanta parlaspas ima,” nispa.

Dios Tatayku, munakuyniykiwan junt’achiway, tukuy rikuwajkuna wawayki kasqayta yachanankupaj. Chayta mañakuyki Jesucristoj sutimpi. Amén.

Septiembre 9

“... Creeni: yanapaway ari astawan creenaypaj...” (Marcos 9:24)

Yachananchej tiyan, creesqanchejchu, noqanchej yuyasqallanchejchu ima ruwayninchejpipis kashan chayta. Wakin kutisqa, kusikuylla jamuwajtincejqa Diospa qayllampi jina kashasqanchejta yuyakunchej; llakiykuna jamuwajtincejri, karupi jina kashasqanchejta yuyakunchej. Chaymanta Diospa Simi Nisqan Biblia sut'ita niwanchej, kusiypi chayri llakiypipis Paywanpuni khuska kawsakunanchej tiyan, mana iskayrayaspa. Ajinamanta yachakun Diospa wawasnin kasqanchejta.

Imapis kachun, chayri imapis jamuchun, Cristopi creesqanchejqa mana iskayrayanqachu. Jesucristollamanta jamun chay kallpa: sonqo tiyaykusqa kay, kusiqa kay, munakuyniyoj kay, Diospaj t'aqasqa kay ima. Sichus chay imas noqanchejpi pisiyapushan chayqa, ichus noqanchejpi kawsayninchejpi imapis mana allinchu kashanman.

Ashka unanchaykunas umanchejman jamun, chay unanchasqanchej wakin kuteqa iskayrayanapaj jinapuni. Chayrayku mana allinchu noqallanchejpi unanchanaqa, ima ruwasqanchejrayku salvasqa kasyta atisqanchejtaqa. Manachayqa, Salvawajninchej Jesusllapi tukuy sonqo atienikusqanchej kusikuyta qowasun.

Wakin mana atinkuchu paykunaj unanchasqankuta atipayta, chayraykutaj paykunaj yuyasqankuman jinalla imatapis creeya munanku; wakinkunataj ajinata yuyaspa llakikuylawanña atipachikunku.

Imaynatataj atisunman paykunata entiendechiyta, Cristopi kaspalla, Diospa Qhasilla k'acha Yanapaynillan sonqonkuta tiyaykuchiyta atisqanta? Jesús nin: “Noqaman jamojkunatarí, manapuni qhesachasajchu,” nispa. (Juan 6:37).

Wakinkunatajri, Jesuspi creesqankuta, Diospa Simi Nisqanta ancha pisita ñawisqankurayku, pisi kallpas kanku. Chayraykutaj yuyayninkupipis waj yuyaykunallaña umankuta muyuchin. Ajina kasqankuraykutaj, salvasqa kanankupajpis, Jesuspi creesqankupis manaña kallpayujchu, manaña kaspajinanchu.

Chay jina kawsayniyoj kaspataj Dioswampis manaña allimpi kawsaymantapis dakunkuñachu. Ajina kawsaymantaqa sumajta t'ukurina kachun, Diosmantaj qhaparikuna yanapanawanchejpaj. Arí, Diosman qhaparikuy: “Yanapaway ari Salvawaj Jesús, astawan creeyniyman kallpata yapaway,” nispa.

Señorníy, Creesqay Fe mana chaykama kallpayojchu, wawayki jina sinch'ita sayanaypaj. creeniyman yapaway kallpataqa jap'inaypaj. Jesucristoj sutimpi. Amén.

“Noqa qankunaj Tataykichej kasaj, qankunataj churisniy, ususisniytaj kankichej, nispa nin Tukuy Atiyniyoj Señorqa.” (2 Corintios 6:18)

Diospa churisnin, ususisnin kanchej. Tatanchejqqa chayta nin: “Sichus Paypa wawasnin kanchej chayqa, herenciayoj kanchej. Diosmanta herenciayoj kaspataj, Cristowan khuska herenciata jap’isunchej,” nispa. (Romanos 8:17).

Kaypi rikushanchej imaniytachus munasqanta, Diospa wawan kasqanchejqqa mana nisqallachu, manachayqa ajinapuni kashan, imaraykuchus kikin atiyniyoj Diospa nisqanrayku. Uyarinkichu? Dios Tataj munasqa Churinwan khuska herenciayoj kanchej nin. Chayrayku Cristoqa wañusqas chawpimanta kawsarimpuspa, nerqa: “Hermanosniyman nimuy: Tatayman, Tataykichejman, Diosniyman, Diosniykichejmantaj, wicharishani,” nispa. (Juan 20:17).

iChaymá k’acha willayqa! Noqanchej juchasapas kashaspapis, Tukuy Atiyniyoj Diospa wawasnin kanchej. Uj k’ata Churin Jesuswan khuska herenciayoj kanchej. Ajinata nin Diosqa. Chaykunataqa pitaj ajina sut’ita atinman entiendeyta?

Martín Lutero chaymanta parlaspa nerqa: “Diosqa wawampaj rejsikapuwasqanchejmantaqa, mana pipis atillanchu sut’ita entiendeytaqa; kayqa uj milagro kashan noqanchejpajqa,” nispa.

Kay pachapeqa, uj uyarisqa presidente wawan kanallaraj, may jatumpaj qhawasqa kasunman. Chaypis runalla, mana imachu kashan. Tukuy Atiyniyoj Dios, kay pachata ruwaj Dios, Janaj pachajjatun k’anchaynimpi tiyakoj Dios, Jesucristo Churinnejta wawampaj rejsikapuwasqanchejqqa may jatumpuni kashan. Astawanqa, Paypa herderon kasqanchej, jatun kusiyaqa sonqonchejpi qowanchej.

Munakuwajniyku Dios, imataj kanman Qan qonqapawaykuman chayri? Mana Qanwanqa imanaykumantajri? Chayrayku mañakuyku sapa p’unchay sinch’ita sayachinawaykuta Salvawajniykupi creespa. Jesucristoj sutimpi. Amén.

Septiembre 11

“... Tukuy ima qankunajta: Pablo kachun, Apolos kachun, Cefas kachun, kay pacha kachun, kawsay kachun, wañuy kachun, kunan p’unchaypis kachun, jamoj p’unchaypis kachun, tukuy chaykunaqa qankunajta. Gankunataj Cristojta kankichej, Cristotaj Diospata.” (1 Corintios 3:21-23)

Diosqa runasta ruwasqa Paypa wawasnin kanankupaj, herederosnin jinataj kawsakunankupaj. Ajina kashajtinkutaj, juchaman urmasqankuqa yuyayninkuta laqhayaykucherqa. Chayrayku noqanchejqqa chay jina jatun imastaqa, mana entiendeyta atinchejchu.

Diosqa nin runata ruwasqa Payman rijch’akoqta, Paypa wawasnin kanankupaj, herederosnintaj kanankupaj. Diospa tukuy ruwasqasninmantaqa, mana imapis kanchu Diospa wawampaj jina, munakuywan ruwasqaqa, ni angelkunapis ajina ruwasqachu karqa.

Wawan kayninchejqqa qallarercqa chay ñawpaj kaj qharita, chanta ñawpaj kaj warmita ruwasqampi. Paykunata munakuspa Dios churarqa, kay pachapi may k’achito huertaman. Jaywarqa kay pachantimpi chay runakunaj herencianku kanampaj. Juchallikusqankuraykutaj chay k’acha q’omer huertamanta qharqochikamorqanku. Chayraykutaj, paykuna juchaman urmasqankurayku tukuy runakuna Diosmanta karunchakorqanku. Qhepamantaj Chay urmasqa runakunata munakusqanrayku, Diosqa watejmanta oqharikaporqa uj k’ata Churin Jesucristonejta, watejmanta wawasnin kananchejpaj.

Wiñaymantapacha Dios Churi wawqenchejman tukorqa. Runaman tukuspataj jamorqa, imaynachus manaraj jucha kashajtin runas karqanku chay k’acha huertapi, ajinaman watejmanta churanawanchejpaj, ajinallataj watejmanta wawan kananchejpaj Jesucristoqa jamorqa.

Diospa leyninman jinaqa, Jesucristo noqanchejrayku juchayoj jina wañunan karqa. Chayraykutaj Cristo jamuspa cuentachejpi castigasqa wañorqa. Ajinamanta noqanchejqqa Paypi creespa salvasqa kanchej wiñaypaj.

Dios Tatayku, Salvawajniyku cuentaykupi wañusqanrayku noqaykuta perdonawayku. Mañakuykutaj yachayta qowayku imachus munayniyki kasqanta entiendeyta atinaykupaj. Jesucristoj sutimpi. Amén.

“Astawampis sutimpi creejtinku, tukuy Payta jap’ikojkunaman atiyta qorqa, Diospa wawasnin ruwasqa kanankupaj.” (Juan 1:12)

Apóstol Juanqa, Diospa Churinmanta parlaspa, nerqa: “Paypata kajkunaman jamorqa, paykunatajri mana Payta jap’ikorqankuchu ... tukuy Payta jap’ikojkunaman atiyta qorqa Diospa wawasnin ruwasqa kanankupaj,” nispá. (Juan 1:11-12).

Maypachachus kikin Señorninchej Jesucristo, chanta Juan Bautista, apostolkuna imaqa, Evangeliota willayta qallarishaspa, nerqanku: “Diosman kutirikuychej, imaraykuchus Janaj Pacha reinoqa qayllaykamunña,” nispá. (Mateo 4:17). Paykunatarí may chhika runakuna, mana uyariyta munarqankuchu. Llank’anankuman riraporqanku, wakintaj negociosninkuman, wakintajri chay kamachista maqararqanku, wañuracherqanku, ima” Chayraykutaj, “juchanku patapi wañurarqanku”... Chaywampis wakinkunaqa evangeliota jap’ikorqanku, chayraykutaj paykunata Diosqa wawasninpaj rejsikaporqa. (Mateo 22:5).

Ñawpa Testamentopi parlan Israel nacionmanta. Paykunaqa, Diospa wakichisqan llajta karqa. Chantapis, Mesias nisqata Dios kachamunanta unayña nerqa, chayta suyasharqanku. Jesús karqa Diospa kachamusaj nisqanka. Ajinapis, askhas Paypa parlasqanta uyarinankupaj tukuynejmanta jamorqanku.

Cristo Jesuspayachachisqanta uyarispa, milagrosta ruwasqanta rikuspa ima, jinallataj juchasapatapis munakuywan qhawasqanta rikuspa imaqa, wakinkunaqa creerqanku Jesuspi, ajinamanta yupaycharqanku ima. Ajinamanta, Jesusta jap’ikojkunataqa, Tata Dios juchasninkuta perdonaspa wawasninpaj jap’ikaporqa. Señorninchej Jesucristoqa, paykunawan mikhorqa ujjarqataj; jinallataj, paykunaman tukuy imata yachacherqa, nerqataj paykunaqa, “wawqesnin kasqankuta.”

Chaywampis wakinqa, chay kutillapaj creerqanku, qhepamantaj imaynachus karqanku ajinallamantaj kutiporqanku. Imaraykuchus paykunaqa chay allin willaykunataqa uyarillarqanku, manataj mask’arqankuchu Diospa perdonnintaqa. Paykunaj munayninkuman jinalla munarqanku kawsakuyta, mana Diospa nisqanta kasuspa. Pischus Diospa perdonninta mask’ajkunari, tarirqanku Diospa: munakuyninta, khuyakuyninta perdonninta, waqaychayninta ima. Kayta paykunamantaqa, ni pipis qhechuyta aterqachu.

Dios Tatayku, noqaqa tukuy suyakuyniyta makisniykiman saqeni. Jinallataj Jesuspi creespa salvasqa kasqaytapis sinch’ichay noqapi. Jesucristoj sutimpi. Amén.

Septiembre 13

“... Sutimpi creejtinku, tukuy Payta jap’ikojkunaman atiyta qorqa Diospa wawasnin ruwasqa kanankupaj. Paykunaqa mana runaj yumasqanmantachu nacekunku, nitajaychaj munayninmantachu, nillataj pi qharejpa munayninmantachu; astawanqa Diosmanta nacekunku.”

(Juan 1:12-13)

Biblیمان jinaqa, pikunachus Jesucristota kawsayninkuman wajyakunku chayqa, kay pachapi kawsanku Diospa wawasnin jina, pikunachus cheqamantapuni “Diosmanta nacesqa kanku chaykunata”. Apostol Pedro, nin: “Ajinamanta qankunaqa, imaynachus Dios kasqanwan ujchasqa kankichej,” nispa. (2 Pedro 1:4). Chayqa may t’ukuna. Ichari?

Diospa wawasnin jinaqa, Pay kikipa yumasqan kanchej, chantapis Paypa khuyakuynimpi kawsakuspa, may k’achas kanchej Paypajqa, wiñay kusikuyniyojtaj kanchej. Kayta yachaspaqa, ñawisninchej waqayta t’ojyan kusiymanta; sonqonchej ukhumantapacha may chhikata graciasta qonchej Diosmanqa. Chay tukuytaqa Diospa qowasqanchej cheqa kaj Fe ruwan.

Apóstol Juan, nerqa: “tukuy Payta jap’ikojkunaman atiyta qorqa, Diospa wawasnin ruwasqa kanankupaj,” nispa. “Jap’ikuy,” nin. Imataj kashan, chay “jap’ikuy”? “Jesucristoj sutimpi creespa sonqonkupi jap’ikojkuna chayqa.” Diospa qhelqachisqan Bibliapi tukuynejpi chaytaqa sut’inchán, ajinamanta Diospa wawasnin kasqanchejta; chayqa Jesucristoj ruwasqasnimpi creesqanchejraykulla.

Ashkha runakunapis Diostaqa qhesachachun, chaykuna ukhupi kankupuni Dioswan allinyakuyta munajkunaqa. Chay tapukuymantaj, Diospa Simi Nisqanqa, kay jinata nin: “Diospa Qhasilla K’acha Yanapayninnejta creeyrayku salvasqa kankichej, mana chaypaj jina kashajtiykichej. Chaytaj mana qankunamantachu jamun, manachayqa Diospa qhasilla jaywasqan,” nispa. (Efesios 2:8).

Mana maynejpipis Bibliapeqa ninchu, Diospa wawan kananchejpajqa, allin imastaraj ruwananchej kasqantaqa.

Diospuni ruwakuwarqanchej, salvakuwarqanchej imataj, K’acha khuyakuyninraykulla. Dios ajllakuwarqanchej manaraj kay Pacha ruwasqa kashajtin, uj k’ata Churinnejtá. Dios Tataqa, k’ata Churinta kachamorqa, Paynejtá wawampaj rejsikapunawanchejpaj, herenciatapis Paywan khuska jap’inanchejpaj, ima.

Diosniyku, yanapawayku ari, ama laqhayaypi chinkanaykupaj. Jesucristoj sutimpi. Amén.

“Qankunachus munanakunkichej chayqa, tukuy runas yachanqanku yachachisqasniy kasqaykichejta.” (Juan 13:35)

Apóstol Juanqa, ñawpaj kaj cartampi, nerqa: “Yachanchej Diosmanta kasqanchejta,” nispa. (1 Juan 5:19). Nillantaj: “Wañuyanta kawsayman chimpapusqanchejta, mana munakojqa wañuyllapiraj kashan,” nispa. (1 Juan 3:14).

Chaymanta parlaspa, Apostol Pablopis, nillaraqataj: “Sichus noqa parlayman runaspa parlayninkupi, angelespa parlaynimpiwan ... Sichus Diospa Palabranta sut’inchayman, yachaymantaj tukuy pakasqa yachaykunata, tukuy kay pacha imasmantawan; sitajchus sinch’ita creeyta atiyman orqosta ithirichinaypaj jina, manataj munakuyniyoj kayman chayqa, mana imachu kayman,” nispa. (1 Corintios 13:1-2).

Apóstolkunaqa, k’iskimanta parlaj kanku, Feyniyoj kayqa rikukusqanta munakuyniyoj kasqanchejpi, nispa.

Pipis Diosta munakuyta qallarin chayqa, khuyakuyninta munakuynita tarin, tukuy juchasninmanta perdonsqa kayta ima tarin. Imaraykutaj kusikuymán ujikuna Diosman kutirikojtinku? Diospa munakuynin noqapi kasqanrayku ahskhata kusikusaj.

Tukuy sonqopuni kusiyniyqa Jesuspi creespa runakuna Jesucristtoman chimpakojtinkoqa; ichus paykunataqa mana rejsillanipischu ajinapis kusikuni. Diospa munakuynin noqanchejpi kasqanrayku ashkhata munakuypi kusikunchej. Chantapis, apóstol Pedrowan khuska atini niyta: “Imaynachus Dios kasqanwan ujchasqa kanchej,” nispa. (2 Pedro 1:4). Apostol Juanpis, nillantaj: “Diosqa munakuymjn,” nispa. (1 Juan 4:16).

Juchaman urmasqa aycha sonqonchejqqa munakun, pichus imapipis noqanchejjinayuyajllata; jinallatajpichus munakuwanchej chaykunallata munakun. Apostol Juanqa nishan, Diosmanta jamoj munakuywan munakojqa, tukuyta munakun uj rejllata: “Tatata munakojqa chay Tataj wawantapis munakullantaj,” nispa (1 Juan 5:1)

Munasqa Diosniyku, ashkhas supaywan ch’awkiyachikunku, yanapawayku sonqoykuta llamp’uyachispa, paykunaman munakuyniykita rejsichiyta. Jesucristoj sutimpi. Amén.

Septiembre 15

“Cristoj Palabranqa, sonqoykichejpi allin junt’a kachun. Qankunataj, ujkuna ujkunawan yachachinakuychej, k’aminarikuychejtaj tukuy yachaywan...” (Colosenses 3:16)

Tukuy imapi allin sonqoyojpuni kana, tukuy imata maychus kananman churaspa. Kikillantataj, Diospa Simi Nisqanmantapis maychus kajta parlarina.

Wakinkunaqa, imapis kachun nispalla ñawirinku Diospa Simi Nisqantaqa; kaynejmanta, jaqaynejmanta p’esqos jina chhuluspa. Ichapis nishanki, mana ñawirinamantaqa chayllatapis ñawirinpuni, nispá. Aswan allin ñawireyqa kashan, ujnín kaj librota kicharíspa t’aqamanta t’aqa ñawerqona. Ajinamanta umaykipi sut’i kanampaj, tukuynin libro imamantachus parlashan chayta yachanaykipaj. Jinallataj, maynejtachus ñawishanki chayta, sonqoykipi qhepakunampaj, mana ni jayk’aj qonqanaykipajtaj. Ajinamanta misk’ichikunaykipaj chay ñawisqaykiwan.

Mana anchatachu Bibliamanta yachanki chayqa, qallariy Mosoj Testamentowan. Mayk’ajchus, ima ratochus ñawiriyta munanki chayta, sonqoykipi t’aqay. Mana ajinata ruwanki chayqa, ni jayk’aj atinkichu ñawiriytaqa.

Ichus allimpuni kanqa, wajkunawampis khuskachakuspa ñawirinayki, kachunku creyentes chayri mana creyentespis. Qallariypi creyentes kajkunapis ajinallatataj ruwaj kanku, Dios Tataj Palabranta ñawirinankupajqa ajinata qotuchakoj kanku. Chantá chay ñawisqankutataj uyarejkunaqa wajkunaman willaraj kanku; paykunapis Jesuspi creespa salvasqa kanankupaj.

Ichus qanqa mana reparankichu ajinata ruwana kasqantaqa. Ajinata ruwanki chayqa, chay ruwasqaykeqa ancha sumaj kanqa, kusichisunqataj Diospa Simi Nisqanta tukuyman willarasqaykirayku.

Ajinata ruwasqaykiraykuqa, juchapi puñusqa kajkuna ujllata rijch’aríspa Jesucristoman chimpakunqanku salvasqa kanankupajqa. Ajinata ruwasqaykiqa jatun kusiy qampaj kanqa. Ajinamanta Jesucristoj Iglesianqa wiñanqa.

Janaj Pachapi kashaj Dios Tatayku, kay pachapi ashkha runakuna mana rejsinkuchu Qampa Simi Nisqaykita. Yanapawayku ari, Evangelioykita willayta, mana iskayrayaspa. Jesucristoj sutimpi. Amén.

“... Tukuy imata iskay sonqolla mana creeyman jina ruwayqa, jucha.”
(Romanos 14:23)

Chay creesqanchej Fe sonqonchejpi ashkhata Dios qowasqanchejman jina kanqa, chayman jinallataj Dioswan imaynachus kayninchejpis kanqa, chaytaj mana tukukoj yaku juturi jina.

Espiritoj pusaykachasqanman jina kawsakunchej chayqa, imayna runachus kasqanchej yachakun, sumajpaj rikuchiwanchej. Noqanchejpeqa kaykuna rikukun: Munakuy, llamp'u sonqo kay, ch'uwa sonqo kay, ima. Chaykunamanta aswan jatonqa Jesucristopi atienikuy, Fe. Sonqonchejpi mana sinch'ichu kashan chaypis, Dios noqanchejman qowasun mañakojtinchejqa. Chay atienikuyninchej Jesucristollapi kajtintaj, allin ruwaykuna noqanchejpi rikukonqa.

Evangelioqa Diospa Qhasilla K'acha Yanapaynin, yachayta qowanchej Jesucristota astawan rejsinanchejpaj. Chaytaj sonqonchej payllamanta yuyasqanmanta kacharichiwanchej, jinallataj leypa wata runan kaymanta kacharichiwanchej. Chay tukuy imata tarinchej, juchasninchejmanta perdonasqa kaspas. Ajinamanta qallarincej munakuypi Dioswan allimpi kaytaqa.

Ajinamanta noqanchejman jamun, Diosta cheqa kaj munakuywan munakusqanchejqa. Jinallataj noqanchejpi rikhurin sumaj poqoypis. Manachus cheqamantapuni reparasun Dios wawampaj rejsikapuwasqanchejta chayqa, mana endiendeyta atisunchu, nillataj Diostapis kasoyta atisunchu.

Pichus reparan Diospa ruwasqan jatun kasqanta, runata wawampaj rejsikapojtaj mayjatun kasqanta chayqa; jinallataj sitajchus cheqamanta creen Diospa nisqampi: “Sonqochakuy, waway. Juchasniykeqa pampachasqaña.” (Mateo 9:2). Ajina kajtenqa, tukuy ima paypajqa sut'i kanqa. Diosta kasonqa ni pej tanqasqan. Imaynatachus uj wawa, tatan munakuyniyoj kasqanrayku, tatanta munakuspa kasun, ajinata.

Wawan kasqaykirayku, Diosqa nisunki Paypi atienikunaykita tukuy sonqo, qhepampitaj chay “allin ruwaykuna,” nisqaqa jamullanqa. Ruwanki tukuy sonqo, ni pi kallpashasujtin. (Tito 3:8; Santiago 3:13). Arí, chayqa sumaj sut'ipuni umaykipi kachun.

Janaj Pachapi kashaj Señorniyku, yanapawayku Salvawajniyu Churiykiwan uj sonqolla kawsakuyta. Jesucristoj sutimpi. Amén.

Septiembre 17

“... Pisipi mana cheqanta ruwajqa, manallataj ashkhapipis cheqanta ruwanqachu.” (Lucas 16:10)

Kanku Jesucristopi creespa salvasqa kajkuna, jatuchaj imaspi allinta ruwaspa junt'ajkunaqa; kallankutaj “juch'uy” ruwaykunapi mana ruwaspa qonqapujkunapis.

Ichapis may chhikas kanku, chay “juch'uy” imastaqa mana rikuspa jinashankuchu, chaywampis chay “juch'uy” imasta qonqasqankuqa, jatuchej uma nanayta apamuyta atinman. Judasqa Jesucristojta, apostolkunajta qolqe jap'ejninku karqa. Payqa pisimanta pisi qolqeta suwayta qallarerga. Ajina pantaypi kasqanraykutaj Jesusta jap'ichinamapajqa, ashkhata moq'erqa chay kinsa chunka phisus qolqeta. Paypa sonqonqa thaluyasqa kasharqa, unaymantapacha qolqeta munapayasqanrayku; ajinamanta Jesustaqa jap'icherqa wañuchinankupajqa. (Juan 12:6).

Chayrayku, Jatuchaj juchaman urmaj jina kashaspaqa, qallarishajtín sapinmantapacha k'utuna.

Chay “juch'uy” pantaykuna nisqasqa, Jesuspi creejkunata atinman urmachiyta, jinallataj Jesusmanta karunchachiytapis. Astawampis mosoj cristianos kajkunataqa, pisimanta pisi Diosmanta karunchachiyta atin.

Ajina kajtenqa, ama piensaychu mayqen juchapis “juch'uy” kasqantaqa. Ima juchallapis Diospa qhawaynimpíqa jucha, contrampi kasqanrayku. Juch'uy kasqanta yuyaspa, patampi patampi juchallillanchejpuni chayqa, qhepaman uj jatun orqoman jina tukuyta atin.

Mana yuyanachu: Chaytaqa pipis ruwallan, kay kutillatawanña, uj chhikitallanta, nispaqa.

Uj niypeqa, mana atipay atina kanman, astawanqa chay “jatuchaj juchas” ninchejña chay juchasman jina tukunman. Maqanakunapajqa Diospa qosqan p'achata churakusqanchejwan atisun atipaytaqa. Chayrayku, kunanmanta ama ninkichu, ima juchatapis “juch'uy” nispaqa. Arí, maqanakunallapuni tiyan juchawanqa; mayk'ajpis, mayllapipis, imaraykuchus tentacionqa rikhurillawanchejpuni mayllapipis, mayk'ajllapis.

Munasqa Dios Tatayku, mana yupayta atinaña juchayqa. Perdonaway ari, khuyaway ari. Jesucristo Churiykej'sutimpi. Amén.

“Creeshqanchejnehta cheqan runapaj qhawasqa kaspa, Dioswan allinyachisqa kanchej Señorninchej Jesucristonehta.” (Romano 5:1)

Diospa Simi Nisqampi rikunchej, ashkha kutita parlan Diosmanta mañakunapuni kasqanta mana puñuspa, jinallataj ima pantaymantapis qhawakunapuni kasqanta, imaraykuchus maqanaku tinkupi kashanchej. Jinallataj Bibliapi parlan, Diospaj llank’ana kasqanta... Chantapis, tiempompichay tukuy imata ruwana kachun. Perdonasqa kasqanchejmanta iskayrayasun chayqa, chay tukuytaqa mana tukuy sonqo ruwayta atisunchu. Jinallataj, sichus salvasqa kasqanchejmantapis iskayrasunraj chayqa, almanchejqqa mana samariyta taringachu.

Chayta sut’iman orqhonapajqa, unancharisun kay rich’anachinata churasaj chaypi: Sumajta kallpachakoj mikhuna kanman, sumaj aycha mat’a, chanta papas ima; mikhujtinchej cuerponchejpajqa allin kanman, kallpata qowasunman. Ajinallataj: Dispa nisqasninta ñawirisun, mana puñuspataj Diosmanta mañakusun chayqa, kayllpachakusun. Diospa chajrampi llank’anapajpis sumajta kallpachawasun.

Ajinallataj, pichus dioswan mana allimpichu kashanman, Diospa nisqampipis mana creeta atishanmanchu, may chhikatapis Diosmanta mañakushachun, Diospa chajrampipis may jinata llank’ashachun, manataj Dioswan allimpichu kashan chayqa, yanqhalla imapis kashan. Ajina kajtenqa, chay runa uya p’akilla kanqa, phiñasqalla pipajpis kanqa.

Pisi creeyniyoj onqosqa alma, Diospa Leynen ñawirispaga reparakunqa chinkasqa juchasapa kasqanta. Ajina kashaspataj, Jesucristo cuentanchejmanta ruwasqanta qharinqa chayqa; chaypi reparanqa Diospa kamachisqan Leypa nisqanqa junt’asqaña kasqanta; ajina kajtenqa, uj sumaj mikhuna jina paypaj kanqa. Ari, chay Leyqa mana juchachayta atinñachu, Cristopi kajkunataqa, imaraykuchus pagasqaña pikunachus Paypi creejkunapajqa.

Ajinata ari, chay onqosqa almayki sanoyanqa; qantaj kususqa kanki. Ajinata Espíritu Santoqa ruwan noqanchejpeqa.

Munasqa Dios Tatayku, noqaqa ajina pisi kallpa kani tukuy imapi. Juchallisqayta willakuyki, perdonaway ari. Jesucristoj sutimpi. Amén.

Septiembre 19

“Noqaqa, Diospa Qhasilla K’acha Yanapaynintaqa, mana yanqhayachinichu. Sichus Leynejta cheqan runapaj qhawasqa kayta atisuman chayqa, yanqhallata Cristoqa wañorqa.” (Gálatas 2:21)

Tukuy kusiyninchejqqa, Cristo noqanchejrayku lugarninchejpi wañusqan kashan. Chay noqanchejpajqa jatun valorniyoj, chaymanta noqanchejmanqa jamun tukuy kusiyninchejqqa.

Cheqamantapuni jatuchej juchasapas kanchej, jinallataj may jina qhellas kanchej. Diospa chajrampi llank’ana kashajtin, sumajta Diosta kasuspa purina kashajtin, mana munanchejchu ruwayta, ajinamanta tiemponchejta qhasimanakajpaj usuchinchej. Cheqatapuni Diosqa munan Paypaj t’aqasqa santo kananchejtaqa. Salvasqa kananchejpajpis noqallanchejtapuni qhawashanchej, allin ruwaykunasninchejwan aswan importanteta jina tukuy qhawanawanchejta; noqanchej ruwayninchejtapuni munanchej jatunchayta. Ajina ruwasqasninchejpi atienikunchej chayqa, “Cristoqa yanqhallata wañorqa noqanchejpajqa.”

Diospa rikuynimpeqa, cheqan runapaj qhawasqa kayninchejqqa Jesucristollapi tarikun, chayraykutaj payllapipuni sonqonchejta churasun.

Pikunachus sapa munarisa juchallillankupuni, perdonta mañakullasaj chanta Diosqa perdonallowanqa nispa ninku chayqa, juchankupi chinkasqa kashanku. Paykunapi Jesucristopi creesqanku chay Fe mana kanchu. Dioswan alqochakunku, kawsayninkuwan phujllakushanku, puraj uyasmantaj tukunku.

Pikunachus Diospa rikuynimpi allintapuni kawsakuyta mask’ajkunaqa, sapa p’unchay maqanakupi kallpata tarinqanku Jesucristoj ruwasqallampi. Sajra imasta ruwayman tanqasqa kashaspapis Cristoman chimpakojtinku, chanta Paypa nisqantataj tukuy sonqo jap’ikujtinkoqa, Dios uj k’ata Churimpa ruwasqanta noqanchejpi rikospa, cheqampaj qhawasqa kasunchej, Cristopi creesqanchejraykulla.

Diospaj t’aqasqa kashaspapis, kay pachapi jucha kasqanraykoqa manapuni chaykama mana juchallejqqa kasunmanchu. Chayrayku, sapa p’unchay chay juchasninchejta Diosman willakuna uj k’ata Churinnejta perdonanawanchejpaj. Cheqampaj qhawasqa kasqanchej, chanta wawampaj rejsikapuwasqanchejqqa Jesucristoj llimphu kawsaynillampi tarikun.

Dios Tatayku, noqapi kallanpuni juchaqa. Yanapaway juchamanta karunchakuyta. Jesucristoj sutimpi. Amén.

“... Runa masinta munakojqa, leypa nisqanta junt’an.” (Romanos 13:10)

Uj runa, Diospa Leyninmanta yachachej karqa, paytaj Jesusta taporqa: “Yachachej Señor, leypa kamachisqasninmanta mayqentaj aswan kuraj?” nispa. Jatun yachayniyoj Señorninchejtaj, kuticherqa: “Señor Diosniykitaqa munakunki tukuy sonqoykiwan, tukuy almaykiwan, tukuy yuyayniykiwantaj. Chaymin leypa kamachisqasninmanta aswan kuraj, ñawpaj kajtaj. Qhepan kaj kamachisqapis ñawpaj kajman rijch’akullantaj: Runa masiykita munakunki qan kikiykita jina. Chay iskay kamachisqaspi tukuy ley junt’akun, profetaspas nisqankupis, nispa nerqa Jesusqa.” (Mateo 22:34-40).

Chaywanri, imaniytataj munan Dios? Kay iskay kamachisqaman jinari, ajinatapunichu yachachin tukuynin Ley, profetas kajkunapis? Ajinata yachachishan tukuynin Ley, jinallataj profetaspis, Jesuspa apostolesnimpis. Ajinamanta, “Diosta munakuyta yachananchejpaj, runa masinchejtapis.”

Imatachus kay pachapi ruwananchej kashan chaytaqa, munakuywampuni ruwasun.

Ñawpa Testamentopi willarqa imachus junt’akunanta, jatuchej profesias chaykunamanta willakorqa; chaymantra ujnin kashan Mosoj Tratomanta willasqa. Chaypi Dios nerqa: “Leyniyta yuyayninkuman churasaj, sonqosninkupitaj qhelqaykullasajtaj,” nispa. (Jeremías 31:33). Chay qhelqasqa Leyqa munakuy kashan, chay munakuytaj Jesucristonejta noqanchejman jamun, imallatapis allinta ruwananchejpaj. Munakuywan imallatapis, jatuntapis, juch’uytapis ruwananchejqa kusichiwanchej, imaraykuchus allin kasqanrayku. Munakuywan ruwasqaqa t’ika jina qhallallarin.

Sinaí nisqa orqopi Dios qorqa llajtanman Chunka Kamachiykunata. Señor Jesuspis “Sermón del Monte” nisqata, uj orqo patapi parlaykullarqataj chay munakuyninmantaqa. Apostolespis sut’ita yachachinku chay “jatun kamachisqa munakuymantaqa.”

Apóstol Pablopis, allinta sut’inchanampaj, nin: “Ama pimampis manuchu kaychej, manachayqa purajmanta munanakuychej, imaraykuchus runa masinta munakojqa, ñapis Leyta junt’anña... Munakuyniyojqa mana ima sajratapis, runa masimpa contranta ruwanchu,” nispa. (Romanos 13:8-10).

Gracias Señor Jesús, Qampa cheqan kayniykiwan qhatasqa rikhurin juchasneyqa. Chayraykutaj noqaqa atini allinta kawsakuyta. Jesucristoj sutimpi. Amén.

Septiembre 21

“Cristo preciowan kancharichiwarqanchej Leypa maldicionninmanta, imaraykuchus Payqa maldecisqa karqa noqanchejrayku. Diosmanta qhelqasqapi, nin: kurkupi tukuy warkhusqa kajqa maldecisqa kachun, nispa.” (Gálatas 3:13)

Diospa qosqan Leyqa, mana qhesachaspa qonqarparinapajchu kashan. Chay Leypi Dios mañawasqanchejqa junt’akunampuni kashan. Mana junt’ayta atisqanchejraykutaj, Diosqa uj k’ata Churinta kachamun Pay junt’anampaj. Chayraykutaj, kacharichisqaña kanchej Jesucristonejta Leypa maldicionninmantaqa. Chayrayku Jesucristopi creespa atienikojkunaqa, manaña juchachasqa kayta atinñachu, chay Leypa nisqanman jinaqa.

Chaywampis, ichus chayta mana sut’ita yachaspaqa mancharinchejraj, chay Leyman jina jasut’isqa kananchejmantaqa.

Sichus Cristopi creejkuna jina Leypaj nisqanta junt’anaraj kanman chayqa, Cristo cruzpi ñak’arisqanqa manachá chaykama junt’asqachu kanman, salvakunanchejpajqa.

Chayrayku, Apóstol Pablowan khuska nisunchej: “Kunanqa Diosman gracias qosqa kachun, wañuyta atipayta yanapawasqanchejrayku Señorninchej Jesucristonejta,” nispa. (1 Corintios 15:57). Ari, wañoyqa kashanraj chaywampis atiyninga manaña kanchu, juchanchejmanta castigasqa kanaqa chinkasqaña; Jesuspi creejkunaj juchasninkupis Diospajqa qonqayman churasqaña: “Kunanqa mana ima juchachaypis kanchu Cristo Jesuspi kajkunapaj,” nispa nin. (Romanos 8:1). Kay aycha cuerponchejpa wañuynintaqa wañusunraj, chaywampis manaña juchachasqachu kasunchej; jinallataj, wañuspapis mana wañusqallapunichu kasunchej, kawsarimusunchej. Imaraykuchus chay aycha cuerponchejpa wañuyninqa pusariwasun aswan sumaj kawsayman, wiñay kawsay samarikuyman ripusun.

Yuyariypuni imastachus qampaj Jesucristo ruwarqa chayta. Payqa mana juchayoj kashajtimpis chay jinata ñak’arisha wañorqa cuentanchejmanta, juchaj atiyninga chinkasqata chinkachinampaj; amapuní chaytaqa qonqaychu: “Kunanqa Diosman gracias qosqa kachun, wañuyta atipayta yanapawasqanchejrayku Señorninchej Jesucristonejta,” nispa. (1 Corintios 15:57).

Munasqa Dios Tatayku, noqapeqa mana imapis allenqa kanchu, chayraykutaj ama noqatachu qhawaway, manachayqa chay Munasqa Churiykita noqapi kashan chaytapuni qhaway; Pay Salvawajniyqa. Jesucristoj sutimpi. Amén.

“Sapa kuti wawasniykichejman yachachinkichej...” (Deuteronomio 6:7)

Tata mama kanki chayqa, ashkha k’acha ruwaykuna kashan qampaj, wawasniykipaj, jinallataj pikunachus qanwan tiyakunku chaykunapajpis, qampa cargoykipi kajkunapaj.

Imaynatataj chayta junt’awaj, paykunawan? Sapa p’unchay Diosmanta mañakunaykichejpajqa tiempota t’aqay paykunawan qotuchakunaykipaj Diospa Simi Nisqanmanta ñawirispas, Cristoj munakuyninmanta parlarinaykichejpaj. Uj ratullatapis qotuchakuychey, ajinamanta Diosmanta mañakujtiykichejpaj; chay p’unchaypi, tukuy uyarejkunajta chanta qampa sonqoyki imaqa, sonqo tiyaykusqa kanampaj.

Jinallataj atiway wasiykipi kajkunawan khuska Diosta yupaychayta. Allimpuni Diosmanta yachakuna kashan, jinallataj mañakuna imapis.

Ajinata wasinchejpi qotuchakuytaqa mana atina jinallachu, imaraykuchus supaypis chaypi qallarillanqataj pantarachiyta, ichapis qhellakuywan, chaytajchus waj imaspi astawan yuyachispa, karunchachiyta munaspa.

Diosmanta mañakuy jatun yachayta qosunampaj, imaraykuchus Paylla kallpata qosunqa, ajinallataj sonqoykitapis wakichinqa, chay parlaykusqaykita allinta uyarispa jap’ikunankupaj. Chaywampis sumajta wakichikuy imatachus yachachiyta munashanki chaytaqa. Ajinamanta sapa qotuchakuyniykichejpi sumaj yuyana kanampaj.

Diospa Simi Nisqan Biblia, jatumpaj qhawasqa kanampaj jinapuni paralaykuy, mana ñak’ayllata uyarinankupaj jinaqa. Chaypajmari, nishayki sumajta wakichikuy nispaqa. Arí, misk’ichikunankupaj jinapuni parlasqaykiqa kachun tukuy yachakujkunapajqa.

Janaj Pachapi kashaj munasqa Dios Tatayku, mañakuyki noqata wakichinawaykita maychus kajta yachachinaypaj, astawanqa Churiyki Jesuscristo ruwasqanta jatunchaspa. Jesucristoj sutimpi, Amén.

Septiembre 23

“Cristorí, uj kutillata wiñaypaj kawsayninta jaywaytawan, Diospa pañanman tiyaykukorqa.” (Hebreos 10:12)

“Cristo preciowan kacharichiwarqanchej leypa maldicionninmanta, imaraykuchus Payqa maldecisqa karqa noqanchejrayku,” nispa nin. (Gálatas 3:13).

Apostolkuna imaynatachus creerqanku, chaymanta qhelqasqan libropi, Luteroka sumaj k’achituta nin: “Jesucristoqa Señorniy, juchasapa kayniymanta preciota pagaspa kacharichiwan. Supaypa atiyinmanta orqhowan; tukuy chaytari mana qoriwanchu nitaj qolqewanchu, manachayqa yawarninta jich’asqanwan,” nispa.

Chay tukuyta ruwanampaj Jesucristoqa, Janaj Pachapi jatun k’anchayninta saquespa kay pachaman jamorqa, kinsa chunka watataj runas chawpipi tiyakorqa, Diospa Leynimpa nisqanman jina kawsakuspa. Jinallataj pikunachus mana aterqankuchu Leypa nisqanta junt’ayta, chaykunaj cuentanmanta junt’arqa. Diospa k’ajaj phiñakuyninqa Jesucristoj patanman urmamorqa.

Supaywan, juchawan, chay millay ruwayninwan pejtuspa tukuy kawsayniypi ñak’arichiwarqa; Chayraykutaj Dios Tataj Churin Jesucristoqa, noqarayku ñak’arerqa, noqata salvanawampaj chay wiñay ñak’ariymanta orqhonawampaj. Chay kashan tukuy imamanta aswan jatunqa.

Pikunachus chay imasta mana atinkuchu creeyta, chaykunaqa llakiyllawan atipachikunku, nitaj atinkuchu ni imawan sonqochakuytaqa, Diospa qosqayki nisqantapis mana creeta atinkuchu. Sichus ajinapi kashanki chayqa, Diospa qowasqanchej chay Qhasilla k’acha Yanapayninmanta (Medios de Gracias nisqamanta) jap’ikuy. Diosmantataj mañakuy, creey Feta qosunampaj Espíritu Santonejta.

Tukuy imapis noqanchejpeqa, Diospa khuyakuynillampi tarikun. Sichus chay creesqanchej Fewan Jesucristopipuni atienikunchej chayqa, Janaj Pachapipis kashasunman jinaña kashan.

Munasqa Dios Tatayku, juchasapa kani, Leytaj infiernoman rinayta niwan. Evangeliopitaj niwanki Jesucristoj salvasqan kanki, nispa. Chayraykutaj noqaqa chay nisqaykipi sonqoyta churasaj. Jesucristoj sutimpi. Amén.

Septiembre 24

“Tiyallantaj cielopi ashkha imas, jinallataj kay pachapipis, chantá cielopi kajkunaj jatun kayninenqa uj jina, kay pachapi kajkunajpatataj waj jina.” (1 Corintios 15:40)

Kay pachapi kaj cuerponchejtaqa rikunchej imaynachus kasqantaqa; cielopi kajkunari imaynapunichus kanqapis, janaj pacha cuerposqa mana kay pacha cuerpos jinachu kanqa.

Cielopi kaj imaspipis mana kikinchu: “Intej k’anchaynenqa uj jina, killaj k’anchaynimpis waj jina, ch’askaspatapis waj jina. Chayrayku uj ch’aska waj ch’askamanta uj jinataj,” nipa nin. (1 Corintios 15:41).

Noqanchejpa cuerponchejpis Janaj Pachapi kanampajqa ujinapuni kanqa, imaynachus kunan cuerponchej kay pachapaj jina ruwasqa kashan, Janajpachapajtaj mosojmanta ujina kanqa.

Pilipintusqa, manaraj pilipintu kashaspaqa qhatatakuj khurulla karqa. Paykunapaj tiempo chayamojtintaj pampata qhatatakuspa puriyta saquespa, chay khurumanta llojsispa phawariyta qallarinku. Salvasqas kajkunamanta parlaspaga chayman rijch’akojllataj kashan. Diospa Simi Nisqan, kay jinata nin: “Uj khuru jina runaqa,” nipa. (Job 25:6). Tiempo chayamonqa, maypachachus runaqa wañusqamanta kawsarimponqa mosoj cuerpoyoj kanampaj.

Mana “khuruñachu” kanqa. Mana qhatatakuspañachu purisun. Arí, chay kawsarimpoj cuerponchejpi Janaj Pachaman phawaripusun yuraj p’achawan, maypichus imapis ima munay kashan, chayman. Chaypeqa, may jina kasisqas kawsasunchej wiñaypaj, jatun khuyayniyoy Diosninchejpa qayllampi tiyakusun wiñaypaj.

“Payqa tukuy waqayta ñawisinkumanta pichanqa, manañataj wañuy kanqachu, nitaj waqaypis, nitaj qhapariypis, nitaj nanaypis,” nipa nin. (Apocalipsis 21:4).

iAy Dios Tatayku, noqaqa enemigoyki karqani, ajinapis munakuwanki! Graciasta qoyki Tatáy, perdonawasqaykimanta. Jesucristoj sutimpi. Amén.

Septiembre 25

“Ajinallataj kanqa wañusqasmanta kawsarimpoyqa. Ismoj ayata p’ampaykunchej, chaymanta kawsarichisqa kajtaj ni jayk’aj ujtawan wañonqañachu. P’ampasqa kajqa mana munanapaj jinachu, kawsarichisqa kajrî may allimpi qhawasqa kanqa. P’ampasqa kajqa pisi kallpayoj, kawsarichisqa kajrî may atiyniyoj kanqa. Aycha cuerpotachus p’ampaykunchej chayqa, Janaj Pachapaj wakichisqa cuerpoyojta kawsarichisqa kanqa...” (1 Corintios 15:42-44)

Kaypi apóstolpa parlashan, pikunatachus Dios qhawan chegan runasta jina, mana juchayojta, Jesucristopi creesqankuraykulla. Arí, ajinapis paykunaqa kay pachapeqa, chay aycha cuerponkupi kashaspapis kawsakunku Espíritu Santoj pusaykachasqan.

Espíritu Santo nin, apóstol Pabloj qhelqasqannejta: “Ismoj cuerpo p’ampasqa,” nispa. Chay ismoj cuerpoqa jallp’aman tukupun, kawsarimponqataj mana ismojñachu. Chay cuerpoqa waj jinaña, mosojtaj kanqa. Mana pipis nanachiyta, chanta ñak’arichiyta atenqañachu.

“Tarpusqa kajqa mana munanapaj jinachu”; kawsarimponqataj lliphipej cuerpo, ima munay k’achitutaj. Ajinataqa Dioslla ruwayta atin. Chaymanta parlaspa Cristoqa, may k’achituta, nin: “Inti jina lliphipenqanku Tatankoj reinompi,” nispa. (Mateo 13:43).

“Tarpusqa kajqa pisi kallpa.” Kay pacha kawsaynimpi runaj cuerponqa onqoyman qosqa, pisi kallpa, mana atiyniyojtaj. “Kawsarimponqataj atiyniyoj,” Janaj Pachamanta atiyniyoj; chaytaj entiendey mana atina jinapuni kashan. Icharí?

“Kay pacha cuerpoqa,” runaqa, uywa jinallataj mikhunawan ujjanawan kawsan; jinallataj sayk’untaj, samarikuntaj. Kawsarimpuspaqa manaña jinachu kanqa Espirituman jina cuerpoyoj kawsarimonqa. Kawsanqa mana mikhunawanñachu nitaj ujjanawanñachu, Janaj Pachamanta angelkuna jina kanqanku.

Kay ismoj cuerponchejqqa, p’achallikunan tiyan mana wañoj cuerpowan. Chaypacha junt’akonqa apostolpa nisqan: “Wañoyqa atipasqaña chinkachisqataj,” nispa nisqan.

Munasqa Señor Jesús, Qampi creeni, Qanman kunan jamuni. Pisi feyniyoj kani chaypis, Qampi atienekuni. Qan noqapi kallpa kanki. Jesucristoj sutimpi. Amén.

Septiembre 26

"Imaynatachus rijch'akunchej jallp'amanta ruwasqa runaman, kikillantataj rijch'akusunchej Janaj Pachamanta Jamojmampis."
(1Corintios 15:49)

Tukuy yachanchej Adanpa cuerpon cuerpoyoj kasqanchejta; chaytaj llakichiwanchej, ñak'arichiwanchej, ima. Jinapis, Diosqa niwanchej wañusqamanta kawsarimpoj Jesucristoj cuerpon cuerpoyoj kananchejta, imaraykuchus Paywan khuska sayachisqas kanchej. Kunampeqa, Adanpa cuerpon juchaman urmasqa kasqanwan kay pachamanta cuerpoyoj kanchej: Juchalliyta yachaj, onqoyta yachaj, machuyapuyta yachaj, wañuyta yachaj, ima. Kunan ajina kashan chaypis, creenchej Janaj Pachapeqa lliphipej cuerpoyoj kananchejta, imaynachus Cristojta karqa wañusqamanta kawsarimpushajtin, ajina.

Wakenqa ninku: Imaynapitaj chayqa ajinapuni kanmanri, nispa. Diospa nisqan niwanchej chayqa cheqamanta ajinapuni kanqa. Imaraykuchus chaykunataqa parlawanchej, tukuy imata ruwaj Dios.

Diosqa niwanchej: Janaj pachamanta runakunaña kasparqa, uj k'ata Churinman rijch'ayniyoj kasunchej. Kay pachamanta runaswan Janaj Pachamanta runaswanqa, ni imapi rijch'akunqachu.

Cristoj rijch'aynenqa, Janaj Pachaj rijch'aynin kashan. Chayqa imaytachus Jesucristoj cuerpon wañusqamanta kawsarimporqa jatun kayninmpa k'anchayninwan, ajina. Onqoj cuerpo kanantaqa sanito, kallpasapa cuerpotaj wiñaypaj kawsajtaj.

Janaj Pachapeqa, llimphu sonqo, Diospaj t'aqasqa santo kaylla kanqa. Runapurapis misk'i kawsaypi kawsakuylla kanqa. Diostapis munakusun maychus munakunata jina. Chay tukuyta, kay pacha kawsaninchejpeqa manaraj atishanchejchu maychus kasqanman jina entiendeytaqa.

Munasqa Señor Jesúcristo, pawisqa jina rikhurini chay imasta uyarispa. Chaywampis Qan niwanki: "Ama manchachikuychu, juchasniyki pampachasqaña," nispa. Graciasta qoyki. Jesucristoj sutimpi. Amén.

Septiembre 27

“Sichus Paypa miraynenqa Leyniyta saqenkuman, sitajchus kamachisqasniyman jina mana kawsanqanku chayqa, kamachisqasniytachus p’akispa kamachisqasniyta mana junt’ankuman chayqa, Leyniyta p’akisqankumanta varawan jasut’isaj, sajra ruwasqankumantataj paykunata seq’oykusaj. Chaywampis Davidta munakullasajpuni nitaj cheqa kayniymanta ladoyaspa, paypa contrampi imatapis ruwasajchu.” (Salmo 89:30-33)

Dios Tataqa Churinman nerqa, khuyakuyninta Payman qonanta. Chay khuyakuynenqa mana paypajchu karqa, manachayqa Jesucristo chayta tarerqa noqanchejpaj, juchanchejmanta Pay pagapunawanchejpaj t’ukuna preciowan. Chayrayku, chay khuyakuynenqa mana tukukuyniyoj kashan; juchallejtinchejpis chay perdonta qowasqanchejqa, mana qhechukapullawanchejtajchu.

Diosqa, mayta kusikun wawasnin Jesucristorayku allin imasta ruwajtinchejqa, ajinamantataj k’acha khuyakuyninta qowanchej. Reparankichu allin imasta ruwajtiyki t’inkata jap’inaykita? Jinallataj, Jesucristopi atienikunchej chayqa, t’inkanchejqa kapuwasun.

Diosqa, kusikumpuni allin imasta wawasnin Cristorayku ruwajtinkuqa. Imaraykupunitaj kusikun? Imaraykuchus Jesucristo Churinrayku ruwasqanchejrayku. Diosqa, astawan kusikun, tukuy imamanta Cristopi atienikusqanchejrayku.

Mana noqallanchejmanta allin imasta ruwasqanchejraykuchu Diostaqa kusichin. Manachayqa, runaj kawsaynimpi ñawpajpi Cristo kasqanrayku ruwajtinchej munakuwanchej. Chayrayku ñawpajtaqa creespa Cristota kawsayninchejpi jap’ikunanchej tiyan Salvawajninchej kanampaj, chaymantaraj munakuywan allin imasta ruwasun.

Chayraykutaj Diospa wawasninqa, Cristopi creesqankuraykulla juchallisqankutapis sapa p’unchay Diosqa perdonallanqapuni.

Dios Tatayku, Leyniyki espejopi jina qhawarikuspa rikukuni juchasapa kasqayta. Perdonawaj ari, Salvawajniy Jesuspa sutimpi. Amén.

“Kay kamachisqaqa churasqa kashan cheqamanta munakuy kanampaj ch’uwa sonqomanta, mana juchachaj sonqo yuyaymanta, tukuy sonqo creeymantataj.” (1 Timoteo1:5)

“Ch’uwa sonqomanta.” llojsimoj munakuy nin. Imaynataj chay ch’uwa sonqori? Chay sonqoqa llimphu sonqo, mana rijch’akullanchu, nitaj llullakunchu k’acha kayninta jatunchakuspaqa; Imatachus ninanpajpis unanchanraj, astawampis Diostaqa rejsin munakuntaj.

Chay jina sonqoqa rikukun pikunachus ch’uwa sonqo kajkunapi, Cristopi creesqanku Fepis mana nisqallachu paykunapeqa.

Allimpuni uj cristianoqa, sapa p’unchay Jesucristoman k’umuykuspa kutirikunan, juchasninmanta perdonta mañakuspa. Ajinamanta yachakunqa tukuy kawsaynimpi salvajnimpi atienikusqan, ajinata kawsaspataj Dioswan uj sonqolla kawsakonqa.

Sapa p’unchay juchallisqanchejmanta perdonta mañakuna, imaynatachus mañakunanchejpaj Jesucristo saqewarqanchej: “Dios Tatayku,” nisqa mañakuyta, ajinata mañakunanchejpaj. “Dios Tataman qayllakunachej ch’uwa sonqowan, tukuy sonqo creespa,” nispa nin. (Hebreos 10:21), Cristowan sonqo tiyaykusqa kawsakunapaj.

Cristoj munakuyninwan sonqochasqa kayqa, jap’inchej jatun munakuyninta. Ajinata nin: “Munakuyniyoj runaqa mana ruwanchu mana allin kajtaqa, mana payllapajchu imatapis mask’an,” nispa. (1 Corintios 13:4-5). Manañataj noqallanchejpajchu kawsakunchej, manachayqa pichus noqanchejrayku wañorqa kawsarimorqataj, Paypaj kawsanchej. Chaymantaraj wajkunatapis tukuy soqowan munakunchej.

Chay kashan, “llimphu sonqomanta llojsimoj munakoyqa.” Mana “munakuyki” niyllachu kashan. Ichari?

Sonqonchejpeqa ajina qhelqasqapuni kashan. Ajinata kawsakoj cristianoqa, yachan imachus Diospa munaynin paypa kawsaynimpaj kasqantaqa.

Dios runaj yuyayninman mana k’anchaykojtenqa, yanqhalla yachachinapis, mana entiendenchu, ajinaqa nitaj pitapis yanapayta atinqachu. Ajinapuni kashan, Dios runaj yuyayninman mana k’anchaykojtinqa, pawipi jinalla kawsanqa.

iOh Dios! Qan ninki: Janaj Pachapi jatun kusiy kasqanta uj juchasapa Diosman kutirikojin. Graciasta qoyki salvawasqaykimanta. Señorniyku Jesucristoj sutimpi. Amén.

Septiembre 29

“Sichus pipis creen Jesusqa Cristo kasqanta chayqa, payqa Diospa wawan. Jinallataj Tatata munakojqa chay Tataj wawantapis munakullantaj.” (1 Juan 5:1)

Wañupunan patapi, uj misionero nerqa: “Hermanosta munakusqayqa mana uj rejllachu karqa; wakinta anchatapuni munakorqani, kunantaj reparakuni chay munakuyneyqa mana junt’asqachu kasqanta,” nispá.

Señorninchej Jesucristo, nin: “Uj mosoj kamachisqata qoykichej: Purajmanta munanakuychej. Imaynatachus noqa munakurqaykichej, ajinallatataj qankunapis purajmanta munanakuychej,” nispá. (Juan 13:34). Salvawajninchejpa ajinata kawsanankupaj k’amisqanqa allimpuni karqa kachasqasnimpa kawsaynimpeqa. Noqanchejpis chay kachamusqan misionerospa kawsayninmanta yachaqakunchej ajinata kawsakuytaqa.

Ichus kay pacha imasllapi yuyaspa, qonqapunchej “Jesuspa mosoj kamachiyta qowasqanchejtaqa.” Ama ari qonqapunachu hermanosta munakuytaqa, wañunanchej patallapiña yuyarikuyqa mana allinchu. Chayrayku, kunan tiempo kashan Diosman chimpakunapaj, chay munakuyta sonqonchejman churanapaj imaqa.

Señorninchej Jesucristo, jinallataj apostolkunaj yachachisqankuman jinaqa, noqanchejpeqa yachakun hermanosta munakusqanchejpi. Imaynatachus Juan 13:35-pi, nin ajinata: “Qankunachus munanakunkichej chayqa, tukuy runas yachanqanku yachachisqasniy kasqaykichejta,” nispá.

Apóstol Juanqa, k’iskimanta parlan munakuymantaqa, kay jinata nispá: “Kay jinamanta yachanchej Diospa wawasniinta munakusqanchejta, maypachachus Diosta munakunchej,” nispá. (1 Juan 5:2).

Chayman jinachu kawsayninchej kashan?

Khuyakuyniyoj Salvajniyku, yachani hermanoy (wawqey) kasqaykita; ajinata nin Simi Nisqayki Biblia. Chayrayku, qanllaman k’umuykamusaj. Mosojyachiy Qampi atienekusqayta. Jesucristoj sutimpi. Amén.

“... Purajmanta munanakuychej...” (1 Juan 4:7)

Munakoyqa sonqonchejpi rikhurin Espíritu Santonejta, Jesucristo noqanchejpi kajtin; chaytaj wiñan Salvawajninchejwan uj sonqolla kawsakun noqanchejpeqa. Chayrayku, Espíritu Santoj qowasqanchej munakuyta, ama saqenachu, imapis chiriyachinantaqa.

Munakuypa enemigosninqa ashkha kanku, chaykunataj noqanchejpi chiriyachiyta munanku. Chaykunamanta aswan millay atiyniyojqa kashan supay. Payqa Cristoj salvasqan kajkunaj contrampi kashan, munanakuyinkuta thasnuyta munaspa, hermanos ukhupi phiñanachispa t'aqarayta munashan. Supayqa sonqonchejpi pantaykunasta tariyta yachan, chaywantaj kawsayninchejpi ch'ataykuwanchej allin imasta t'ustiyta munaspa.

Noqanchejpi munakoyqa, Espíritu Santoj ujnin kaj poqoynin kashan, Cristopi kawsajkunapeqa. Nerganchejña, chay munakuyqa allin junt'asqa kanqa, Jesucristowan khuska kawsakojtinchejqa. Juchallisaj chaypis Jesucristoman sapa p'unchay chimpakujteyqa Dios perdonanawanqa. Ajinamanta hermanostapis tukuy sonqowan mmunakusaj. Mana ajinata kawsasaj chayqa, munakuyneyqa, chiriyaponqa.

Sichus uj cristiano kay pacha runaspa yuyayninman jinalla kawsakunman chayqa, manañataj juchallisqanmantapis Jesucristoman chimpakunchu chayqa, munakuyninqa chiriyapushan pisimanta pisi. Chayraykutaj, hermanospa pantasqasninkuta rikuspapis paykunamantaqa sajralataña parlanqa, Diospa jatun munakuyninmanta parlananta nisqaqa.

Charayku, ama saqenachu juch'uy pantaykuna ch'ajwachinawanchejtaqa. Astawanqa, Cristota jatunchaypi astawan yuyasun; jinallataj, Diospa Simi Nisqan Biblia aswan jatumpaj qhawasqa kayta mask'asun Iglesiapeqa.

Señor Jesús, munakuyniyki sonqoypi junt'a kachun. Sutiyki jatunchasqa kachun. Jesucristoj sutimpi. Amén.



Octubre

*Noqaman jamuychej, tukuy sayk'usqa
kajkuna, llasa q'epiyojkuna ima, noqataj
samarichisqaykichej.” (Mateo 11:28).*

Octubre 1

“... Imaraykuchus noqanchejpis kay pachapi, Pay jina kanchej.” (1 Juan 4:17)

Salvadorninchejqqa Belemipi nacekorqa, ajinataj Cruzpi chakatasqa wañunankama kay pachapi kawsarqa. Diospa uj k'ata Churenqa noqanchejrayku k'umuykachachisqa kawsarqa. Chaymanta parlaspa profeta Isaías nerqa: “Runasqa payta qhesacharqanku, pisipaj qhawarqanku. Payqa imaymana nanaywan junt'a karqa; ñak'ariypi, llakiypi ima yachasqa karqa,” nispa. (Isaías 53:3). Chaywampis, chay llamp'u sonqo kayninqa, noqanchejpajqa, uj velowan qhastasqa jina, wiñay atiyniyoj Diospa K'ata Churin kasqanqa, mana rikukorqachu: “Payqa Diospa Jatun Kaynimpa k'anchaynimpa llhiphiynin, Paypa kaynintaj Dios Tataj kaynimpuni,” nispa nin. (Hebreos 1:3).

Kay pachapi creejkunaj kawsayninkupeqa, imaymana ñak'ariy jamun; wakin kuteqa, mana piniyoy jina rikhurinku. Ajinamanta ñak'akariy jamojtin ayqonku, may jina lllasa q'epiyoy jina. Chay lllasa q'epepi ujnenqa kashan juchan. Jesucristollapi atinchej samariytaqa. Mana kanchu wajpi ajinata samarinapajqa.

Mana creyentes kajkunaqa, manchayta rimanku uj creyente imapipis uj chhikanta pantajtinkoqa. Imaraykutaj pantanku cristiano kashaspa, nispa. Llullaykukuspataj astawan yapaykuspa paykunapajqa rimanku, astawan p'enqaypi rikhurichiyta munaspa. Ch'insitumanta ñak'arinku Jesucristoj salvasqasnenqa, paykunaj pipichus creesqankuta wajkunaman rejsichiyta munaspa.

Diospa Simi Nisqanrí, imanintaj chaykunamanta? Nin: “Qankunaqa wañorqankichejña, kawsayniykichejtaj Diospi pakasqa kashan Cristowan khuska. Cristomin kawsayniykichejqqa. Pay rikhurimojtin, qankunapis rikhurillankichejtaj jatun kayninpa k'anchaynimpis, Paywan khuska kanaykichejpaj,” nispa nin. (Colosenses 3:3-4). Ajinata kunampis Diospa wawasninqa, pakasqa jinalla kashanchej. Ajinapis noqanchejqqa Jesuspi creesqanchejrayku, Paywan khuska Diospa herederosnin kanchej. Wañupusunchej chaypis, kawsarillasuntaj t'ukuna k'anchashaj cuerpowan. Job sutiyoj runapis sarna q'etalla kashaspapis Diospa kawsaqen karqa. Lazaropis tukuyta millachikunan kashaspapis Diospa herederon karqa. Ajinata Diospa wawasnenqa, kunan qhesachasqa kasunchej chaypis, Janaj pachapi kusiya kawsay suyashawanchej.

Dios Tatayku, Qanqa juchayta pampachanki. Supaymanta kacharichiwanki, yanapaway Qanta jatunchaspa kawsakuyta. Jesucristoj sutimpi. Amén.

“... Kay pachamanta runas chejnisunkichej chayqa, yachaychej noqataraj qankunamanta ñawpajta chejniwasqankuta. Kay pachajtachus kawajchej chayqa, kay pachamanta runasqa munakusunkichejman. Kunanrí mana kay pachajtachu kankichej, manchayqa noqa kay pachapi kajkunamanta ajllarqaykichej. Chayrayku kay pachamanta runasqa chejnisunkichej.”

(Juan 15:18-19)

Jesús pa salvasqan kajkunapajqa, allimpuni chay nisqasmanta yuyarikunaqa, Cristoj chay nisqasninta sonqonchejpi jap'inaqa; ajinamanta, tukuy imamanta astawan sonqochasqa kananchejpaj.

Cristopi creesqanchejrayku kay pachapi runasqa chejniwanchej. Chayraykutaj allimpuni kashan, salvasqas kajkunapuraqa munanakunanchejta, imaraykuchus uj ayllulla kanchej. Kay pachapi churasqa kashanchej Cristoj reinonta jatunyachinanchejpaj; kay pachapi may jina ñak'arichisqa kashaspapis Salvawajninchejraykuqa kallpachakunanchej tiyan, Señorninchej Jesucristopi.

Cristianos kajkunaqa, kay pachapi ajina chejnisqas, qhesachasqas, nanachisqas kashaspapis, mana kay pachaj kawsaqen kayta munankupunichu. Paykunamanta ichus wakin, ancha pisi kallpas kaspas, iskayrayapunku creyente kayninkumanta. Salvajninku Jesusman chimpajtinkurí,, Espiritunnejta paykunata watejmanta kallpachan, sinch'i sayasqa kanankupaj. Ajinamanta Diosninkumanta mana karunchakunankupaj. Sinch'i kallpayojtaj rikhuringanku, pisi kallpa kajkuna hermanosta yanapanankupaj.

Munakuypi ujlla kawsajtinchejqas, Jesucristo kallpachawanchej juchawan maqanakunapajqa. Jesúsqa chaypi yuyasqa, yachachisqaninman nerqa: “Kay pacha runasqa, chejnisonqachej,” nispa. Chaywanqa niyta munarqa, noqawan kashaspaqa uj sonqolla karqankichej, ajinallataj kunanmanta munanakusqaykichejqas uj sonqollata ruwasqanchej, nispa.

Arí, chay karqa Jesús pa yachachiynin ripunan qayllapeqa, paykunapura munanakunankuta, kay pachapi manapis aychamanta uj tatayoj uj mamayojchu kasunman chaypis, munanakunchej uj Tatayoj kasqanchejrayku, hermanos jina kawsakusqanchejpi. Chaymanta paraspataj, Señorninchej Jesucristo, nerqa: “Uj mosoj kamachisqata goykichej: Purajmanta munanakuychej. Imaynatachus noqa munakorqaykichej, ajinallataj qankunapis purajmanta munanakuychej. Qankunachus munanakunkichej chayqa, tukuy runas yachanqanku yachachisqasniy kasqaykichejta,” nispa. (Juan 13:34-35).

Diosniyku, Yanapawayku wawasniyki jinapuni munakuypi kawsakunaykuta. Jesucristoj sutimpi. Amén.

Octubre 3

“Kay imasmanta qankunaman qhelqamuyku, sonqoyku kusiyan jun’tasqa kanampaj.” (1 Juan 1:4)

Diospa wawasnin kajkuna Jesucristopi perdonasqaña kajkunaqa, mana q’aymalla phiñasqapis kankuman jina kananchu: “Manachayqa cheqan kaymanta, sonqo tiyaykuymanta, Espíritu Santopi kusiymantawan. Sichus pipis ajinata ruwaspa Cristota sirvin chayqa, Diosta kusichin,” nispa nin. (Romanos 14:17-18).

Ajinamanta noqanchejpeqa kusiyan jun’ta kanan tiyan, Señorninchej noqanchejwan kasqan astawan kusichiwanchej. Jesusta jap’ispa presoharqanku chay ch’isi, Señorqa iskay kutita nerqa: “Kusiyniy qankunapi kanampaj, kusikuyniykichejtaj jun’takunampaj,” (Juan 15:11) “Mañakuychej, jap’inkichejtaj, sonqoykichej kusikuywan jun’tasqa kanampaj,” nispa. (Juan 16:24).

Señorqa, ajinata yachachisqasninman qorqa chay jina jatun kusiya. Payqa mana khuyaynillantachu, nitaj perdonallantachu, nillataj Dioswan allinyakuynillanchejtachu qowanchej. Manachayqa, kusikuyta qowanchej, Payqa munan munasqa wawasninqa kuisqa kananchejta. Chayrayku nin: “Kusiyniykichej jun’tasqa kanampaj,” nispaqa.

Apóstol Juampis, chaymanta parlaspa, nillantaj chay iskay kaj cartampi: “Astawanqa noqa kikiy qanta waturikuyta munani uyapura parlarikunanchejpaj. Ajinamanta kusikuyninchej jun’tasqa kanqa,” nispa. (2 Juan 1:12).

Ichapis wakin yuyanku, kay k’amiykunaqa mana chaykama jatunchu kasqanta, chay waj k’amiykuna jinaqa. Ajinata yuyajkunaqa, rikuchiwanchej ancha pisita yachasqankuta, chayraykutaj mana kusikuyninku kanchu. Diospa Simi Nisqan nishan: “Tata Diospa kusikuynenqa kallpachawanchej,” nispa. (Nehemias 8:10). Yuyarikuyuni kay nisqataqa, chayrayku Diospa nisqanqa jatunta kusichiwanchej.

Diospa wawan jinaqa, ama saqeychu kay pacha imas qhechusunanta, Cristopi kusiyniykitaqa. Cheqamanta qampajqa ashkha imas kashan, Dioswan khuska kuisqallapuni kanaykipajjinapuni.

Munasqa Señorñyku, creesqay Feyniyman yapaykuway. Mañakuyki yanapanawaykita astawan qampi atienikuyta. Jesucristoj sutimpi. Amén.

“Imatachus rikusqaykuta, chay uyarisqaykuta ima qankunaman willayku, qankunapis uj sonqolla noqaykuwan kanaykichejpaj, imaynatachus noqaykupis uj sonqolla kayku Dios Tatawan, Churin Jesucristowampis, ajinata.” (1 Juan 1:3)

Apostol Juanqa nishawanchej, Tata Diospa nisqasninca, sapa p'unchay yuyayninchejpuni kananta.

Apostol Juanqa, niwanchej sapa p'unchay Diospa nisqasnintaqa uyarinatapuni, ajinamanta Paywan allimpi kanapajqa. Kutin kutinta niwanchej: “Imatachus rikusqaykuta, chay uyarisqaykuta ima qankunaman willayku”, nispa. (1 Juan 1:3). Cristomanta kusiya, sonqochaynintawan jap'inapajqa, mana uj kutillatachu Evangeliota uyarina. K'iskimanta, kutin kutinta Diospa nisqasnintaqa uyarinapuni, cheqan ñanta purinanchejpajqa.

Cristomanta, kusikuyta sonqochayta ima jap'ikunapajqa, sonqonchejpi Diosninchejpa nisqasnintaqa uyarinapuni tiyan. Ajinamanta yachasunchej maymantachus chay allin imas jamusqantaqa. Dios imatachus qonawanchejta niwanchej chaytaqa, manaraj jap'ishaspapis creenchej chayqa, jap'isunmanñapis jina kashan. Noqanchejqa, rikunchejña imastachus Dios Churinnejta noqanchejrayku ruwasqantaqa. Manachus chaykunapi creesun chayqa, manaraj imapi sonqonchejpi chay kusiyqa chinkapunman.

Sichus kay pacha imasllapi yuyayninchejta churasunman chayqa, noqanchejmantaqa chinkapunman pichus kawsachiwanchej chaypi atienikuyninchejqa, ajinamanta chay allin imas noqanchejpi kajkunamantaqa manaña anchata dakuwasunmanñachu.

Ajinata chay allin imasta kawsayninchejmanta qharqosunman chayqa, Diospa Simi Nisqanta ñawerqospapis, yuyayninchejpeqa pantasqasninchej astawan kasper Diospa niwasqanchejtaqa mana uyarichiwusunchu, ajinamanta pisimanta pisi chinkapunman.

Ajinamanta wakin hermanosqa, Diospa Simi Nisqantaqa ancha pisita ñawirinku; chaymanta jawataj, chay ñawirisqankutataj ni uj chhikallantapis umankupi jap'inkuchu, sonqonkumampis mana yaykunchu.

Noqanchej Bibliata tukuy sonqo ñawirispa atienikunchej nisqasnimpi chayqa, kallapachawanchej kusichiwanchej ima. Ajinamanta sapa p'unchay kawsakunchej sonqo tiyaykuypi.

Señorniyku Tata Dios, salvasqa kanaykupaj creesqayku Feman astawan yapawayku, ama Salvawajniykupi creesqayku iskayrayanampaj, nitaj pisiyanampaj. Jesucristoj sutimpi. Amén.

Octubre 5

“... Chimpamuy, noqataj rikuchisqayki noviata, Corderoj warminta.”
(Apocalipsis 21:9)

May k'achituchus kanman, Diospa Espiritun ajinata parlaykuspa “Cristoj Iglesiasanta”, Janaj Pachapi, Jesucristowan khuska kashajta rikuchinawanchejqa.

Tukuy imamanta aswan kusiyqa, Diospa Qhasilla K'acha Yanapaynin sonqonchejpi kasqan. “Diosqa ajllawarqanchej Cristopi mana juchayoj, mana k'aminataj paypa ñawpaqempi kananchejpaj.” (Efesios 1:4). Manaraj kay pacha ruwasqa kashajtin, Diospa k'ata Churinga karqapuni wiñaymantapacha. Payqa rikuchikorqa runa jina cuerpoyoj hermanonchej kanampaj, noqanchejmanta kutikuspa, Dios Tataj ñawpaqempi kanampaj.

Jesucristoqa, qallariypi imaynachus karqa ajinallapuni kashan. Chayraykutaj, Diospa Qhasilla K'acha Yanapaynenqa ni jayk'aj tukukunqachu, nitaj waj jinaman tukonqachu. Manaraj kay pacha ruwasqa kashajtin, Diosqa uj k'ata munasqa Churinneja ajllawasqanchejña wiñaypaj.

Diospa wawasnimpa kusikuynimpis ni jayk'aj tukukuyniyoj kanqa, imaraykuchus Dios qowanchej Jesucristopi creesqanchejraykulla. Chaymanta parlaspa, apóstol Juanqa nin kay jinata: “Imatachus rikusqaykuta, chay uyarisqaykuta ima qankunaman willayku, qankunapis uj sonqolla noqaykuwan kanaykichejpaj, imaynatachus noqaykupis uj sonqolla kayku Dios Tatawan, Churin Jesucristowampis, ajinata,” nispa. (1 Juan 1:3). Ajina kashan tukuy cristianospa aswan jatunta yuyasqankoqa. Chaytaj paykunapi rikukun uj yuyaylla kasqankupi, uj sonqolla kasqankupi ima.

Diosqa, ajinata ruwashan kunankamapis, tukuy wawasnin ujlla kanankupaj, Paypa Simi Nisqanneja kawsakunankupaj.

Dioswan uj sonqolla kayqa, Janaj Pachapi, jinallataj kay pachapipis noqanchejwampis, ajina kashan Dios Tataj Reinonqa.

Tukuy Atiyniyoj Dios, juchasniykuta chinkachiy noqaykumanta, imaraykuchus llakichiwayku, chinkaymantaj apayta munawayku. Chayta mañakuyku Jesucristo Salvawajniykoj sutimpi. Amén.

“Chay kikin Espiritullataj, espiritunchejwan khuska, testigo jina sut’inchán Diospa wawasnin kasqanchejta.” (Romanos 8:16)

Tukuynin Bibliapi nin, kusikuyninchejqqa Jesucristopi creesqanchejraykulla noqanchejmanqa jamusqanta.

Sonqoy ukhupi imaynachus kasqanqa, Jesucristopi atienikuspa creesqaypi Fepa poqoynin kashan, imaraykuchus feqa Payllamanta noqamanqa jamun. Jatun pantay kashan pischus yuyanku ñawpajtaqa Diosmantaraj ashkhata mañakuna kasqanta, chanta sonqoy ukhupiraj sientechinawan tiyan, chaymantaraj feneyqa kanqa, nispa yuyasqankuqa. Chayqa rijch’akun uj sach’aj poqoyninta rikuyta munay, manaraj chay sach’ata jallp’api sayachishaspa; chantapis manaraj wiñashajtin. Rijch’akullantaj uj wasita ruwashaspa techomanta qallarejman, manaraj cimientonta sumajta ruwashaspa.

Chay “medios de gracia” nisqamanta parlaspa. Imakunataj kashan rikukoj imas? Chaykunamanta ujnin kashan: Diospa Simi Nisqan (Biblia). Chaypi Diospa parlasqanta creenaykipaj, yuyayniykipitaj qhepakunampaj. Ajinamanta pantasqasniyki, phutikuyniykipi, wajcha sonqo kayniyki ima, yanapasunampaj, kallpachasunampajtaj. Sut’i kachun umaykipi ajinamanta kusikunaykipaj. Makisniykita oqhariy Jesucristoman yupaychaspa, mañakuytaj qanwankhuska kawsakunanta, sapa p’unchaytaj perdonasunanta.

Maypichus rikukun yaraqhay, ch’akichikuy salvacionmanta, maypitajchus kashan Cristoman qhaparikuy, chaypeqa chay creey Feqa vela jina ñápis jap’ikunña. Espíritu Santonejta willasqaña sonqoykipeqa Diospa wawan kasqaykita.

Maysumajpuni chaymanta mana iskayrayanaykeqa. Manaraj sonqoykipi chay imas kasqanta reparakunkichu chaypis, jatunmanta Diosman graciasta qonayki kashanña, imaraykuchus kay ñawirisqayki, sonqoykita kicharinña. Arí, ichapis chay kikimpi atiwaj qonqorikuspa niyta:

¡Ay Diosñiy Tatáy! Mana atishanichu maychus creenata jina creeyta. Yanapaway astawan creeta, Churiyki Jesusqa noqarayku pagasqampi. Munani creeyta tukuy sonqo Pay Salvawajniy kasqampi. Jesuspa sutimpi. Amén.

Octubre 7

“... Rejsinkichejña Señorninchej Jesucristoj Qhasilla K’acha Yanapayninta: Qhapaj kashaspapis, qankunata munakuspa wajchaman tukorqa, chay wajcha kayninwan qankuna qhapajyachisqa kanaykichejpaj.” (2 Corintios 8:9)

Jesucristoqa Dios karqa, chayraykutaj mana Paypa patampichu ley kasharqa, ajinapis Dios kashaspapis kay pachapeqa junt’arqa. Mana Payllapajchu kawsarqa, noqanchej cuentanchejmanta castigasqa ima karqa; Paynejta Diospa ñawpaqempi cheqan runapaj qhawasqa kananchejpaj. Payqa, tukuysitunta Leypa mañasqanta junt’arqa.

Diospa Simi Nisqanqa, sut’ita nin: “Cristoqa mana ima juchatapis ruwarqachu. Diosri noqanchejrayku Cristota castigarqa kikin juchapis kanman jinata, noqanchej Cristopi kaspas, Diospa cheqan kaynin ruwasqa kananchejpaj,” nispa. (2 Corintios 5:21).

Chaymá noqanchejpajqa may sumaj willayqa. Juchasninchejmanta castigota Pay muchon, ajinamanta cheqan kayninta noqanchejman qowanchej. Noviaqa wajcha karqa ashkha manutaj, Noviotaj chay manunta pagaspa qhapajman tukuchin. ¡Chay kashan Evangelioj willaynenqa!

Diospa Simi Nisqanqa nillantaj, pichus creen Cristo Salvajnin kasqampi chayqa, Paywan ujchasqa rikhurin. Chay ratomantapachataj Cristoj tukuy imata tarisqantaqa noqanchej jap’iyta atinchej.

Tukuy imapipuni Cristoqa junt’asqata kasukorqa, santo kaynimpi, cheqan sonqo kaynimpi ima; ajinamanta, Dios Tataj ñawpaqempi cruzpi wañusqanqa ashkha valorniyoj kashan; noqanchejpajqa wañuynin chay tukuy imata ruwarqa, noqanchejpis chay tukuyta ruwasunman jina.

Chayraykutaj kay pachapi cristianos kajkunaqa, tukuy kawsayninchejpi kusiysaspuni kawsakunanchej tiyan. Cristopi salvasqa kasqanchejqa tukuy imamanta aswan jatun, waj imaspis umanchejta nanachishanman chaypis, kay tukuy imaswanqa kallpachasqaspuni kanchej.

Ajinapis chaykunataqa, ama yachani nillaychu, nitaj uyarillaychu, manachayqa chay tukuy imapi creeypuni, qampaj kasqanta jinapuni qhaway. Chantá atinki niyta: “Diospa Qhasilla K’acha Yanapaynenqa noqapaj,” nispa.

Dios Tatayku, mayta kusikuni Churiyki Jesucristo Salvawajniy kasqanmanta. Chaymanta iskayrayay jamuwajtin, mana q’enaqakunaypajtaj, kallpata qoway. Jesucristoj sutimpi. Amén.

“Diosqa noqanchejta, mana judío kajkunatapis uj ñawillawan qhawawanchej, chayrayku sonqosninkutapis juchamanta llimphuchan creesqankurayku.” (Hechos 15:9)

Diosqa, salvasqa kasqanchejrayku tukuyta uj ñawillawan qhawawanchej. Imaraykuchus uj k'ata Churinneja ujlla kasqanchejrayku, Diospaj t'aqasqa santo kasqanchejrayku ima; chaymanta parlashan Diosqa, kay jinata nispá: “Mosoj sonqota qosqaykichej, qankuna ukhupitaj mosoj espirituta churasaj. Orqhosqaykichej chay rumi sonqoykichejta, llamp'u sonqotataj qosqaykichej,” nispá. (Ezequiel 36:26).

Señorqa kaypi parlan mosoj sonqota qowasqanchejmanta. Espíritu Santotaj Pabloy siminneja, kay jinata nin: “Aychaman jina kawsajkunaqa, aychaj imasnillampi yuyanku, Espíritu man jina kawsajkunari, Espíritu imasimpi yuyanku,” nispá. (Romanos 8:5).

iPajtataj! yuyawaj Jesuspi creenapaj llimphu kanapaj imaqa, kay pacha kawsaymantaraj t'aqasqatapuni t'aqakuna nispá. Chay jinata yuyajkunaqa jatun pantaypi kashanku. Paykunaqa yuyanku cristiano kaspapis imatapis munasqayta ruwallasaj nispá. Ajinamanta llimphu kawsaypi kawsanamantaqa mana dakunkuchu, imapis kasqallanta kawsakunku.

Pikunachus paykunallamanta jatunchakunku, noqaj sonqoyqa llimphupuni, nispá. Chayta nejkunaqa pantashallankutaj, paykunaqa qonqapunku imaninchus Biblia nishan chayta. Bibliapeqa ni maynejpi ninchu, cristianospa aycha cuerponkoqa juchamanta llimphu kasqanta nispá. Kaymanta Apóstol Pablo nin: “Aychaj munayninga Espíritu contrampi... Chayrayku qankunaqa mana imatapis munasqaykichejta ruwayta atinkichejchu,” nispá. (Gálatas 5:17).

Aycha cuerponchejmanta Bibliaqa, nin: “Cristojta kajkunaqa aychankoj munayninta chakatanku, chay millayta ruwayta yachasqa kaynintawan khuskata,” nispá. (Gálatas 5:24).

Señorníyku Dios, noqaqa mana atinichu intita ruwayta, nitaj killatapis k'anchachimuyta; nillataj creesqay fetapis noqapi ruwayta atinichu. Chayta Qanlla atinki ruwayta. Chayrayku Davidpis mañakusorqa: “Diosnít sonqoyta llimphuchaway, mosoj espirituta sonqoyman churay,” nispá. noqapis mañakuyki chayta. Jesucristoj sutimpi. Amén.

Octubre 9

“Leyqa churasqa karqa, jucha astawan ashkhayanampaj...” (Romanos 5:20)

Runaqa, ni jayk’aj cheqamanta Cristota honrayta ateqachu, manachus ñawpajta Diospa Leyninwan qhatiykachasqaraj kanqa chayqa, chanta Leynejtaraj juchachasqa kanan tiyan.

Diosqa uj k’ata Churinneja, allinyachiwarqanchej Pay kikintawan. May chhika jatun preciowan rantiwasqanchej, chayraykutaj Churimpa ruwasqanrayku noqanchejpajqa, Diospa sonqompi munakuyninqa k’ajarin. Chayraykutaj, Paymantaqa mana pipis ayqheyta atinmanchu, waj llajtasman pakakuyta atinampajqa: “Pakakuna llajtas kanankupaj, chaypi mayqen runapis pakakunampaj,” nispá nin. (Números 35:9). Chay llajtaqa karqa pakakunankupaj, qhatiykachasqa kaspa. Chayrayku Tata Diosqa chay leypa kamachisqanneja mancharichinawanchej tiyan, phutichinawanchej ima tiyan, chay kamachisninta mana junt’ayta atisqanchejrayku.

Uj runa pay kikinwan sonqo junt’asqa kasharqa, jinallapi reparakusqa juchasapa kasqanta. Chay runaj ñawpaj kawsaynimpeqa juchapi kawasakuyninqa munasqa karqa. Ajina kashaspalla, ujllata reparakusqa juchasapa kasqanta, ajinamantataj phutiypi rikhurusqa payllamanta aswan allin runaman tukuyta mana atisqanmanta. Ajinallapi sonqompeqa Diosta munakuyta munasqan rikhurin, mana allin imas payman jamojtintaj astawan phiñakun Diospajqa. K’acha imasllapi yuyayta munan, payman mana allin imas jamojtintaj ithirikuyta munan. Sonqonqa rumi jina sinch’i chuki ni pita uyarispa, ni pita kasuspa jatunchakuyllaman rin.

Chaytaqa Diospa Leynin rikuchishan payllamanta mana junt’ayta atisqanta, ajinamanta juchaqa ashkhayaspa jinan. Rikunchej Leyqa mana cheqan runaman pitapis tukuchiyta ateqachu. ¡Unanchariy allinta! Leyqa mana juchata atipanampajchu, manachayqa juchasapa kasqaykita rikuchisunampaj, Leypaj kamachisusqanta mana junt’ayta atisqaykita rikuchisunampaj ima kashan. Leypi nin: Kayta ama ruwaychu, nispá. Runataj mana junt’ayta atinchu, juchataj ajinamanta paypi ashkhayan.

Munasqa Dios, Yanapaway Jesuspi creesqay feta yapaway. Kay pachantin runakuna contraypi kashajtimpis Qampi atienikuspa amapuni urmanaypaj. Chayta mañakuyki Jesucristoj sutimpi. Amén.

“K’anchaypichus kawsanchej chayqa, imaynatachus Diospis k’anchaypi kashan, ajinata, noqanchejpi, ujkuna ujkunawan ujsongqolla kawsanachej, Diospa Churin Jesuspa yawarnintaj tukuy juchamanta pichawanchej.” (1 Juan 1:7)

Apóstol Juanqa niwanchej, “Cristoj yawarnenqa pichawanchej tukuy juchamanta”, nispa. Imaynataj chayrí? Paymanta perdonta mañakojtinchejqqa juchasnincheyta pichanqa. ¡Arí ajina! Apóstolqa nin: “Juchallisqanchejta pampachanqa,” nispa. (1 Juan 1:9). Chaytachu ruwan yawar? Arí, Jesucristoj yawarnin chayta ruwan.

Ñawpajtaqa, su’ita yachanayki, chanta creenaykitaj tiyan imatachus Jesucristoj yawarnin ruwan chayta. Chaytataj Espíritu Santonejta noqanchejpi ruwan.

Kaypeqa, apóstol Juan parlashan cheqan runapaj khawasqa kasqanchejmanta, jinallataj Jesucristoj yawarninnejta Dioswan allinyakusqanchejmanta. Sichus creenchej Diospa Churin, Jesucristoj yawarnin juchamanta llimphuchawasqanchejta chayqa, Dios niwanchej: “Qankunaqa llimphuchasqaña kankichej”, nispa (Juan 15:3).

Tukuy kay pachapi runakunaj juchasnin, Jesucristo cruzpi wañuspa yawarninta jich’asqanrayku perdonasqa kanku. Ajinamanta Diosqa allinyakun tukuy runakunawan. Chay allin willaykunatataj Diospa kamachisninqa, rispa willarananku karqa tukuy kay jallp’a patapi tiyakujkunaman, jamuychej: “Cristoj sutimpi (Dioswan) allinyakuychej,” nispa. (2 Corintios 5:20).

Tukuy, pikunachus chay allin willaykunata uyarispa Cristopi creenku, Paytataj qhatishanku chaykunataqa, kikin Dios t’aqan Paypaj santos kanankupaj. Paykunaqa Señorpa k’amiynintapis jap’ikunku, mana karunchakuspataj maypichus imaynatatajchus Dios perdonarqa, chayman jina kawsakuspa; ajinamanta paykunaqa k’anchaypi purinku kay pachapeqa. (1 Juan 1:7).

Mayllapipis kashaspa Señorninchej Jesucristota songonchejpi jap’ikunchej chayqa, terinchej perdonasqa kayta; yawarninta cruzpi jich’asqanraykutaj llimphuchasqa kanchej, ajinamanta Dioswan allinyachisqa khuskachasqataj kanchej.

Señor Jesucristo, Qan sumaj Michejniyku kanki, noqari waj ñanta jap’irej oveja jina kashani; jamuy ari noqata mask’awaj, kutichimuway Qampa qayllaykiman. Jesucristoj sutimpi. Amén.

Octubre 11

“K’anchaypichus kawsanchej chayqa, imaynatachus Diospis k’anchaypi kashan, ajinata; noqanchejpis, ujkuna ujkunawan uj sonqolla kawsanchej, Diospa Churin Jesuspa yawarnintaj tukuy juchamanta pichawanchej.” (1 Juan 1:7)

Cristowanqa, “Aswan Santo” nisqa cheqapi kashanchej, chaytaj tukuy runaj qhawaynimpeqa pakasqa jina mana rikukunchu; Diospa pakasqan cheqapi kawsakushanchej. Chaypitaj kashan Diospa jatun k’acha yanapayninqa. Juchasapa kashajtinchejpis Diospa Qhasilla K’acha Yanapaynin noqanchejwan kashan, noqanchejtaj ajinata kawsakusunchej kususqas wiñaypaj.

“Diospa Churin Jesuspa yawarnintaj tukuy juchamanta pichawanchej.” Chaypi kashan mana tukukoj salvaciónqa, jinallataj kusikuy sonqochay imaqa. Ima umataj chayta cheqatapuni entiendenaga, Diospa Churin Jesuspa yawarnintaj, tukuy juchamanta pichawanchej. Waranqa waranqa watasta Diospata pakasqa jina kasharqa noqanchejpajqa. Kunantaj rikuchisqa, sut’i kashan tukuy. Dios Churi “warme j mirayninmanta” kashan, katarej umanta p’altanampajqa. (Génesis 3:15)

Chay tukuy imaqa pakasqallataj kasharqa unaymantapacha, tukuy uywa wañuchisqaspa yawarnin Ñawpa Testamentopi, chayta rikuchisharqa: Salvador Jesucristo allinyachinampaj yawarninta jich’aspa, wiñaypaj salvasqa kananchejpaj.

Ajinamanta, Egipto llajtapi Israelitaspa ruwasqankuqa, ñawpaj Pascua Corderoj yawarnimpi pakasqa jina kasharqa, Jesucristoj yawarnin uj kutillata wiñaypaj jich’asqa kanapaj. Egipto llajtamanta llojsinankupaj Diospa llajtanqa, sapa wasipi corderoj yawarninwan, punkuta jawinanku karqa, uj señal jina kanampaj, kuraj wawasta wañuchej ángel chay wasi punkuta pasapunallampaj, yaykuspa mana wañuchinampaj.

Tukuy imamanta astawanqa, Bibliapi parlashan Dios Tataj munasqa Churimpa qhapaj yawarninmantaqa: “Tukuy profetaspis Jesumanta willarqanku,” nin. (Hechos 10:43). Kusikuywantaj Diosta ashkhas Janaj Pachapi yupaychashanku chay yawar jich’asqa kasqanmanta: “Qan wañuchisqa karqanki, yawarniykiwantaj Diospaj runasta ranterqanki, tukuy ayllusmanta, tukuy laya parlaykunamanta,” nispá. (Apocalipsis 5:9). “Paykunaqa p’achasninkuta yurajyacherqanku, Corderoj yawarnimpi t’ajsaspa,” nispá ima. (Apocalipsis 7:14). Chay yawar noqanchejtapis llimphuchawanchej tukuy juchanchejmantaqa.

Dios Tatayku, perdonawayku juchasniykuta. Noqa jamuni Qanman munasqa Tatay. Jesucristoj sutimpi. Amén.

“Chayrayku mana manchachikusunchejchu, kay jallp’a ikhakushajtimpis, mama qocha ukhuman orqos chinkaykujtimpis; mama qocha yakupis phiñakuspa qhollchoqeyashajtimpis... mana manchachikusunchejchu. Uj mayu yakoqa Diospa llajtanta kusichin, patapi kaj Diosninchejpa santo llajtanta. Diosninchejqqa, chay llajta chawpipi kashan; Payqa llajtata sayachenqa, tutamantataj yanapanqa.” (Salmo 46:2-5)

Kaypeqa parlashan Diospa llajtan kay pachapeqa, imaymana problemas mama qocha yakujina phiñarisqa chawpipi jina kashaspapis, Jesucristopi atienikojqa sonqochasqapuni kanqa, jinallataj ni imamanta llakikuspa kanqanku, Señorninku paykunaj michejninku kasqanrayku.

“Diospa llajtanqa”, pikunachus cheqamanta Diospa Iglesiampi kajkuna kashanku. Chay Iglesiaqa “Diospaj t’aqasqa santos” kajkuna, paykunaqa kay pachapi cheqamanta Cristopi tukuy sonqonkuwan creejkuna kashanku. Arí, paykunalla (Efesios 5:23; Hebreos 12:22-23).

Iglesiaqa kashan, chay pikunachus Cristopi creespa juchasninku perdonasqa kajkuna, ajinamanta salvasqa kajkuna. Paykunaqa kanku uj muju jina, kay pachantinman tarpusqa, sumajta poqonankupaj.

Chay Iglesiataj mañaqasqa kashan casarakunampaj Cristowan. (Apocalipsis 21:9). Kay pachallapiraj kashan chay noviaqa, uj forastero jina janajpachaman chayanchejkama. Imaynachus israelitakunapis ch’in nisqakunanejta purerqanku, Diospa jallp’a qosqan llajtaman chayanankukama, ajinata.

Iglesiapí kajkunaqa, Diospa wawasnin kajkuna kashanku. Jinallataj Sumaj Michej Jesuspa ovejasnin kanku. Paykunaqa Diospa tiyakunan Templon kanku, t’aqasqa santo kajkuna kanku. Jesuspi creejkuna kawsaj rumiswan perqasqa jina kashanku, nin. Apóstol Pablopis nin: “Qankunaqa apostolespa, profetaspa cimientonku patapi wasichasqa kankichej; chay aswan sumaj eskina rumitaj Jesucristomin,” nispá. (Efesios 2:20).

Kay kashan, Diospa ayllun. Tata Diospa palabran, nin: “Kawsaj Diospa llajtanman, Janaj Pacha Jesrusalenman, waranqa waranqa angelespa tantakuyninkuman. Ajinallatataj qayllaykunkichej kuraj kaj wawasnimpa tantakuyninman, pikunaj sutisninkuchus Janaj Pachapi qhelqasqa kashanku, chaykunajpaman,” nin. (Hebreos 12:22-23).

Salmosta qhelqajpis Paymanta takerqa, jatun kusiyanpuni.

Munasqa Diosnýku, graciasta qoyki, supaypa makinmanta kacharichiwasqaykimanta. Tukuy kawsayniypi kallpata qoway, supay ni jayk’aj urmachinawampaj. Jesucristoj sutimpi. Amén.

Octubre 13

“Diosninchejqqa chay llajta chawpipi kashan; Payqa llajtata sayachenqa...”
(Salmo 46:5)

Diospa Iglesianqa ni jayk’aj chinkanqachu, mashkha maqasqa kashaspapis Jesucristopeqa kallpayojllapuni kanqa, aswan k’achitataj lliphirenqa. Salmospi chay ñawisqanchejpiqa, t’ukunata willawanchej: “Diosninchejqqa, chay llajta chawpipi kashan; Payqa llajtata sayachenqa,” nispa. Jinallataj nin: “Kaymin chay wiñaypaj samarikunay cheqaqa,” nispa. (Salmos 132:14).

Pitaj chaymanta yuyarikonman jatun llakiypi kashaspa? Arí, wakin kuti Diosqa, ajina kajtenqa may jina karupi kaspera jinan; chaywampis Diosqa qayllanchejpi kashan, yanapashawanchej tukuy sajramanta waqaychaspa; ñawisninchej mana rikun chaypis noqanchejwampuni kashan. Diosqa jatunchasqa kachun, imaraykuchus wakin kutipeqa, t’ukunata yanapawanchej.

“Kunanmá sajra supayqa, kay pacha millay imaspi kamachejqqa, jawaman wiych’usqa kanqa.” Chay millay atiyuniyoj supaytaqa, aswan atiyuniyoj (Jesucristo) jawa infiernoman wich’ushajta kusiyan rikusun. Sumaj Michejninchejqqa, chay p’unchaypi tukuynejmanta ovejasninta tantaykamonqa. Chay p’unchay chayamunanpajqa mana ancha unayñachu kashan, Chhika munakoj Sumaj Michejninchejqqa, kutimunapachapi kashan.

Kay pachallapiraj kashajtin, may chhika llakisqas kajkunaqa uyarerqanku, kay jinata nejta: “Sonqochakuy, wawáy, juchasniykeqa pampachasqaña,” nispa. (Mateo 9:2). Chanta uyarejkunaqa kusijsas Michejninkoj qhepanta thaskirerqanku.

Kay pachantimpi Señorpa obranqa, may jinata ashkhayashan. Wakin hermanospa qhawaynin as p’enqaylla kashan chaypis, yupay mana atina kashanku Jesuspi creespa salvasqa kajkunaqa. Rikukushan paykunapi Diospa atiyninga: “Diosninchejqqa chay llajta chawpipi kashan,” nispa nin. (Salmos 46:5).

Señorniyku Jesucristo, Graciasta qoyki, yupaychayki, jatunchayki. Qan k’atalla Diosniy kanki, Salvawajiniy kanki. Amén.

“Ashkhastaj kanqanku llimphuchasqas, rit’iyachisqas, allinchasqastaj. Sajra runastaj sajra imasta ruwallanqankupuni, mana unanchakuspa imachus kasqanta. Yachayniyoj runastajrí tukuy imata allinta unachakonqanku.” (Daniel 12:10)

Profeta Danielpa qheqasqan libroj tukukuynenqa, aswan uyarisqa Ñawpa Testamentopi karqa; wakinnejpi nisqastaj, as ayphulla pakasqa jinalla kaspera jinashan. Chaymanta parlaspa, uj Angel nin: “Kay imasqa pakasqallapuni kanqanku, tukukuy p’unchay tukukunankama,” nispa. (Daniel 12:9). Jinapis, manamin pisipaj qhawana jinachu kashan.

Chaypeqa parlan, “kay pacha tukukuyninmanta”, wañusqakunaj kawsarimuyninmanta, Juicio p’unchaymanta. Kay jinata nispa: “Ujnintaj taporqa linomanta p’achayoj runata, pichus mayoj chawpimpi yaku patapi sayashajta: Mayk’ajtaj tukukunqa kay t’ukuna imasri? nispa. Jinapi chay linomanta p’achayoj runaqa makisninta janaj pachaman oqharispa, kawsaj Diospa sutimpi juraspa nerqa: Kinsa wata khuskanniyojmanta, maypachachus Diopa ayllumpata atiyin manaña atipasqachu kanqa chaypacha, kay tukuyin imasqa tukukunqa, nispa,” nerqa. (Daniel 12:6-7).

Profetaqachayta uyarispa, nerqa: “mana entiendenichu,” nispa. Señortaj kuticherqa: “Ashkhastaj kanqanku llimphuchasqas, rit’iyachisqas, allinchasqastaj. Sajra runastaj sajra imasta ruwallanqankupuni, mana unanchakuspa imachus kasqanta. Yachayniyoj runastajrí tukuy imata allinta unachakonqanku,” nispa. (Daniel 12:10).

Kay pachaj tukukuyninmanta, Danielpa parlasqanqa, sumaj tinkusqa kashan Apocalipsis libroj tukukuyninwan. Chaypeqa, Jesucristo nin: “Sajra runaqa sajrata ruwallachunrajpuni; ch’ichi kawsayniyojqa ch’ichichakullachunraj. Cheqan runarí cheqan imasta ruwallachunraj, juchamanta t’aqasqataj juchamanta t’aqasqallapuni kachun. Arí, usqayta jamushani t’inka aparisqa...” nispa. (Apocalipsis 22:11-12).

Chay tukuy nisqasqa willashan jatuchaj pruebas kananmanta; Diospa wawasni mpajqa sut’iman orqhoshqapuni kanan tiyan.

Gracias khuyakoj Diosn’íku, Munasqa Churiykita kachamorqanki. Juchaj wata runan kaynaymanta librawarqanki. Kunantaj kallpata mañakuyki mosoj creyentesman, chaykunamanta willaranaypaj. Jesucristoj sutimpi. Amén.

Octubre 15

“Pay jamuspaqa kay pachapi kaj runasta reparachenqa juchamanta, cheqan kajmanta, juiciomantawan. Reparachenqa juchamanta, imaraykuchus juchayoj kanku noqapi mana creesqankurayku.”
(Juan 16:8-9)

Imamantataj Espíritu Santo reparachenqa, kay pachapi runakunata? “Juchamanta, chanta noqapi mana creesqankurayku,” nispa nin Jesucristoqa. Imaniytataj munan chay? Señorqa Espíritu Santonnejta reparachin tukuy runakunata juchankumanta. Señorninchej Jesucristoqa nishallampuni: “Noqapi mana creesqankurayku,” nispa. Arí, Jesucristopi nana ceejkunaqa, DIOSMANTA T’AQASQA KASQANKUTA reparachinampaj.

Diospa chay chunka kamachisqasnimpa contrampi juchallisqanchijtapis reparachiwanchej, ajinamanta Jesucristoj noqanchejrayku junt’asqanta rikuchiwanchej, perdonta jap’ikunanchejpaj. Chaywampis ichus uj runa ch’urkikuspa munasqanta ruwaspa juchallijitillampuniqa chayqa, mana perdonta tarinqachu. Chayqa kashan: Diospi mana creey, Diospa nisqanta mana kasuy. Chay runaqa, Diospa phiñakuynimpi kawsanqa.

Cristo kay pachapi kashajtinga, tukuy laya runakuna chimpakorqanku. Chaykuna ukhupi karqanku mpuestosta cobrajkuna, paykunaqa chejnisqas mana perdonanapaj jina karqanku. Ajina kashajtimpis Diosqa Cristopi perdonaspa allin kawsayman churarqa, tukuy juchankuta qonqayman churaspa.

Ajinamanta pichus Cristoman chimpajkunaqa, Diospa Qhasilla K’acha Yanapayninta jap’ikorqanku. Diospa ñawpaqempeqa, ni jayk’ajpis juchallinkumanchu ajina tarikurqanku.

Chay mana creejkunarí, Jesucristopaj rimarqanku: Juchasapaswan tantakun, paykunawan mikhumpis, nispa. Cristotaj nerqa: Juchankupi chinkasqasta mask’aj jamuni, nispa. Arí, Pay karqa chay Sumaj Michejqa. Pay yawarninta jich’arqa tukuynin runakunarayku. Pikunachus Paypi creenku, Paypa nisqanta jap’ikojkunaman wiñay kawsayta qon. Uj juchalla mana perdonasqa kayta atinqachu, chaytaj: MANA PAYPI CREESQANKURAYKU.

Señorniyku, noqaqa mana perdonanapaj jina kani. Jinapis, mañakuyki khuyakuyniykita, yanapaway Qanpi creeyta, Jesucristo Churiykej sutimpi. Amén.

“Pay jamuspaqa kay pachapi kaj runasta reparachenqa juchamanta, cheqan kajmanta, juiciomantawan... Reparachillanqataj cheqa kajmanta, imaraykuchus Tatayman ripushani, manañataj qankuna ujtawan rikuwankichejchu.” (Juan 16:8,10)

Espíritu Santo, kay pachapi runakunata “reparachinqa cheqa kajmanta” nispaga, nisharqa sut’inchanta kikin Jesucristomanta, imapajchus kay pachaman jamusqanta. Imaraykuchus Pay kashan cheqa kajqa. Janaj Pachaman: “Tatayman ripushani,” nispaga nisharqa, noqanchejpaj ruwananta tukuychaspa Tatanpajman ripusharqa, salvacionninchej junt’asqa kanampaj.

“Cheqan kajmanta, Tatayman ripushasqayrayku,” Nispaga, nishawarqanchej Pay ripojtinga, mana wajchaschu qhekunchej. Uj yanapajta saqewanchej, Pay kay pachaman jamuspa cheqan ñanta pusrinawanchejpaj. Munasqa Señorninchej Jesucristoqa chaywan nishallarqataj, kay pachapi runakunata Payman chimpakujkunaqa allinyakusqaña Tatanwan kasqanta.

Dios Tataj palabran, kay jinata nin: “Manallataj chivospa nitaj torillospa yawarnin aparisqachu yaykorqa, manachayqa Pay kikimpa yawarninwan Aswan Santo Cheqaman uj kutillata yaykorqa, chay yawarninwantaj wiñaypaj juchaj atiyinmanta kacharichiwarqanchej... Cristoqa mana runaspa ruwasqan Aswan Santo Cheqamanchu yaykorqa, mayqenchus cheqa kajpa rijch’aynillan karqa, chayman. Payqa kikin Janaj Pachamampuni yaykorqa, Diospa ñawpaqempi rikhurispa noqanchejrayku,” nispa. (Hebreos 9:12,24).

“Tatayman ripushani” nispaga, nisharqa: Imamanchus kay pachaman jamurqa, chayta tukuychaspaqa wiharipusharqa Tatampa lardonman. Jinallataj Señorninchej Jesucristoqa janaj pachaman ripusharqa noqanchejpaj tiyakunasta wakichinampaj.

Chay ch’isipi, Santa Cenata yachachisqasninwan mikhushapa, nerqa: “Kayqa tratomanta yawarniy, chaytaj jich’asqa kanqa ashkha runaspa juchasninku pampachasqa kanampaj,” nispa. (Mateo 26:28). Arí chay yawarninwan Jesús yaykorqa Dios Tata maypichus kasharqa chayman, tukuy runasta Dioswan allinyachinampaj, manaña juchachasqa kananchejpaj, imaraykuchus Pay qowanchejña “cheqan kayninta.” Noqanchejta Dios mana juchayojta jina qhawanawanchejpaj.

Señor Jesús, Santa Cenapi mikhusqayqa yuyarichiwan perdonasqa kasqayta, manaña juchachasqa kanayta. Gracias chaymanta. Jesucristoj sutimpi. Amén.

Octubre 17

“... Cristowan khuska kawsarichisqa kaspa, mask’aychej Janaj Pachapi kaj imasta, maypichus Cristoqa Dios Tataj pañampi tiyasqa kashan, chayta. Jinallataj Janaj Pacha imaspi yuyaychej, ama kay pacha imaspeqa, imaraykuchus qankunaqa wañorqankichejña, kawsayniykichejtaj Diospi pakasqa kashan Cristowan khuska. Cristomin kawsayniykichejqa. Pay rikhurimojtin qankunapis rikhurillankichejtaj jatun kaynimpa k’anchaynimpí, Paywan khuska kanaykichejpaj.” (Colosenses 3:1-4)

Salvasqa kananchejpajqa, noqanchejpi iskay imas kanan tiyan: Ujninga, Diosman kutirikuy Jesucristopi creespa, jinallataj Payllapi atienikuywan ima. Jinallataj, imaynatachus juchapaj wañunchej, Cristopaj mosoj kawsayman kawsarimunanchejpaj, ajina.

Jayk’ajtaj wañorqanchej juchapaj? Maymachachus bautizasqa karqanchej, chaypacha. Bautismopi Cristowan khuska p’ampasqa karqanchej, juchapaj wañuspa (Romanos 6:11). Arí, ajinata Bautismopi wañorqanchej Diospaj kawsanapaj, supaypa ruwaykunasninta qhesachaspa.

Kunanqa, Colosenses 3:1-4-ta, ñawirinchej, chaypa tukukuynimpí aswan sut’ita parlashan. “Cristowan khuska kawsarimunkichej,” nispa nishan. Chayta nispa Apostolqa nishan: Cristowan khuska ujjlapi kawsarimunchej, Paywan wiñaypaj kawsakunapaj.

Jesupsi creesqanchejqa, Pay salvawajninchej kasqampi atienikusqanchej kashan, jinallataj wiñay kawsayta qonawanchejpi creey kashan; chay wiñay kawsay junt’asqa kanampajqa, tukuy sonqo suyakunanchej tiyan Señorninchej Jesucristo kutimunanta. Apostol Pabloqa, nishallantaj: “Ajinallataj qankunapis yachaychej juchapaj wañusqa kasqaykichejta, Diospajtaj kawsasqaykichejta Cristo Jesús Señorninchejpi,” nispa. (Romanos 6:11).

Ajina kajtinga, ipatapi kaj imasta qhawanachej! mana qonqaspa, imaraykuchus mana kay pachapichu cheqa kawsayninchejqa kashan; manachayqa janaj pachapi wiñaypaj kawsayninchejqa, ajinapis kunanqa Cristowan khuska pakasqa jinallaraj kashanchej. Cristo kutimojtin kawsayninchejqa paywan khuska rikusqa kanqa, wiñay jatun k’achaypi.

Khuyakoj Diosniyku, Qanqa qowayku may jina munasqa uj k’ata Churiykita. Paytaj noqaykurayku wañuchisqa karqa. Kunanqa Espíritu Santuyki waqaychawachuyku Jesucristopi creesqayku Feniyku sinch’i kanampaj. Amén.

“Sichus pipis Cristopi creej kasqanrayku ñak’arichisqa kanman chayqa, ama p’enqakuchunchu, astawanqa chaynejta Diosta jatunchachun Cristojta kasqanrayku.” (1 Pedro 4:16)

Iglesia qallarikushajtin, supayqa chinkachiyta munaspa, sajra sonqoyoj runasta kachaykorqa wañurachinampaj, jinapis yanqhalla karga. Chayta reparaspa supayqa, mana reparayllata iglesia ukhupi rikhurichin llulla yachachiykunata, paykuna ukhullapitaj mana allin imas rikhurinanta. Chaywan Evangelioj yachahiyninta laqhayaykuchinampaj, ajinamanta mana sonqochakuyta tarinankupaj, phutikuyla paykuna ukhupi kanampaj.

Jinallataj wakin creyentesqa, ch’inlla kanku ima llulla yachachiyta uyarispapis. Ajina kayman urmanaqa, mana karupichu kashan; pikunachus creesqankupi mana sapichasqachu kanku, chaykunataqa facilitata urmachinku. Chay jina juchaman tanqasqa kashajtinchejqqa, Diospa cheqa yachachiynillan Espíritu Santonejta, atiyinwan cheqan ñanman pusawasun.

Pikunachus ñak’ayllata, iskay songolla Diospa wawan jina kawsakojkunaqa, mana allimpichu kashanku, paykunaqa mana ujka Diosman k’askasqa kayta munankuchu, ajinamanta Dioswampis supaywampis uj rijlla kaspajinan paykunapajqa. Chayrayku, Pikunachus kay mundowan allimpi kayta munaspa, Cristota saqeyta munanku chayqa, mana allinchu. Ajinata ruwaspaqa wañuyman rishan.

Diospa Simi Nisqanqa Nin: “Sichus pipis Cristopi creej kasqanrayku ñak’arichisqa kanman chayqa, ama p’enqakuchunchu, astawanqa chaynejta Diosta jatunchachun Cristojta kasqanrayku”, nispá. (1 Pedro 4:16). Sichus pay kikin mana allinta ruwasqanrayku ñak’arichisqa kashan chayqa, ama Cristorayku ñak’arishani nichunchu, chayqa mana allinchu, nispá nishan1 Pedro 4:15. Chaymanta astawan yachanaykipaj, ñawiriy Mateo 5:11-12-pi, imanishanchus chayta yachanaykipaj.

Tukuy Atyniyoj Diosniyku, Graciasta qoyku Santa Cenata qowasqaykumanta, chaynejta kallpachawayku ari. Jinallataj noqayku ukhupi munanakuy kachun, Jasucristo Salvajniykoj sutimpi. Amén.

Octubre 19

“Pitaj Cristoj munakuyninmanta t’aqawasunrí? Ñak’ariychu, llakiychu, qhatiychasqa kaychu, yarqhaychu, p’achamanta pisi kaychu, wañuy patapi kaychu, chayrí wañuchisqa kaychu?... Chaywampis, chay tukuy imaspi atipajkunapuni kanchej Munakuwajninchejrayku... Ni patamanta kaj, ni ukhu pachamanta kajpis, nitaj waj ima ruwasqa kajpis t’aqayta atiwasunmanchu. Diospa munakuyninmanta, mayqenchus Cristo Jesús Señorninchejpi kashan, chaymanta.” (Romanos 8:35,37-39)

Jesucristopi creespa sinch’ita sayayqa, mana kikinchu kallpallanchejwan imatapis ruwanaqa, chaytaqa mana atina jinallachu, mana Jesucristoj yanapayninwanqa. Imaraykuchus sajra supayqa manchayta phiñarikun noqanchejpajqa, kawsayninchejpipis juchaqa maytapuni pharaqean munayninta ruwayta munaspa. Chayta reparakujtinchejtaj mana sonqochakuyta atinchejchu, sonqonchejpeqa laqhayaylla, chiriyaylla, wañuylla kaspa jinan.

Chay jinapi rikhurispaqa, ama imaspipis yuyaychu. Astawanqa, yuyayniykita chanta sonqoykita churay Salvadorniykipi, imatachus Cristo qampaj ruwasqampi, supayta atipasqampi ima. Paylla noqanchejpaj kallpanchejqa kashan.

Ama qonqaychu, salvanawanchejpaj Diosqa allin imasta ruwasqantaqa. Noqanchejqa runa kanchej, Cristopirí mana juchayoj k’achas kanchej, mana wañoj almayojtaj. Yuyariy Diosqa qampaj wakichipusunki ñawiykej tukuy rikusqanta, ajinallatataj qampajqa k’ata Churinta jaywarqa qanrayku wañunampaj, ajinamanta juchayki pampachasqa kanampaj, wiñaypaj Paywan kawsanaykipaj... Cristoqa hermanonchejman tukun. Qhapaj yawarninwan rantiwanchej. Qanqa Cristopi kaspaqa manapis ni jayk’aj juchallikuwajchu jina kanki. Mana kanchu ni ima juchapis, Dios mana llimphuchasuyta atinampaj jinaqa.

iDiospa Qhasilla K’acha Yanapaynintaqa, amapuni qhesachaychu! jinallataj Salvasojniykitapis. Payqa munanpuni orqhosuyta chay asna t’uru jina juchaykimantapis. Imayki nanasqa kashanman chaypis jampiykusonqa. Salvasqas kanchej Jesucristopi creesqaykiraykulla. Sichus chayta mana creej jina kashanki chayqa, kunanpacha Diosman willakuy, mañakuytaj creeta sonqoykiman astawan yapasunanta.

Señor Jesucristo, yanapaway allin imaspi poqonayta, kallpata qoway Iglesiaykipi kallpawan llank’anaypaj. Jesucristoj sutimpi. Amén.

“Chaywampis, chay tukuy imaspi atipajkunapuni kanchej, Munakuwajninchejrayku.” (Romanos 8:37)

“Atipajkunapuni,” nispapa nishawanchej: Ima prueballapipis Señorninchej Jesucristoj kallpanwan atipajkunapuni kasqanchejta.

Mana noqanchej kallpallanchejwanchu atipanchej, astawampis Dios chay pruebaspi atipaytaqa qowanchej uj k’ata Churimpa kallpanwan. Dios Tataj simi nisqampis, chaytapuni nin. Chay pruebasta, phutikunata imaqa, Dios saqen noqanchejpa allinninchejpaj, Paypa yanapayninman chimpananchejpaj, ajinamanta atienikuyninchejqa qory jina kanampaj, ashkha valorniyoj.

Sichus mana Diosta uyarispa pantallanchejpuni juchapi kawsaspa chayqa, jasut’ispa kutichimuwanchej llimphuchawanchej ima, allin ñanmantaj watejmanta churawanchej. Ajinapi Diospi atienekuyta yachakunchej, jinallataj Diosmanta mañakuyta, Diospa Simi Nisqampi unanchayta ima yachakunchej. Sapa pruebapi Dios rikuchiwanchej Atiyninta atipananchejpaj, ajinamanta nisqanta junt’asqata rikuchiwanchej. Chay pruebasnejta pacienciakuytapis yachakunchej.

Apóstol Pabloqa, nin: “Mana chayllachu; astawanqa kusikullanchejtaj llakiykunapi, yachaspa llakiykunaqa pacienciakuyta yachachiwasqanchejta,” nispa. (Romanos 5:3). Apóstol Santiagopis, kallpachawanchej kayjinata nispa: “Hermanosniy, imaymana mana allin imas jamusojtiykichej, qankunaqa mayta kusikuychej, imaraykuchus yachankichej jina, creesqaykichej pruebaman churasqa kajtin, yachaqakunkichej chay imaspi mana sayk’uspa sinch’ita sayayta,” nispa. (Santiago 1:2-3).

Apostol Pablopis, nillawanchejtaj: “Kay kunan ñak’arisqaykoqa mana imapischu, uj ratollapajtaj, imaraykuchus chaynejta noqaykupaj kanqa may sumaj wiñay kusiymín,” nispa. (2 Corintios 4:17). Apóstol Pabloqa chayta nispa nishawanchej: “Ni ima t’aqawasunchu Cristoj munakuyninmantaqa,” nispa. Diosqa ni jayk’aj atipasqa kanqachu. Astawanqa atiynin kanqapuni noqanchejman qonawanchejpajqa, chay Jesucristoj atiyninwan imatapis atipananchejpaj, Janaj Pachaman chayachinawanchejkama.

¡Ay Diosniyku! Cristomanta t’aqasqa kaspapa juchasapa kani, Cristowanrí tukuy juchasniymanta llimphuchawanña yawarninwan, chaymanta gracias Señorníy. Amén.

Octubre 21

“... Yachaspa kallpakusqay, trabajasqaytaj mana qhasipaj kasqanta.”
(Filipenses 2:16)

Kay nisqasqa, Jesucritopi creejkunaj sonqonkupi qhelqasqapuni kashan.

Diospa Simi Nisqan qhesachasqa kasqanrayku, kay pachamanqa imaymana ñak'ariykuna jamunn; chaykunata reparaspa mana qhesachajkunari pisilla kanku. Yanqha manakajlla wakin iglesias kanku, pisi kallpayoj kasqankurayku. Imarayku? Imaraykuchus chay iglesiamanta kajkunaj sonqonkupi Jesuspi creesqankuqa mana kaspa jinanchu, Diospa Simi Nisqanta mana allinta ñawirisqankurayku.

Jucha kay pachaman yaykusqanmantapacha tukuy runakuna mana allinpichu kanku. Kay pachaqapeqqa llakiylla, ashkhas ovejas jina ch'eqerasqas tarikunku, paykunaj ñanninkuta ripunku, munayninkuta ruwaspa, lantista yupaychaspa ima, ajinamanta Diosta wasanchaspa sonqonkuta rumiyachinku.

Diosrí, jatun khuyakuynimpi runakunataqa mana ajina musphashajta saqerparinchu. Janaj Pachamanta apachimusqan muju Evangelioqa tarpusqa kashan. Chay mujuqa sumaj muju, soqoman tarpusqa kaytawan sumajta poqonqa, Diosman rijch'asqa kayninchejta watejmanta kawsarichinampaj.

Diospa Simi Nisqan Bibliaqa, Paypa munakuyninta willashan, chay rumi sonqosta llamp'uyachinampaj. Chayta ñawirispataj tukuy pis atinku rikuyta Jesucristopi Diospa munakuynintaqa. Qan sichus Dios Bibliapi nisqanta mana uyarishanki chayqa, ni ima kajtin atinkichu qanllamanta atipayta qampi kaj chay sajra imastaqa. Imaraykuchus juchaqa, mayupi ashkha yaku jina apakaposonqa.

Sichus, tiempoy mana kanchu Bibliata ñawirinaypaj nishanki chayqa, kunan pacha wakichispa t'aqay tiempota ñawirinaykipaj: Paqarimpichus, ch'isimpichus ñawiriyta atiwaj chayta. Imaraykuchus Dios Tataj nisqasnillan atin yuyayniykiman sonqoykiman ima, k'anchaykuyta. Chantapis, Bibliaqa sonqoykita pataman oqharenqa, kallpachasonqataj.

Munasqa Dios Tatayku, feneykuman yapawayku Salvawajniyku Jesucristopi astawan atienikunakupaj. Amén.

“Diosníy Allinta sonqoyta qhawaykuy ... sajra ñantachus purishani manachus chayta. Chantá wiñay ñanta pusaway.” (Salmo 139:23-24)

Manachu sonqoyki tiyaykuyta atin? Kallpaykichu pisiyapushan? Manachu valorniyki tiyan pimampis Jesucristomanta willanaykipaj? Manchachikunkichu pitapis k’amiyta sajra kawasayninkumanta? Manchachikunkichu kay pacha imas sonqoykita suwananta? Chayri, manañachu atinki takiyta “Diospa Corderonman chay mosoj takiyta?”

Ajina kashanki chayqa, manaraj juchasapa kasqaykita reparakunkichu; nillataj Cristotapis rejsinkirajchu. Ni qan kikiykitapis, maychus rejsinata jinaqa rejsikunkichu. Ajina kajtenqa, Jesucristoqa manaraj salvasojniykichu kashanman.

iK’anchataqa ama manchachikuychu! iK’anchapi kawsanaqa k’achitu! iCheqamanta juchasapa kasqaykita reparakuspa, Jesucristomanta mañakuy perdonasunanta! Sichus ajinata ruwanki chayqa, chay Salmosta qhelqajwan khuska, niy kay jinata: “Diosníy, allinta sonqoyta qhawaykuy... sajra ñantachus purishani manachus chayta,” nispa. (Salmos 139:23-24). Sichus mana dakusunkichu Diosman chimpakuyta chayri, imaynachus kashanki jinalla chimpakuyta munashanki chayqa, sonqoyki rumiyasqa kashan.

Sitajchus evangeliomanta p’enqasqalla kashanki, manataj imamantapis umaykita oqharinaykipaj jinachu kashanki chayqa, Diosman chimpay kallpata jap’ikunaykipaj. Chanta, iJatunmanta kusikuy, Diosta yupaychasp! Jesuspa nisqantataj jap’ikuy, qampajpis kanman jina, simiykiwantaj parlarispa niy: “Sonqochakuy... juchasniykiqa pampachasqaña,” nispa. (Mateo 9:2). Chaywanqa Jesucristopi atipajpuni kanki kay pachapeqa, Jesucristowantaj wiñaypaj kawsanayki.

Jesucristoman chimpaykoj juchasapa warmeqa, mayta waqarikuspa chay waqayninwan Cristoj chakisninta mayllarqa, chujchasninwantaj ch’akicherqa. Kay warmeja jatun kusiyninqa Jesucristopi perdonasqa kasqan karqa. Chay wasiyoj Simonqa, yuyakorqa mana juchayoj kasqanta, chayrayku mana kusiynin kargachu. Chay juchasapa warmirí, Jesús perdonasqanrayku kusiyninqa jatun karqa, tukuy juchasnin pampachaqa kasqanrayku.

Cristoj chakisninman k’umuykojqqa cheqamanta kusiyniyojpuni kanqa. Diosqa Angelkunawan khuska mayta kusikunku uj juchaspa Diosman kutirikojtenqa, nispa nin Tata Diospa Palabran. Ajinallataj runapis mayta kusikun juchasapata Dios perdonasqanrayku.

Diosníyku, Tukuy wawasniyki kay pachapi kajkuna sutiykita jatunchachun. Jesucristoj sutiypi. Amén.

Octubre 23

“... Rikuwasqaykiraykuchu creenki? Kusikuyniyojmin kanku, mana rikuwaspalla creejkunaqa, nispa.” (Juan 20:29)

Mana kallpayoj kaspa, chiri sonqo kaspa, Diospa munayninta mana kasuyta atispapis. Diospa Qhasilla K'acha Yanaynimpi creeyta atisunmanchu? Ajinapi tarikuspaga iNoqallanchejmantaqa mana atisunmanchu! Chayrayku Salvawajninchejqqa munan noqanchej kikinchejpi atienekuyta saquespa, Payllapi atienikunanchejta. Jesucristoman chimpajtincheyqa, Payqa ashkha imasta ruwan noqanchejpajqa. Chayraykutaj Paypi atienikunachej, ajinamanta Paypi creesqanchejqqa kusichin chhika munakoj Salvawajninchejtaqa.

Sichus Bibliata ñawiriyllata yachanki, nitaj dakusunkichu Dioswan allimpi kayta chayqa, salvasqa kanaykipaj creesqayki chay Fe nisqaqa, wañusqa jina kashanman; ajina kajtinga Diospaj t'aqasqa santo kanaykimantapis mana dakushankichu. Sitajchus qan mask'ashanki Cristowan uj sonqolla kawsakuyta chayrí, ajina kajtinga Bibliata ñawiriyepis qampajqa aswan sumaj yuyana kanqa, chay nisqampi unanchaymanta wañurinki, chaymantataj qampi chay Fe kawsashan, chaytaj kusiymán apasonqa.

Iglesiamanta mayqempis aswan kasqanta yuyakun kay pacha runas jina chayqa, iglesia chanta Biblia imaqa, paypajqa mana ancha yuyana jinachu kanman, Diospi atienikuyninqa wañusqa jina kashanman.

Creenin (fe) wañusqa chayqa, Jesucristoqa paypi mana yuyanapaj jinañachu kashan, Diosmanta mañakuypis chinkapunña yuyayninmantaqa; Jinallataj Evangeliomanta wajkunaman parlaykuypis, paypeqa manaña kanchu. Kay nisqayta tukuchinapaj nisun: “nina larwan wakin kutiqa manchay jatunta, ni jak'aj wañunampaj jina, chaywampis atin wañuyta. Mana larwashanchu chaypis uj chispallapis kashanrajpuni. Ajina, Fe wañun chaypis sonqo ukhupi, uj k'uchitupi kashanraj uj chispa jina. Ajinapi tarikuspaga yuyarikuy Jesucristomanta, Pay qanrayku wañusqanmanta kawsarimpusqanmanta ima. Yuyarikuy Jesusqa atiyinijoj kasqanta, chay wañusqa feniykita kawsarichinampaj.

Munasqa Diosniyku, yuyayniykumanta, sonqoykumanta wijch'uy imachus noqaykupi chiriyachiwayku chayta, iUyariwaykupuni! Jesucristoj sutimpi. Amén.

“Uj warmeqa, wawitanta qonqarparinmanchu? Wijsanmanta llojsej wawanta, manachu munakunman? Pay qonqapunman chaypis, noqaqa ni jayk’aj qonqasqaykichu.” (Isaías 49:15)

Ñawpa Testamentopi willashawanchej Diospa llajtan nisqankuta: “Tata Diosa saqerpayawan; Señorqa noqata qonqarpariwan,” nispá. (Isaías 49:14). Chay llajtaj qhaparikusqanqa rijch’akun, uj runa, ch’innejpi kashaspa, sapallan llakiynimpi qhaparikojman.

Diostaj aswan sinch’imanta, nin: “Uj warmeqa, wawitanta qonqarparinmanchu? Wisanmanta llojsej wawanta, manachu munakunman?”, nispá. “Qanrí imaninkitaj”? Yuyankichu qonqapususqanta? “Wijsanmanta llojsej wawanta, manachu munakunman? Pay qonqapunman chaypis, noqaqa ni jayk’aj qonqasqaykichu,” nispá nin Señorqa.

Chay tukuy nisqanwan Señorqa, yachayta qoshawanchej munakusqan Iglesiasntaqa ni jayk’ajpis qonqapunqachu. Imaynatachus uj mamaqa mana qonqapuyta atinchu ukhunmanta llojsej wawanta, kikiillantaj Señorninchej Jesucristoqa mana atinchu qonqapuyta Iglesiasntaqa. Arí, ajina, Jesuspi tukuy creejkunaqa chay Iglesia kanchej.

Diospa munakuynin jinaqa, mana imapis kanchu. Kay pachantimpi ajina jatun munakuytaqa mana tarisunmanchu.

Diosqa ni jayk’aj qonqayman churasunqachu, chaytaqa ama qonqaychu ni jayk’aj. Ashkha kutitaña ninchej, watijmanta nillasuntaj: Dios Tataqa, mana mich’akorqachu uj k’ata munasqa Churinta, wañuyman jaywaykorqa qanrayku, noqaraykuy, payrayku; imaynatataj mana qosonqachu imatachus mañakusqaykita? Imachus qampa allinniypaj kashan kay pachapi, chayta qosunqapuni.

Tukuy Atiyniyoj Dios Tatáy, Espíritu Santoykiwan sonqochaykuwayku K’ata munasqa Churiykej sutimpi. Amén

Octubre 25

“Makiyman sutiyki qhelqasqata apaykachayki...” (Isaías 49:16)

Señorninchej Dios Tataqa, sutinchejta maki t’ajllunman qhelqaykun. Mana noqanchej jina uj anillumanchu munakusqampa sutintaqa qhelqaykun. Munasqa Señorninchejqa qhelqaykun maki t’ajllunman. Manaraj Isaías profeta chay jina k’achitusta parlashajtin, Diospa Espiritun, Cristomanta parlaspa nerqa, rey Davidnejta: “Chakisniyta makisniytawan jusk’urawanku,” nispa. (Salmos 22:16).

Wañusqamanta kawsarimpuspa Señorninchej Jesucristoqa, makisninta chakisninta ima yachachisqasninman rikucherqa. Astawan sut’itapuni nispaqa, clavospa jusk’usqanta rikucherqa. Chay jina jusk’usqa makisnenqa wiñaypaj, Diospa chay jatun munakuyninqa tukuy runaspaj sutimpi kashan, chaytaqa mana qonqana jinallachu kashan.

Diosqa jatun munakuyninta rikuchiwanchej: “Makiypi sutiyki qhelqasqata apaykachakuyki” nispaqa. Ajinata Señorninchej Jesucristoqa, makisnin chakisnin jusk’urasqas Janaj Pachaman wichariporqa.

Watejmanta nispa, sutinchejqa Jesuspa maki t’ajllumpi qhelqasqa kashan. Chay jina llik’irasqa makisnenqa, rikuchiwanchej juchasninchejmanta pagasqaña nispa; imaraykuchus juchasninchejrayku makisnin, chakisnin ima, cruzman clavasqa karqa. Ajinamanta Diosqa uj k’ata Churinnejtta wiñaypaj noqanchejwan allinyakorqa, juchasninchejta cristoman q’epirichispa.

Evangelioqa niwanchej, chay allinyakuyqa tukuy kay pachapi runakunapaj kashan, mana ujllapajchu. Jinapis phutiywan qhawanchej pisilla chayta jap’ikunku, imaraykuchus ajina kasqantaqa wakillan creenku. Kay pachapi kawsayninchej may jina millaypis kachun, Diosqa munasqa Churinnejtta tukuyta perdonanawanchej. Cristoj yawarta jich’asqan pichawanchej tukuy juchamanta.

Munakoj Salvawajniyku Jesucristo, Qanqa supaypa ruwasqanta phirej jamorqanki kay pachamanqa. Chayrayku kallpaykita qoway, Esp’iritu Santonejta. Amén.

“Ama cuentata mañaychu kamachiykimantaqa, imaraykuchus ñawpaqeykipeqa mana pipis llimphu llojsinmanchu.” (Salmo 143:2)

Diospa ñawpaqempeqa mana pipis, payllamanta cheqan sonqo runaqa kayta atinmanchu. Chayta nin Diosqa, chantapis ajina qhelqasqa kashan.

Ichus qanqa yuyanki, Diosqa pichus pisillata juchallikojtaqa perdonayta atillan, nispa. Jinallataj, pichus chaykama mana ancha sajrachu kajkunatapis perdonallanqa, nispa ima.

Ajinata nejkunataqa sapa p’unchay uyarinchej. Ari, noqanchejpis wakin kuteqa, ajinata yuyajkunapuni kanchej. Diospa Simi Nisqan Bibliarí, mana ajinatachu nishan. Juchaqa juchallapuni jatumpis juch’uypis, ujsitullapis juchaqa Diosmanta t’aqawanchejpuni. Chantapis chayqa qhelqasqapuni kashan.

Yuyarichisqayki chay qhelqasqapi imaninchus Diospa munakuyninmanta, salvasqa kananchejpajqa, nin: “Diosqa chay jinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis Paypi creejqa mana chinkayman renqachu, astawanqa wiñay kawsayniyoj kanqa,” nispa. (Juan 3:16).

Kay pachapi, tukuy paykunallamanta yachaysapa kasqankuta yuyakujkunaqa, imatapis nillanku. Paykunapis, chayri angelkunapis imatapis nichunku, mana dakusunñachu. Kaypeqa pi umanchejta muyuchiwasunchu, Bibliapi Diospa nisqanmanta jawaqa. Dios imatapis nin chayqa, ajinapuni kanan kashan, chaypi atienikusun.

Diospa nisqasnenqa wiñaypaj, tukuy nin nisqasninga junt’akumpuni, unaypis junt’akorqapuni. Chayrayku Diosqa nin, tukuy runakuna juchasapas kasper chinkasqa kasqankuta. Chantá nillantaj uj k’ata munasqa Churin runaman tukuspa kay pachaman jamusqanta; jinallataj Jesucristoqa wañuyman jaywakorqa tukuy kay pachapi runakunarayku. Dios Tataqa sonqon junt’asqa karqa chay pagasqanwan. Charaykutaj kunanqa, noqanchej juchasapasmantapaq mana imatapis mañawanchejñachu ruwananchejtaqa.

Señor Diosniyku, makisniykiman churayku Evangelioj contrampi maqanakujkunata. Paykunaqa mana munankuchu uyariyllatapis. Yanapawayku paykunaman munakuyniykimanta willayta. Jesucristoj sutimpi. Amén.

Octubre 27

“Creespatajchus tukuy imata mañakunkichej chayqa, mañakusqaykichejta jap'inkichej.” (Mateo 21:22)

Diospa Simi Nisqampi, nin: “Diospa Qhasilla k'acha yanapayninrayku runasqa cheqan runaspaj qhawasqa kanku, Cristo Jesusnejta juchamanta kacharichisqa kasqankurayku.” (Romanos 3:24).

Ashkha cristianos malayakunku Diosmanta mañakusqankuta mana usqayllata jaywajtin. Ichus paykunaqa chay mañakuyninkupi, mana mañakunata jinachu mañakurqanku. Ajinamanta wakinqa llakisqas ñawpajtaqa aswan sumaj kasqankuwan chimpakunku. Ichus phutiypi tarikuspalla chimpakunku, allillan kaspataj mana mañakuyta yuyarqankuchu, kunanrí qhellasmanta ñak'ayllata uj chhikallata mañakuspa jinanku.

Gallariypi Jesucristota sonqompi jap'ikushaspa, chay creesqanku Feqa jatun karqa, kusikuypis paykunaman chayamorqa mosoj runa kasqanrayku. Kayqa mana niytachu munan, chay kutipi, aswan allin cristianos kasqankutaqa. Ichus chaypiqa uña wawitas jina paqarikorqanku, ajinamanta tata mamankojpa lulusqan jina kasqankurayku. Chay kusiyqa karqa, Dios juchasninkuta perdonasqanrayku, Salvajnincoj qayllitampi kashasqankurayku.

Uña wawitasqa ajinapuni kanku, icharí? Chaywampis Chay creesqanchej fe, killas, watas pasasqanman jinaqa, manaña uña wawita jinanañachu kanchej. Wiñasqanchejman jina, creeninchejqqa probasqa kanchej sinch'ichus manarajchus creeyninchej, chay yachakunampaj. (1 Corintios 13:11).

Diosmanta mañakuyta yachasqanchejpis, manaña ñawpajpi jinachu kaspera jinan, kay pachapi tukuy ima ruwanasninchej kasqanraykuqa, sonqo chiriayypis rikhurin, juchallisqamanta mana sonqota nanachikusqarayku, Jinallataj Diospa nisqanta mana anchata creesqarayku ima.

Chaywampis Diosqa munakuynimpi mana sayk'upunchu, wawasnintaqa yanapaspallapuni kashan. Payqa, makisninchejman churan ashkha imasta kallpachanawanchejpaj. Iskayrayay, chanta chiriayay jamuwajtinchejpis kallpachawanchej creesqanchej Feman astawan yapaspa, ajinamanta sich'i kanapaj. Astawampis, tukuy ima Diospa makisnimpi kashan wawasninta yanapanampajqa.

Munasqa Diosniyku, creesqayku Fepi waqaychawayku, Qampa Simi Nisqaykimanta mana misk'anaykupaj. Jesucristoj sutimpi. Amén.

“... Mana pipis yachanchu pichus Churi kasqanta. Chaytaqa Dios Tatalla yachan. Nitaj pipis yachanchu pichus Tata kasqanta, manachayqa Churilla yachan, pimantajchus Churi rejsichiyta munan, chaypis...” (Lucas 10:22)

“Pimantajchus Churi rejsichiyta munan” nispaqa, niytachu munan, Chureqa Tatanta mana rejsichiyta munasqanta? Mana jinachu. Cheqamanta Jesucristoqa jamun tukuy runakunaman Tatanta rejsichinampaj. Chaywampis kanku runas “paykunallamanta yachaysapas, sumajta entiendesqankuta yuyakujkuna.” Chaywampis paykunaqa Dios Tataj ñawpaqempeqa ciegos kanku, ciego masisninkuman yachachejkuna; imaraykuchus paykunaqa mana munankuchu pipis paykunaman maychus cheqa kajta yachachinankutaqa.

Ajina runasqa mana reparakunkuchu, Dios Tataj ñawpaqempeqa ciegos, wajchas, q’alasllataj kasqankutaqa. (Apocalipsis 3:17). Nitaj paykunaqa Diosman k’umuykuyta munankuchu yanapayninta mañakunankupajqa, yuyakunku paykunalla imatapis ruwayta atisqankuta. Chayraykutaj Chureqa mana atinchu ajina runasman Dios Tataj munakuyninta rejsichiytaqa, Payta qhesachasqankurayku.

Kayta ñawirej kawsaqe, uyarishanki Jesucristo imaynatachus wakichisqanta, qan salvasqa kanaykipajqa; sichus chaykunata uyarispa mana imatapis nishankichu chayqa, niyta munan, creesqaykeqa wañunampipacha kashan.

Qanqa, ichus nishanki: “Dios Tata cheqamanta Cristonejta kay pacha runasta Pay kikinwan allinyacherqa.” (2 Corintios 5:19). “Churimpa wañuyninnejta Dioswan allinyachisqa karqanchej”, nispataj parlarishanki. (Romanos 5:10). Chaywampis, ichus chay yachasqaykiwan mana sonqochasqachu kashanki chayqa, mana Cristo sonqoykipichu. Jina chayqa, imaynatataj wajkunaman niwaj salvasqa kasqaykita, Dioswan allinyasqaña kani nispari?

Diosmanta noqanchejpa unanchasqanchejqa mana kikinchu. Diosqa, Churimpi sut’inchawanchej cheqa kajta mana pantayniyojta, chaymá yuyayninchejpeqa kanan tukuytaj, manari noqanchejpa yuyasqallanchejchu.

Janaj Pachapi kashaj Diosniyku, qanqa noqayku wawasniykiwan ruway ashkha poqoyniyoj sach’ata jina; k’acha misk’i poqoyniyojta jina. Wawasniyki jina k’achata kawsakojta ruwayayku. Jesucristoj sutimpi. Amén.

Octubre 29

“... Sonqoypitaj yachayniyoj kayta yachachiwarqanki.” (Salmo 51:6)

Jatun yachayniyoj Diospa wawasnin kajkuna ninku, uj pakasqa jinalla kajkunata mana sut'ita entiendeyta atisqankuta. Filipenses 3:12 nin: “Manaraj chaykunata taripanichu. ... astawanqa sinch'ita kallpakuspa ñawpajman rishallanipuni,” nispa. Chaymanta parlaspa Lutero nin: “Chaykunamanta yachaqakuyqa ni jayk'aj tukukoj, ni pipis tukonqachu, sapa p'unchay astawan astawan yachakushallanchejpuni,” nispa. Profeta Jeremiaspis nin: “Manaña pipis runa masinta yachachinqachu... tukuy rejsiwanqanku, sullk'amanta kurajkama,” nispa. (Jeremias 31:34). Chaywanqa nishan, runasmanqa Dioslla atin yachachiyta. Juanpis nillantaj: “Diosqa tukuyman yachachenqa,” nispa. (Juan 6:45).

Imamantapunitaj parlashan chay pakasqa yachachiy? Chayqa parlashan mosoj kawsaymanta, Espirituman jina kawsaymanta. Chayqa sut'i kashan Diospa Simi Nisqampi, chaytataj rikuyta atinchej, Dios Biblianeyta sut'inchawajtinchej.

Imanintaj noqanchejmanta Diospa Simi Nisqampi? Niwanchej juchasapas kasqanchejta, chinkasqa kasqanchejta ima. Señorninchej Jesucristotaj Dioswan alliyachiwasqanchejta niwanchej. David nerqa: “Nacekusqaymantapacha sajra kani. Mamaypa wijsanmantapacha juchasapa kani... Llimphuchaway, llimphu sonqo kanaypay,” nispa. (Salmos 51:5,7).

Apóstol Pablopis, payllamanta ima allintapis ruwasqasninmanta reparakusqa, chaykunataqa qhasipaj qhawasqa. Charayku payqa nin: “Paypi tarisqa kayta munani. Manaña Leyta junt'aspa cheqan runapaj qhawasqa kaytachu mask'ashani,” nispa. (Filipenses 3:9).

Martín Luteropis nin: “Chayta entiendeyqa mana atina jinallachu,” nispa. Chayqa kashan Cristopi atienikusqanrayku Diosqa cheqan runapaj qhawawanchej. Jatun pantayta pantanku pikunachus paykunaj ruwasqallankuwan Diosman chimpakuyta munajkunaqa. Ajinata yuyajkunaqa puñusqa jina kashanku. Paykunamanqa Dioslla atin yachachiyta, Pay suyashan tukuy munakuyninwan sut'inchanampaj.

Dios Tatayku, Espíritu Santoykinejta Sonqoykuman yuyayniykuman ima churay Qampa nisqaykita, aswanjatunta qhawanaykupaj. Jesucristoj sutimpi. Amén.

“Manachus kamachisqasniyki kusichiwanman karqa chayqa, llakiyniy tukuchiwanmanña karqa.” (Salmo 119:92)

Kawsayniyki, ruebas jamusojtinga sinch'itachu sayarqanki Jesucristuman k'umuykukuspa? Ajinapi sinch'tachu sayarqanki Salvasojniykita mana wasanchaspa? Juchaman tanqasqa kashaspa Señornichejpa kallpanwan atipayqa may k'achapuni. Chaytaj mana qan jatunchakunaykipajchu, Dioslla jatunchasqa kanan tiyan. Imaraykuchus, Dios qampi kasqanraykulla atiparqanki.

Diospa wawasnin kashaspa wakin chinkapunku chayqa, Dioswan mana uj sonqolla kayta munasqanrayku; kay pachapi tukuy imaman chhapukusqankurayku pisi kallpaman tukunku, Diospa Simi Nisqantapis manaña ñawisqankurayku.

Chayrayku, qanqa, qhellakun qhellakunpis kawsayniykita Jesucristoj makinman churay; Bibliatapis ñawerqoypun, nisqasnintapis uyariypuni, ajinamanta tarinki sonqoykej tiyaykuyninta. Ajina kajtenqa Jesucristopi creesqayki Feqa qampi wiñanqapuni. Ichus unayña Diospa Palabranta mana ñawirikusqaykirayku pisi kallpaman tukurqanki, ajinamanta juchaman tanqasqa kaspas urmarqanki chaypis, kunanpacha watejmanta puririy Señorpa ñannimpi ñawpajman rinaykipaj.

Diospa Simi nisqan Bibliata jatumpaj qhawanchej, kicharispataj ñawirikunchej chayqa, kallpatajap'inchej Creesqanchej Fe aswan sinch'i kanampaj.

Ñawirisqaykipi, uj palabralla atinman churayta yuyayniykiman Jesucristopi kallpata, juchamanta reparakunaykipaj. Ajina kajtenqa ima juchapis qampajqa juch'uysitu kanqa, Señorninchej Jesucristoj atiyinwanqa. Wakin kuteqa, mana allimpi kashajtiyki, chayri pisi kallpa kashajtiyki, Bibliata oqharikuspa ñawikusqaykiqa puñuymanta jina rijch'arichisunki, watejmanta thaskirinaykipaj.

David niwanchej: “Manachus kamachisqasniyki kusichiwanman karqa chayqa, llakiyniy tukuchiwanmanña karqa,” nispas. (Salmos 119:92). Arí, Bibliapi Señorninchej parlasqasninga rijch'arichiwanchej kawsachiwanchejtaj, chaykunapi creespa salvasqa kananchejpaj. Mana qhasipajchu Diosqa saqewarqanchej Simi Nisqasnintaqa.

Dios Tatayku kallpachaway, Simi Nisqaykita uyariyta atinaypaj. Jesucristoj sutimpi. Amén.

Octubre 31

“Creeshqanchejnehta cheqan runapaj qhawasqa kaspá, Dioswan allinyachisqa kanchej Seeñorninchej Jesucristonehta... Ni imaynamanta salvakuyta atishajtinchej, maychus tiempompi Cristo wañorqa juchasapasrayku.” (Romanos 5:1,6)

Apóstol Pabloqa, niwanchej Dioswan allinyachisqa kasqanchejta. Chayraykutaj kunanqa, imayna kananchejtachus Dios munarqa ajina kashanchej; Pay munarqa Churin Jesucristopi cheqan runas k'achastaj kananchejta. Kay jinata nin: “Cheqan runapaj qhawasqa kanchej, creeshqanchejnehta,” nispa. Imaraykuchus juchasapasllaraj kashajtinchej, Jesucristoqa wañorqa juchasapasraykoqa: “Diospa contrampi kashasparaj, noqanchejqa Churimpa wañuyinnehta Dioswan allinyachisqa kanchej,” nispa nin. (Romanos 5:10).

Dioswanqa allinyachisqakanchej, mana imapikallpakusqanchejraykuchu, nillataj kallpakuspa mana juchallisqanchejraykuchu. Diospa qhawaynimpeqa, juchasapas kanchej castiganapaj jinapuni. Chayta uyarispaqa kharkatitinanchej mancharikuywan. Icharí? Imaraykuchus leypa kamachisqanman jinaqa juzgasqa kana karqa. Chaymanta salvasqa kanapajqa Cristollapi tarinchej sonqo tiyaykuytaqa, imaraykuchus Jesucristo noqanchejnehta junt'anña, Dioswantaj allinyachisqaña kanchej.

Chaywampis sajra aychanchejpa munapayaynenqa, kay pacha imasman k'askasqallapuni kayta munan, chayta kasusunman chayqa pisi kallpaman tukuchiwasunman; chayrayku, juchamanqa urmayta atisunmanraj. Mana urmanapajrí, imanasuntaj? Yuyarikusun Jesucristopi creeshqanchejrayku Salvassqa kasqanchejta, Payman risunchej kallpata jap'inapajqa.

Espíritu Santo creeyta sonqonchejman churan, chay “medios de gracia nisqanehta”; pikunachus salvassqaña kaspá Cristowampuni kawsakuyta munajkunaqa, wiñay kawsayniyojña kanku. Chantapis chay medios de gracia nisqaqa, noqanchejpi sumaj poqoyta churan: Dioswan allimpi kayta, jinallataj Diospa k'acha yanapayninmanta mana iskayrayayta, sonqo tiyaykusqa kayta ima.

Munasqa Señorníyku, khuyaway noqa wajcha juchasapata, Espíritu Santoykinehta atiyta qoway Jesucristoman chimpaspa juchata atipanaypaj. Amén.



Noviembre

*“Ajinaqa, uj chhikanta suyariychej, rikunkichejtaj
Tata Diosqa jatuchej t’ukuna imasta qankunaj
ñawpaqeykichejpi ruwananta.” (1 Samuel 12:16).*

Noviembre 1

“... Kaykunaqa chay jatun ñak’ariy tiempomanta llojsimojkuna kanku. Paykunaqa p’achasninkuta yurajyacherqanku, Corderoj yawarnimpi t’ajsaspa...” (Apocalipsis 7:14-15)

Allin allinta reparasun: “Kaykunaqa chay jatun ñak’ariy tiempomanta llojsimojkuna kanku,” nispa nishan chayta.

Diospa wawasninga imaymana pruebasta pasanku, chay phutiyanta llojsejtinkutaj, Dios qon kusikuyta paykunamanqa. chay ñak’ariynejta, Diospa Corderompa yawarnin paykunataqa tukuy juchamanta mayllan. Chaymanta parlawanchej chay jatun phutiy ñak’ariy (tribulación) nispaqa. Tukuy Jesucristopi creejkunaqa, yawarnimpi llimphuchasqa kanchej.

Yuraj rit’i t’ajsasqa p’achaqa, Cristoj “justician” kashan. Imajtinchus Pay yawarninwan tarerqa salvasqa kananchejpajqa. Paypa justicianwan noqanchejqa p’achallikunchej llimphu p’achawan jina, Biblia nin: “Jesupa yawarnitaj tukuy juchamanta pichawanchej,” nispa. (1 Juan 1:7).

Chay chinkaj waynamanta Jesus parlasqampi rikukun, chay kashan noqanchejpajqa aswan sumaj p’achaqa; chaytaj Cristoj cheqan kaynin (justician) noqanchejpi churasqa kashan.

Bibliaraq parlallantaj wajp’achamanta. Chayp’achaqa linomanta ruwasqa nin. (Apocalipsis 19:8). Chaytajri kashan, Diospa wawasnin Jesucristoj cheqan kayninwan p’achallisqas, Diospaj t’aqasqa santos kayninkupi: “Qankunaqa Diospa ajllakusqasnin kankichej, Paypaj t’aqasqa, may munasqataj. Chayrayku kay imaswan p’achawan jina p’achallikuychej: Khuyakuywan, k’acha kaywan, llamp’u sonqo kaywan, mana phiñakoj kaywan, pacienxiawan ima,” nispa nin. (Colosenses 3:12). Chay kashan “aswan sumaj p’achaqa”, noqanchejpi Jesucristoj justician. (Lucas 15:22). Chay p’achaqa Jatun Raymiman yaykuna p’acha.

Ajinata munakoj Diosninchej rikuchiwanchej chay Qhasilla K’acha Yanapaynintaqa. Chaypitaj runaqa may jina millay juchasapatapis kachun, Churinpa yawarninwan llimphuchaspa wawampaj rejsikapun.

Chay kashan Diospa wakichisqan Salvanawanchejpajqa. Juchallillanchejtaj chaypis Jesupa yawarnin mayllawanchej, manañataj juchachawanchejchu. Manañataj juchallinachu ni ima kajtin.

Munasqa Dios Tatayku, supaywan tinkupi kashajtiykoqa, Qan yanapawayku noqaykupi atipachispa, Chayta mañakuyki Jesucristo Salvawajniykoj sutimpi. Amén.

“... Hermanosniyman nimuy: Tatayman, Tataykichejman, Diosniyman, Diosniykichejmantaj wicharishani, nispa nisunkichej.” (Juan 20:17)

Wañusqamanta kawsarimpuytawan, imachus ruwananta junt'aytawan Salvawajninchejqqa chayta nerqa. Chaypi sut'ita rikunchej noqanchejmanta dakusqanta, noqanchejtaqa hermanosninta jina rejsikapuwasqanchejpi. Chantapis nillantaj: Tatayman, Tataykichejman wicharishani, nispa. Tatanqa noqanchejpatapis Tatallanchejtaj kasqanta nin.

Manaraj wañushaspaqa, apostolesninmanqa manaraj ajinata nerqachu. Imachus ruwananta tukuspaña sut'incharqa; supaypa umanta p'altasparaj chaytaqa nerqa. Ajinamanta noqanchejpis wañusqa kashajtinchej, kawsarimuyninwan kawsarichiwanchej cheqan runasta ruwaspa, “hermanosniy”, niwanchej.

Cristoj wañuyninnejta, kawsarimpuyinnejtataj imaynachus manaraj jucha kashajtin karqa chayman churawanchej: Tata wawanwan imaynachus kanku, ajina kayman churawanchej, “hermanosniy” nispaqa.

Salvawajninchejqqa, chaykunata nisqanqa may jina jatumpuni; imaraykuchus Diospa uj k'ata munasqa Churin Jesucristoqa kay pachaman jamorqa, Diosta runatawan allinyachinampaj. Jesucristo sonqo nanayta ñak'arispas wañusqanrayku, Dios Tataqa wawampaj rejsikapuwarqanchej.

Tukuy atiyniyoj Dios Churiqa, Janaj Pachamanta Kay pachamantawan dueñoqa, millay juchasapas mana qhawarinapaj jina kashajtinchejpis niwanchejraj: “hermanosniy” nispa. Jinallataj niwanchej Diostapis Tatayqa, qankunajtapis Tataykichej, nispa.

Juchaqa, Diosmanta t'aqawarqanchej perqapis kanman jina; chay perqataj thuñisqa wiñaypaj Jesucristo p'ampasqamanta kawsarimusqanraykulla. (Efesios 2:14). Chayraykutaj runaqa Dioswan watejmanta allinyachisqa canchej, pikunachus Paypi creesqankuraykulla. Jesucristoqa kuraj hermanonchej, Dios Tatataj, Tatanchej. (Romanos 8:29).

Chaytaqa mana facilta entiendena jinallachu. Diospa qhasilla k'acha munakuyninta qowasqanchejqqa manchay jatumpuni kashan, sonqonchejtaj Diospa munakuynimpa qayllampeqa ancha juch'uysitu.

iAy Diosniyku! Kay sonqoykutaqa Qan kamachiy munasqaykiman jina, Qanwan, jinallataj runa masiykuwampis allimpi kawsakunaykupaj. Jesucristoj sutimpi. Amén.

Noviembre 3

“Noqaqa Señorninchejrayku preso kaspá, tukuy sonqo niykichej, wajyasqa karqankichej, imaynachus purina kasqanman jina purinaykichejta.”
(Efesios 4:1)

Kaypeqa jatun rikukunan tiyan, “imaynachus Diospa wajyasqan jina purinamanta.” Chay nisqanman jinaqa, kay pachapi kawsayninchejmanta parlashan.

Bibliapi, Castellano parlaypi “vocación” nispa nishan “ima ruwanamanchus wajyasqa kanchej,” chaymanta. Pitaj wajyashan? Kikin Dios wajyashan Evangelionejta tukuy runakuna Janaj pachamanta Diospa jatun munakuyninta Reinonta ima, kay pachapi willaranapaj.

Apóstol Pablo kaypeqa, mana nishanchu sapa uj cristiano kay pacha mundo ruwanasman wajyasqas kasqanchejtaqa. Manachayqa, Diospa wawsnin Jesucristopi creejkunaqa, Espíritu Santonejta wajyasqas kanchej chajrampi llank’ananchejpaj, ajinamanta chayman jina kawsakunapaj. Chaymanta parlashan.

Sapa uj carta qhelqasqampi apóstol Pabloqa, k’amiwanchej Diospa chay wajyawasqanchejman jina kawsakuna kasqanta. Tesalónica llajtapi kaj Iglesiaman, nin kayjinata: “Mayta qankunata nerqayku Diospa wawsnin jina kawsanaykichejta, pichus wajyasorqachej reinompi, jatun kaynimpa k’anchaynimpi kawsanaykichejpaj,” nispa. (1 Tesalonisenses 2:12).

Efeso llajtapi iglesiapi kajkunaman, ujtawampis nillantaj: “Manaña waj llajtayojchu kankichej, nitaj forasteroschu; manachayqa Diospa ajllakusqasninwan uj llajtayojllaña kankichej, Diospa wasimpitaj wawsnin kankichej. Qankunaqa apostolespa, profetaspa cimientonku patapi wasichasqa kankichej; chay aswan sumaj esquina rumitaj Jesucristomin,” nispa. (Efesios 2:19-20).

Evangelioj wajyasqan kajkunata Pablo nin: “Qankunaqa Iglesiapiña kankichej; jinaqa chaypi imaynachus kawsakunata jina kawsakuychej, imaraykuchus mana mayqen qotu runasllachu, manachayqa uj sumaj ayllu kankichej, nispa.”

Diospa wawsnin kanchej, Cristowan khuska Diospa herederosnin kanchej. Espíritoj Templontaj kanchej, sacerdotes jinaqa Reininchejta sirvinanchejpaj.

Munasqa Diosniyku, graciasta qoyku noqaykuta qan kikiykitawan allinyachiwasqaykumanta. Qanta sirvisojkunata ruwawayku. Jesucristoj sutimpi. Amén.

“... Yachanchej, Jesucristo rikhurimojtin Payman rijch’akunanchejta, imaraykuchus Pay kikinta rikusunchej imaynachus kasqanta.” (1 Juan 3:2)

Kay nisqaspi allinta unanchariy, imayna kusiypunichus noqanchejpaj kanqa, maypichus kasun chaypeqa; mana kanqachu ima sajrapis, ni imamanta pisichikuypis, manchachikuypis manaña kanqachu. Yachanchej jina, maymantachus, pimantatajchus jamun chay tukuy sumaj imas, chaywan uj sonqolla kasunchej. Diospa ñawpaqempi Salvawajninchejwan khuska, chay jatun kaynimpa k’anchaynimpi, misk’i munanakuyti kawsakusun.

Chay tukuy imasqa Jesucristollapi tarikun, Paypa justicianwan p’achallisqa Janaj Pachapi casaraku raimiman yaykusun. Imachus kay pachapi ismojqajallp’aman tukojqaj, chaymanqa mana yaykonqachu. (1 Corintios 15:50). Chay ismoj cuerpota jallp’aman tukojqata, herenciata jina jap’erqanchej Adanmanta.

1 Corintios 15:51-53, nin: “Mana tukuychu wañusunchej; chaywampis tukuy uj jinaman tukuchisqa kasunchej, ujllata, uj ñawi ch’irmiypi, cornetaj waqaynimpa tukukuynimpi. Corneta waqajtin, wañusqas kawsarimponqanku mana ismoj cuerpoyoj. Chantá noqanchejpis uj jinaman tukuchisqa kasunchej. Kay ismoj cuerpota tukupunan tiyan mana ismoj cuerpoman. Kay wañoj cuerpota tukupunan tiyan mana jayk’aj wañoj cuerpoman”, nispa. Arí, ajina p’achallisqa kasunchej Janaj Pachapi kanapaj jinapuni; k’achitos, Ilimphus, Cristo jina k’ancharispa, angelkuna jinataj.

Mana cuentollachu, nitaj pujllakuychu kay nisqasqa kashan; chayraykutaj wakichikuna kachun, Diospa wakichisqa p’achata churakunapaj, ajinamanta chay casarakuman yaykunapaj. Cristo kutimojtintaj kusikuywan yaykusun Janaj Pachapi chay casarakumanqa.

Janaj Pachapi kashaj Diosniyku, Espíritu Santoykita qowayku, sonqoykupi juchasniykuta riparachispa uj k’ata Churiyikiman pusanawaykupaj. Jesucristoj sutimpi. Amén.

Noviembre 5

“Qankunaqa kay pachapaj k’anchay kankichej.” (Mateo 5:14)

Kay pachantimpi Iglesia, jinallataj sapa llajtapi Iglesias kajkunaqa uj k’ancha kanku, Diospaj Jesucristonejta t’aqasqa santo kanku, paykunapi Diospa khuyaynin rikukunampaj; ajinamanta paykunata rikuspa ashkha juchasapas Jesucristoman chimpakunankupaj.

Mayqen Iglesiapichus, kay laqha mundopi, mana k’anchashanchu chayqa, mana, “Jesucristoj Iglesian” ninapaj jinachu kashanman. Iglesiaqa, sapa uj runa ujlla Cristopi creejkuna qotuchasqa kashanku, chay Cristoj Iglesianqa. 2 Corintios 3:2-3, nin: “Qankunamin noqaykoj cartasnayku kankichej sonqosniykichejpi qhelqasqa, rejsisqa, tukuy runaj leesqasnintaj,” nispa. Ajina kashan, Cristoj cheqa Iglesianqa.

Sichus pipis nin, Cristoj yachachisqan kasqanta, manataj Cristoj yachachisqan jinachu kawsashan chayqa, paypeqa mana ima k’anchapis kanchu; astawampis paypi mana allin imas kajkuna mana saqenchu k’anchajta.

Chayraykutaj noqanchej kikinchej tapukusunman: Imaynatataj tukuy kawsayniypi uj k’ancha jina kawsayman? K’anchachu kashani manachu? Imaynatataj atiyman, Diospa cheqa kayninwan k’anchayta wakin rikunankupaj jina? nispa. Jesucristo noqanchejpi tiyakojtinqa, Espíritu Santo cheqa kajmampuni pusawasun ajina k’ancha kanapajqa. Paylla noqanchejpeqa kanchan.

Amapuni qonqanachu, Juan 15:6 imaninchus nisqantaqa: “Mana noqapi kajqa rama jina jawaman wijch’usqa kanqa, ch’akiponqataj. Chay ramasta tantaspataj, ninaman enqhaykunku q’olanampaj,” nispa nin.

Señor, mana atishanichu runa masiyta munakuyta, imaynatachus Qan munakuwanki ajinata. Yachachiway tukuy sonqoywan munakuyta. Jesucristoj sutimpi. Amén.

“Imaynachus Janaj Pachapi kashaj Tataykichejqa cheqan munakuyniyoj, ajinallataj qankunapis kaychej.” (Mateo 5:48)

Tukuy cristianos kajkunaqa, tapukunanchej: Janaj Pachapi Tatanchej imaynatachus munakuwanchej chayta. Ajinatachu runamasinchejta munakunchej, manachú? Nispa. Chay tapukuymanka, ch'uwa sonqowan Diosninchejmanqa kutichinanchej; Payqa noqanchejmanta tukuy imata yachan, rikuntaj.

Tapurisqayki: Imastachus kawsayniyki, allinchus manachus chayta unanchashankichu? Ima ruwaychus Diospa contrampi kajkunatapis qhesachankichu? Chay jucha jatunpis juch'uypis kachun qhesachashankichu? Pakayllapi juchalliytapis qhesachashankichu? Ichus Diospa chay Chunka kamachisnintapis kallpallaykiwan junt'ayta munashanki? Chayri, tukuy kawsayniykiwan chu Diosta jatunchashanki?

“Imatachus Pay ruwayta yuyan, chaytaqa ruwampuni,” nispa nin. (Job 23:13). Ajina Diosninchejqa. Ajina kajtenqa, ama iskay sonqolla Paypajqa imatapis ruwaychu. Diosmanta mañakuy rikuchisunanta imastachus Jesucristopi may k'achata ruwanaykita. Diosmantaqa mañakuypuni, imaraykuchus mana Paypa yanapayninwanqa mana atisunmanchu allimpi kawsaytaqa. David nerqa: “Paykunaj kallpankoqa astawan astawan yapakonqa,” nispa. (Salmos 84:7). Chayqa, cheqamanta ajinapuni kashan, kay pachata kawsayninchejwan k'anchanapajqa. Munakuyniyoj llamp'u sonqotaj kananchej tiyan, Cristoman rijch'asqa.

Diospuni qosunki, chay cheqa kaj Fe qampi kashan chaytaqa. Chayrayku, Jesucristollapi atienekuy tukuy kawsayniyki, ajinamanta atinki Diospa ñawpaqempeqa llimphu sonqo sayayta. Qampaj kallpallaykiwanqa mana atinkichu, nitaj qampa yuyasqaykiman jinallaqa llamp'u sonqo kaytaqa atiwaychu. Pruebas jamuwasun chaypis, waqasun chaypis, Jesucristoj kallpanwanqa llojsison chaykunamantaqa; tukuy ima allimpuni kanqa, imaraykuchus chay llakiykunaqa Payman kutichiwasun. Chaymantaraj Diostaqa nisun: “Khuyaway ari noqa juchasapata,” nispaqa. (Lucas 18:13). Ajina kajtenqa, maymanchus rishanchej chaymanqa rillasumpuni chayananchejkama.

Señor, wakin kutipi runa masiy, noqapaj mana allin kajta ruwan. Ichus noqapis wakin kuteqa, ajinata ruwani, Qantaj chay jina millay juchasniyta perdonawanki. Gracias Señor. Jesucristo Churiyke sutimpi. Amén.

Noviembre 7

“Ajinallataj k’anchayniykichejqa k’anchachun runaspa ñawpaqempi, paykuna allin ruwasqasniykichejta rikuspa, Janaj Pachapi kashaj Tataykichejta jatunchanankupaj.” (Mateo 5:16)

Kay pachapi k’ancha kanki chayqa, mana creejkunamanta nisqaqa wajjina kawsayniyoj kanki.

Uj cristiano imatapis mana allinta ruwasqanqa, may jina jatun llakiyta rikhurichinman runa masimpa kawsaynimpeqa. Sichus pipis tuta laqhapi qaqqa pata ñanta rejkunapaj k’anchata mana jap’ichinman chayqa, urmaykunqanku. Ajinapi jatun llakiyta runa masisnimpaj apamunman.

Cristopi creej masi, chaykunapi allinta unanchay, t’ukuriy imaynataj kawasayniyki kashan chayta. Kay laqha mundopi may chhika juchasapa runakunaqa laqhapi purikushanku, mana reparakuspataj rishanku infiernoman cheqanta nina larwayman. Paykunapajqa, qan wajyasqa kanki k’anchanaykipaj, chay k’anchata rikuspataj paykunaqa Jesucristoman jamunqanku.

Cristopi creesqaykimanta mana ithirikunkichu, ichus mana ruwashankichu imatachus iglesiapi ruwanaykita chayqa, chay k’anchaqa mana allintañachu k’anchashan. Ajinallataj ichus qayllaykipi kajkuna wiñay jasut’iman rishanku, manataj qan reparachinkichu chayqa, Dios Tataj ñawpaqempi qan juchayoj kawaj, kawsayniykiwan mana reparachisqaykirayku, nitaj Evangeliomanta paykunaman parlaykusqaykirayku.

Ajinallatapuni mundo runakuna jina kawsanki ni pimanta dakuspa; jinallataj gustuykiman jinataj, kawsayniyki juchasta ruwaspa purinki chayqa, Diospa qosusqan k’anchata wañuchishanki. Diosqa nisunki: “Noqa juchasapaman nejtiy: Cheqamanta wañunki, nispa, sichus qan mana k’amiwaj, nitaj parlawaj chay runaman sajra kawsayninmanta reparachispa chayqa, payqa chay juchanrayku wañonqa, noqatajri paypa wañuyninmanta cuentata mañasqayki,” nispa. (Ezequiel 3:18).

Sitajchus tukuy sonqo munakunki Salvasojniykita, qhatispataj Paypa munayninta ruwayta munanki chayqa, Dios yanapasonqa kallpachasuspa, Pay qosunqa k’anchatapis jatunta k’ancharinaykipaj jinapuni. Arí, ni ima kajtin qonqaychu Diosmanta qampaj k’ancha jamusqantaqa.

Dios tatayku, Perdonaway may chhika kutita Qampa contraykita juchallisqaymanta. Jinallataj yanapariway runa masiyta perdonaspa Qanman pusamuyta. Jesucristo Salvawajnimpa sutimpi. Amén.

“Llamp’u sonqo kaywan, k’umuykukuywantaj, purajmanta pacienciaakuspa, munanakuypi kawsakuychej.” (Efesios 4:2)

Jesucristoqa k’iskimanta yachachisqasninman yachacherqa llap’u sonqoyoj kanankutapuni. Waj juchasmanta nisqaqa, jantunchakuy juchamanta astawan k’amerqa.

Apostolkunaqa, Jesusta taporqanku, mayqenninkuchus aswan jatumpaj qhawasqa kasqankuta. Jesustaj kuticherqa: “Diosman kutirikunaykichej tiyan kay wawasman jina tukuspa. Manachayqa, janaj pacha reinoman mana yaykunkichejchu,” nispá. (Mateo 18:3).

Noqallanchejmanta Jatumpaj qhawasqa kayta mask’ayqa, llakiyta apamuwanchej; chantapis jatunchakuyqa Janaj Pacha Reinoman mana yaykujta saqewasunmanchu. Imaraykuchus aswan allenqa, Janaj Pachapi sutinchej qhelqasqa kasqan; chaytaj mana noqallanchejpajchu, manachayqa tukuy Jesuspi creejkunaj sutinkupis chaypi qhelqasqa kashan.

Apóstol Pedroqa, jatunchakuyninwan Jesusman chimpanqa: “Tukuyninku saquesojtinkupis, noqaqa manapuni jayk’ajpis qanta saqerparisqaykichu,” nispá. (Mateo 26:33). Manaraj imapitaj supaywan thanta phulluta jina thalarparichikun, Señorninta p’enqayta wasanchaspa mana rejsinichu nerqa. Chay qhepata payllataj qhelqasqampi nin: “Llamp’u sonqos kaychej, imaraykuchus Diosmanta qheqasqapi nin: Diosqa jatunchakujkunaman sayaykun, k’umuykukojkunamantaj qhasilla k’acha yanapayninta qon,” nispá. (1 Pedro 5:5).

Señorninchej Jesucristomanta k’acha khuyakuyniyoj kayta yachaqakuychej, sajra aychaj munaynintataj tanqarpariychej. Imamantapis phiñakojlla kasqaykita mana atipayta atinkichu chaypis, Jesucristo qanwan kajtenqa, sonqoykiqa ñit’iykukonqa; ajinamanta pantasqaykiqa allinchakonqa. Efesios 4:26 nin: “Nitaj inti yaykunankama phiñasqallapuni kaychejchu,” nispá.

Sichus wasi masiyki aylluykimanta kajkunawan, phiñakuspa mana kawsakunapaj jina kanku chaypis, yuyarikuy Jesucristopi atienikuna kasqanta: “Ama sajra kajwan atipachikuychu, astawanqa sajra kajta allin kaywan atipay,” nin. (Romanos 12:21). “Llamp’u sonqo kaywan, k’umuykukuywantaj purajmanta pacienciaakuspa, munakuypi kawsakuychej,” nispataj nin. (Efesios 4:2).

“Purajmanta yanapanakuychej ima llakiypi rikhurispapis, ajinamanta Cristoj Leyninta junt’anaykichejpaj,” nispá nin. (Gálatas 6:2). Chay kashan Diospa munayninqa.

Señor, munakuyniykiwan k’acha runaman tukuchiway, tukuy imata cheqanta ruwanapaj. Chaytaqa mañakuyki Salvawajniy Jesucristoj sutimpi. Amén.

Noviembre 9

“Diospa reinonqa mana parlayllapichu yachakun, astawanqa atiyipi.” (1 Corintios 4:20)

Kay nisqataqa allintapuni yachakuna tiyan. Imaraykuchus “Tukuy imamanta nisqaqa runaj sonqonmin aswan ch’awka,” nispa nin. (Jeremías 17:9). Ch’ichichasqa kanchej llullakuywan, ch’awkiyaywan, puraj uya kaywan ima. Mana Jesucristo noqonkupi kajtenqa, Diospa wawan nisqalla kashankuman. Ajina runakunaqa Bibliamanta uj chhikanta yacharikusqankurayku umata oqharispa ch’awkiyakunku, tukuyanta astawan yachasqankuta yuyakuspa (2 Timoteo 3:5). Chaykunaqa trigo ukhupi, alpistaman (cizaña) jina kanku.

Kay ñawishanchej chaytaqa, apóstol Pablo qhelqarqa Corinto llajtapi kaj Iglesiaman. Paykunamanqa, kikin Pablo Evangeliota allinta yachacherqa. Chayrayku payqa nin: “Parlasqayqa yachachisqaypis, mana runata creechinapaj yachayniyoj palabraswanchu karqa. Astawapis Espíritu Santoj atiyinta rikuchispa willarqani, creesqaykichej ama runaspa yachayninkupi sayachisqa kanampaj, astawanqa Diospa atiyinimpi,” nispa. (1 Corintios 2:4). Paykunatajri chayta jap’ikusqanku “may kusiyan, llamp’u songowantaj,” nin. (Hechos 2:46).

Mana ancha unayrajchu Corintopi kaj Iglesiamanqa, chay wist’u yachachiyqa yaykusqa; chay iglesiapi kajkunaqa, líderes kajkunata jatunchaspalla kashasqanku; chayraykutaj paykuna ukhupeqa t’aqanaku rikhurerqa. Paykuna nisharqanku Pabloj yachachisqan noqapajqa cheqa, ujtaj nisharqa noqapajqa Pedroj yachachisqampuni aswan sumaj nispa, wakintaj nisharqanku noqapajtajri Apolospa yachachisqanpuni aswanqa nispa. Ajinamanta t’aqa t’aqaslla rikhurirqanku. Ajinamanta, uj yuyaylla uj sonqolla kaytaqa chinkapunampaj jinaña kasharqa. Chaymanta chay iglesiapeqa, uj wayna madrastranwan warmimpis kanman jina kawsakapusqa. Iglesiamanta kajkunari ni imata nisqankuchu.

Chay jina kawsayniyoj kashaspapis, sonqo junt’asqapis kashankuman jinalla kakusharqanku. Jesuspa salvasqan kajkuna iglesiaqa mana ajina kayta atinchu. Chaypajqa Jesucristo sapallanta qhatikuna tiyan, mana runastachu.

Khuyakoj Dios, Espíritu Santoyki yanapawachuyku, ama chay jina kawsayman chayanaykupajqa. Chayta mañakuyku Salvawajniyoj sutimpi. Amén.

“... Runa masinta munakojqa Leypa nisqanta junt’an.” (Romanos 13:10)

Tata Diospa nisqasnintaqa, tukuy kawsaynincheypi mana qonqaspa yuyarikullasumpuni, ajinamanta noqanchejpajqa k’ancha kanqa: “Palabraykiqa purinaypi k’anchana jina, ñanniypitaj k’anchay jina,” nispa nin. (Salmos 119:105). Corintiosman ñawpaj kaj cartapi, 12 t’aqapi 31 chijllaypi, Apóstol Pabloqa yachachin imatapis ruwanapajqa Dios qowanchej atiyta. Kay jinata nispa: “Chaywampis qankunaqa, aswan sumaj ruwana atiykunata mask’aychej, Noqataj qankunaman rikuchisqaykichej aswan sumaj ñanta,” nispa.

Mayqen ñantaj aswan sumaj kashan? Chaytaqa willashan chay ñawpaj kaj cartapi. Chaypi nishan: “Sichus noqa parlayman runaspa parlayninkupi, angelespa parlaynimpian, manataj munakuyniyoy kayman chayqa, jatun campanaj waqaynin jinalla kayman... Sichus Diospa Palabranta sut’inchayman, yachaymantaj tukuy pakasqa yachaykunata, tukuy kay pacha imasmantawan; sitajchus sinch’ita creeyta atiyman orqosta ithirichinaypaj jina, manataj munakuyniyoy kayman chayqa, mana imachu kayman. Tukuy kapuyniytachus wajchasman rak’iymán, cuerpoytapis ninaman enqhaykusqa kanampaj jaywaykuymán mentasqa kanayrayku, manataj munakuyniyoy kayman chayqa ni imapi yanawanmanchu,” nispa nin. (1 Corintios 13:1-3).

Diospa Simi Nisqanqa, sut’ita yachachiwanchej, munakuypuni tukuy atiykunamanta aswan jatun kasqanta. Waj atiykuna aswan jatun kanman chaypis, mana rijch’akunchu munakuymánqa.

Imaraykutaj munakoyqa aswan jatun? Imaraykuchus Diosmanta jamun munakuyqa, chayrayku noqancheypi chay munakuyqa mask’an runamasinchejpa allinnintapuni. Chayrayku Diosninchejqa tukuy runakunata munakuwanchej. Chayrayku Diosqa astawan kusikun wawasninta kusikuypi kawsasqankuta rikuspa. Munakuypi rikukun Diospa wawasnin kasqanchejqa. Apóstol Pabloqa nishallampuni: “Munakuyniyoy runaqa pacienciayoy, k’achataj... mana envidiakunchu, nitaj may kasqanta yuyakunchu, nillataj jatunchakunchu. Munakuyniyoy runaqa, mana ruwanchu mana allin kajtaqa, nitaj payllapajchu imatapis mask’an. Mana usqayllata phiñakunchu, nitaj payllapajchu imatapis mask’an...” nispa. (1 Corintios 13:4-7).

Arí ajina, pichus munakojqa Diospa Leyninta junt’an.

Dios Tatayku, ima juchaykutapis perdonawaykupuni munakuwasqaykurayku. Mañakuyki supaypa trampasninmanta waqaychawayku. Jesucristoj sutimpi. Amén.

Noviembre 11

“... Sichus Dios noqanchejman kutisqa kashan chayqa, pitaj contranchejpi sayayta atinmanrí? Diosqa uj k’ata Churinta mana mich’akuspa qorqa, tukuyninchejrayku wañunampaj. Ajina chayqa, imaraykutaj mana qowasunmanchu Churinwan khuskata tukuy imatawan?” (Romanos 8:31-32)

Chayta nispaqa, Apostol Pablo rikuchiwanchej maymantachus salvaciónninchej, Diospa t’aqasqa kasqanchejpis jamusqanta. Apostolqa nin Diosmanta jamun tukuy kusi, yanapapis noqanchejmanqa, imaraykuchus Pay munakuyniyoj Tatanchejqa.

Noqanchejmanqa, imata ruwananchejpajpis atiyqa Diosmanta jamun, chayta yuyayninchejman churasun mana qonqanapaj. Payqa Janaj Pachapi kashan, jinallataj kay pachapipis, chayta yachanchej chayqa, noqanchejpeqa kusikuyta rikhurichin Jesucristopi creesqanchejraykulla. Diosmantapuni jamun yanapa imata ruwananchejpajpis, Pay atiyta qowasqanchejrayku. Diospi kashan cheqan kayninchej, atiy, Sonqo tiyaykusqa kay, kusiyninchej imapis.

Tatanchejqa Dios, Paypi tarinchej waqaychasqa kaytaqa. “Sichus Paypa wawasnin kanchej chayqa, herieciayoj kanchej. Diosmanta herenciayoj kaspataj, Cristowan khuska herenciata jap’isunchej.” (Romanos 8:17). “Diosqa uj k’ata Churinta mana mich’akuspa qorqa, tukuyninchejrayku wañunampaj. Ajina chayqa, imaraykutaj mana qowasunmanchu Churinwan khuskata tukuy imatawan?” (Romanos 8:32).

Niway, Tukuy Atiyniyoj Dios kawsaqenchej chayqa, manachu kusiqa sonqo junt’asqataj kasunman? Tukuymanta aswan wajcha kashawaj, mana imayoj kashawaj chaypis, Dioswanqa aswan qhapaj kanki, llamp’u sonqotataj Pay qosunki. Tukuypa qhesachasqan kanki chaypis, qanqa mana kay pachamantachu kanki, Janaj Pachapi kashan qhapaj imasniykeqa. Chayraykumá sapa p’unchay Diosninchejwan khuska atinchej kusirikuyta. Paypitaj atinchej tariyta tukuy allin imastaqa.

David, jinallataj tukuy Diospaj t’aqasqa santos kajkunaqa, unaypis Diospeqa ajinatapuni kusikurqanku: “Noqaqa Tata Diospi jatunta kusikuni,” nispa. (Salmos 34:2). Tukuy sonqo atinchej niyta: “Qan, Tata Dios, kallpay kanki; noqa munakuyki,” nispa. (Salmos 18:1).

Janaj Pachapi kashaj Diosniyku, noqataqa Qan ruwawarqanki, Qanllataj noqarayku jatun preciota pagarqanki. Chayrayku, noqapi kallpay pisiyajtenqa kallpachaykuway ari. Jesucristoj sutimpi. Amén.

“... Noqaqa cheqa uva sach’a kani, Tataytaj llank’aj. Noqapi kaj rama, sichus mana poqon chayqa, Dios Tata k’utonqa. Poqoj ramatataj podaspa llimphuchanqa, astawan poqonampaj.” (Juan 15:1-2)

Tukuy Diospa wawasnin kajkunaqa, kawsashanchej wist’u yachachejkuna chawpipi; jinallataj Jesuspi creejkunamanta wasanchajkuna chawpipi ima.

Wakin kuteqa, kachipis laq’ayapun, Jesuspi creejkunapis kay pacha runaspa usunkupi puriymanta yachakapunku, Salvajninku Jesusmanta qonqapuspa.

Allimpuni cheqa kajpi creejkuna imaynata kawsakuyta yachananchejqa, mana creejkuna kajkunamanta mosoj kawsaypi kawsakuspa, ajinamanta ashkhas Diosta rejsikunankupaj. Chaymanta parlashan kay qallariypi ñawirisqanchejman jinaqa.

Munankichu yachayta, imaynachus kanku Jesuspi creejkunaj kawsaynin? Uyariy, imatachus kikin Jesús nerqa chayta: “Mana poqoj ramataqa, Dios Tata k’utonqa,” nispaj.

Sichus kunitan Iglesiapi Jesuspa salvashashanwan khuska, miembro kashanki, nitaj poqoshankichu chayqa, Jesucristoj kay nisqasninga qampaj kashan. Chaytaqa qan qhawarikuy unancharikuytaj imaynachus kashan chay poqona, imastajchus kashan chay poqoykunata, chayta. Sichus mana uva sach’api kashanki chayqa, k’utusqa rama jina wañusqa kashawaj. Juicio p’unchaypitaj Diosqa t’aqarparisunkiman, nina larwashaj infiernomantaj wich’uykusqa kawaj wiñaypaj.

Manachu manchachikunki Señorpa chay nisqanta? Sichus mancharinki chayqa, Jesucristoman chimpakuy perdonaspa sonqo tiyaykuyta qosunqa, chay tukuy imatataj sut’inchasunqa. Tukuy munakuywan Diosqa qosunqa kallpata, astawan cheqa kajta rejsinaykipaj, chanta cheqa kajpi purinankupaj ima. Amapuni chay jina munakuyniyoj Diosmanta ch’urkikuspa karunchakuychu. Nitaj ninriykita lojt’uyachiychu pipis cheqan ñanman pusasuyta munajkunata mana uyariyta munaspaqa. Ajina kajtenqa yuyarikuy Jesuspa nisqanta: “Mana poqoj ramataqa, Dios Tata k’utonqa,” nispaj nin.

Munasqa Dios, llakiyniyta lllasa q’epita jina q’epishani. Qampa chakisniykiman apamuni perdonaspa samarichinawaykita, yanapaway, sonqo tiyaykuytataj qoway. Jesucristoj sutimpi. Amén.

Noviembre 13

“... Runa masinta munakojqa Leypa nisqanta junt’an.” (Romanos 13:10)

Pikunachus tukuy sonqo creesqankupi chay Fe nisqa paykunapi kashan, jinallataj sichus cheqa Espíritupis kashan chayqa, Diospa munakuynimpi kusikuyniyojpuni kanqanku, jinallataj tukuy imata Diosmanta yachaqakuytapis munanqankupuni.

Ashkhas mana ajinatachu ruwanku, astawanqa paykunaj yuyaychakusqankuman jinalla kawsakuyta munanku. Paykunaqa manchachikunku astawan Bibliaj nisqasninta yachakuytapis; kawsayninkumantapis manaña dakunkuchu, Diospa munayninman jinachus manachus kawsashanku chaytaqa. Ajinata kawsanku, imaraykuchus manaraj Diospa munayninta allinta rejsisqankurayku, chayraykutaj Leypa nisqallanta ruwayta munanku.

Apóstol Pabloqa munan umanchejpi sut’i kananta, munakoyqa tukuy imamanta aswan jatun kasqanta. Jinallataj sut’ita yachananchej kashan, chay “pakasqa imasta sumajta entiendeyta.” Chayqa kashan munakuypuni aswan jatun kasqampi. Creeninchej Fepis noqanchejpi may jina jatun kachun orqosta ithirichinapaj jina chaypis, munakuypuni aswan jatun kanan tiyan noqanchejpeqa. Cuerpota hermanonchejrayku ninaman enqhaykuypis, manapuni jap’ikunchu munakuyman aswan jatun kaypeqa. “Diospa munayninta ruwayqa” munakuypi allin kajta ruway kashan.

Tukuy Profetaspa, Apostolespa k’achituta yachachisqankutaqa, uj palabrallawan entiendeyta atinchej; chay palabraqa kashan, “munakuy”. Paykunaj parlasqanku kawsasqankupi imaqa, rikunchej munakuyta. Chayqa niyta munan, Diospa tukuy kamachisqanqa munakuypuni junt’akusqanta. Diosqa, tukuy runasta munakusqanrayku, kamacherqa “munakunankuta.”

Ima “allin imasta” Diospa sutimpi ruwasqapis, runa masinkupaj mana munakuy kanmanchu chayqa, mana allin ruwaykunachu kanman.

Diospa tukuy imata kamachisqasninqa, munakuywan imatapis ruwasqapuni kashan. Sichus wawasnimpaj ruwasqasnin munakuypi ruwasqa kashan chayqa, cheqamanta chay “allin imasqa” paykunapi sut’i rikukun.

Munasqa Tatayku, Qanqa k’aminki jasut’inkipis pitachus munakunki chaytaqa. Chay k’amiyniykipi khuyarikuwayku. Jesucristoj sutimpi. Amén.

“Noqapi kaj rama sichus mana poqon chayqa, Dios Tata k’utonqa. Poqoj ramatataj podaspa llimphuchanqa astawan poqonampaj.” (Juan 15:2)

Uj niypi chay nisqa kashan chayqa, anchatataj songochawanchej, kallpachawanchej ima, uj niypitaj mancharinapaj jina kashan.

“Mana noqapi kajqa rama jina jawaman wich’usqa kanqa, ch’akiponqataj. Chay ramasta tantaspataj, ninaman enqhaykunku q’olanampaj,” nin. (Juan 15:6). Ajinata Cristoj nisqanqa, sinch’imanta mancharikunapaj jinapuni kashan; pikunachus: “Cristopi kashani” nispa nishaspa, manataj ajinachu kawshanku chaykunapaj phutiyqa kashan.

Chay casaraku raymiman wajyasqas kajkunaqa, sapa uj achakista mask’ayta qallarercanku mana chay raymiman riyta munaspa. Paykuna mana riyta munashajtinkupis, casaraku raymiqa ruwakorqapuni. Chay raymimantaj, ashkha runakuna junt’aykusqanku nin.

Usunkuman jinachari casaracojqa, chay raymiman yaykunankupajqa sapa ujman uj p’achatachari qonman karqa. Jinataj chay raymipeqa, kasqa uj runa chay p’achata mana jap’ikuyta munaj. Ichapis yuyanman karqa chay p’achata mana necesistasqanta, chaychus yuyarqa mana chay p’achayojpis yaykunallanta... Mana chay p’achayoj kajtintaj wijch’uchikamosqa.

Unancharisun: Señorninchej Jesucristoqa chay raymimanta parlaspas, nisharqa pikunachus Paypa qosqan p’achamanta; chayta tukuy cristianos jap’ikusqanku tukuy sonqo Jesucristopi creespa; Payta sonqonkupi jap’ikujkunamanqa, “aswan Sumaj P’achata churaykun,” chay p’achawan tukuy salvasqa kajkuna, Janaj Pachaman yaykunankupaj.

Chantá unanchallasuntaj uva sach’amanta: Mana poqoj ramasmanta, chanta poqoj ramasmantapis. Cheqamantapuni Jesuspi creespa salvasqa kajkunaqa, Payman khuskachasqa kajkunaqa, sumajta poqojkuna kanku. Jesuspi creenipuni nispalla nijkunari, qhasi ramas mana poqojkuna kanku. Chaykunaqa allin imasta ruwanku chaypis, Jesucristo mana sonqonkupi kajtenqa, Diospa qhawaynimpeqa mana sumaj poqoyiniyojchu kanku, paykunaj ruwasqallankupi jatunchakusqankurayku. Cheqamanta salvasqa kajkunapirí Espíritu Santoj poqoyinqa ashkhamanta rikukun.

Apostol Pabloqa chaymanta parlaspas sut’ita yachachin, runaj payllamanta ruwasqanqa, Espíritu Santoj poqoyninwanqa mana kikinchu kasqanta. Chayrayku nin: “Aychaj munaynenqa Espíritoj contrampi; Espiritupis aychaj munaynimpa contrallampitaj,” nispa. (Gálatas 5:17).

Khayayniyoj Dios, pisi kallpalla kashani. Qanlla atinki sinch’ichawayta Espirituykiwan. Qan imaynachus noqa kanayta munanki ajinata ruwaway. Jesucristoj sutimpi. Amén.

Noviembre 15

“Qankunachus munanakunkichej chayqa, tukuy runas yachanqanku yachachisqasniy kasqaykichejta.” (Juan 13:35)

Munakuymanta parlaspaqa, wakin creyentes kajkunaqa ninku: Cristopi creej masiytaqa atillani munakuyta mana munakunaymanta nisqaqa. Chaywampis pikunachus falsos, puraj uyas kajkunatarí, mana facilta atillanichu munakuytaqa, nispa.

Paykunaj t'aqankumanta hermanostaqa atillanku munakuytaqa; jinallataj, ichapis imapi yanaparqa, chayrí imata jap'iyta yuyaspa, chayraykulla atinku munakuytaqa. Way iglesiamanta creyentes kajkunatarí mana atillankuchu munakuytaqa.

Iglesiapeqa kanku falso puraj uya creyentes, paykunaqa runakunaj qhawaynimpeqa sumajtapis kawsashankuman jina kanku, yachaphukus jina. Diosmanta mañakuspapis, rikuchikunku tukuy sonqopis ruwashankuman jina. Ajinamanta wakin kuteqa jap'ichikunku falso creyente kasqankuta, imaraykuchus mana atinkuchu unayta pakaytaqa. Paykunaqa imatapís thutushampuni Jesuspa salvasqan kajkunaj contrampi. Cristianos pantanku chaypis, yapaykuspaña anchatataj rimanku paykunawan chhoqonakuspa.

Cheqamanta llimphu sonqo munakoyqa, mana ajinachu: “Munakuyniyoj runaqa, mana kusikunchu mana cheqan kajmantaqa, astawanqa kusikun cheqa kajmanta.” (1 Corintios 13:6). Uj creyente ima juchaman urman chaypis, sonqonta nanachikun munakuyta yachasqanrayku, chayraykutaj urmajtaqa munakuywan yanapan sayarichiyta munaspa. Chayta ruwan ch'uwa sonqo munakoyqa, imaynatachus san Pablo nin: “Sichus ujnín ima nanasqa kanman chayqa, tukuy ninku sonqonkuta nanachikunku chay ujwan khuska,” nispa (1 Corintios 12:26).

Kay cheqa munakoy mana noqanchejpi kashan chayqa, maypitaj tarisunman? Chaytaqa jap'inchej Dios Tataj ñawpaqempi juchasapa chinkasqa kasqanchejta reparakuspa, chanta tukuy sonqo cheqapipuni Jesucristopi creesqanchejrayku, ajinamanta Diospa khuyayninta Jesusllapi tarinchej.

Cheqapipuni Cistopi creyejkunapajqa, mana kallpakunarajchu munakunapajqa; imajtinchus munakoyqa mana Leypa ruwasqanchu, manachayqa Espírituj ujnín kaj poqoynín kashan.

Diosný, supaytaqa Qampa yanapaynillaykiwan atipasaj. Tukuy imapi Churiyki Jesucristopi atienikuyta yanapaway. Chayta mañakuyki Salvawajniypa sutimpi. Amén.

“Cheqan kajman jina kawsayman yapaychej hermanospura allinta kawsakuyta, chaymantaj yapaychej munakuyta.” (2 Pedro 1:7)

Cheqa creyente kajqa, mana atinchu pakayta Dioswan kawsakustantaqa, “imaraykuchus sonqon junt’a kasqanman jina simeqa parlan,” nin. (Lucas 6:45).

Creyentesman rijch’akojkunapis atinku parlayta creyente jina kawsanamantaqa, mana creyentes kajkunaj sajra ruwasqankutapis jucha kasqanta ninku. Ichus paykunaj sonqonkupeqa mana Jesucristo kawsakunchu, chayrayku paykunaqa: Diosmanta, Jesucristoj ñak’ariyninmanta, Qhasilla K’acha Yanapayninmanta imaqa, mana ch’uwata parlankuchu.

Pikunachus Evangelionpa wajyasqan kanchej, Salvawajninchejwantaj uj sonqolla kanchej, chaykunapajqa mana imapis kanchu aswan parlanaqa; Diospa wawasnin jinaqa, Jesucristo imatachus noqanchejrayku ruwasqanmantaqa parlana jinapuni, mana ch’in kasunmanchu. Manaraj Cristopi creeshajtincejqa Paymanta parlayqa mana atina jinallachu karka, imaraykuchus paymantaqa yacharqanchej chaypis, p’enqakuj kanchej. Kunantajrí Diospa munakuyninmanta parlayqa may misk’i kusiytaj noqanchejpajqa.

Chanta chay mosoj kawsayri mayk’ajtaj noqanchejpi rikhrerqa? Rikhrerqa maypachachus juchasapa kasqanchejta riparakuspa Jesucristopi creespa chimpakurqanchej perdonninta jap’ikuj, chay ratomantapachataj mosoj runaman tukorqanchej.

Chay ratomantapacha jap’ikorqanchej mosoj sonqota, mosoj kallapata ima. Chaytaj rikukun munakuywan imatapis ruwasqanchejpi. Ajinata kawsashajtincejpis, kay sajra aychachejqa churanakuwanchejraj mana allin ruwaykunaman tanqaspa.

Cristo uva sach’amanta parlasqanpi, ramasnin kasqanchejta niwanchej, chaypi sut’ita yachanchej Cristopi ujchasqa kaspa poqoyniyoj kasqachejta. Pay nerqa: “Noqapi kajqa, Noqataj paypi, chaymá ashkhata poqonqa,” nispa. (Juan 15:5).

Dios Tatayku, mana yachashanichu imaynatachus supayta atipayta. Payqa mana reparayllata ima ruwayniypipis sat’ikamun. Chayrayku yanapayniykita mañakuyki Jesucristo Salvawajniypa sutimpi. Amén.

Noviembre 17

“Noqapi kaj... poqoj ramataqa, podaspa llimphuchanqa astawan poqonampaj.” (Juan 15:2)

Kay nisqaspi wakinqa yuyanku: Jesuspa salvasqan kajkunaqa manaña juchallinkuñachu, nispa. Ajinapis kaypeqa rikunchej llimphuchanaraj kasqanchejta. Cheqapipuni salvasqa kajkunaqa Cristowan ujchasqa kasqankurayku, supayqa karunchahiytaraj munanqa imaymana ch'ichichayta apamuspa, chayraykutaj sumaj poqoyniyoj kanankupajqa llimphuchasqarajpuni kananku tiyan, imaraykuchus manaraj mana juchachakojqa kankurajchu.

Uva sach'api uj sumaj rama poqoshan chaypis, chay ramapi kankuraj juch'uy ramas mana poqojkunaqa, chayrayku chay mana poqoj ramitasqa podaspa llimphuchasqaraj kanan kashan. Ajinallataj kayta atin uj creyente Cristopi kashan chaypispis; allintapis poqochun, ichapis paypi kashanraj imachus mana allinchu kashan, manataj poqojta saqenchu chayqa. Aswan sumajta poqonampajqa, Diosqa podaspa paymanta orqhoyta atinqaraj.

Ichapis qampaj kay nisqasqa, mana creena jina kashan. Imaraykuchus, wakin runakunaqa atinku k'achas kayta, mana Cristopi creespapis. Chaywampis espirituman jinaqa wañusqas kashanku, imaraykuchus Jesucristo salvadorninkuta qhesachasqankurayku.

Ajina kajtenqa, yuyarikuyuni: Mana sumaj llimphupunichu juchallinamanta kashanki, nitaj supaypa trampa man urmaymantapis. Sichus juchasllispa pantasqaykimanta reparakuspa Jesucristoman perdon mañakuspa chimpanki chayqa, Salvadorninchej perdonasonqa, ajinamanta sajra supayqa mana atipayta atisunqachu. Sichus Salvasojniykiwan khuska kawsakuyta munanki chayqa atipajpuni kanki, ashkha poqoyniyojtaj.

Watejmanta nispa, pichus sumajta “poqoshan chaytaqa, Dios llimphuchanqa, astawan poqonampaj.” Mana poqojtarí Diosqa saqellanqa wiñajta, chaymantataj k'utuspa, ninaman enqhaykonqa.

Diospa wawasnin kajkunaqa, pantasqa ñanta jap'irishajtinchej k'amisqa, llimphuchasqa, jasut'isqa kasun, Payman watejmanta kutimpunanchejqaj. Bibliapi kay jinata nishan: “Pitachá munakun, chayta castigan wanachinampaj. Pitachá wawampaj rejsikapun, chayta seq'on... Mana pi wawapis kanchu wanachinapaj tatampa mana jasut'isqanqa... Mana mayqen jasut'ipis chay ratoqa kusikunapaj jinachu, manachayqa llakikunapaj jina. Qhepamantajrí chay castigasqa kajkuna chaywan yachaqakuspa allin kawsayta, cheqan kawsayta ima sumaj poqoyta jina oqharinku,” nispa nin. (Hebreos 12:6-11).

Bendito Jesucristo, kay tukuy yachaqakusqayqa, Qanta jatunchasunaypaj kachun. Mana ajina noqapi kajtenqa yanapaway chay tukuy imapi. Chayllata kunan mañakuyki Salvawajniy jesuspa sutimpi. Amén.

“Qankunaqa llimphuchasqaña kankichej, noqaj parlasqayrayku.” (Juan 15:3)

Jesuspa nisqanqa, Cristopi creejkunapajqa mana facilta entiendena jinallachu, “Parlasqarayku llimphu,” nispaqa. Imaniytataj munan? Ajinata Jesús nerqa, Espirituman jina llimphuchasqa kasqannkumanta parlan.

Arí, Dios Tataqa Jesucristoj yawarnimpa llimphuchasqanwanqa sonqo junt’asqa karqa. Señorninchej llimphuchasqanta mana pipis niyta atinchu “ch’ichi” nispaqa. Dios nin chayqa ajinapuni kanan tiyan, Paymin atinyiyoj juezqa. (Romanos 8:33-39).

Bibliaqa is kay laya llimphuchakuymanta parlan. Uj llimphuchakoyqa ruwakun sonqonchejpi, chayqa Espíritu Santoj ruwasqan. Hechos 15:9 nin: “Mana judío kajkunata, sonqosninkuta juchamanta llimphuchan creesqankurayku,” nispa.

Chay ujnin llimphuchayqa mana tukusqarajchu, imaraykuchus kay pachallapiraj kashanchej, juchallishanchejrajpuni munaspa mana munaspa; supaytaj juchaman tanqashallawanchejpuni urmanachiyta munaspa. Mashkha kuti juchawan pejtukunchejrajpuni. Jesucristoman rejtinchejqa perdonaspa llimphuchawasunraj.

Chay kashan ujnin kaj llimphuchayqa, sapa kuti juchamanta kacharichisqa kasqanchejpi, castigasqa kanamanta salvasqa kanchej. Sapa kuti Payman chimpakusqarayku perdonawanchej, ajinamanta Diosninchejqa cheqan runapaj qhawawanchej. Apóstol Juan chaymanta parlaspa, nin: “Diospa Churin Jesuspa yawarnintaj tukuy juchamanta pichawanchej,” nispa. (1 Juan 1:7).

Juchanchejmanta Dios llimphuchawanchej chayqa llimphuchasqata llimphuchawanchej, pipis nichun imatapis, Dios nin chayqa ajinapuni, Paytapuni creena tiyan. Ichari?

Janaj Pachamanta nimorqa Pedrota: “Imatachus Dios llimphuchasqantaqa ama ch’ichi niychu,” nispa. (Hechos 10:15). Chayta noqanchejmampis nillawanchejtaj.

Munasqa Dios Tatayku, chay niwasqaykipi creeyta yanapaway. Chayta mañakuyki Salvawajniy Jesuspa sutimpi. Amén.

Noviembre 19

“Chay kikin Espiritullataj, espiritunchejwan khuska, testigojina sut’inchán Diospa wawasnin kasqanchejta. Sichus Paypa wawasnin kanchej chayqa, herenciayoj kanchej, Diosmanta herenciayoj kaspataj, Cristowan khuska herenciata jap’isunchej; sitajchus Cristowan khuska ñak’arinchej chayqa, Paywan khuskallataj, jatun kaynimpa k’anchaynimpi wiñaypaj kasunchej.”

(Romanos 8:16-17)

“Diosmanta Jesucristowan khuska herenciayoj kanchej,” nin. ¡Chaymá kuseyqa!

Chayta uyarispaqa entiendenchej, warme j miraynin nispaga, parlashan Jesucristomanta. Edén huertaj cuentamanta Janaj Pacha punkuta kicharipuwanchej tukuy juchasapaspaj. Ajinata niwanchej Señorninchej Jesucristoqa: “Tatayman, Tataykichejmantaj, Diosniyman, Diosniykichejmantaj wicharishani,” nispá. (Juan 20:17). Chaywampis chay nisqantaqa, wakin kuteqa ñak’ayllata creenchej.

“Diosmanta herenciayoj kanchej Cristowan khuska.” ¿Uyarinkichu? “¡Ancha qhapajkunataj kanchej!” Chayta uyarispa t’ukuni, kusikunitaj. Allinta unancharina chaypi, mana chaypaj jina kashajtincejpis, herenciata qowanchej. Chay imastaqa manapis rikunchejrajchu, pisi p’unchaykunamantawan rikusunchej. 1 Corintios 2:9 nin jina: “Imatachus ñawi mana rikorqachu, nitaj ninri uyarerqachu, nillataj sonqonkupi yuyarqankuchu, chas imastaqa Dios wakicherqa Payta munakojkunapaj,” nispá.

Apóstol Juan nerqa: “kunanqa Diospa wawasnin kanchej; chaywampis, mana yachakunrajchu imaynachus kananchejqa aswan qhepaman. Yachanchej Jesucristo rikhurimojtin Payman rijch’akunanchejta, imaraykuchus Pay kikinta rikusunchej imaynachus kasqanta,” nispá. (1 Juan 3:2).

Chaytachus cheqamanta creenki, sonqoykipitaj jap’inki Dios wawampaj rejsikapususqanta chayqa, ni jayk’aj munankichu munakusoj Tataykimanta karunchakuytaqa; jinallataj Salvasojniyki Jesucristomantapis mana munankichu wajladoman ripuytaqa. Astawanqa sapa p’unchay paywan parlarikuyta munanki, imaynatachus Pablo Nin: “Wawasninña kajtiykichejtaj, Diosqa Churimpa Espiritunta sonqoykichejman kachamorqa, Paytaj Dios Tataman qhaparikun: Tatáy, Tatáy, nispá.” Ajinata nin. (Gálatas 4:6).

Munasqa Diosniyku, wakin runakunaqa Qanmanta willasqaykuta mana japikuyta munankuchu, paykunaj sonqosninkuta munakuyniykiwan kichariy jap’ikunankupaj. Jesucristoj sutimpi. Amén.

“Sichus mana juchayoj kasqanchejta ninchej chayqa, noqallanchejtaj ch’awkiyakunchej, cheqa kajtaj mana noqanchejpichu kashan.” (1 Juan 1:8)

Noqanchejqa runa kasqanchejraykoqa juchaj atipasqan kanchej. Wakin kutisqa, ni reparakullanchejpischu juchallishasqanchejtaqa.

Noqallanchejmanta jatunchakuy juchawan junt’a kashanchej, sajra yuyaykunawan ima ch’ichichasqa. Diospa qhawaynimpeqa mana Cristowanqa juchasapaspuni kanchej. Simi Nisqampi, nin kay jinata: “Tukuy ima, allin ruwasqaykupis, millay ch’ichi thanta jina”, nispa. (Isaías 64:6).

Diostaqa, mana munakunata jinachu munakunchej. Diosmanta mañakushaspapis, chayrí Bibliata ñawishaspapis, yuyayninchejqa may karupi kashan. Wajcha kawsaypi kajkunapis, yanaparinamanta jina kashanku, mana paykunamantaqa dakullanchejpischu. Ichapis yuyanchej mana imanchejpis kasqanta yanaparinanchejpajqa; ajinapi kaspataj phiñarikuywan atipachikunchej. Ajinapi tarikuspataj, Jucha chanta sajra kaywan imaqa, noqanchejpi t’ojyanampaj jinaña kashan.

Chay jinapi rikhurejtinchejtaj, sajra supayqa thanta trapota jina thalaj wakiwanchej, Cristotaj chaytaqa saqellan noqanchej reparakunanchejkama. Ajinamanta yuyayninchejmanqa tukuy mana allin imas jamun, juchataj munayninta ruwayta munan noqanchejpeqa.

Rey Davidqa, sapa kuti ajinapi rikhursqanta niwanchej, chanta Diosman k’umuykukojtillan sonqo tiyaykuyta tarisqanta niwanchej. Chayqa qhelqasqa kashan Salmos libropi. Apóstol Pablopis qhaparikushamampis jina, nin kay jinata: “Ay, imanallasajtaj? Pitaj kay wañoj cuerpoymanta kacharichiwanqari?”, nispa (Romanos 7:24).

Chaywampis munakoj, khuyakoj Diosman k’askasqa kajkunaqa, taringankupuni yanapataqa, ni pipaj rimaspa Diospa makinman churakunqanku, sonqochasqa kanankupajqa.

Maypachachus Dios parlan juiciomanta juchachakojkuna castigasqa kananmanta ima chayqa, mana Dioswan k’asqasqa kajkunamantachu parlashan; manachayqa pikunachus juchallisqankuta reparakushaspapis Diosmanqa mana k’umuykunkuchu perdonta mañakuspaqa, chaykunamanta parlashan. Pikunachus juchallisqankumanta Diosman willakoj chimpajkunaqa perdonasqapuni kanqanku.

Chayrayku, sonqonchej ukhuta qhawarikunanchej tiyan, imaynachus kawsayninchej kashan chayta.

Dios Tatayku, kallpata qowayku qanman jamuspa perdonta mañakunaykupaj. Ajinamanta ch’uwa sonqo kayta ruwawayku. Jesucristoj sutimpi. Amén.

Noviembre 21

“Ajinaqa, Cristopi kaj runaqa mosoj runañamin; ñawpa kawasayqa tukukapun, mosoj kawsaytaj chayamun.” (2 Corintios 5:17)

Jesupi creespa salvasqa kajqa, tukuy kawsaynimpi Espíritu Santoj escuelampi Cristopi atienikuyta yachaqakun; Critopi atienikoj cristianoqa, Paypa qosqan justicianwan p’achallisqa kashan. Chayta Diospa Simi Nisqanqa nishan: “Cristopi kay,” nispaqa. Chayta nin Apóstol Pabloqa: “Mosoj runañamin; ñawpa kawsayqa tukukapun,” nispaqa.

Mosoj kawsayqa, Jesuspa salvasqan kajkunaj kawsayninkupi rikukun. Jesucristota sonqonkupi jap’ikusqankuraykulla chay mosoj kawsayqa. Chay mosoj kawsayqa, paykunapi sonqo tiyaykuyta qon; jianallataj, Diospa Qhasilla K’acha Yanapayninta, munakuyninta, paciencianta, yachayta ima, paykunaman qon. Ajinamanta kawsayninkoqa waj jina, mana Cristowan kashaspa kawsayninkumanta nisqaqa, aswan k’achito.

Espíritu Santo qowanchej mosoj ñawita, mosoj simita, mosoj ninrita, mosoj kallpata; tukuy ima mosoj. Chaytaj rikukun, mosoj runa jina kawsayninchejpi.

Mawk’a kawsaynichej qhepakapun kay pachapi, juchallapi kawsay munayninwan khuska. Imaraykuchus, kay pacha mundo imaspis manaña kusichiwanchejchu, unay jinaqa. kunanqa molestawanchej llakichiwanchej ima, chay ruwaykunaqa. Imachus Diosmanta kajkuna unayqa aburrichiwaj, llakichiwaj kanchej, kunanrí chaykunaqa kusichiwanchej kawsayninchejpita ancha k’achitupuni.

Dios nacechikuwanchej mosojmanta. Edén huertapi kashaspa runaqa juchapi wañorqa, ajinamanta chinkacherqa Diosman rijch’akoj kayninta, kunantaj chayta kutichipuwanchej Jesucristonejllata watejmanta mosoj runaman tukuchispa.

Chaywampis kashanraj noqanchejpi, chay mayqentachus San Pablo, nin: “Mawk’a runanchej” nispa. Wakin kutitaj, nin “Sajra aychanchej,” nispa. Arí, sajra aychanchejqqa, misk’ichikuytaraj munan kay pacha sajra imaswan noqanchejta kusichiyta munaspa. Noqanchejpita watejmanta nacekusqanchejrayku, “mosoj runa” kanchej. Unay misk’ichikoj kanchej chaywan millachikun.

Munasqa Dios Tatayku, Espíritu Santoykinejta Iglesiataqa qampuni pusariy ñawpajman. Noqallaaq mana atinichu. Chayta mañakuyki Jesucristoj sutimpi, Amén.

“... Uyariwaychej ari kawsanaykichejpaj...” (Isaías 55:3)

“Ajinaqa uyarisqanejta runaman chay creeyqa jamun, uyarisqantaj Cristoj palabrannejta jamun,” nispa nin. (Romanos 10:17).

Creesqanchejrayku chay Feqa noqanchejman jamun, mana payllamantachu noqanchejpi rikhurin. Wakinkuna yuyanku noqallanchejmanta chaytaqa tarinchej nispa. Chantaqa mana jap’isunmanchu munasqanchejman jinallaqa. Chay creey Fetaqa Dios qowanchej, Paypa munasqanrayku, chay Medios de Gracia nisqanejta Dios qowanchej. Cristo nerqa: “Noqaj parlasqayrayku,” nispa. (Juan 15:3).

iUyariy Dios imatachus nin chayta! Bibliata oqharikuy, kicharispataj ñawiriy, ñawirispataj uyariy, chay nisqampitaj atienekuy. Ichus kunampi kawsayniyki pejtupacha kashan chaypis, Bibliaj nisqampi atienekuy, ajinamanta Diospa munakuyninta rejsinki, ajinallataj Jesucristotapis sumajta rejsinki. Payqa, munan salvasuyta Janaj Pachapi Paywan tiyakamunaykipaj.

Apóstol Pablo chaymanta parlaspa, sut’incharqa kay jinata nispa: “Ama sonqoykipi ninkichu: Pitaj Janaj Pachaman wicharenqari? nispa. Chay niyta munan Cristota kay pachaman urayk’uchimunapaj. Amallataj ninkichu: Pitaj ukhu pachaman urayk’unqari? nispa. Chayqa niyta munan Cristota wañusqakunamanta kawsarichinapaj. Astawanqa, ima nintajri? Palabraqa qayllaykipi kashan, simiykipi, sonqoykipitaj, nispa. Chaymin creeymanta yachachisqayku palabraqa. Sichus simiykiwan runaspa uyarinanta ninki Jesusqa Señor kasqanta, creenkitaj sonqoykipi Dios wañusqakunamanta Payta kawsarichimusqanta chayqa, salvasqa kanki,” nispa. (Romanos 10:6-9).

Cristoj nisqasnintaga mana tukuynejpi mask’anachu kashan; Diospa Simi Nisqan Bibliaga makiykipi kashan. Chaypi nisqanta ñawiriy, chanta chaypi nisqantataj uyariy. Cristotaj qanman parlaykusonga.

Bibliaj tukuy nisqanpi creespa atienikuy. Chaykunamanta parlaspa, Jesús nin: “Qankunaqa llimphuchasqaña kankichej, noqaj parlasqayrayku, nispa.” (Juan 15:3).

Señor, Iglesiaqa qampata, chaywampis atinki noqanejta nisqaykita junt’ayta; reinoyki kay pachapi wiñanampaj. Jesucristoj sutimpi. Amén.

Noviembre 23

“... Qankunaqa llimphuña kankichej, manapis tukuyniykichejchu.” (Juan 13:10)

Ñawirerqanchejña, “Uyarisqanejta, runaman chay creeyqa jamun,” nisqataqa. Jinallataj Dios Tataj palabranqa, nishan: “Pichus Diospa Churimpi creejqa, Diospa testigon jina willasqanta sonqompi jap’in,” nin. (1 Juan 5:10).

Judaschus Cristoj parlasqanta allinta uyarispa creenman karqa chayqa, llimphuchasqa salvasqataj kanman karqa. Jinapis, Judasqa supaypa yuyaychasqanta astawanqa uyarerqa, yuyasqanman jinalla ruwarqa Jesuspa parlasqanta pisipaj qhawaspa.

Qanqa Bibliapi Diospa nisqasninman yuyayniykita sonqoykita churay, Diostaj sonqoykipi junt’a kawsakonqa, ajinamanta kusiyniyki junt’asqa kanqa. Chaypitaj sut’ita yachanki Jesucristolla qampeqa chay jatun milagrota ruwasqantaqa. Ajinamanta creesqayki fe sumajta saphichakonqa, sut’itataj reparanki Jesucristolla ruwasqanta salvasqa kananchejpajqa.

Diospa Simi Nisqan, nin: “Diospa Qhasilla K’acha Yanapayninnejta, creeyrayku salvasqa kankichej,” nispá nin. (Efesios 2:8). Noqanchejpi Jesucristollapi atienikuy kajtenqa mana puñukapusunchu; mashkha imastaña Bibliamanta yachaspapis astawan ñawirisun. Noqanchejpi chay creey kajtenqa, ashkha k’acha imasta yachakusun, chaytaj punkuta kichariwanchej kay pacha kawsayninchejpi k’achata kawsakunapaj.

Ajinamantataj, noqanchejqa aswan kusionqa sumaj wakichisqastaj thaskirisun, Janaj Pachapi wakichisqa kashan chay casaraku raymiman chayananchejkama; jinallataj Dioswan allimpi kawsakuyta munasunchej, runamasinchejwampis munasumpuni Diosmanta parlarikuyta salvacionta jap’ikunankupajqa. Chay creey Fe yachachiwanchej Diospa nisqasninman jap’ikuyta.

“Uyarisqanejta runaman chay creeyqa jamun,” nispá nin. Juchaykirayku p’engasqa, mancharisqataj kashanki chayqa, Diospa palabrampi **uyarinki** perdonayta munasusqanta chayqa, ajinamanta Payman rejtiykeqa perdonasonqa, khuyakuynimpitaj llimphuchasqa kanki.

“Diosqa chay jinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis Paypi creejqa mana chinkayman ringachu, astawanqa wiñay kawsayniyoj kanqa.” (Juan 3:16).

Señorníyku, paykunaman qanmanta yachachishajtiy, rikuchiy munakuyniykita. Qampa Simi Nisqaykipis cheqapuni kasqanta rikuchiy. Jesucristoj sutimpi. Amén.

Noviembre 24

“... Imaynatachus ramaqa sapallanmanta mana poqoyta atinchu mana uva sach’api kaspaga. Ajinallataj qankunapis mana atinkichejchu, manachus noqapi kankichej chayqa.” (Juan 15:4)

“Noqapi kaychej”, chayta Jesucristoj nisqanqa, noqanchejpajqa may sumajpuni kashan Paypi kawsakuspa, nisqasninta jatumpaj jap’ikunaqa. Waj kutispipis ashkhata nerqa Payman k’askasqa kananchejtapuni. Ajinata nispaqa yachayta qowanchej Paywan khuska kawsakunatapuni.

Diospa Churenqa wajyakuwanchej, Paywan ujchasqallapuni kananchejta.

Chay nisqanmanta mana ancha unayninmanchu Jesusqa, Dios Tatamanta mañakorqa, Kay jinata nispas: “Mana paykunallapajchu mañakuni, astawanqa paykunaj willasqankurayku noqapi creenqanku, chaykunapajpis. Mañakuyki tukuy ninku ujlla kanankupaj, imaynatachus Tatay, qanqa noqapi kashanki, Noqapis qampi, ajinata. Paykunapis noqanchejwan ujlla kanankupaj,” nispas. (Juan 17:20-21).

Munakuynillampipuni kaspaga Cristollawampuni kanchej. Chayta astawan sut’inchas, kay jinata nispas: “Noqapichus kallankichejpuni, nisqasniytaj qankunapi kashanku chayqa, tukuy munasqaykichejta mañakuychej, jap’inkichejta,” nispas. (Juan 15:7). Chayta nispas nisharqa: Paypa parlasqanqa ama umallanchejpichu, nitaj simillanchejpichu kanan tiyan, manachayqa sonqonchejpipis kanan tiyan.

Chay jina kayqa, noqallanchejmantaqa mana atina jinachu, mana Diospa yanapayninwanqa mana sut’ita entiendena jinallachu kashan. Diospa Simi Nisqanqa sonqonchejpi kashan, kawsayninchej rikukunampaj, imaynatachus mikhuna cuerponchejpaj kashan ajinallataj. Sapa p’unchay Bibliata ñawirikusun chayqa, Cristopi kayninchejqa wiñanqa.

Sichus Diospa Simi Nisqan umanchejpi chanta sonqonchejpitaj kashan chayqa, kawsayninchej Jesucristoman k’askasqa kanqa. Ajinamanta sapa p’unchay astawan astawan rejsisun Señorninchej Jesucristotaqa, Paypi atienekuytataj yachakusunchej.

Dios Tatayku, yanapaway palabraykita ñawiriyta sapa p’unchay. Ama saqewaychu imapis chayta alqachinawantaqa. Salvawajniy Jususpa sutimpipuni chayta mañakuyki. Amén.

Noviembre 25

“Noqaqa Leynejta leypaj wañusqa kani, Diosllapajña kawsanaypaj. Cristowan khuska chakatasqa karqani manañataj noqachu kawsani, manachayqa Cristo kawsashan noqapi. Kunantaj aycha cuerpoypi kawsashaspapis, Diospa Churimpi creesqayraykulla kawsashani. Paymin munakuwarqa, noqaraykutaj wañuchisqa kanampaj jaywaykukorqa.”
(Gálatas 2:19-20)

Uyariy allinta Apostolpa nisqanta. Payqa nin: “Leynejta leypaj wañusqa kani ... Kunantaj aycha cuerpoypi kawsashaspapis, Diospa Churimpi creesqayraykulla kawsashani. Paymin munakuwarqa,” nispa nin.

Juchasniykimanta mancharisqa kashanki, mana kacharichikuyta atispataj kashanki chayqa, munakusoj Jesucristo qayllaykipi kashan yanapasuyta munaspa, Paymanta perdonta mañakuy, ajinamanta sonqo tiyaykuypi kusisqataj kawsakunaykipaj.

Sichus qan mana munashankichu Cristoman chimpakuyta, nitaj atienikuytapis munankichu chayqa, llakiy ñampi purishanki, manaraj Cristoj kacharichisqanchu kanki. Imaraykuchus, ichus qampaj kallpallaykipi atienikushanki, yuyayniykipis qanllamanta ruwasqasnillayki jatumpaj qhawasqa kahan. Ajina kajtinga juchaj watasqallanraj kashanki. Diospaj t’aqasqa jina santo kawsaypi kayta munanki chayqa, juchasapa kasqaykita reparakuy, Jesucristomantataj perdonta mañakuy, kacharichisonqa tukuy juchamanta, munakuynimpitaj kawsakunki.

Yuyarina apóstol Pabloj nisqanta. Payqa nerqa: “Chay Leynejtataj jucha wañuchiwarqa,” nispa. (Romanos 7:11). Arí, chayqa niyta munan, ñawpajtaqa leypa nisqannejta llakichisqa nanachisqataj karqanchej, Ley ch’ataykuwasqanchejrayku, juchapi wañusqas rikhurerqanchej. Jesucristorí chay tukuy leypa kamachisqanta junt’arqa, chayraykutaj Paylla sonqo tiyaykuyta qowanchej. Manaña noqallanchejmanta allin imasta ruwasqasninchejpichu atienikunchej. Leypa mañasqantaqa Jesucristolla kasuspa junt’arqa; chayrayrayku Dioswan allimpi kananchejpajqa, Jesucristo Salvadorninchej perdonninta jap’ikuspalla sonqo tiyaykuyta tarinchej.

Waj, juchamanta kacharichej Ley chayamorqa, chayqa Jesucristopi creesqanchejraykulla junt’akun. Biblia nin: “Señor Jesucristopi creey, qantaj salvasqa kanki,” nispa. (Hechos 16:31). Chayraykutaj Pabloqa nillarqataj: “Manañataj noqachu kawsani, manachayqa Cristo kawsashan noqaki,” nispa. (Galatas 2:20). Ajinallataj qampajpis Cristopi kawsayniykiqa kachun.

Señorniyku, michejniykuta waqaychay pantasqa yachachejkunamanta. Amapuni ch’awkiyachikuchunchu. Espíritu Santoyki paypi sinch’i kachun. Jesucristoj sutimpi. Amén.

“... Mana noqawanqa, mana imatapis ruwayta atinkichejchu.” (Juan 15:5)

Qallariypi, Dios Tataj palabranqa ima parlaypichus qhelqasqa karqa, chaypeqa jatunmanta parlarispapuni nisqa, kay jinata: “Noqamanta t’aqasqa kaspaqa, ni imatapuni ruwayta atinkichejchu,” nispá.

Kay nisqastaqa ama qonqanachu. Jesusqa, uva sach’amanta ramasinmantawan parlashaspa, nerqa: “Noqapi kaj rama, sichus mana poqon chayqa, Dios Tata k’utonqa,” nispá. (Juan 15:2). Chay rama k’utusqa kaspaqa mana poqonqañachu, ninaman enqhanallapajña kanqa. Kikillantaj noqanchejwampis kayta atin, manachus Jesucristowan ujchasqa kanchej chayqa. Apostol Pabloqa nin: “Kunanqa pitaj Pablori? Pitaj Apolosri? Noqayku Diospa kamachisnillan kayku, qankunataj noqaykunejta creerqankichej; chaytataj sapa ujniyku ruwayku Señor ruwanata qowasqaykuman jina,” nispá. (1 Corintios 3:5). Chaywanqa nisharqa, noqaykupis Jesucristopi ujchasqa kaspa kay imata ruwayku, nispá.

Chaypajqa Dios qowanchej Jesucristopi mosoj “atiyta”. Filipenses 2:13 nin: “Diosqa qankunaman churan munanaykichejta, ruwanaykichejtataj Paypa k’acha munayninrayku,” nispá. Cristopi kaspa poqoyninchejqa kashan Cristoj atiyinillampi. Jinallataj Jesucristo noqanchejpi kajtingqa, perdonasqapuni kanchej, juchapis manaña munayninta ruwawasunchu. Cristopi kanchej chayqa, Leypa kanmachisqantapis manaña manchachikusunchu. Romanos 5:13 nin: “Maypichus Ley mana kanchu, chaypi runaqa mana juchachasqachu,” nispá nin.

Chayrayku, Señorninchej Jesucristotaqa ashkhata munakunchej, ni imapis kanchu astawan munakunapaj jinaqa. Ajina kajtingqa, Cristollapajña kawsakusunchej. Imatachus Pay munan ruwananchejta imaynachus kananchejtapis, kusiyan atisun ruwayta.

¡Ay Diosniyki! Qanqa ruwawajniyku, Juezniykutaj kanki. Imachus ruwanay kashan chaytaqa junt’ayta yanapaway. Mana allin imas chayamuwajtimpis amapuni iskayrayajta saqewaychu. Chayta mañakuyki Salvawajniy Jesuspa sutimpi. Amén.

Noviembre 27

“Diosqa may sumaj atiyininwan tukuy imasta qowanchej cheqan kajman jina kawsananchejpaj, Payta sumajta rejsisqanchejrayku. Payqa wajyawarqanchej jatun kayninwan, atiyininwantaj.” (2 Pedro 1:3)

Apóstol Pedroqa, sumajta parlaykun riparachispa, imaymanamanta achakesta churaspa mana kasukoyta munajkunaman, kallpachasqa kanankupaj.

Ima allin imaschus kawsayninchejman jamuwanchej, chaykunaqa Dios munakuynimpi qowasqanchejraykulla kashan; Apostolqa nishawanchej, Diosqa uj k’ata Churin Jesucristonejta, chay tukuy imataqa qowasqanchejta.

Qanqa, ichus Diospa Simi Nisqanta uyarejkunamanta ujnin kashanki, imachus Diospa munaynin kasqantapis yachankiña. Chaywampis ichus mana kasuyta atishankichu, nitaj Paymanta yachasqaykitapis parlariyta atishankichu. Ujta nisqayki, ichapis qonqashanki, Diospa nisqanqa, nin: “Yachankichej jina, Diosqa preciowan kacharichisorqachej chay qhasi manakaj kawsaymanta, mayqentachus tatasninykichejmanta jap’erqankichej, chaymanta. Chay precioqa mana tukukoj imaschu karqa; mana qorichu, nitaj qolqechu karqa. Astawanqa, Cristoj qhapaj yawarninwan kacharichisqa kankichej, mana ch’ichiyoj, mana iman imanasqa corderoj yawarninwan jina,” nispa. (1 Pedro 1:18-19).

Chay tukuytaqa Cristo noqanchejpaj ruwarqa, “kunan kawsajkuna amaña paykunapajchu kawsanankupaj, astawanqa kawsanankupaj, jaqay pichus wañorqa, kawsarimporqataj paykunarayku, chaypaj.” (2 Corintios 5:15). Chaywampis ichus qanqa munashankiraj supaywantaj Dioswantaj puriyta, ajina kajtinqa mana allinchu, manataj iskayninwan kawsayta atikunqachu.

Ajinata kawsaspachu Janaj Pachaman yaykuyta munashanki? Chay Ñawpa kawsayniykiipi sajra imasta ruwayta yachaj kanki, chaytaqa manataj munankichu saqeyta chayqa, wiñaypaj wañuyman apasunkiman. Chaymanta parlashan Apostol Pedroqa.

Munasqa Dios Tatayku, yanapaway munayniykiman jina kawsakuyta, noqapis ujkunata yanapayta atinaypaj. Tukuy wawasniykimantaj qowayku sonqo tiyaykusqa kayta, Qan jatunchasqa kanaykipaj. Jesucristoj sutimpi. Amén.

“Chay imasnejta Dios qowarqanchej jatuchaj may jina valorniyoj qosaj nisqasninta. Ajinamanta qankunaqa, imaynachus Dios kasqanwan ujchasqa kankichej. Jinallataj chay nisqasninnejta ayqeyta atinkichej kay pachaj millay imaswan ch’ichichasqa kanamanta, mayqenkunachus sajra munayniykichejmanta jamun, chaymanta.” (2 Pedro 1:4)

iDiospa chay nisqasninmá k’achaqa! Pay qowanchej chay k’acha willaykunataqa, noqanchejtaj chay k’acha willaykunata apaykachajkuna kanchej, tukuyman willaranapaj.

Tukuy kaj chhika rikusqanchejta, mana ñawi rukusqanta ruwaj Tukuy Atiyniyoj Diosqa, qallariypi ruwasqan runatapis, Payman rijch’akojta ruwarqa. Chay ruwasqan runa chay jina llakiy juchaman urmashajtimpis, “mana saqerparispa jatuchaj imasta qonanta nerqa”, chay urmasqa runasmanqa.

Imastachus qonanta nisqanmanta ujnin kashan: Noqanchej herenciata Paymanta jap’inanchejta Jesucristowan khuska wiñay Janaj Pachapi kawsakunanchejpaj.

Chayta cheqamantapuni creenchej chayqa, chay tukuy imasqa kawsayninchejpi kashan. Chay sumaj imasta qowasqanchejmanta ujnin kaj kashan, “imaynachus Dios, ajinallataj wiñay kawsayniyoy kasqanchejpi.” Mana entiendeyta atisqanchejtapis Pay sut’inchawanchej, chay tukuy ima sut’ita rikukun Dios noqanchejpi kawsakojtin.

Qallariypi runaqa ruwasqa karqa Ruwajninman rijch’ayniyoy, ajina kaynenqa uj p’unchay jucha yaykusqanrayku paymanta chinkaporqa. Diosqa munakuynimpi uj k’ata Churin Jesucristota kay pachaman kachamorqa, runa jina jamorqa noqanchejrayku wañunampaj, ajinamanta runamanqa chay qallariypi chinkachisqanta kutichiporqa, Espíritu Santotataj sonqonchejman yaykorqa tiyakunampaj

Chay chhika bendicionesta qonawanchej Diosqa, chaytataj jap’ikunchej creesqanchejraykulla; juchasapas ni imapaj allin kashajtinchejpis, payman rijch’ako kayninchejtaqa kutichipuwanchej. Kunataj Jesucristoman rijch’akojta ruwawanchej. ¡Chaymá jatun kusiyqa!

Señorníyku, yanapaway ari, ama kay pacha sajra imasta moq’espa kawsanaypaj. Iglesiaykipi ima ruwanatachus qowanki, chayta sumajta ruwanaypaj. Jesucristoj sutimpi. Amén.

Noviembre 29

“Chayrayku qankunaqa atisqaykichejta kallpakuychej creesqaykichejman yapanaykichejpaj k’acha kawsayta, k’acha kawsaymantaj yachayta.” (2 Pedro 1:5)

Diosqa niwanchej qonawanchejta jatuchaj k’acha imasta. Kay pachapi runakunari may chhika kanku Diosmanta mana dakojkunaqa, chay jina k’acha kashajtimpis. Kallankutaj may chhika creyentes, kawsakunku Diosman mana graciasta qospa, kikillantaj paykunaqa, mana dakunkuchu creesqankuman k’achapi kawsakuytaqa.

Diosqa qowanchej allin imasta kay pachapi k’achapi kawsakunanchejpajqa. Payqa munan wawasnin jina kawsananchejta, chayrayku allin imasta qowanchej; ajinamanta imaynachus Dios munakuyniyoj, ajinallataj noqanchejpis kananchejpaj, imaraykuchus paywan khuska Janaj Pachapi wiñaypaj kawsananchej kashan.

Apóstol Pedroqa yuyarichiwanchej, chay creesqanchejqa, mana creyente kani nispallachu kawsakunanchejta. Manachayqa, Diospa wawan jinapuni ujkunawan k’achas kananchejta nin.

Dios imatachus qonawanchejta niwasqanchejpi creespa, tukuy sonqo imatachus ruwananchejta ruwanata niwanchej. Chaywampis, mana chayllatachu, manachayqa, Salvawajninchejpi creeninchejman yapanata k’acha kayta, imaynachus Diospis noqanchejwanqa k’achapuni, ajinata.

Ashkha kanku mosoj kawsayta jap’ejkunaqa, ichus paykunamanta wakin mana yachankuchu sapa p’unchay “mawk’a runankuta” wañuchina kanantaqa. Noqanchej kikinchejta waturikuna kachun, ima juchanchejtachus mana saqeyta munashanchejchu, chayta.

Cheqamanta Jesuspi creenchejña chayqa, chay creesqanchej rikukunan tiyan imaynachus mosoj runa kasqanchejpi. Diosta munakuyninchejqa rikukun juchata saquespa Paypa nisqampi kawsakusqanchejpi.

Señorníy, mañakuyku kamachiwajniykuman k’acha sonqoyoj kayta qoy. Jinallataj noqaykumampis qowayku runamasisniykuwan k’achas kayta. Jesucristoj sutimpi. Amén.

“... K’acha kawsaymantaj yachayta.” (2 Pedro 1:5)

Cheqa cristianopeqa mana k’acha kasqallampichu tukukun; chayri, Diosta munakusqallampichu, chayri k’acha imasta ruwasqallampichu tukukun, manachayqa sumajta Dios Tataj nisqasninta yachakuspa, ajinamanta cheqanta ematapis ninampaj, ruwanampaj ima. Ajinata yachakuspaqa, mana imatapis usqhayllata ruwarparinqachu. Manachayqa, Diospa Simi Nisqanman jina imatapis ruwanqa, Espiritu Santoj yanapasqan.

Ajinamanta, Janaj Pachapi kashaj Dios Tatanchejta sirvishaspajqa allinta yuyaychakuspa, tukuy sonqo, Diosta jatunchanapaj ima ruwasun; jinallataj runa masinchejpaj imatapis ruwasun chayqa, allinimpajpuni tukuy imapi yanapaspa.

“K’acha kawsaymantaj yachayta,” nin. Kay yuyaychayqa noqanchejpajqa, ancha jatumpuni kashan.

“K’acha kawsayqa,” tukuy imamanta ñawpajpi Diosta munakuy, manataj pitapis Paymanta astawanqa; imata ruwaspapis Diospa jinapuni ruwana kachun. K’acha kaspapa, puñusqas jina kajkunatapis rijch’arichina, chinkasqa kasqankuta reparachispa. “Yapana yachayniyoj kayta,” nispaqa nishawanchej cheqanta imatapis, allinta unancharispapuní imatapis ruwanapaj, jinallataj mayk’ajchus allin kanampi yuyaspa.

Chay “yachay” noqanchejpi kashan chayqa, reparayta atisun uj hermano mana allimpi kashajtimpis, parlapayanapaj. Ichari? Ichus chay parlapayana kashajtin, chay rato mana walejchu kashanman, phiñasqallaraj kashanman chaypis, mana uyariwasunmanchu; chayraykutaj suyarisun ujchhikanta phiñakuynin pasapunankama. Runa masinchejta yanapanapaj parlayninchejqqa, nanasqa sonqonta thañikunampaj jinapuni kanan tiyan, tukuy munakuywan.

“Sumaj yuyaywan” k’amina hermanos pantajtinkoqa. Munakuywan parlaykuspa pantasqanman jina k’amiykuspa. Siminchejwan parlaykuspaqa sumaj yuyaywampuni parlaykusun, munakuywan sonqo tiyasqa kaywan ima. Mana may jina phiñasqachu parlaykusun, nitaj misk’i simillawan juchachakusqankupi llosq’oykuspachu. Manachayqa, reparachisun juchallikusqan wañuyman apashasqanta, usqayllata Salvador Jesucristoman kutirimunampaj.

“Hermanos, sichus qankunamanta pipis juchaman urman chayqa, qankuna Espirituman jina kawsajkunaqa, llamp’u soqowan allin ñanman kutichiychej,” nispa nin. (Gálatas 6:1).

Dios Tatayku, Yachayniyojta, chanta yuyayniyojta ima ruwaway, Jesucristoj sutimpi. Amén.



Diciembre

“Diosqa chay jinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis Paypi creejqa mana chinkayman renqachu, astawanqa wiñay kawsayniyoj kanqa.” (Juan 3:16).

Diciembre 1

“Yachayman yapaychej aychaj sajra munayninta atipayta...” (2 Pedro 1:6)

Diospa qowasqanchej Feqa, Paypi atienikunanchejpaj kashan, chay creesqanchejraykutaj noqanchejpi rikhurin k'acha kay. K'acha kaytaj noqanchejpi rikhurichin allin imasta ruwanaman. Tukuy chay allin ruwayman churakojtinchejtaj sajra aychanchejqa churanakuwanchej, chay allin ruwayta saqechiyta munaspa; mana atipayta atispataj, sajra aychanchejqa jatunchakuytañataj rikhurichin, jinallataj kay pacha imasta astawan astawan munapayayta yuyayninman churaspa ima.

Sajra tentación jamushawajtinchej, Espíritu Santo reparachiwanchej sajra aychanchejpa munayninta Jesucristoj kallpanwan atipanapajqa, chaytataj sapa p'unchay cruzman chakatanapaj. Chaymin kashan Jesucristonejta sajra munayninchejta atipayqa.

Apóstol Pablopis nin kayjinata: “Hermanos, kayta niyta munaykichej: Pisi tiempollaña kashan. Chayrayku kunanmanta ñawpajmanqa casadosqa manapis casarasqachu kankuman jina kawsakuchunku. Waqajkunapis manapis waqankumanchu jina kachunku; kusikujkunapis manapis kusikunkumanchu jina kachunku; rantikujkunapis mana kapuyniyojpis kankuman jina kallachunkutaj. Kay pachaj imasninwan kosisqa kajkuna manapis kosisqachu kankuman jina kachunku, imaraykychus kay pachaqa askamalla tukukaponqa.” nispá.(1 Corintios 7:29-31).

Dios saqen llakiyta pasanaykita chayqa, ama waqaypi tukukunaykipaj jinachu waqay, imaraykuchus kusiyya chayamusunqapuni. Chayrí, allillan kashanki chaypis, isumajta qhawakuspa kusikuy! Chaywampis yuyayniykipiqa kachun, kay pachapeqa tukuy imapis pasapunqa. Dios ajina kananta munanqa chayqa, ajina kanqa. Paypa makimpi kashanchej, ama t'aqakuychu, imaraykuchus pay waqaychasonqa tukuy sajramanta, jinallataj Pay kallpata qosunqa tukuy llakiymanta llojsinaykipajqa. Chayraykumá allin kashaspaqa ama runaykachaychu, nitaj anchata phutikuspa kharkatiychu.

Cristianoj kawsaynenqa, tinku maqanakupi jina kashanchej. Chay tinkupi atipanapajqa, Jesucristoj yanapanwan, sajra aychanchejpa munayninta sapa p'unchay cruzman chakataspa wañuchisun. Chayta nispaga nishanchej, aychanchejpa munayninta mana kasuna kasqanta. Mosoj runa kasqanchejta yuyarikunapuni kachun.

Chhika munakoj Diosníku, Espíritu Santoykinejta qoway ari Qampa yachayniykita yachanaypaj runa masiyta yanapanaypaj. Jesucristoj sutimpi. Amén.

“... Ñak’ariypi sinch’i sayayta, chaymantaj yapaychej cheqan kajman jina kawsayta.” (2 Pedro 1:6)

Jesuspa salvasqan kajkuna qhapajyanku chayqa, chay tukuy imayoj kayninkupi sumaj yuyayniyoj kachunku, qolqe munapayaywan mana atipachikuspa, nitaj sajra imasman kusiyninta apaspa. Ama yuyayninta churachunchu wisan junt’asqa kanallampeqa, mana chay tukuy imata lantitajina jatunchaspa, nitaj diostajina qhawaspa. Sichus ashkha imasta payman Dios qorqa chayqa, ama jatunchakuyma urmachunchu. Pacienciakuchun Diosmanta imatapis suyaspaqa.

Cristianosqa pacienciawan suyakuyta yachana, mana imatapis usqhay usqhayllata munanachu. Diosqa nin: “... pacienciaykichejwan salvasqa kankichej,” nispa. (Lucas 21:19). Nishallantaj: “Uj tumpitamantawan jamojqa jamonqaña, manataj unayñachu kashan jamunampaj,” nispa. (Hebreos 10:37). Chanta Apoltol Santiagopis, nin: “Kusikuyniyojmin pichus imaymana mana allin kajjamojtin sinch’ita sayajqa, imaraykuchus chay mana allin kajta atipasqanmanta payqa wiñay kawsay pilluta jap’enqa, mayqentachus Dios nerqa qonanta Payta munakojkunaman, chayta,” nispa. (Santiago 1:12).

Yuyarina pikunachus Jesuspi creesqankurayku manchayta ñak’arisqankuta. Paykunaqa Janaj Pachata qhawaripa rikorqanku, ima kusiychus paykunapaj jaqaypi suyashasqanta paykuna wañupojtinkoqa, kay pachapi ñak’arichisqa kashaspapis kusiyninkoqa jatun karqa.

“Noqanchejqa chay chhika testigoswan muyurisqa kashanchej. Chayrayku tukuy imachus llasaykuwanchej, jinallataj tukuy juchata, mayqenchus manaraj imallapi ch’ipaykuwanchej, chaytapis wich’upunachej. Chantá pacienciawan ñanpajllamampuni t’ijunachej, Dios churapuwarqanchej, chay ñanta,” nin. (Hebreos 12:1).

Arí, chay Fe Diospi atienikuy noqanchejpi kasqanrayku rikhurin, uj k’ancha jina.

Dios Tatayku, Chay tukuyta qowasqaykimantaqa, ashkhata agradecikuyki. Jesucristoj sutimpi. Amén.

Diciembre 3

(Qaynamanta parlallasumpuni)

“... Ñak’ariypi sinch’i sayayta, chaymantaj yapaychej cheqan kajman jina kawsayta.” (2 Pedro 1:6)

Jesupsi creesqanchej Fe Paypipuni churasqa chayqa, yuyariyuypuni Dios tukuy imata Qhasilla K’acha Yanapayninwan qosunqa, ama sajra aychaykej jatunchakuynin rikhurimunampaj. Diospa makinman kutin kutinta churakuy, mañakuspa chay imakunatachus Dios nisorqa qosunanta, chaykunata jap’inaykipaj. Jinallataj chay Fe qampi mana chiriyapunampaj, Paymanta jamoj imaspipuni jatun kusiyniyoj noqanchejpajqa.

“Cheqan kajman jina kawsayqa,” songopi rikhurin Jesucristopi creesqanchejraykulla, noqanchejpeqa k’acha poqoy rikhurin. Sichus qanllamanta cheqan kayniykiwan, qampa kallpakusqaykiwan, yachayniykiwan, tariyta munanki chayqa, Cristiano kasqaykeqa qawiya qallarenqa. Jinallapuni kawsayniyki kajtintaj ch’akipunqa, chinkapunankama, jallp’amanta sik’isqa sach’a jina.

Yuyariypuni Jesupa nisqanta: “Mana noqapi kajqa rama jina jawaman wijch’usqa kanqa, ch’akiponqataj.” nispa. (Juan 15:6). Chayqa sut’i kashan. Qanllamanta cheqan kajman jina kawsaywan, Cristoj nisqampi kawsaywanqa, mana kikinchi. Chayrayku Apóstol Pedroqa chayta yuyarichiwanchej: “Ñak’ariypi sinch’ita sayayman yapaychej, cheqan kajman jina kawsayta,” nispa. Mana chay nisqasninman jina kawsasunman chayqa ch’akipusun, wañupusuntaj cristiano kayninchejpeqa. Ichari?

Munankichu “cheqan kajman jina” pacienciayoj, yachayniyoj jinataj kawsayta? Chaytaqa mask’ay Jesucristoj kallpampi poqoyta. Jesucristowan ujllapi kawsakusqaykirayku Dios imastachus qosunanta nisorqa, chaykunaqa qanman jamunqa ashkhamanta poqonaykipaj. Jinallataj yuyariypuni Diospa Churin imastachus qampaj ruwarqa chayta. Ajinamanta kawasayniykeqa Jesucristolla kanqa, mana kanchu waj sonqo tiyaykuyta tarinaykipajqa. Chay kashan tukuy imamanta aswanta yuyana, jatunmanta kusikunaykipajqa.

Señor Jesús. Wañusqaykiwan, kawsarimpusqaykiwantaj perdonta wiñay kawsaytawan qowarqanki. Chay tukuymanta sonqoy ukhumantapacha graciasta qoyki. Salvawajniy Jesucristoj sutimpi. Amén.

“Cheqan kajman jina kawsayman yapaychej hermanospura allinta kawsakuyta...” (2 Pedro 1:7)

Maypachachus pipis salvacionta tarin Cristopi creesqanrayku chayqa, chayllapitaj qallarín sumajta poqoyqa. Chay poqoykunamanta ujnín kashan, “hermanospura allinpi kawsakuy”

Qhawariy allinta: Cristopi kaspá, Dioswan allimpi kanki chayqa: Hermanosniykiwampis allimpipuni kawsakunki. Ajinamnta tukuy rikunqanku Diosta munakojkunaqa, hermanostapis munakusqankupi.

Ashskhata uyarínchej: “Mana tukuy ima lliphejqa qoripunichu,” nejta. Ajinallataj wakinkunaqa tukuyta rikunallanta creyentejina purinku, tukuy sajra imasta moq’esqankutaqa ñit’iykukuspa, pakaypitaj juchallinku. Chaykunaj sonqonqa mana allinchu kashan, mana Jesucristo sonqompi tiyakunrajchu, manataj Diospa wawampunichu. Jawa ruwaynillanku rikukun, sonqon ukhupirí ch’ichi kashan.

Askhas kawsanku paykunallamanta Leypa kamachisqanta ruwayta munaspa, ajinamanta paykunaqa llimphus kasqankuta yuyakunku. Ajinamanta ujkuna creyentes kajkunataqa pisipaj qhawanku, mana paykuna jina kasqankurayku. Apóstol Pedroqa chayta rikuspa, reparachiwanchej: “Cheqan kajman jina kawsayman yapaychej hermanospura allinta kawsakuyta,” nispa.

Jesusqa, nerqa: “Qankunachus munanakunkichej chayqa, tukuy runas yachanqanku yachachisqasniy kasqaykichejta,” nispa. (Juan 13:35). Apóstol Juanqa, nishallampuni: “Sichus hermanosta munakunchej chayqa, yachanchej wañuyamanta kawsayman chimpapusqanchejta. Mana munakojqa wañuyllapiraj kashan, ” nispa. (1 Juan 3:14). “Chay jinamanta yachanchej cheqa kajmanta kasqanchejta, ajinamantataj Diospa ñawpaqempi mana manchachikuspa kayta atínchej,” nispa ima. (1 Juan 3:19).

Señor Jesucristo, kawsayniyta makiykiipi jap’iy amapuni kachariwaychu. Kallpata qoway Qanta jatunchasuspa imatapis ruwanaypaj. Jesucristoj sutimpi. Amén.

Diciembre 5

“... Chaymantaj yapaychej munakuyta.” (2 Pedro 1:7)

Hermanosllata munanakuyqa ujtaj kashan, tukuyta munakuyrí waj jinataj, mana kikin kikinchu. Jesucristopi creejkuna hermanosninchejta munakunchej paykunata astawan yanapaspa, uj Tatayojlla kasqanchejrayku; kawsayninchejpis paykunawanqa uj layalla. Paykunaqa Jesucristoj Iglesiasmanta kanku, noqanchej jina Diosta yupaychajkuna. Chaypeqa tukuyninchej rikunakunchej, yanapanakunchej uj creeniyojlla kasqanchejrayku.

Chaywampis Jesucristoj salvasqan kajkunaqa, mana iglesiankumanta kajkunallatachu munakunku, nitaj paykuna jina kajkunallatachu munakunku; manachayqa tukuy runa masinkutapis munakullankutaj, imaynatachus Cristopis tukuy runakunata munakun, ajinata. Paypa contrampi kajkunatapis munakun, chayraykutaj tukuy runarayku yawarninta jich'arqa.

Chay munakoyqa sonqomantapuni llojsimun, tukuymantaj chayan. Cristota sonqonchejpi jap'ikujtinchejqa, munakuynin noqanchejpi rikhurin, chay munakuy noqanchejmanta llojsimun tukuytaj. Chayraykumá, Jesucristoj salvasqasninga imatapis mana paykunallapajchu munanku, munanku wajkunapis salvasqa kanankuta. Jinallataj kay pachapi pipis imamantapis pisichikun chayqa, atisqankuwan yanapanku runamasinkutaqa.

Jesusqa mana khuskachakorqachu kay pacha millay ruwaykunapeqa, chaywampis tukuy juchasapa runakunataqa munakorqapuni. Juchankuwan sajrayasqa kashajtinkupis Jesusqa sonqo tiyaykuyta qoyta munarqa, imaraykuchus paykunarayku wañorqa salvasqa kanankupaj, wiñay kawsayniyoj kanankupajtaj. Noqanchejpis ajinallatataj kawsananchej tiyan.

Tukuy salvasqa kajkuna Cristoj yachachiwasqanchejtaqa japíkuna kachun, jinallataj apostolkunaj yuyaychasqankuman jinataj munakuytapis yachana. Diospa kamachisqasninga kay nisqampi junt'akun nin, uyariy: “Tukuynin Leyqa kay kamachisqallapi junt'akun: Runa masiykita qan kikiykita jina munakunki,” nispa nin. (Gálatas 5:14). Arí, ajinata munakuyta yachanki chayqa, tukuynin kamachisqasta junt'anki, imaraykuchus Diosqa munakuymín. Sichus kunan munakunki q'ayataj manaña chayqa, manapis ni jayk'aj munakuwajchu karqa ajina kashan. Chayrayku munakuypi kawsakuy, jinataj munakullaypuni runamasiykitaqa.

Munasqa Salvawajniyku, Qan jina munakuyta sonqoykuman churay, noqaykupis munakuyta atinaykupaj. Jesuspa sutimpi mañakuyku. Amén.

Diciembre 6

“Chayrayku hermanos may k’uchi kaychej, wajyasqas ajllasqastaj kasqaykichejpi sumajta sayanaykichejpaj. Sichus chay imasta ruwankichej chayqa, mana jayk’ajpis urmankichejchu.” (2 Pedro 1:10)

Jesucristopi creesqanchejrayku salvasqa kanchej; chaypitaj yachanchej Jesucristonejta wiñay kawsaypaj ajllasqa kasqanchejta. Jesucristoj ruwasqasnimpipi atienikusqanchejrayku Diospa ayllunmanta kanchej. Ajinamantataj Janaj Pachapi noqanchejpaj wasinchejqqa wakichisqa kashan, chay llajtayoj kanchej, mana kay pachamantachu kanchej.

Tukuy allin imas moqanchejman jamun, mana noqallanchejmanta “buenas obras” nisqata ruwasqanchejraykuchu, nillataj k’acha kawsayniyoj kasqanchejraykuchu, chay tukuy k’acha imasqa Diosmanta jamun, Jesucristoj ruwasqampi atienikusqanchejraykulla. Chaytaj sinch’ichan kallpatataj qowanchej tukuy ima k’acha imasta ruwanapajpis, chay kallpawan imatapis ruwaj churakunchej Jesucristoj Iglesiampeqa.

Maypachachus kawsayninchejta qhawarikunchej chayqa, mana ni ima allinta ruawananchejpaj kallpanchej kanchu; chayraykutaj Diospa kallpan munakuynimpuni tanqawanchej allin imasta ruwananchejpajqa. Jinallataj ujkunata yanapanapajpis kallpaqa Diosmantapuni jamun. Chayta reparachiwanchej Dioslla ruwasqanta salvasqa kananchejpajqa, mana noqanchejchu.

Ni imamanta dakoq qhella creyenterí, atin urmachiyta cristianomasintaqa. Ajinata ruwajtintaj, imaymana uma nanaykuna kawsaynimpipi rikhurin, jinallataj paymanqa llakiykunata apamun. Ajinata rikuspaqa, allinta qhawarikuy mana urmanaykipaj.

Pichus Jesucristoj yanapayninman kawsayninkuta churan, allin imasta ruwanankupaj chayqa, sonqompis yuyaynimpis sinch’ichakun kallpachakun, mana facilta iskayrayanchu. Apostol Juan kay jinata nin: “Wawitasníy, ama simillawanchu munakusun, astawanqa ruwasqasninchejwan rikuchinanchej munakusqanchejta,” nispá. (1 Juan 3:18).

Munasqa Diosniyku, ima ruwanaychus kashan chayta munani junt’ayta noqaj aylluy ukhupi. Chayta ruwayta yanapaway ari, kallpata qoway sutiyki jatunchasqa kanampaj. Jesucristoj sutimpi. Amén.

Diciembre 7

“... Janaj Pachapi kashaj Tatayku.” (Mateo 6:9)

Ni mayqen Cristianopis, niyta atinchu noqajllata: “Diosniy Tatay” nispaqa; uj juch’uy wawajtaqa tiyan wawqesnin, Diosqa tukuy pata Tatanchej.

Diosta, “Tatáy” ninki chayqa, mana allinchu uyarikun. May jina k’achitupuni uyarikun: “Dios tatayku” nispa nijtinchejq. Jinallataj may jina allimpuni kashan “sutiyki jatunchasqa kachun, reinonki jamuchun,” nispa nisqanchejq. Tukuy cristianospa mañakuyninku ukhupi, noqanchej mana kashasunmanchu chayqa, mana Diospa wawanchu kasunman. Ichayri? Phutiy kanman, mana Jesucristoj salvasqan ukhupi kasunman chayqa.

Chay mañakuypa qallariynimpi imatachus nishan, chayllatapis simiykiwan parlariwaj chayqa, Diospa khuyakuynin, tukuy wawasninwan khuska qampi kashan; ajinamanta cheqapipuni creesqayki rikukunqa. Ajina kajtenqa, Dios Tataykiman tukuy atienikuyniykiwan chimpankuy, imaraykuchus Diosqa Janaj Pachapi Tatayki kasqanrayku. Cheqa kaj mañakuyqa mana kutin kutinta chayllatapuni kutikipaychu kashan. Diosmanta mañakushaspaqa Paywan parlarikuna, imaynatachus qanwan noqawan parlakunchej, ajinata. Orakuspaqa Diospa makisninman churakuna, kawsayninchejtataj Payman jaywapuna.

Dioswan allimpi kananchejpajqa, imakunapis mana allinman tukuchiya munashan chayqa, oraciompi osqayllata Diosmanta yanapanta mask’ana tiyan. Ajinamanta Jesucristopi creeninchejta astawan yapamuwansun, Dioswan allimpi kananchejpaj, chay mana allinkunatapis Jeaucristoj kallpan noqanchejpi atipanqa.

Diospa munakuyninqa mana chinkapuyniyojchu kashan, Diosqa chay jinatapuni munakuwanchej. Chayraykutaj atienekunanchejpuni tiyan, uj ayllupeqa: Tatakuna, mamakuna, wawakuna imaqa, Iglesiapeqa uj Tatayojlla kanchej, tukuyninchejtaj ima sajratapis atipanapajqa ujlla kallpa kanchej.

Munasqa Dios Tatayku, wasiypi aylluyta Qan qowanki, munasqaykiman jina kawsakuyta yanapawayku. Jesucristoj sutimpi mañakuyki. Amén.

“Sutiyki jatunchasqa kachun.” (Mateo 6:9)

Kay “Janaj Pachapi kashaj Tatayku,” nisqa mañakuypi, chay ñawpaj kaj mañakuy imaniytachus munan, chayta Lutero sut’inchan, kay jinata nispá: “Diospa sutenqa cheqamantapuni Pay kikinmanta Llimphu, Santo. Chaywampis kay mañakuypi cheqamanta ninchej Diospa sutinga, ajinapuni Llimphu, Santotaj kasqanta. noqanchej ukhupi ajina kachun, pimampis Bibliamanta yachachishajtincheyqa. Jinallataj noqanchejpis chayman jina kawsakunachej llimphu kawsaypi, Diospa t’aqasqa santos. Pichus kaymanta yachachej imaynapis kachunta kawsakun chayqa, manataj Diospa Simi Nisqanman jinachu kawsakun chayqa, Diospa sutinta ch’ichichashan. ¡Chaytaqa noqayku ukhupi ama saqeychu Tatáy!”, nispá.

“Diospa sutenqa” Pay kikinmanta Dios kasqan. Pay kikitaj sut’inchawanchej pichus Pay kasqanta, imaynachus kasqanta, imatachus ruwasqantantapis.

“Jesús” sutitarí qonqayta atisunmanchu, Dios Tata uj k’ata Churinman chay sutita churasqanta? Ni jayk’aj qonqasunmanchu. Chay suteqa niyta munan “Salvaj”, kasqanta. Chay sutipi kashan chay allin willaykuna Evangelioqa; chaytaj tukuy runakunaman rikuchisqa kashan, tukuy uyarejkuna salvasqa kayta atinankupaj.

Chay sutipi unanchanchej chayqa, Pay kikin noqanchejman jamun rejsichikunawanchejpaj; may jina jatunchus, may jina llimphu santotajchus kasqanta rejsichikoj jamun. Jinallataj, may jina khuyakuyniyochus, may jina k’achatajchus Pay kasqanta rejsichikoj jamun kay pachamanqa.

Dios, may jina “santo” kasqanta tukuyman yachayta qona, Señorninchej Jesucristota rejsichispa. Chay willaytataj mana q’ewispa, nitaj chharpuyachispa; nillataj ima cuentosta jinalla Paymanta yachachispa; manataj runaj umanta muyuchispa karunchachinapajchu.

Munasqa Dios Tatayku, graciasta qoyki ruwanata qowasqaykimanta, ichapis mana chaykama jatucheychu, nitaj tukuyta moq’enanchu kashan. Chaywampis kallpata qoway allinta ruwanaypaj munasqaykiman jinapuni. Jesucristoj sutimpi. Amén.

Diciembre 9

“Reinoyki jamuchun...” (Mateo 6:10)

Diospa Reinonqa, Janaj Pacha Reino, chaytaj kay pachaman urayk’amun Jesucristonejta, maypichus Pay kunitan reinashan, Qhasilla k’acha Yanapayninwan.

Manaraj Cristo kay pachaman jamushajtenqa, runakunaj kawsaynenqa mancharinapaj jina karqa, millaytaj phutiytaj.

Tukuy naciones tuta laqahapi jina, imaymana lantista ruwakuspa yupaychasharqanku, mana Evangeliota rejsispa. Diospa Churin jamusqanwantaj Diospa Reinonqa kay pachapi qallarikurqa, tukuyman yachayta qospa: “Tiempo junt’akapunña, Diospa reinontaj qayllapiña kashan. Juchasniykichejta saqerpayaspa, Diosman kutirikuychej, evangeliopitaj creeychej,” nispa nerqa Jesúsqa. (Marcos 1:15).

Diosmanta ima kajpis kay pachapeqa, uma muyuy jina sajra kawsay tukuynejpi kasharqa. Ajinallapi, Jesús chayamuspa Evageliota willayta qallarerga, kay jinata nispa: “Cheqatapuni cosechaqa ashkha, oqharejkunataj rí pisi kanku. Mañakuychej ari cosechaj dueñon Señormanta, astawan oqharejkunata consechanman kachamunampaj,” nispa. (Mateo 9:37-38). “Reinoyki jamuchun,” nispaqa, chayta mañakushanchej.

Ajinamanta suyashanchej jatun k’anchaynimpi Diosqa reinananta. Arí, ujkama mañakunchej reinun tukuyman chayamunanta. Señorninchej Jesucristoqa yachachisqasninman, nerqa: “Chayrayku qoykichej uj reinota, imaynatachus Tatay qowarqa, ajinata reinoypi noqawan mikhunaykichejpaj, ujanaykichejpaj ima. Ajinallatataj kamachina tiyanaspi tiyaykunkichej,” nispa. (Lucas 22:29).

Kay pachapi Diospa wawasnenqa forasteros kanchej. Chayraykutaj noqanchejqqa yuyananchej tiyan Cheqa kaj llajtanchejpi, chayqa kashan Janaj Pacha reino. Chayrayku Salvawajninchejqqa yachachiwanchej ajinata mañakuyninchejta, “Reinoyki jamuchun,” nispaqa. Chayta nispaqa mañakushanchej ujkuma tukuy salvasqa kanankuta.

Dios Tatayku, mañakusqaykuta qowayku ari. Chaykamataj waqaychawayku juchaman mana urmanaykupaj, Jesuspa sutimpi. Amén.

“... Munayniyki ruwasqa kachun, imaynachus Janaj Pachapi, ajinallatataj kay pachapipis.” (Mateo 6:10)

Uj rey kamachinampajqa paypa nisqan ruwasqa kanan tiyan. Ajinallataj Diospa Reinon noqanchejman chayamunampajqa, Paypa munaynin ruwasqa kanan tiyan.

Janaj Pachapi Diospa reinonqa, junt’akushan ni imaj alqachisqan. Salmospi angelkunamanta parlaspa, nin: “Tata Diosta yupaychaychej, tukuyniykichej Paypa soldadosnin, munayninta ruwaspa Payta sirvejkuna,” nispá. (Salmos 103:21). Kay pachapirí, Diospa Churin Jesucristoqa waqarqa llakiymanta, Paypata kajkuna Diospa munayninta mana ruwayta munasqankurayku, kay jinata nispá: “Mashka kutitachus wawasniykita tantayta munarqani, imaynatachus wallpa chillwisninta lijrasnin uraman tantaykun, ajinata, qantajrí mana munarqankichu,” nispá. (Mateo 23:37).

Chayrayku noqanchej Diospa wawasnin jinaqa, mañakunanchej tiyan khuyakuyninneja noqanchejpi munaynin ruwasqa kananta, noqanchejnejtataj wajkunapis salvasqa kanankupaj. Chay anagelkuna jina Diosta sirvispa, kay pachapi Evangelioj allin willaykunasninta tukuyman willaspa.

Diosqa, Rey, tukuy ruwasqan patapi. Chayrayku Payqa, munan kamachiya sonqonchejta yuyayninchejta ima. Ajinamanta Paypa munasqanman jina noqanchejman cheqan ñanta rikuchiwanchej. chayrayku, mana qonqaspa oraciompi mañakunanchej tiyan, munayninta ruwayta atinanchejpaj maychus ruwanata jina.

Mañakunachej Dios ñawisninchejta kicharinanta yuyayninchejmantaj k’anchaykuspa, ajinamanta rikunanchejpaj mayqenchus kashan Paypa munaynin, chayta. Mañakunachej sonqo tiyaykuyta kusiya ima qonawanchejta, ajinamanta Dios sonqonchejpi kamachinampaj Cristoj sonqo tiyaykuyninwan. Ajinallamantamin kay pacha kawsayninchejpeqa atisun junt’ayta kamachiwasqanchejtaqa. Paymanta mañakushaspataj mana qonqaspataj, nisun: “Munayniyki ruwasqa kachun,” nispá.

Munasqa Dios Tatayku, graciasta qoyki ruwanata qowasqaykimanta, ichapis mana chaykama jatuchajchu nitaj tukuytaj moq’enan jinachu kashan. Chaywampis ruwayta munanipuni. Yanapaway ari. Jesucristoj sutimpi. Amén.

Diciembre 11

“Sapa p’unchay t’antaykuta, kunan qowayku.” (Mateo 6:11)

Ashkhas llakisqa kashanku pisichikuypi tarikuspa. Munakoj Diosrí munampuni mikhuna kanantapuni kawsananchejpajqa. Chayraykutaj, Payqa niwanchej ama chaymanta yanqhallata llakikuywan atipachikunataqa.

Señorqa munampuni mikhunata noqanchejman qoytaqa. Chayraykutaj, Paypuni niwanchej ajinata mañakunanchejtaqa. Paypi atienekusun chayqa, mana ni imapi pisichiwasunchu. Señorninchej Jesucristo, sumajta yachan imawanchus sapa p’unchay kawsananchejtaqa; chayraykumá ajinata mañakunanchejta munan. “Sapa p’unchay t’antaykuta kunan qowayku,” nispaga.

Paymanta imatapis mañakojtinchej manataj qowasunmanchu, chaywanqa ichus niwashawasuman: Kunaqa manaraj qoykimanchu, suyarikuy uj chhikanta nispa chayqa, suyarikuna kachun pacienciawan. Ichus wakinqa ajinapi tarikuspa yuyanku Diosqa nichá uj parlayniyojllachu kanman nispa. Pichus ajinata yuyan chayqa, pantasqa kashan.

Bibliaga, mana mayqen runaj wakichisqallanchu. Bibliaga Diospa Simi Nisqan, chaypi tukuy qhelqasqa kajqa junt’akorqapuni, jinallataj junt’akonqapunitaj kunampis. Ni imarayku iskayrayasunmanchu Bibliapi Dios imatachus qosqaykichej niwasqanchejmantaqa. Dios nin chayqa, chay nisqanqa junt’akonqapuni.

Noqanchej runa jinaqa, imatapis usqhayllata munajkuna kanchej; uj chhikanta mana suyarikuyta atejkuna kaspataj, ni imanakuyta atinchejchu. Diosqa chay jina kayninchejmanta, kay pacha imasmanta wañurisqa kayninchejmanta ima, noqanchejmanta chinkachiya munan, Payllapi atienikuspa kawsananchejtataj munan.

Noqanchejqa, Jesucristopi kallpakunanchej tiyan Janaj Pacha imaspi yuyayta, imaraykuchus Janaj Pacha imasqa, wiñaypaj. Diosqa, kay pacha imasmantaqa kacharichiya munawanchej, uj k’ata Churinnejtataj perdonayta munawanchej, ajinamanta Paywan wiñaypaj kawsakunapaj.

Munasqa Diosniyku, bendeciwayku chajraykuta sumajta poqochipuwayku. Chaypajtaj parachimpuwaykupuni. Churiyki Jesusta munakusqaykirayku. Amén.

“Juchasniykuta pampachapawayku, imaynatachus noqaykupis contraykupi juchallikojkunata perdonapuyku, ajinata.” (Mateo 6:12)

Kunankamaqa, kinsa imastaña mañakuyninchejpi yachakunchej: “Sutiyki ... reinoyki ... munayniyki,” nispa. Chaykunataj parlashan Diosmanta, Diospajtaj. Tawa kaj mañakuypitaj kunanqa, mañakusun: “noqanchejpaj mañakuyta”. Chay nisqanchejpeqa, noqanchejpaj Diosmanqa parlaykushanchej, imatachus necesitanchej, kachun “espiritual kajkunata,” chayri “material” kajkunatapis.

Diospa ñawpaqempeqa manu kanchej, chay manunchejtaj juchanchej kashan. May chhika kuti Diosman manu rikhurinchej. Chayrayku chay manuta Dios pagapuwanchej Jesucristo Churinneja; chayrayku tukuy imamantapis Diospa perdonninga aswan jatun kashan. Mana perdonasqa kasunman chayqa, mana sonqo tiyaykuy noqanchejpaj kanmanchu, nitaj kusiy, nitaj “gracias” niytapis atisunmanchu.

“Juchasniykuta pampachapawayku” (perdonawayku) nispaqa, juchallisqanchejrayku mosoj sonqonchejpa nanasqa ayqoynin kashan; ajinata llakikuywan umphunchej, Diosninchej perdonanawanchejta munaspa. Runapi yawar mana tukuy cuerpoman chayan chayqa, chay runaqa wañupunman. Ajinallataj creyente runapi Diosninwan mana allimpi kaspaqa wañupunman manachus perdonasqa kanman chayqa. Diospa Espiritumpis ripunman noqanchejmantaqa.

Kay mañakuypi ninchej: “Juchasniykuta pampachapawayku,” nispa. Chaypaj qhepitampitaj, nillanchejtaj: “Imaynatachus noqaykupis contraykupi juchallikojkunata perdonapuyku, ajinata,” nispa. Icharí? Sichus chayta mana entiendeshanchejchu chayqa, Jesusta uyarisun. Pay kay jinata nin: “Sichus contraykichejta juchallikujkunata perdonankichej chayrí, ajinallataj janaj pachapi kashaj Tataykichejpis juchasniykichejta pampachanqa,” nispa. (Mateo 6:14).

Diosqa perdonawasun, sichus noqanchejpis runamasinchejta perdonallasuntaj chayqa. Chayrayku Diospa niwasqanchejtaqa jap’ikunanchej tiyan. Ajinata ruwasun chayqa, atisun niyta: “Imaynatachus noqaykupis contraykupi juchallikujkunata perdonapuyku, ajinata,” nispa.

Señorniyku, runa masiykuwan allimpi kawsakuyta yanapawayku. Paykunata tukuy sonqo perdonayta yachachiwayku. Jesucristoj sutimpi. Amén.

Diciembre 13

“... Jark’awayku sajramanta...” (Mateo 6:13)

Dioswan allimpi kawsakuyninchejwan churanakoyqa, jucha kashan. Chaymanta noqanchejqa perdonta mañakunachej tiyan. Diostaj, perdonawasun “Ilimphuchawanchej munakuynintataj noqanchejman churanqa.” Diospa Churin Jesucristo yawarninta jich’asqanraykulla, noqanchejqa juchamanta kacharichisqa kanchej.

Kay pacha kawsayninchejpeqa supayñataj juchaman tanqashawanchej, sapa kuti urmachiyta munaspa; chay sajra supayqa, mana sayk’uyta Diosmanta karunchachiyta munashan. Ajinamanta sapa p’unchay maqanaku tinkupi jina kashanchej.

Judas jinachus juchawan atipachikusun chayqa, Jesuspi creesqanchej Feqa noqanchejpi chinkaponqa. Mana supaypaj trampampi urmanapajqa qhaparikuna Dios kallpata qonawanchejpaj, kay jinata nispa: “Amataj saqeychu juchaman urmanaykuta,” nispa. (Mateo 6:13)

Dioswan kuisqa kawsakunapajqa, juchasninchejmanta perdonasqa kananchej tiyan.

Yachanchej jina, Dios juchanchejmanta perdonanawanchejpajqa, munasqa Churin Jesusta jaywarqa noqanchejrayku ñak’arispawañunampaj. Paytaj ni tumpata ch’urkirakuspa, may jina nanayta muchorqa noqanchejta munakuwasqanchejrayku. Sichus Jesucristoj munakuynin noqanchejpi kashan chayqa, mana munasunchu ni jayk’aj juchallapipuni kawsaytaqa.

Chayrayku, supay juchaman tanqashawasqanchejta reparakuytawankama, Jesucristo Salvadorninchejman usqayllata rina, yanapata mañakuj: “Juchaman urmajta ama saqewaychu,” nispa.

Diospa Simi Nisqanqa, kay jinata nishan: “Diosniy, allinta sonqoyta qhawaykuy; rejsiy sonqoyta, tukuy yuyasqaytataj allinta yachaway. Qhaway, sajra ñantachus purishani manachus, chayta, chanta wiñay ñanta pusaway,” nispa. (Salmos 139:23-24).

Jesucristopi creej runapi chay cheqa kaj atienikuy Fe kashan chayqa, Diosmanta perdonta mañakujtin, jinallataj runa masinmantapis perdonta mañakun chayqa, kawsaynimpi tarin sonqo tiyaykuyta kusiya ima.

Janaj Pachapi kashaj munasqa Tatáyku, yanapawayku runa masiykumanta perdonta mañakuyta, ajinamanta kusiyan yupaychasunaypaj. Jesucristoj sutimpi. Amén.

“Amataj saqeychu juchaman urmanaykuta...” (Mateo 6:13)

“Ama saqeychu juchaman urmanaykuta,” nisqanqa, ñawpaj mañakuyninchejpi nerqanchej: “Jark’awayku sajramanta,” nispa. Chay nisqanwan kunan mañakuyninchejwanqa sumaj t’inkisqa kashan.

Tukuy sajra imasqa supaypi qallarikun, imaynatachus allin kajpis Diospi qallarikun, ajinata. Jark’awayku sajramanta nispa mañakusqanchejqqa, mañakushanchej waqaychanawanchejta sajra supaypa atiyinmanta, ama sajra kaj imasman qhatatanawanchejpaj.

Cheqan kawsayniyoj runaqa, chayqa atienikuy Fe paypi kasqanrayku chay cheqan kawsayninqa, mana pay kikimpi atienikusqanraykuchu. Ajinapis sajra supayqa munanqa tanqaykuyta jatunchakuyman, chanta sajra imasmampis. Ajinapi rikhurispaqa, Diosllaman qhaparikuna Jesucristo Churinnejta yanapanawanchejpaj.

Jamoj p’unchaykunapi supay juchaman tanqasunanmanta ama manchachikuychu, tukuy sonqo atienikuy “Dios Tatayku” nisqata mañakuypi. Ajinamanta Dios Tatanchejman risun, Paytaj jark’awasunchej tukuy sajramanta mana urmananchejpaj; imaraykuchus Paylla tukuy atiyiniyoj supaymanta jark’anawanchejpajqa.

Atinki sonqoykimanta llojsimoj parlaykunawan chay imasta mañakuytaqa. Ichapis niwaj: “Dios Tatayku, librawaj tukuy sajra kajmanta. Qanqa rikushanki maynejpichus kashan supaypa trampasnin chaytapis reparachiway. Jinallataj Qanqa yachanki imayna wajcha sonqoyojchus kani chaytaqa, ajinapis kallpachaway. Mana khayayniykiwanqa chinkapuyman. Qan wajyakuwarqanki qanmanta mañakunaypaj Jesucristo Churiykej sutimpi,” nispa.

Jesucristowan kashanchej chayqa, chay kallpaqa jatun noqanchejpeqa; chayrayku Diosman chimpakunanchej tiyan, yanapata mask’aspaqa. Arí, “Sichus Dios noqanchejman kutisqa kashan chayqa, pitaj contranchejpi sayayta atinmanrí?” nispa nin. (Romanos 8:31).

Dios Tatayku, Qan noqawan kashanki chayqa, ni imamanta manchachikusajchu. Sapa p’unchay Qanwan parlarikusaj, Qantaj uyariwankipuni mañakususqaytaqa. Salvawajniy Jesuspa sutimpi. Amén.

Diciembre 15

“... Imaraykuchus qampatamin reino, atiy, jatunchasqa kay ima, wiñaypaj wiñayninkama. Ajina kachun.” (Mateo 6:13)

Diosqa uyariwanchejpuni mañakusqanchejtaqa, chaypi creenanchej tiyan.

Imaraykuchus, Diospuni niwanchej paymanta mañakunanchejtaqa, nillanwanchejtaj uyarinawanchejta: “Llakiy p’unchaypi wajyakuway; noqa librasqayki, qantaj jatunchawanki,” nispá nin. (Salmos 50:15).

Manachus Dios nisqanta Bibliapi qhelqasqata saqewasunman karqa chayqa, ni jayk’aj yachasunmanchu karqa Dios uyarinawanchejtaqa, jinallataj mana yachasunmanchu karqa mañakuyninchejpipis junt’asqatachus ninchej manachus chaytaqa. Chayrayku Diosqa munakuynimpi yachachiwanchej imaynata Paymanta mañakunata. Payqa munampuni noqanchejwan parlarikuytaqa.

Diosqa tukuy atiyniyoj kaspaqa uyariwanchejpuni munasqa wawasnintaqa, imaraykuchus Paypatamin: “Reino, Atiy, gloria, wiñaypa wiñaynintimpaj.”

Chay palabrasqa Diosta yupaychaspa jatunchananchejpaj kashan, noqanchejmanqa yupaychayninchejpi jamun tukuy sonqochaypis. Janaj pachapi kashaj Diosninchejqqa tukuy paywan kawsakujkunaj Reynin kashan, chayrayku Paytaqa tukuy sonqo yupaychananchejpuni tiyan. Paypajqa tukuy ima atikun, ima pejtupi kashajtinchejpis allinyachinampajqa.

Uyariwasqanchejtaqa yachanchej: “Imaraykuchus qampata Reino, atiy,” nispá nin. Jinallataj Payqa tukuy reykunaj Reynin, Janaj Pachapi kay pachapipis munayninta ruwaj Rey kashan. Señorninchej Jesucristoqa, kay pachapi tukuy atiyniyojkunamanta patapi atiyninga kashan; munasqa wawasninmanqa atillan munasqanman jina tukuy imatapis qoyta.

Yachanchej jina, Diosninchejqqa uyariwanchejpuni, chayrayku tukuy sonqo nisun: “Atiyniyoj” kanki nispáqa. Imaraykuchus Pay tukuy imasta ruwarqa, chayraykutaj atin munasqanman jina noqanchejman ima mañakusqanchejtapis qoytaqa. Noqanchejqqa yupaychaspa jatunchasumpuni: “Yupaychasqa, jatunchasqataj kachun wiñay Reyqa, pichus mana jayk’aj wañoj... wiñaypa wiñaynintimpaj. Ajina kachun,” nispá. (1 Timoteo 1:17).

Diosñyku, Qanqa tukuy imata atinki ruwayta. Yanapawayku Qanta jatunchasuyta tukuy kawsayniykupi. Chayta mañakuyku Jesuspa sutimpi. Amén.

“... Leyniyta yuyayninkuman churasaj, sonqosninkupitaj qhelqaykullasajtaj...” (Jeremías 31:33)

“Diospa kamachisqasnenga,” Paypa munaynin kashan, sonqonchejpitaj qhelqasqa kashan, sapa kuki yuyarichinawanchejpaj, Diosqa Santo kasqanta, ajinata munan noqanchejpis kawsananchejta. Sichus chay kamachisqasninta escalerata jina jap’isunman, noqanchej ruwasqallanchijwan Janaj Pachaman wichariyta munaspa chayqa, ni jayk’aj salvasqa kayta atisunchu. Chaypajqa Jesucristolla junt’asqata junt’arqa, chay ruwasqampi atienikuspalla salvaciontaqa tarinchej.

Cheqamanta juchanchejrayku phutiywan ayqorqanchej: ilmaynapichus Diosta astawan astawan munakuymañ!, nispa. Ajinapeqa, ichus noqallanchejmanta Leypa kamachisqasninta junt’ayta munaspa kallpakorqanchej, manataj aterqanchejchu junt’asqata junt’aytaqa. Ajinamanta, chay kamachisqa Leynejta yacharqanchej imachus Diospa munaynin kasqantaqa.

Apóstol Pablo nin: “Ajinaqa kayta reparani: Allin kajta ruwayta munajtiy, sajra kajlla noqapi kashan. Sonqoypeqa Diospa leynimpi kusikuni,” nispa. (Romanos 7:21-22). Ajina, Pablojta jina cristianoj kawsaynenqa kashan.

Chay chunka sipaskunamanta Jesuspa parlasqanpeqa nin, paykunamanta khuskan yuyayniyoj kasqanku, ujkunataj mana. Chaywampis tukuyninku puñurparisqankuta nin. Ajinata willawanchej Mateo 25:5-8.

Diosman gracias kachun, Jesuspa salvasqan kajkunaqa mana tukuychu puñusapalla kashanku. Ajinapis ichus pisi kallpas kashankuraj, Diosmanta mañapuna paykunapaj, imaraykuchus noqa yanapasaj nin, munakoj Diosninchejqa.

Mosoj kawsayniyoj mosoj songoyoj kajkunaqa, munanchejpuni imapipis Diospa munayninta ruwaytaqa.

Munasqa Señorniyku, tukuy ima qampa ruwasqayki, Qan noqawan kashanki chayqa, tukuy imayoy kani. Amén.

Diciembre 17

“Qanta yuyaychayki, noqamanta rantikunaykita ninapi ch’uwachasqa qorita, cheqamanta qhapaj kanaykipaj.” (Apocalipsis 3:18)

Jesupa salvasqanmanta ujnin “q’oñiyasqalla” kaj, reparakun mana allimpi kashasqanta chayqa, mana qhesachasqachu kanqa Diospa khuyaynimpeqa. Imajtinchus Señorninchej Jesucristo nishan: “Noqamanta rantikunaykita ninapi ch’uwachasqa qorita, cheqamanta qhapaj kanaykipaj,” nispa.

Chayrayku chay q’oñiyasqalla kajpis chiriyasqa kajpis, atinku Jesucristoman riyta perdonasqa kanankupajqa. Diospa jatun munakuyninwan ruphaman tukuspataj, atinku jap’iyta Diospa Qhasilla K’acha Yanapayninta, sonqochaytawan imaqa. Bibliapi nin kay jinata: “Chayrayku niyki: Kay warme ashkha juchasnin pampachasqa kanku, imaraykuchus anchata munakun; pisita perdonasqarí, pisillata munakun, nispa nerqa Jesusqa.” (Lucas 7:47).

Ama yuyaychu kay tukuy imata kallpallaykiwan ruwayta atisqaykitaqa. Ñawpajtaqa juchasniykimantaraj perdonasqa kanayki tiyan, Jesucristo qanrayku cruzpi wañusqampi creespa, ajinamantataj Pay qampi chay k’acha imastaqa ruwanqa.

Chayraku Señorninchejqqa chay q’oñiyasqalla kajkunata, chiri kajkunatapis mana ninchu, kayta jaqaytaraj ruwamuychej nispaqa. Payqa munan imachus wawasninta cheqamanta llimphuchaspa kusichisqanta, chayta munan, mosoj p’achasniyoj (mosoj kawsayniyoj) kanankuta. Allinta rikunankupajtaj ñawisninkuman sut’uchikuna jampita, ajinamanta Diospa munakuyninta rikunankupaj. Chayta nin: “Noqamanta rantiway ninapi ch’uwachasqa qorita,” nispaqa.

Ashkha qolqetachu chaymanta pagana kashan? ¡Mana, ni uj phatatapis paganachu kashan! Jesús nin: “Tukuy ch’akichikojkuna, jamuychej yakuta uyjaj. Mana qolqeyojkuna, jamullaychej, mikhunkichejtaj mana qolqellawan ...” nispa. (Isaías 55:1). “Ch’akichikojqa jamuchun, munajtaj, kawsay yakumanta qhasilla uyjachun,” nispa nin. (Apocalipsis 22:17).

Señorninchej Jesucristoqa, munan salvaciontaqa qhasilla jap’ikunanchejta, mana ni imata pagaspa, tukuy sonqo Paypi creespalla. Arí, ama qanqa yuyaychu imatapis ruwanaykiraj kashanqantaqa. Sichus ruwaytaraj munashanki chayqa, Señorninchej Jesucristoqa nisonqa: Qampaj noqaj ruwasqayqa pisichu? Nispa. Imatataj chayman kutichiwaj?

Señorniyku Jesús, kachamuwayku cheqan yachachejkunata cheqapi kawsakunaykupaj, munasqaykiman jinataj kawsanaykupaj. Amén.

“... Yuyaychayki ratikunaykita yuraj p’achata p’achallikunaykipaj ama q’alalla kasqaykej p’enqaynin rikukunampaj...” (Apocalipsis 3:18)

Diospa Qhasilla K’acha Yanapaynintaqa, Paypi creespa jap’ikoyqa qhasilla. Chaytaj kawsayninchejman apamuwanchej sonqochayta, chanta sinch’is kaytawan ima. Kaypeqa, Señor Jesús nishawanchej uj q’oñisqalla kajta, jinallataj chiriyasqa kajtapis, mosojman tukuchinanta.

Runaqa kay pachaj qallariynimpi juchaman urmasqanmantapacha, Diosmanta astawan astawan karunchakushan. Chayrayku Jesusqa sut’inchan, runapeqa mana imapis allenqa kasqanta, runataj ajina kashaspapis mana reparakunchu. Diostaj runata munakusqanrayku, Jesusucristo churinnejta Qhasilla K’acha Yanapayninta qoyta munan: Qorita, chay yuraraj p’achata, tukuy ima Paymanta jamuj wiñaypaj t’ukuna valorniyojta.

Diospa qhawaynimpeqa mana chaypaj jina juchasapas kanchej, astawampis millachikuspa siminmanta ajtumunawanchejpaj jina kanchej. Ajina kashajtincejpis Diosninchejqa munakuwanchej. Jesucristo pagapuwanchejrayku, chayrayku qhasilla jap’ikunchej: k’achito qorita, k’achito yuraj p’achata imaqa.

Chay Iglesiamanta kajkunari nisharqankuraj: “Qhapaj kani, tukuy imayoj,” nispa. Diosrí payta nin: “Mana reparakunkichu khuyana, mana imayoj, wajcha, ciego, q’alallataj kasqaykita,” nispa. (Apocalipsis 3:17). Dios rikun sonqonchejta rikun, yachantaj mana Paywanqa wajchas kasqanchejta.

Chay jina runapajqa, aswan allin kanman Señorpa yuyaychasqanta jap’ikunan, chay qoyta munasqampi creen, salvacionta jap’ikunampaj mana mashkhata pagaspalla.

Ajina ari, runaqa ancha mich’a, tukuy imatapis payllapaj munan, wiñaypajpis kay pachapi kawsanman jina. Chayta yachaspataj Jesusqa runata khuyan, munantaj qoyta Janaj pachamanta qhapaj wiñay kawsayta.

Dios Tatayku, ajina sonqoyoj kasqaykumanta ama ari castigawaykuchu, mana chaypaj jina kashajtiykupis perdonawayku. Allin ñanmantaj kutichiwayku. Jesuspa sutimpi. Amén.

Diciembre 19

“... Dios kachamorqa Churinta uj warmimanta nacekunampaj...” (Gálatas 4:4)

Uyariy kayta: Mana ninchu: “Nacen Diospa Churin,” nispaga. Manachayqa, nin: “Dios kachamun Churinta uj warmimanta nacekunampaj,” nispaga. Chay wawitaqa uywaspa puñunan wasipi nacekorqa, uywas mikhunanku patapitaj sirichirqanku. Ajinapis Payqa wiñaymantapacha Diospa Churinpuni karqa.

Wiñaymantapacha, manaraj kay pacha ruwasqa kashajtin, Payqa “Dios Tatapi kasharqa, Dios Tatataj Paypi kasharqa, kasharqanku Espíritu Santowan ima”. Imaynatachus san Juan nin: “Qallariypeqa Palabraqa karqapuni. Chay Palabraqa Dioswan kasharqa. Palabrataj Diospuni karqa. Paymin qallariypeqa Dioswan karqa. Tukuy imasqa Paynejta ruwasqa karqa, ruwasqa kajmantataj mana Paywanqa mana imapis ruwasqachu karqa. Kawsayqa Paypi kasharqa, chay kawsaytaj runaspaj k’anchay karqa. K’anchayri laqhapi lliphipin, laqhataj k’anchayta mana atiparqachu.” Nispa. (Juan 1:1-5).

Ajina kajtenqa, Diospa Churenqa karqapuni. Dios Tatataj munakuynimpi salvacionta noqanchejpaj wakichisqanman jina kay pachaman jamorqa: “Diosqa chay jinatapuni kay pachapi kaj chhikata munakusqanrayku uj k’ata Chrinta qorqa. Pillapis paypi creejqa mana chinkayman rinampaj, astawanqa wiñay kawsaniyoj kanampaj,” nispaga nin. (Juan 3:16).

iKaymá k’acha willayqa! Diospa munakuynin noqanchejman chayamusqan, Dios Tata kay pachaman Churinta kachamusqa noqanchej Paynejta kawsananchejpaj. Leypa kamachisqanman jinaqa mana ni pipis aterqachu salvasqa kaytaqa. Cristopi kaspalla salvasqa kayta atinchej, imaraykuchus Pay runaman tukuspa cuentanchejpi wañusqanrayku.

Chayta ama qonqaychu, sapa kuti yuyarikuspa uj Wawita Belén llajtapi nacekusqanta, yuyariy Salvadorniyki qanrayku kay pachaman jamusqanta.

Janaj Pachapi kashaj Diosniyku, gracias Qanmanta yachachejkunata kachamuwasqaykumanta, ajinamanta astawan rejsisunaykupaj. Jatunchayku sutiykita. Jesucristoj sutiimpi. Amén.

“... Dios kachamorqa Churinta uj warmimanta nacekunampaj...” (Gálatas 4:4)

Diospa wiñaymantapacha Chureqa, kay pachaman jamuspaqa cheqamanta runapuni karqa, tukuy imapis noqanchejman rijch’akoj karqa, chaywampis mana juchayoj. Pay k’atalla ajina mana juchayoj, “warmimanta nacekojkuna” ukhupeqa karqa.

Warmimanta nacekusqanrayku cheqamanta runapuni kasqanqa sut’i kashan. Chayraykutaj Dios Tataj wiñay Churenqa runaswan khuska tiyakorqa, runa kasqanrayku; “tukuy imapi hermanosninman rijch’akoj” karqa. Chaywampis mana juchayoj.

Kayqa, mana entiendey atina noqanchejpajqa. Chayrayku ahschas tapukunku: Diospa wiñay Churenqa hermanonchejpunichu kanman? nispa. Chayqa t’ukuna, Dios Tataj Churenqa qaylla ayllunchejchu kanman? Arí, ajinapuni kashan. Chaytaj sinch’ita sayanankupaj kashan, wakimpajtaj mana creta atinankupajjinapuni kashan.

Mana creena jina Dios noqanchejta chay jinatapuni munakuwasqanchejqa, noqanchejrayku uj k’ata Churin wañusqanqa manchay jatumpuni kashan. Chayqa ajinapuni, chaytaj noqanchijmanqa kusiya apamuwanchej.

Ninchej jina, Diospa uj k’ata Churin hermanonchej kananqa, wakimpaj mana Paypi creeya munajkunapajqa misk’ana rumi jina kashan. Chay k’acha willayqa mana pakasqa kayta atinchu, chaytaj may jina unayñapuni yachachisqa karqa; chay cheqa willaytaqa mana qhesachayta atisunmanchu.

Waranqa waranqas creenku Jesusqa Diospa uj k’ata Churin kasqanta, jinallataj Profetas kajkuna unaymantapacha willarqankuña Mesias Salvador kay pachaman jamunanmantaqa, kikin Dios noqanchijman jamunanta. Chay p’unchay junt’akorqa Belén llajtapi, uywas puñunan wasi ukhupi nacekurqa, uywaspa mikhunanku patapitaj siriykucherqanku, chaytataj ashkha runas rikurqanku.

Chay jina munakuyniyoj Diostaqa, atiwajchu qhesachayta? Jatun wasi ruwasqapi, esquina rumi jina churasqa kashan; chaytaqa ashkhas qhesachanku. Noqarí qhesachallaymantajchu? ¡Mana qhesachasajchu! Payqa, kay pachaman jamusqanmantapacha qhesachasqa karqa, ajinapis Payqa ni pita qhesachanchu.

Ashkhaspis qhesachachunku, noqaqa manapuni qhesachasajchu. Imaraykuchus Paylla yachan llakiyniyniya, pisichikuyniyapis. Imaraykuchus runa jinaqa llakikorqa, waqarqa ima.

Munasqa Dios Tatayku, Iglesiaykipeqa ama saqeychu waj yachachiyta contraykipi yachachejkunata. Qan orqhoy chaykunata. Jesucristoj sutimpi. Amén.

Diciembre 21

“... Dios kachamorqa Churinta uj warmimanta nacekunampaj, Leyta kasuspataj kawsanampaj. Jinaspataj Leypa kamachimpi kajkunata preciowan kacharicherqa tukuyninchej Paypa wawasnin jina rejsisqa kananchejpaj.” (Gálatas 4:4-5)

Diosqa, munarqa Leypa kamachinta mana junt'ayta atisqanchejmanta salvasqa kananchejta. Mana junt'ayta atisqanchejraykutaj juchanchejqa infiernoman cheqanta apashawarqanchej. Jesucristorí junt'arqa tukuyninta leypa kamachisqantaqa, mana p'akispa ni uj chhikallantapis. Leypa Señornin kashaspapis, runaman tukuspa tukuyninta junt'arqa cuentanchejmanta.

Adanwan Evawanqa chinkacherqanku, chay llimphu mana juchayoj kayninkutaqa, Diospa kamachisqanta mana kasusqankurayku; ajinamantataj sajra sonqoyoiman tukorqanku. Noqanchejtaj paykunaj miraynin kaspaga, juchayoj kanchej nacesqanchejmantapacha. Chayrayku noqanchejqa, may jina kallpakuspapis mana atisunmanchu karqa Leypa kamachisqanta tukuyninta junt'aytaqa. Ajinamanta Diosmantaqa astawan astawan karunchakorqanchej, munayninchejta ruwaspa, noqallanchejpaj imatapis munaspa.

Bibliaj nisqanman jinaqa, tukuy runakuna juchaj atipasqan kanchej: “Ni ujpis mana juchayojqa kanchu. Entiendeqa mana ujpis kanchu; Diosta mask'ajpis manallataj kanchu. Tukuyninku cheqan ñanmanta pantaykunku, jinataj mana kajman tukunku. Mana pipis allin kajta ruwajqa kanchu, ni ujllapis,” nispa nin. (Romanos 3:10-12). Arí, ajinapuni runaqa nacesqanmantapacha juchasapa. “Leyta mana kasojkuna, nipunitaj atinkuchu.”

Diostaj, cheqan mana pantay Paypi kasqanraykuqa, mana aterqachu chaykunata qonqayman churaytaqa. Chayraykutaj, tukuyninchej Diospa maldicionnimpi urmasqa rikhurerqanchej, ajinamanta aycha cuerponchejqa uj tiempota wañusqa jina kanampaj, chanta qhepampitaj wiñaypa wañuymanta wiñaypaj kawsarimunampaj, chay wañuytaj wiñaypaj wijch'usqa kanapaj.

Diostaj khuyakoj kaspaga, uj k'ata munasqa Churinta kachamorqa jatun preciowan juchamanta salvanawanchejpaj, wañuymanta, chanta supaypa makinmanta kacharichinawanchejpaj ima.

Munakoj Dios, waqaychay pisi creeniyoj kaj hermanosniykuta. Chayta mañakuyku, Jesucristoj sutimpi. Amén

“... Chayamunan p’unchay junt’akojtin, Dios kachamorqa Churinta uj warmimanta nacekunampaj, Leyta kaspataj kawsanampaj.” (Gálatas 4:4)

“Chayamunan p’unchay junt’akojtintaj.” Chay nisqanqa, niyta munan: Diosqa wakichisqaña uj k’ata munasqa wawanta kachamunanta; señalasqan p’unchay chayamojtintaj junt’akorqa uj k’ata Churimpa kay pachaman chayamuynenqa. Ajinata chay Allin Willayqa, ñawpajtaqa willasqa karqa angelkunanejta, jamorqanku Belén llajtitaman kay jinata nispa: “Willasqaykichej tukuy runaspaj may kusiyniyoj willanasta. Kunan qankunapaj nacekun Davidpa llajtampi uj Salvaj. Chayqa Cristo Señor,” nispa. (Lucas 2:10-11).

“Chay Palabraqa aychallikorqa,” nin. (Juan 1:14). Chayqa niyta munan, noqanchej jina runaman tukorqa, nispa. Ari, ajina, Adanwan Evawan juchachakorqanku, Diostaj paykunaman nerqa uj Salvajta kachamunanta kay pachaman juchamanta salvanampaj. Chaytaj junt’akorqa Belén llajtapi, chay wawita nacekushajtin. Diospis niillarqataj: Tukuy nacionesmanta runakuna bendecisqa kanankuta. Arí, chay wawitapi kasharqa salvación. Diospa qowasqanchej Churi sutinqa karqa: “Mayta T’ukuna Yuyaychaj, Atiyniyoj Dios, Wiñaypaj Tata, Allin Kawsayta Apamoj Rey ima,” nispa. (Isaías 9:6).

Ñawpa Testamentopi tukuy yachanankupaj qhelqasqaña karqa, Diospa yuyaychasqan Profetas qhelqarqanku Salvador nacekunamanta, chanta imatachus ruwananmantapis, Paymantaqa willasqaña karqa, tukuy Paypi creespa suyakunankupaj.

iDiosman gracias kachun, chay jina jatun imasta qowasqanchejmanta!

Dios Tatayku, yanapawayku wañuyta atipayta Salvawajniykupi creesqaykuwan, imaraykuchus Pay atipanña. Chayta mañakuyku Jesucristoj sutimpi. Amén.

Diciembre 23

“... Gloria kachun Diosman Janaj Pachapi...” (Lucas 2:14)

Sichus reparakunki juchawan ch'ipasqa kashasqaykita, reparakunkitaj qanllamanta mana kallpayoj kasqaykita chayqa. Ajinapi tarikuspaqa, qhawariy Jesucristo qanrayku ruwasqanta, jinallataj Pay munakususqanta ima.

Sichus kallpakushanki qanllamanta sajra kawsayniykita allinyachiyta munaspa, sitajchus Diosman qayllakuyta munaspa ruwasqallaykiwan Payman chimpakuyta munashanki chayqa, pantasqa ñanta thaskishanki. Chaypajqa Jesucristoj ruwasqallan sonqo tiyaykuyta qosunqa, Payqa suyashasunki, Paylla kallpayki allin kawsayniyki imaqa.

Evangeliota uyarejtiyki, chay fe nisqaqa sonqoykiman yaykun. Chaymantaraj recien yachanki Dioswan kawsakuyqa imayna kusikuychus kasqantaqa. Chantá profeta Isaías jina ninki: “Qanqa kay nacionesmanta runasta miraykuchinki, kusiyywantaj junt'achinki. Ñawpaqeykipi tukuy kusikonqanku, cosechapi runas kusikunku ajinata; maytapuni kusikonqanku, imaynatachus wañuchinaku maqanakupi qhechusqanku qhapaj imasta rak'inakuspa runas kusikunku ajinata. Qanqa paykunata phaskaranki yugonkumanta... Chayta Qanqa ruwanki, imaynatachus Madianta urmacherqanki, ajinata,” nispa. (Isaías 9:3-4).

Sichus pipis creen chay Wawita Diospa Churin kasqanta chayqa, cheqamanta Diospa wawan, imaraykuchus cheqa chaj Fe paypi kashan, kay Navidadpitaj atin raymichayta, jatun kusikuywan.

Kay pachapi Diospa wawasin kajkunataqa, mana pantayniyojtaqa manapuni tarisunmanchu. Diospa churin Jesuslla nacekorqa mana juchayojqa; Chayrayku, Jesucristolla sonqonchejman yaykuspaqa k'achakawsayta qowanchej. Ujniypeqa, Paysonqonchejpinacekujtenqa, chay wawas kusikunku Navidadpi, ajinata watantinta kusikunchej, chay kusiyninchejqa Diospa Churin noqanchejpi kajtillan junt'asqa kanqa. ¡Chaymá k'achaqa!

Munasqa Diosniyku, gracias uj k'ata Churiykita kachamusqaykimanta, noqaykuta salvanawaykupaj. Jesuspa sutimpi. Amén.

“... Gloria kachun Diosman Janaj Pachapi, kay pachapitaj sonqo tiyaykuy kachun Diospa munakuynimpi kajkunapaj, nispa.” (Lucas 2:14)

Angelkunaqa Señorta yupaycharqanku, Jesúsqa nacekusqanta willaytawankama, kay jinata nerqanku: “Kunan qankunapaj nacekun Davidpa llajtampi uj Salvaj. Chayqa Cristo Señor,” nispa. (Lucas 2:11).

Mana qonqanapaj, Lucaspa qhelqasqanta ñawirisunchej: “Jinallaman rikhurimorqanku angelpa qayllanman ashkha ángeles Diosta yupaychaspa. Paykunaqa, nerqanku: Gloria kachun Diosman Janaj Pachapi, kay pachapitaj sonqo tiyaykuy kachun Diospa munakuynimpi kajkunapaj, nispa.” (Lucas 2:13-14).

Wiñaypaj Dios kashaspa Señorninchej Jesucristoqa runaman tukusqan, jinallataj runaspa makinman churakusqanqa, may jina jatun willay karqa. Chaytachus kunan allinta entiendenki Diospa Churin nacekusqanta, noqanchejrayku jamusqanta chayqa, jatunmanta kusikuspa yupaychay.

Janaj pachamanta angelkunapuni, Jesuspa nacemientonmantaqa willarqanku: “Gloria kachun Diosman Janaj Pachapi, kay pachapitaj sonqo tiyaykuy kachun Diospa munakuynimpi kajkunapaj,” nispa. Ajinallataj noqanchejpis kay pacha runakunaman kusiyan kay k’acha willaytaqa willaramuna kachun.

May chhika runakunaraj kay pachapeqa, mana uyarinkuchu kay allin willaytaqa, imayna valorniyojchus Jasuspa nacekuynin kasqantaqa. Noqanchej uchhikanta entiendesqachejwan mayta kusikunchej, mana imapis kay pachantimpi kanchu ajina kusiyya.

Kay p’unchaykunapeqa, tukuynejpi Jesuspa nacekusqanta kusiqqas raymichanku, Salvajpi mana creejkunapis kusikuywan raymichanku, ichus paykunaqa waj imaspi yuyayninkuta churaspapis kusinkunku Jesuspa nacekusqanmantaqa.

Cristopi creejkunarí junt’asqata jatun kusikuywan Navidad p’unchaypeqa raymichanchej. Angelkunawan khuska yupaychanchej, yuyarispa Salvawajninchej kay pachaman jamusqanmanta noqanchejta salvanawanchejpaj.

Munasqa Diosniyku, yuyariyku munasqa Churiyki kay pachaman jamusqanta. Gracias Señor munakuwasqaykimanta. Jesucristoj sutimpi. Amén.

Diciembre 25

“... Qharej mana chayasqan sipas wijsallikonqa, nacechikuspataj, wawanta Emanuelta sutichanqa.” (Isaías 7:14)

“Emanuel” suteqa, niyta munan: “Diosqa noqanchejwan,” nispa.

Dios kashaspa Jesusqa, runaman tukorqa noqanchejta salvanawanchejpaj. Uyarishankichu, kikin Dios runaman tukusqa. Payqa hermanonchej, chayrayku Diosqa qayllanchejpi kashan sajra kajmanta waqaychanawanchejpaj. iT’ukunapaj chayqa! iK’achitu suti: Emanuel suti, chaytaj niyta munan: “Diosqa noqanchejwan kasqan!”

Imaynataj kanman chaymanta aswan sumaj, Dios noqanchejta watukunawasqanchej? Diosqa Rey, Jatun kaj Rey, jinallataj Payqa uj q’olaj nina jina atiyuniyoj. Paypa Santo kaynenqa manchay jatun, noqanchej juchasapa runa jinaqa qayllampi mana kayta atinapaj jina. Kunanqa Janaj Pachapi kamachina tiyanampi Jesusqa tiyasqa kashan; Pay chay Belén llajtapi nacekojqqa, chay jatun TronOMPI kashan.

Diospa Churenqa runa kaynimpi llamp’u sonqo kasukojtaj karqa, kamachi jinataj kawsarqa; ajinamanta imaynachus manaraj jucha kay pachapi kashajtin, Diosman rijch’akoj kayninchejta atin noqanchejman kutichipuyta. Jucha kasqanrayku wiñaypaj wañuymán juchachasqa karqanchej, Jesucristo kawsayninwan wiñay kawsayta tarin noqanchijpajqa.

Jesucristoj jamuyninwan, ima jatun imastataj qowanchej noqanchej juchasapasman? iDiospa Churenqa, noqanchej runa jina kayta jap’ispa, noqanchej cuentanchijmanta junt’arqa, mana junt’ayta atisqanchejta. Kunantaj, Tukuy atiyuniyoj Dios Tataj pañampi tiyasqa kashan, Payqa tukuy atiyuniyoj Janaj Pachapi, jinallataj kay pachapipis.

Ajina kasqantachus entiendesunchej creenchejtaj chayqa, kay pacha kusiynamantaqa mana dakuwanchejñachu, imaraykuchus kunanqa aswan jatun kusiyma Dios uj k’ata Churimpi qowanchej, kunanqa Janaj Pachapi may jina jatun kusiyma noqanchejpi yuyaspa kawsakunchej.

Chayraykutaj kunanqa, angelkunawan khuska simi junt’ata nisunchej: “iDiosman gloria kachun Janaj Pachapi, kay pachapipis!” nispa.

Munasqa Diosniyku. Ujllata mañakusqayki: Kawsayniy Qanwampuni kachun, amapuni kachariwaychu. Salvawajniy Jesucristoj sutimpi. Amén.

“Noqaman jamuychej...” (Mateo 11:28)

“Noqaman jamuychej,” nin Señorninchej Jesucristoqa. Ajinata nispapa, tukuyta wajyarikun, pikunachus phutiypi sayk’usqas kashanku, mana kallpayoj, juchajjarap’asqan kajkunata.

Wajyashan, pikunachus chinkayman apaj jucha q’epej sayk’uchisqan kajkunata; pikunachus aswan allimpi kawsakuyta munajkunata, manataj ni imaynamanta chay jina kawsakuyta tariyta atejkunata; tukuy paykunata Cristoqa wajyarikushan: “Noqaman jamuychej, tukuy sayk’usqa kajkuna, llaqa q’episniyojkuna ima, noqataj samarichisqaykichej,” nispapa. (Mateo 11:28).

Chayta nispapa, Señorninchejqan nishawanchej: “Noqapi atienekuspa, hermanoykichejman jina chimpaykamuychej, imaraykuchus qankunata salvajjamuni”. Chayta niyta munan: “Jamuychej noqaman,” nispapa.

Jatun munakuyniyoj Salvadorninchej Jesucristoqa nishawanchej: Ama manchachikuychejchu noqaman jamuyta, juchasapa kasqaykichejpi yuyaspapa. Chaytaqa yachaniña manaraj mañashawajtiykichej; sonqo tiyaykuyta qosqaykichej mana perdonanapaj jina kashajtiykichejpis perdonasqaykichej qankunata munakusqayrayku, chayrayku kay pachaman jamorqani, nispapa.

Ichus nishallantaj, Señorninchej Jesucristoqa: Salvasqa kayta, wiñay kawsaytawan qosqaymantapaq mana ni imawan pagawankichejchu, pagasqaña. Apostol Pablopis, kay jinata nin: “Diospa Qhasilla K’acha Yanapayninrayku ajllasqa kanku chayqa, manaña ruwasqasninkuraykuchu. Manachus jina kanman chayqa, Diospa qhasilla k’acha yanapaynenqa manaña qhasillachu kanman,” nispapa. (Romanos 11:6).

Dios Tatayku, wajyawarqanki Palabraykinejta, perdonawarqankitaj uj k’ata Churiykinejta. Yapawayku astawan Qampi atienikuyta; astawanqa chay rumi sonqonkuta llap’uyachiy. Jesucristoj sutimpi. Amén.

Diciembre 27

“Diosqa uj k’ata Churinta mana mich’akuspa qorqa, tukuyninchejrayku wañunampaj. Ajina chayqa, imaraykutaj mana qowasunmanchu Churinwan khuskata tukuy imatawan?” (Romanos 8:32)

“Mana mich’akuspa,” nin. Chayta nispaqa nishawanchej, Diosqa chay jina munakuynimpi, noqanchejman uj k’ata Churinta qowasqanchejta, chay jina juchasapa kashajtinchejpis munakuwasqanchejrayku, uj k’ata Churinta qowanchej cuentanchejpi wañunampaj. Diosmanta wiñaypaj t’aqasqa kananchej kashajtin salvawanchej.

Tapukunachej: Runari ima allimpunitaj kasqari, chay jina juchayoj kashajtin? Kikin Dios uj k’ata Churinta cuentampi wañuyman jaywanampaj? nispa.

Ichus ashkhas yuyanku, Diosqa pikunachus k’achas kanku chaykunallawan allimpi kan, nispa. Ajinata tukuy yuyananchej Dioswan mana allimpi kasqanchejrayku phutikuywan atipachikunchej. Adampis, chay jina munasqa kashaspa tukuy imata Dios qoshajtimpis, Tatan Diospa kamachisqanta mana kasuspa millay runaman tukurqa. Ajinapis, Diosqa, munakuynimpi willarqa Evageliota. Apóstol Pablopis kay jinata ninwanchej: “Juchasapallaraj kashajtinchej, Cristo wañorqa noqanchejrayku,” nispa. (Romanos 5:8).

Mana pipis wawanta jaywanmanchu wajpa cuentampi wañuchisqa kanampajqa. Diosrí maykamachus munakuwasqanchejta rikuchiwanchej, uj k’ata munasqa Churinta noqanchejrayku wañuyman jaywaspaqa. Chay allin willayqa, nin: “Diosqa chay jinatapuni kay pachapi kaj chhikata munakusqanrayku, uj k’ata Churinta qorqa. Ajinamanta pillapis paypi creejqa mana chinkayman renqachu, astawanqa wiñay kawsayniyoj kanqa,” nispa. (Juan 3:16).

Noqa runa jinaqa, sajra sonqo kani. Noqa ajina kani chayqa, tukuy runakunapis ajinallataj kanku. Ajina juchasapa kashajtinchejpis Diosqa munakuyninta rikuchiwanchej, Munasqa Churinta noqanchejrayku qospa.

Diosqa nin, chay jinatapuni munakuwasqanchejta, chayta nispaqa nishawanchej munakuwasqanchejqa manchay jatumpuni kasqanta. Chayrayku Payman rispa mañakuna perdonanawanchejta, Payqa perdonawasun. Chay jina mana uyarikoj, mana kasukoj kashajtinchejpis wajyakuwanchej Payman rinapaj.

Munasqa Salvawajniyku, kunanqa sut’ita rikuni munakuwasqaykitaqa. Kunankama pisita munakorqayki chaypis, kunamantaqa astawan munakusuyta yanapaway. Jesucristoj sutimpi. Amén.

“... Chay chayamunan p’unchay junt’akojtin, Dios kachamorqa Churinta uj warmimanta nacekunampaj, Leyta kaspataj kawsanampaj. Jinaspataj Leypa kamachimpi kajkunata preciowan kacharicherqa tukuyninchej Paypa wawasnin jina rejsisqa kananchejpaj.” (Gálatas 4:4-5)

Diospa qosqan Leymanta kacharichisqa kananchejpajqa, Diosllataj wakicherqa Churinta kay pachaman kachamuspa. Leypa kamachisqanta tukuy ninta junt’aspa kacharichinawanchejpaj. Diospa wakichisqanman jina chay tiempo chayamojtin junt’akorqa. Apostol Pablo nin jina: “Leyqa Cristopi junt’akun, paypi tukuy creejkuna Diospa ñawisnimpi cheqan runaspaj qhawasqa kanankupaj,” nispa. (Romanos 10:4).

Kay qallariypi ñawirishaspa, Apóstol Pabloqa Galacia llajtapi kaj iglesiaman nisharqa yuyarikunankuta Tukuy nin Ñawpa Testamentopi Salvaj Jesucristomanta Profetas nisqankuta. Adáwan Evawan juchaman urmajtinkama kikin Dios nerqaña: “(Warmej) miraynin umaykita saruspa, p’altarparenqa...” nispa. (Génesis 3:15). (Supay atipasqa kananta nerqa), chaymantapacha may chhika profetasnejta Diosqa parlarqa Churin Jesusmantaqa. May chhika corderitos jucharayku wañuchisqas karqanku, chaytaj Diospa Corderon Jesus jamunanta señalasharqa.

Chayrayku Bibliapi nishan chay uywaspa wañuynenqa runasta mana junt’asqata juchasnintaqa llimphuchayta aterqachu, salvaytapis manapuni atinmanchu karqa. Kay jinata nin: “Mana uywa wañuchisqata, nitaj jaywanasta munarqankichu. Manachayrí noqapaj aycha cuerpota wakichipuarqanki... Chantá nerqani: Kaypi kashani imaynachus noqamanta qhelqasqa kashan libropi: DiosnÍy munayniykita ruwaj jamuni, nispa.” (Hebreos 10:5,7).

Chaypi tarikun sumaj sayachisqa kayninchej salvacionninchejmantaqa, Dioswan allinyachisqa kayninchejpi. Dios yupaychasqa kachun.

Munasqa Salvador Jesús, tukuy kawsayniypi imaymanasta ruwani, wakinta allinta wakintari mana allinkunasta. Chaywampis sonqoy tiyaykusqa kashan, imaraykuchus Qan llimphuchawankiña qhapaj yawarniykita jich’aspa. Amén.

Diciembre 29

“... Dios Tata cheqamanta Cristonejta kay pacha runasta Pay kikinwan allinyacherqa...” (2 Corintios 5:19)

Sichus runakunamanta Dios juchasninkumanta cuentata mañayta munanman chayqa, pitaj sayasqa kayta atininman Diospa ñawpaqempi?

Chayrayku Evangelioqa nin, Diosninchej k'ata Churinta jaywarqa runakunaj juchankurayku wañuchisqa kanampaj, nispá. Ama yuyaychu chayqa llulla kasqanta. Chayqa ajinapuni kashan.

Wakin kutisqa juchanchej sinch'ita ñak'arichiwanchej, llasta q'epita jina reparakunchej. Chayrayku Diosqa niwanchej, tukuy chay juchasniykimanta perdonaykiña, nispá. Chayta uyarispa anchatataj kusiywan sonqochakunchej. Diospa Qhasilla K'acha Yanayninqa aswan jatun, juchasniymanta nisqaqa. Diosqa mana llullakunchu chayqa ajinapuni kashan.

Diosqa pay kikintawan allinyachiwanña, Jesucristo noqarayku wañusqanrayku. Chaywampis mana chayllachu, Diosqa qollawantaj chay Sacramentos nisqata salvasqa kasqayta rikuchispa, chaytaj uj sello jina kashan. Noqaqa bautisasqa kaspáqa Cristoj ruwasqampi Paywan khuskachasqa kani, imaynatachus Gálatas 3:27 nin jina; jinallataj Tito 3:5 nin jina. Bautisasqa kasqayraykutaj Diosqa wawapaj rejsikapuwan.

“Imatachus Dios qon, chayqa mana mañakapullantajchu; wajyan chaypis, mana iskaychakunchu,” nin. (Romanos 11:29).

Uj runa barcomanta jatun mama qochaman urmaykun chayqa, barcoqa mana p'ultikullanqatajchu. Bautismo tratopi Diospa Qhasilla K'acha Yanaynenqa mana chinkapoqanchu, noqa imapi juchallini chaypis; kallanqapuni perdón wiñaypa wiñaynintimpaj. Salavasqa kasqayqa mana noqamantachu jamun, manachayqa Dioslla Salvacionta qowanchej. Bautisasqa kasqaypis noqamantaqa, manallataj chinkaponqachu.

Noqaqa, wañusajpis kawsasajpis, kay sonqo tiyaykusqa kayneyqa, Diospa Qhasilla K'acha Yanapaynimpi sinch'i sayasqa Cristopi kashan.

Munasqa Dios Tatayku, rijch'arisqata makiykipi jap'iwayku Salvawajniyku kutimojtin wakichisqa suyanaykupaj. Jesucristoj sutimpi. Amén.

“... Munasqa hermanosnáy, sinch’ita sayaychej, mana sayk’uspa, wiñaspapuni Señorpa ruwaynimpi... Yachankichej Señorpa sutimpi ruwasqaykichejqa mana qhasipajchu kasqanta.” (1 Corintios 15:58)

Wajyasqa kanchej creeyninchejpi “sinch’ita sayanapaj.” Diospa Qhasilla K’acha yanapaynimpi atienikuspa, cheqa kajpipis sinch’is kaspá ...

Wiñay kawsay pilloqa suyashawanchej, pichus tinkupi Jesucristoj kallpanwan maychus maqanakunata jina maqanakojpaj. Sichus cristianosman rijch’akojlla kanki, Dioswantaj mana allimpichu kashanki chayqa, allinta qhawarikuy imachus kapususqanta, ama waj chay pilluykita jap’ikapunampaj.

Supayqa wañuchinawanchejpa qhatiykachashawanchej: “Enemigoykichej kuraj supayqa, phiña león jina qhaparirispá muyuykachashasunkichej, mayqellantapis oqoykunapaj,” nispá nin. (1 Pedro 5:8). Jinallataj nin: “Satanaspis yachan k’anchaj angelman tukuriyta,” nispá. (2 Corintios 11:14), may chhikasta ch’awkiyaspa; “Espiritoj atiyinwan qallarishaspa, kunanqa aychay kallpakusqanman jinachu tukuychayta muankichej?”, nispá nin, Apóstol Pabloqa. (Gálatas 3:3).

Wakin kanku supaypaj urmachisqan. Ñawpajpi iglesiapi líderes kamachejkuna karqanku, yachachejkuna ima karqanku; chayta saqerparispataj kay pacha imaspi yuyaspa allin kayninkuta saqerparispa karuchakunku; chayqa ancha llakiy. Jesuspi creesqanku chay Fe lluphasqa rikurin, khishkas chawpiman muju tarpusqa jina.

Wakinkunataj, Cristollawampuni kasaj nerqanku, iglesiankumanta ni jayk’aj t’aqakusajchu nispá. Chaywampis paykunaqa sajra wayraswan apachikunku, llulla yachachiykunaj qhepanta ripunku

Ajinata karunchakuspaqa, manaraj Jesuspi creeshaspa imaynachus karqanku chaymantapis aswan mana allinman tukunku. Ajina kajtingqa: “aswan allin kanman karqa cheqan ñanta mana rejsinankoqa.” (2 Pedro 2:20-21).

Chayrayku, qanqa Diosmanta mañakuy khuyakuyninta, Salvasojniyki Jesuspi creesqayki ama chiriyampaj. Apostolpa nisqantataj jap’ikuy sonqoykipi: “Sinchita sayaychej mana sayk’uspa, wiñaspapuni Señorpa ruwaynimpi, imaraykuchus yachankichej Señorpa sutimpi ruwasqaykichejqa mana qhasipajchu kasqanta” nispá. (1 Corintios 15:58).

Señor Jesús, kay pacha kawsayqa tukukonqa, wawasniykitaj gloriaykipi kasqayku. Jamullayña Señor noqaykuman. Amén.

Diciembre 31

“... Uj k’ata Dioslla tukuy imata ruwan tukuypi.” (1 Corintios 12:6)

Pipis kusiyan sonqochakun Cristopi kaspaqa, jinallataj Paypa obrampi llank’aspapis, aswan jatun kusiyan junt’an. Kallpankupis mana pisiyanqachu, sonqo tiyaykuytaj kanqa.

Uj runa may llakisqa unayta tiyakorqa juchachakusqanta mana qonqayta atispa. Diosta mana munakusqanmantapis llakikuspa mucha manchalla kawsakoj. Pisi kallpa kaspataj yuyayninqa, chay juchaman urmasqanmanta mana atipayta atispa llakisqa kasharqa.

Uj tuta mosqokusqa kawsaqesninwan, paykuna imatachari takishasqanku. Sapa uj libro jap’irisqa uj palabrallata takishasqanku kutin kutinta. “Tukusqaña”, “Tukusqaña,” nispa. Qhepan takiyman kicharipa takishallasqankupuni: “Tukusqaña”, “Tukusqaña,” nispa. Qhepan takiyman kicharispapis kikillantaj: “iTukusqaña! iTukusqaña! iTukusqaña!,” nispa.

Jinallapi, ujllata rijch’arisqa, Diospa Simi Nisqan: “iTukusqaña!” nisqampi yuyaspa, sonqompitaj chay nisqasqa qhepakusqa. Diospa Espirituntaj imatachus niyta munasqanta sut’ita entiendechisqa; ajinamantataj Señormanta perdonta mañakusqa, chaypacharaj paymanqa kusikuy chayamusqa.

Chayrayku noqanchejpajqa kusiyan kashan, imatachus noqanchej ruwananchej karqa chayta Cristo ruwaspa tukuyninta junt’an. Juchanchejmanta pagananchej kashajtin, chaytapis pagasqaña cruzpi wañusqanwan. Cheqamanta, “tukuy ima tukusqa” salvasqa kananchejpajqa.

Diospa phiñakuyninmanta manchachikunallapunichu kanman? Jesucristoman chimpakunchej chayqa manaña, imaraykuchus manunchej pagasqaña. ¡Cristo paganña tukuyninta! Arí, “tukusqaña.”

Tukuynin Diosman chimpakojkunataqa, Cristo llimphuchanña. “Leyqa Cristopi junt’akun, Paypi tukuy creejkuna Diospa ñawisnimpi cheqan runapaj qhawasqa kanankupaj,” nin. (Romanos 10:4).

Dios Tatayku, makiykiman churani kawsayniyta. Graciasta qoyki kay pasay watapi yanapawasqaykimanta... Jamoj watapipis Qampi atienikuspa kawsakuyta yanapaway. Jesucristoj sutimpi. Amén.

